
ШУҲРАТ

ТАНЛАНГАН АСАРЛАР

Уч жилдлик ● Иккинчи жилд

Р о м а н

X и к о я л а р

Тошкент — 1980
Faafur Fулом номидаги
Адабиёт ва санъат нашриёти ·

ББК 84Уз
[1] 97

W $\frac{70303-156}{M352(04)-80}$ 175-79-4702057020

ОЛТИН ЗАНГЛАМАС

Роман



*Меҳрибон онам,
севикли жуалимим,
қадрдан дўстим,
азиз фарзандларимга
багишлайман.*

Автор

1. АТЛАС ҚҮЙЛАҚЛИ ҚИЗ

Қодир умри бино бўлиб бунаقا келишган қизни кўрмаган эди!

У боғда, майса устида, кўйлагини чиқариб, ботинкасини ечиб, майкада дарс тайёrlаб ўтиради. Ҳаво дим. Қилт этган шамол йўқ. Дараҳтларнинг барглари қўргошиндан қўйилгандек вазмин солланиб туради. Фақат анҳор четидаги ўсиқ гиёҳларни сув эпкини ўз ҳолига қўймай тортқилайди, «юр биз билан!» дегандек букиб кетади.

Қодир на ҳавонинг димини, на вақтнинг ўтганини биларди. У билан ўчакишгандек бир жуфт мусича парр этиб қаёқдандир олдинма-кейин учиб келди-да, унинг ёнига тушди. Олдин учиб келгани кейингисига тутқич бермас, у «ку-ку»лаб қархисига борса қочади. Йўргалаб ёнига ўтса, учиб сал нарига тушади. Яна кейингиси хушомад қилади... Бирдан чўқилашиб кетишиди. Икки ювош парранданинг бу ножўя иши Қодирнинг ғашига тегиб, энди ҳайдамоқчи бўлиб турган эди, биттаси дарахтга учиб ўтди, кейингиси кетидан қараб қолди. Қодир «қани, энди нима қилар экан!» деб турган эди, қархисида бир қиз кўринди. У, кенг атлас кўйлагига шамол тўлдириб, қархисидаги соясини қувгандек елиб келарди. Қиз Қодирга яқинлашгач, қадамини секинлатди. Қодир унга тузуккина қарагунча бўлмай, қиз сўради.

— Шу ердан иккита қиз ўтмадими? Биттаси чамандагул дўппили.

— Пайқамадим,— деди Қодир. У илон авраган қурбақадек бақрайиб қолган эди,

— Олдидан ўтган қизни пайқамайдиган қанақа йигит экансиз!

Қиз шу сўзни кулиб айтди-ю, йўлида давом этди. Кулганда икки қатор садаф тишилари бир ҳуснинг ўн ҳусн қўшиб юборди. Қиз нарироқ бориб «гапимни уқдингизми, яхши йигит» дегандек яна бир орқасига қараб қўйди. Мана шу қараш умрида бирон қиздан, айниқса, «буғун тушдан кейин дум бераман» деб турган қовундек етилган қиздан икки оғиз ширин сўз эшитмаган Қодирни адойи тамом қилди. Қўлида дафтари билан кетидан бақрайиб қолганини анчадан кейин пайқади. Пайқади-ю, фикрида шу кунгача бўлмаган ажиб ғалаён бошланганини, бу ғалаён унга ҳам ширин, ҳам ваҳимали алланарсалар ваъда қилаётганини ҳис этди. Үнинг фикр-ўйи шамол шопирган ўша атлас кўйлак қатига ўралиб кетган эди. «Ойиси баҳорда; қизил гул сайлида туққанми, бунча кулиши чиройли бўлмаса», деб қўйди ўзича.

Қиз ўша бедана йўргалашида сўқмоқ йўлдан бориб дарахтлар орасида кўздан фойиб бўлди. Бир оздан кейин ўша томондан қизларнинг кулгиси эшитилди! Бу кулги ичидан Қодир қизнинг овозини таниди ва юраги гурсиллаб уриб, ларзага келди...

Қодир ўзини зўрлаб дарс тайёрламоқчи бўлган эди, кўзи китобда яхмалак отиб, ҳеч нарса бошига кирмади. Лекин, нима учундир, бирдан хаёлига ўша атлас кўйлак, чилвир соч, кулиши ёқимли қиз эмас, бояги мусичалар келди. Атрофига қараб уларни кўрмади. Шунда яна хаёлига келди: қизиқ, улар ўша қиз келгунча учиб кетишдими, ёки кейинми? Нега мен пайқамай қолдим? Улар ярашганинкин, ёки ҳали ҳам қувлашиб юришибдими? Ярашгандирлар! Ярашишлари керак. Гуноҳи бўлса ҳам кечириши керак. Ялиниб-ялпоғланиб ўляпти, бечора! Бағритошлиқ яхши эмас. Аҳиалик, меҳру муҳаббатга нима етсин!

Қодирнинг хаёли мусичаларда бўлса ҳам, кўзи қиз кетган томонга йўл чизиб қолди.

Уни яна бир кўргиси, жонон пиёла жарангидай товушини эшитгиси келди. Юраги қиз кетган томонга ундаса ҳам, оёғи тортмади. Лекин кечаси шундай аҳволга тушдики, орада тубсиз жар бўлса ҳатлаб ўтишга, чўққида бўлса тирмашиб чиқишига тайёр эди. У қизни кўриш орзудан кўра эҳтиёжга айланган эди.

Эрталаб туриб, «йўқ, боқقا чиқмаймац, шу ерда дарсимни тайёрлайман», деб аҳд қилди у. Йўғон қайрагочга суяб қўйилган тумбочкага мук тушди. Бир оз тайёрлаган бўлди. Сал ўтмай сояси қалин, япасқи қайрагоч тагида кулги кўтарилди. Қимdir ҳуштак чалди. Атрофга қараб қулай жой тополмади: институт ҳовлиси каравотларга тўла. Уларнинг усти қурама. Бирининг устига беқасам тўн кўндаланг ташланган бўлса, бирида шинель, бирининг ёстиғи остида каттакон тугун, бирида кимdir ҳалигача ухлаб ётибди...

Ҳаммаси кўзига эриш кўриниб, ҳар куни шу ерда бепарво дарс тайёрлаганига, тинимсиз, шовқин-суронни пайқамаганига ажабланди. Фақат кечагина боқقا чиққан эди.

Боғ эсига тушди-ю, қалби ўша томонга уннади. Назариди, кечаги атлас кўйлакли, кулиши ёқимли қиз кутиб тургандек, ёки у бориб ўтириши билан яна олдидан ўтадигандек бўлиб кўринди. Лекин қиз у ерда йўқ эди, Қодир тушгача дарс тайёрласа ҳам ўтмади. Олдинроқ ўтиб кетдими, деб кеча кулги келган томонга қулоқ солди: жимжит. Фақат тўғондан ошиб тушган сувнинг шарқирашигина эшитиларди. Қимdir уннинг қулогига «энди кулишмасдан тўғри гаплашиб ўтирибди» дегандек бўлди. Қодир бу меҳрибон ғойиб ҳамроҳининг сўзига жон деб ишонди. Ўрнидан туриб кеча қиз кетган томонга йўл олди. Юраги гун-гун урар, кўз олди баъзан жимирилашиб кетар эди. Ҳар дараҳт, ҳар чечак, ҳар гиёҳ жонли, кўзи тўрт б. либ уни кузатиб тургандек. Оlam нақадар чиройли! Ҳар нарсанинг ўз ҳаёти, ўз ҳусни, ўз камолоти бор. Ўз кўрки, ўз фазилати билан бир-бирини тўлдиради, бир-бирининг ҳуснини очади, бир-биридан ажралмас бир бутунлик ташкил этади.

Қодир илгари ҳеч қачон пайқамаган ажойиботлар орасидан ўтиб бораётгандек завқланиб, ҳар япроқقا, ҳар гиёҳга, ҳатто маржондек тазилишиб сўқмоқни кесиб ўтатётган чумолиларга гап қотгиси келар, улар дунёсинни қалбига яқин сезар эди. Лекин бу билан бир вақтда уннинг юрагида номаълум бир ташвиш, ҳис-ҳаяжон ётарди. Нимадандир чўчир, нимадандир ҳадиксираётгандек бўлиб, аланглаб қўярди. «Тўхта,— деди ички бир нидо,— хўш, у қизни тоидинг. Кейин нима? Унга айтадиган бирон гапинг борми? Йўқ!! Шундай бўлгач, қидириб нима

қиласан. Бор, жойингга ўтириш, дарсингни қил, у қиз баҳор шамолидай ўтди-кетди!»

Қодир чиндан ҳам бундоқ ўйлаб қараса, у қизда ҳеч қандай иши ҳам йўқ, айтадиган сўзи ҳам! Шундай бўлса-да, кеча кулги эшитилган томонни айланиб келди. Учратиб қолса, нима дейишини билмаса ҳам, уни қидирди. Ҳеч қаерда йўқ: на ерда, на кўкда.

Қайтиб кеча ўтирган жойига келса, мусичалар донлашиб юрибди. Жуда аҳил, бир-бирига меҳрибон, сахий. Е кечагилар эмасми? Йўқ, ўшалар. Ўшаларнинг ўзи! Аҳиллик, меҳрибонлик қандай яхши!!

Атлас кўйлакли, кулгиси ёқимли ўша очиқ қиз Қодир учун олтин узукнинг сувга тушиб кетган зумрад кўзи бўлди.

Эртасига, индинига, бир ҳафтагача уни шу боғдан ислади — топмади, кўча-кўйини кузатиб борди — учратмади. Унга қизнинг ўзидан ҳам хаёли ширин бўлиб қолгани эди.

Охири, «тушимда кўрдиммикан», деди ўзига-ўзи.

Атлас кўйлакининг оловидан бағрига тушган учқунни кул босгандек бўлди.

Қодир институтга қабул қилиниб, уч-тўрт кун она шаҳрининг ҳавоси билан пафас олгани қайтганида имтиҳонлардан яхши ўтганидан хурсанд бўлса ҳам, юрагига аллақаерп нимадандир ачишиб турарди. Ўсиб-ул-гайган ҳар битта тошигача унга таниси бўлган сиа шаҳрини тарқ этганида юраги қанча энтиккаи бўлса, институтга кириб, ўз шаҳрига қайтаётганида ҳам кўнгли шунчалик ғалати бўлиб кетди. Бегона шаҳарда нимасидир эспидан чиқиб қолгандек, нимасидир кўнглига ғашлик со-лаётгандек туюлди. Ҳеч ким уни кузатгани чиқмаган бўлса ҳам, кўзлари жавдираб кимнидир қидирди, кимгадир айтадиган гапи бордек ўзича пичирлаб қўйди. Поезд жилганида-ку, купеда туролмай, ўзини деразага урди, кимнидир кўрмоқчи эди... Бу ҳолатнинг бониси ўша атлас кўйлакли, кулгиси ёқимли қиз, олтин узукнинг совга тушиб кетган зумрад кўзи эканини Қодир яхши биларди.

Қодирдаги бу ўзгаришни ҳаммадан олдин унинг онаси Адолат хола оналик қалби билан сезди шекилли, катта ўғли Содиқقا:

— Йўқ, болам, укангга бир нарса бўлган. Бунаقا эмас эди,— деди.— Ўқишига киргани ростми? Ё номусдан ёлғон гапириб, ич-этини еб юрибдими?

— Қоғозини кўрсатди, ўз кўзим билан кўрдим,— деди Содиқ ишонч билан.

— Бўлмаса уканг касал, биздан яширяпти.

— Чарчаган бўлса керак, менинг кўзимга ҳам шунака кўринди. Яна суриштиарман.

— Шундай қил, жон болам, ёш, билмайди.

— Хўп, хўп!

Фарзанд додгини кўравериб, юраги безиллаб қолган Адолат хола, Қодирнинг дардини билолмай армонда эди. Бир чеккаси, ёлғиз ўзини ўқишига юборишга ҳам раъий йўқ. Шунинг учун, Содиқ укаси ўқишига кирган шаҳарга кўчиш, у ердаги катта докторларга Жаннатни кўрсатиши, ўзи ҳам аспирантурага кириш ниятида эканини айтганда, аввалгидек, «мени ота-онам ёнига қўйгин, кейин ўз билганингни қил» демади, тезгина кўна қолди. Икки йил Армияда «мусофир» бўлган Қодирни яна бегона шаҳарда ёлғиз ўзини мусофир қилгиси келмадими, ёки яна соғиниб кўз ёши тўкишига бардоши етмаслигини билдими, Содиқни қувватлади:

— Майли, жон болам, ҳаммамизнинг бир жойда бўлганимиз маъқул. Қодир ҳам иссиқ-совуқсиз қолмайди, ёнимда бўлади.

Содиқ бу қарорни Қодирга билдирганда унинг ортиқча қувонмаганидан ҳайратда қолди.

Бу лоқайдлик Содиққа оғир ботди. Укасига бир нарса бўлганига шубҳа қилмай қўйди. «Ойим бекорга ташвишланмаган экан», деди-ю, сабабини билишга жиддий киришди. Уни бошлаб сойга кетди. Йўл-йўлакай укасининг қўйнига қўл солди. Бир-икки шўнгиб чиқиб, офтобда ўтиришар экан, пайти-пайти билан унинг ҳаракатини кузатиб, гап ташлади:

— Марказда анчадан бери бўлганим йўқ, жуда обод бўлиб кетгандир.

— Ха.

— Боғларида ҳалиям дам олиш кунлари одам кўп бўладими?

«Боғ» сўзи Қодирни уйғотгандек бўлди, ғалати бўлиб кетди.

Содиқнинг бугунги сайдан фаҳмлагани шу бўлники, Қодир аввалгидан камгап, кишилар билан учрашишга

майли йўқ, ёлгизликни хуш кўради. Тан-жони соғу, фақат қаттиқ чарчаган. Вақти билан ёзилиб кетади. Икки йил Армия хизматини ўтаб, бугунги кунда институтга имтиҳон бериб киришнинг ўзи бўладими!

Лекин Қодир имтиҳон азобларини аллақачон унуглан, очигини айтганда, унчалик ҳис қилмаган, фақат ёшликийнинг бошқа бир имтиҳони олдида минг бир хаёл билан турарди.

Бу имтиҳон аввалгисидан осон эмас эди.

2. ТИРНОҚҚА ЗОР ОИЛА

Дунёда бефарзандликдан ёмон нарса борми!

Ёшлиқда билинмайди, умр ўйин-кулги билан ўтаверади. Бола муҳаббатини эр-хотинликнинг қайноқ бўсаси ва ҳеч тамом бўлмайдигандек ширин сұхбати босиб туради. Шундай пайт келадики, бу муҳаббат ва бўсани фарзандга кўчириш керак, фарзанд эр-хотинликка файз киритади, оиласи безайди. Лекин фарзанд йўқ. Ана шунда зил кетади, ҳалигача ширин деб шимиб келган оғзингдаги обакидандоннинг тахири чиққандек бўлади. Айниқса, сен билан олдинма-кейин турмуш қурганлар бир-икки фарзанд кўриб, каттасини етаклаб гузарга чиқадиган бўлганда, қўғирчоқдек ясатиб, бошлаб юрганда ёмон! Ардоқлаб оққа кўчираётган хатингга сиёҳ тўкилгандек юрагинг ачишади.

Содиқ билан Жаннатнинг ҳаёти худди шундай бўлган эди. Улар севишиб турмуш қўришган, юлдузлари жуда ўнг келган, бир-бирларини кўпдан синашган кишилардек фазилатларини ошириб, нуқсонларини яшириб, бошқалар ҳавас қилгудек тинч-тотув яшашди.

Ҳамма ўзбек келинларида бўлганидек болага ҳавас бошлаб Жаннатда уйғонди, ахир қизлар бекорга муштумдаклигидан «оббо, болам!» деб қўғирчоқ қучоқламайди-да! Йиллар ўтган сари бу ҳавас заруратга, энг зўр заруратга айланди. Аввалига эрига билдиrmай ичиди куйди, бировга айтгани уялди, ёшлиқ қилди, хилватга ўтиб аччиқ-аччиқ йиглади. Таниш-билишнинг кўзи ёриганини эшитса, аъзойи бадани зирқираб, изтиробдан титраб кетарди, кимдир «нега сен туфмайсан?!» деб таъна тоши отаётгандек бўларди. Унинг кўнгли бузилганини кўрган Адолат хола дарров бошини силарди:

— Сабр қилинг, жон болам, худо севган қулини бе-
фарзанд қўймайди. Сабр сўнгги — сариқ олтин.

— Сабр қилмай, нима қиляпман, ойижон! — дерди
Жаниат яна баттар ёнарди, сирти кулиб, ичи йиғларди.

Адолат хола табиатан ҳалимдек юмшоқ, ширин сўз
аёл эди. «Сиз» ҳам, «сен» ҳам бир оғиздан чиқади.
«Сиз»ни «сен» қилиш яхшимас, дерди, ўзи шу ақидасига
амал қиласар, икки сўзининг бирида «жон болам» деб ту-
пар эди. Шунинг учун бутун маҳалла унинг исмини айт-
май «жонболам хола» дейишар, бу сўз холанинг қуло-
гига кириб қолса кулиб қўя қоларди.

«Жонболам хола» бундоқ қараса, Жаниат кундан-
кун чўпдек бўлиб кетяпти, кечагина бармоғига зўрға сиф-
ган узуги бугун бармоғидан тушса тушиб қолгудек. Ран-
гини айтмайсизми?! Йил — ўн икки ой кўрпа-ёстиқ қилиб
ётган касалнинг ўзи! Нима қилсин она бечора! Қўлидан
келган ирим-сиirimни қилди — бўлмади, аллақачон ирғи-
тиб ташлаган паранжисини аллақайси бурчакдан топиб
фолбинга қатнади, отинга ўқитди — бўлмади, доя хотин
айтган «дори-дармон»ни қилди — бўлмади. Ҳеч нарсадан
қайтмади. Тирик йлонни ют, шу сенга шифо деса, уни
ҳам ютишга тайёр эди Жаниат бечора!

Жаниатнинг назарида, тинч турмушининг қасри бо-
ласизлик туфайли йилдан-йил нураб бораётгандек кў-
ринади. Кимдир «орқангда бир туёқ қолмаган умр умр-
ми!» деб кесатаётгандек бўларди. Тўй-ҳашамга бориш-
дан юраги безиллади, хотинлар «туғмас Жаниат ана
шу» деб бир-бирига кўрсатаётганга ўхшайди, фарзанд-
дан гап очилган тўйдан ҳамма хурсанд қайтса, у йиғлаб
қайтади.

Жаниат «эрим ичида куйса керак» деб ўйларди. Чун-
ки эри билдирилар мас эди. Минг қилса ҳам эркак! Бунинг
устига иши бошидан ошиб ётибди. Яқинда мактабга ди-
ректор қилиб қўйишиди. Қишлоқ жой эмасми, айниқса,
қиз болаларни ўқишига тортиш қийин. Сал бўйин чўзилди
дегунча кетиб қолади, ота-онаси қўймайди. «Бу ишингиз
яхшимас!» деб излаб борса, «хотин кишидан лайғамбар
чиқибдими» дейишади. Ўша кезларда Содиқ хотинини
ўқишига киритиб қўйди. Боғча мураббиялари тайёрлаш
мактабини битиргач, боғчада ишлатди. Бу билан, бир то-
мондан, уни бошқаларга ибрат қилиб кўрсатмоқчи бўл-
са, иккинчи томондан хотинини овутмоқчи, «болага бўл-
ган меҳрингни шу ерга тўк!» демоқчи эди.

Жаннат буни пайқади. Демак, эри уни хафа қилмоқчи эмас. Ичилда ёнади-ю, ташқарига тутунини ҳам чиқермайди. Шундан биладики, Содиқ унинг ярасини тирна-моқчи эмас, демак, у қалбиди, Жаннат эса кўзида кўрсатиб йифлайди!

Нима учундир, Жаниат ҳамма айни ўзинда кўрарди. Шунинг учун Содиқ марказга кўчиш қарорини унга айтганда йўқотган нарсасини бирдан топгап кишидек қувониб кетди. Лекин, шу билан бир вақтда юрагининг алла-қаери «жиз» этиб ачишди, нимадир кўнглини хира қилди.

— Хўш, нима дейсан, сенга маъқулми? У ерда катта докторлар бор, ўзингни ҳам қаратасан,— деди Содиқ.

«Ўзингни ҳам қаратасан» сўзи Жаннатнинг қулоғига алланечук бўлиб эштилди. У, шу вақтгача ўзини тумаслиги бир касал эканини билмас, касални бунаقا хили ҳам борлигини тасаввур қилмас эди. Демак, эри уни касал ҳисоблади, касал ҳисоблаганде ҳам катта докторлар муолажа қиладиган касал экан. Мана шу «катта докторлар» сўзи ҳам унинг бағрига учли найза бўлиб қадалди. Яхши, булар у шаҳарга кўчиб боради, Жаниат эри айтган ўша «катта докторлар»га ўзини кўрсатади, дардига даво топса-ю, нур устига аъло нур, борди-ю, топмаса, «дори-дармоннинг фойдаси йўқ!» деса нима бўлади? Йўқ, катта доктор бўлганидан кейин ҳар қандай касалга даво топиши керак.

Жаннат шундай қарорга келган бўлса ҳам, ҳалиги «нимадир» ҳамон кўнглининг бир чеккасини хира қилиб турарди. Бўлмаса унинг бу ерда қоладиган ҳеч кими йўқ. Энг яқин кишини — эри, энг меҳрибони — қайнанаси.

Уша «нимадир» унга кечаю кундуз тинчлик бермади. Ҳамон кўнглининг бир чеккасини хира қилиб ётарди. Марказга кўчиш эсига тушди дегунча энтикади, қалбини муздай бир нарса кесиб ўтади... Эрталаб кўчишга оёғи тортмаётганини аниқ ҳис қилди. Сабабини тушунтириб беролмайдиган бўлгани учун эрига айтмади. Фақат дея олди:

— Кўчмасак нима қиласди? Доктор бўлса, Қодиржоннинг олдига бориб туриб...

— Нима? У ер сенга ёқмаяптими? Жуда яхши шаҳар, кенг, гавжум...

— Яхшиликка яхши-ю, шундай бўлса ҳам... кўчмайлик... оёғим тортмаяпти...

— Жинни!— деди кулиб Содиқ,— юрагинг увишяптими? Үрганиб кетасан.

Содиқ хотинининг руҳий ҳолатини тушунмади, тўғриси, хотинларда бўладиган «нуқсон»лардан деб кулиб қўя қолди. Лекин бу «нуқсон» Жаннатнинг қалби тубига чуқур ботиб борар, кўнгилғашликдан диққатга айланмоқда эди.

— Бормайлик!— деди охири қатъий.

— Чарчабсан, хотин, дамингни ол!

«Нега Жаннатнинг феъли бунақа айниган? Нега яна кўчишга раъйи бўлмай қолди. Сабабини тузук суриштирмай, гапини қайтарганим яхши бўлмади».

Содиқ ўзича муҳокама қилди. Жаннатнинг катта бир далили бўлиши мумкин эмас. Туғилиб ўсган шахридан кетгиси, сирдош ўртоқларидан ажралгиси келмаётган— дир. Ё ишини қизғаниятими? Эҳ, аттанг, у ерда ҳам ишлашини айтсам бўлар экан. Тўғри, шу иши учун қиляпти. Хафа бўлма, Жаннат, у ерда ҳам севган боғчалигда ишлайсан. Ўзингнинг болаларинг ҳам бир боғча бўлиб кетса ажабмас. Ажойиб бир доктор Ленинграддан келибди деб эшитдим. Ушанга боқтирасан. Ўксинма! Оёғинг тортаверсин, жоним!

* * *

Кўчиб кетишлари аниқ бўлгандан кейин, Содиқ маориф бўлимининг илтимосига кўра, ўз ўрнига одам танлади. У билан бир неча кун ишлашди. Севган мактабининг келажакда ҳам мавқеи тушиб кетмасин учун қўлидан келган бутун маслаҳатларни берди. Ўқитувчиларга қисқа-қисқа характеристика ҳам бериб чиқди, «баъзи сир»-ларгача ўртоқлашди. Бир кекса ўқитувчи:

— Кўнглимизин чироги олиб чиқиб кетилгани уйдай қилиб кетяпсиз, Содиқжон,— деган эди.

— Ёритиб турган мен эмас, сизларсиз, сизларниң ўзингиз,— деб кулди Содиқ. Қоровулдан торгиб, янги директоргача ҳамма билан қўл олиб хайрлашди. Хайрлашув орасида ҳар кимнинг ўзига яраша ҳазил қилди, гап қотди. У суюб юрган, ишчидан чиққан ёш ўқитувчи бағрига ташлашиб «энди менинг аҳволим нима кечади?» дегангага ўхшаган бир гап қилгани эди, Содиқ:

— Кўпчиликка суюнинг, кўпчилик кўтаради. Лекин мутолаани сусайтирмаанг. Мен сизнинг ҳаракатингизга ишонаман,— деди ва бағрига босиб ўпди, қўлини қаттиқ сиқди. Лекин мактабдан чиқиб кетиши енгил бўлмади, юрагининг аллақаери узилиб қолаётгандек ачишиб кетди. Нимадир эсидан чиқиб қолгандек орқасига бир-икки қараб қўйди, аммо рангининг сал оқаринқираганидан бехабар эди. Эшик олдida мактабга кириб келаётган болани тўхтатиб, иши бўлмаса ҳам исмини сўради, синфини суриштириди, унинг жавоб беришидан завқ олаётгандек кулиб турди, кейин бағрига босиб, лўппи юзларидан чўлл-чўлл ўпди:

— Яхши ўқи, хўпми?— бола ҳайрон эди. Содиқ нарироқ бориб болага хайрлашиб, қўл силкиди.

Содиқ ҳамма билан хурсанд хайрлашган бўлса ҳам, уйига кўнгли ғалати бўлиб қайтди. Ана шунда мактабини қанчалик севганини бутун қалби билан ҳис этганди. У ўйинчоғи сувга оқиб кетган боладек анча вақт хомуш юрди. Фақат кечқурун, оила аъзолари жамулжам бўлиб, овқатга ўтирганда кўнгли аста-секин ёришиди. Чунки суҳбат энди бутунлай эртаги кунга, кўчиб борадиган шаҳардаги ҳаётга, ишга бағишланган эди.

Маслаҳат шунга келиб тўхтадики, Содиқ Қодиржон билан бирга олдинроқ кетиб, уй-жой тараддудини кўрадиган бўлишди.

Кўчишга ҳаммадан олдин рози бўлган Адолат хола, иккала ўғлини кузатиш вақтида ўпкаси тўлиб йиғлади. Ёшлигини, бу уйга келин бўлиб тушган чоғларини, кетма-кет нобуд бўлган болаларини эслади. Эрталаб гуриб, ҳали-ҳозир жўнаб кетаётгандек, ота-онасининг қабри тепасига бориб келди. «Аллақаерларда ўлиги қолиб кетган»— мардикордан қайтиб келмаган раҳматли эрини ёдлади. Нобуд бўлган болалари тирик бўлганида неча ёшга киришини хаёлидан ўтказди. Охири Содиқнинг қилич-қалқон тақиб «Оқ подшонинг думи — босмачиларни биратўла йўқотмасак, яна бева-бечора кўпайиб кетадиганга ўхшайди», деб чиқиб кетгани, у йиғлаганда: «Йиғламанг, ойи, сиз йиғласангиз, босмачи қаҳ-қаҳ уради», дегани эсига тушди. Ушанда коптоқдек ерга урса кўкка сакрайдиган азамат йигитча эди. Мана, кеча қўрса унинг ҳам чаккасига иккита оқ тола из солибди. Лекин манглайи шўр келди, фарзанд кўрмади. Битта сиқиладигани шу, бўлмаса кам-кўсти йўқ. Эл орзу қилса қилгудек,

маслаҳат солса ақл олгудек эс-ҳушли. Келини Жаннатдан ҳам айбситадиган жойи йўқ. Очса кафтида, юмса муштумида. Йўқ, йиғлаши бекор. Яхши умидлар билан бошланган сафарнинг оқибати хайрли бўлади. Майли, Содиқ олдин борсин, жой топсин, кўчиб кетади. Болаларининг ўз қаноти остида бўлганига нима етсин! Қодиржон икки йил аскарда юрганида соғингани ҳам бўлади. Энди кўтаролмайди. Мусоғир бўлса ҳам болаларининг олдидаги бўлади, айниқса, Қодиржонга кўз-қулоқ бўлиб туриши шарт. Яхши қиз топса, ўзи бош бўлиб уйлантиради, ёши ҳам анчага бориб қолди. Аслида, шу ердан уйлантириб кетганда яхши бўларди. Боласи тушкур, кўнмади, «олдин ўқийман» деб туриб олди. Онага қолса-ю, йиғлаб-сиқтаб кўндиради, ўртага Содиқ тушди, «шахтини қайтарманг!» деди. Жаннат бўлса, «шахар кўрган йигит қишлоқдан уйланадими, кўз остига олганлари борми ҳали», деб ҳазилга олди. Шунда ҳам она қарши турмади, «вой айланай, розиман. Ҳар ким кўнгли тортган ошни ичади», деди. Лекин Қодирдан ҳадегандаги садо чиқмади, фақат анчадан кейин: «Мен оладиган қизнинг қулоғини кеча тешибдилар, бугун исирға буюртириб келаман!» деган китобини қўлтиқлаганича чиқиб кетди. Ана шу «олдин ўқиш» деган ўғли муродига етяпти. Ўқишига кирди, беш йил ҳам «ҳа-ҳу» дегунча ўтиб кетади. Аскарга жўнагандаги «икки йил қачон ўтади!» деб бекор куйган эканман, кўз очиб-юмгунча ўтиб кетди. Буниси ҳам ўтади. Майли, ўқиши битгунча уйланмаса, кейин уйланади, эс-ҳушини таниб уйланган яхши бўлади. Ишқилиб, танисоғлик, хотиржамлик бўлиб турса бас.

Адолат хола хаёлида ҳамма ишни тарозига солиб, ўзини тутиб олгандан кейин, йўл тараддудини кўраётган ўғиллари олдига кирди. Дераза остида, бир тирсангини рапига қўйиб ўтирди.

— Ҳой, болам, қулоғингда бўлсан: жой олсанг, қўни-қўшнисини суриштир. Қўшнинг тинч — сен тинч. Кейин, мен гаплашадиган қари-қартангиги ҳам бўлса яна яхши,— деди у. Чамадоннинг қорнидан камар боғлаётган Содиқ онасига қараб, тузатди:

— Квартир олсанг денг.

— Кавартири бўлса, кавартири. У ёқларда турадиган жойни кавартири дейишадими-а, жон болам?— Адолат хола келини Жаннатга мурожаат этди. У «ҳа, шундай»

дегандек бош силкиб қўя қолди. Унинг юраги ҳамон ғаш. Қўчишни эшишган куни юрагида пайдо бўлган, сабабини ҳалигача билолмаган «алланима» ҳозир ҳам тинчлик бермас эди. Бу яхшиликдан кўра, кўнгилсизликни ваъда этаётгандек бўларди. Кечаси жиндай йиглаб, юрагини бўшатиб ҳам олди.

Содиқ вазминлик билан тасалли берди:

— Киши унар-унмасга диққат бўлиб, ҳар нарсани ўзига олавермайди. Бағрингни кенг тут.

Содиқ хотинини ҳам, ўзини ҳам чалғитмоқчи бўлди:

— Сен ишдан бўшашингни кўп чўзма.

Хотинининг кўнглига қил сиғмас эди, жавобни қисқа қилди:

— Ҳўп.

— Узоқ ҳаяллаб кетсанг, хат ёз, жон болам!— деди она.

Эшик тагида, хайрлашиш вақтида она ўзини тетик тутди.

Ирим қилиб, битта кулчани ушатиб, бир бурдадан иккала ўғлига берди, қолганини олиб қолди:

— Ризқимиз бир-биримиздан узилмасин!

Содиқ кулиб оғзига солар экан, ҳамон кўнгли ғаш Жаннатга назар ташлади: «Бунча хафа бу! Орамизда бир нарса ўтгану, мен билмайманми! Ё ойим билан... Иўғ-э... Баъзан киши ўзи шунаقا сабабсиз диққат бўлади», деди ичидা ва Жаннатнинг кўлинини олиб, қаттиқ сиқди. Бу билан «хафа бўлишининг сира ўрни йўқ, жоним!» демоқчи бўлди.

Бир ҳафтадан кейин Содиқдан «йўлга чиқинглар» деган телеграмма келди.

Содиқнинг иккита ўртоғи уларни поездга кузатиб қўйди, Адолат хола бир оз хомуш, Жаннатнинг кўзида ёш милтилларди.

— Сафар олдидан ниятингизни яхши қилинг, жон болам!— деди Адолат хола келинига.

Жаннат ноилож кўзини артди.

Аслида унинг оёғи тортмаганича бор эди, истиқболда уни бахтсизлик кутарди.

3. ЯНГИ ЖОЙ, ЯНГИ ТАНИШЛАР

Шаҳар маорифи бўлимидан йўлланма олиб, район маорифига келганда Содиқнинг биринчи учратган киши-

си Мирсалим бўлди. Ўлабирдан келган, сурма ранг дўппили, сертакаллуф бу одам маориф эшигига унга рўпара келди-ю, саломлашганга ўхшаш бир ҳаракат қилиб, унинг дикқатини ўзига тортди. Одатда, нотаниш ерга кириб келаётганингда илк учраган одамдан, айниқса, у очиқ юз билан сенга боқса, кўнглинг сув ичгандек бўлади, ўзингдан унга яқинлик сезасан. Содиқ ҳам худди шундай бўлди, ундан маориф мудирининг кабинетини сўради. Кейинчалик ўқитувчи Мирсалим эканлиги маълум бўлган бу одам кўриниб турган эшикни «ҳу, ана!» деб қўя қолмасдан аввал юмшоқ кулди, кейин Содиқнинг олдига тушиб бошлаб кетди. Уч эшик ўтгандан сўнг қора дерматин қопланган қўш қанот эшикни сал қия очиб:

— Марҳамат! Мудирининг ўзлари ҳам шу ердалар!— деди. Бунга ҳам қаноат қилмай, унинг кетидан мушукдек силлиқ кириб, шафтоли қоқидек камгўшт секретарь хотинг тушунтириди.

— Бу кишига ўртоқ мудиirimiz керак экан.

Секретарь хотин «ўзининг тили йўқми» дегандек, унга кўзойнаги остидан қараб қўйди, кейин бу «корчалон»га зарда қилгандек, бир ҳаракат билан машинкасига қоғоз қўйди. Унинг бутун ҳаракатидан кўриниб турардики, бу одамни у яхши билади, унинг нимасидир хотиннинг ғашини келтиради, энсасини қотиради. Лекин секретарь хотин машинкасида иш бошлишидан олдин кўзидан кўзойнагини олиб, ёқимли бир табассум билан Содиқга мудирининг олдида одам борлигини айтди ва ўтиришга таклиф қилди.

Содиқ кўрсатилган ерга ўтираётиб овора бўлгани учун Мирсалимга миннатдорчиллик билдирган эди, у яна ўта такаллуф билан нималардир деди, лекин машинканинг шақ-шуқида эшитилмади. Мирсалим Содиқ билан қуюқ хайрлашиб, ҳатто ўз ишига банд секретарга ҳам хайрлашув ишорасини қилиб эшикдан чиқди.

Маориф мудири кабинетидаги кишини кузатиб чиқиб, Содиқни кўриб қолди.

— Сиз Содиқ Қўчқоровмисиз? Жуда яхши. Эрталаб менга телефон қилишган эди. Қани марҳамат!

Мудир Содиқни кабинетига эмас, коридорга бошлади. Йўл-йўлакай аҳволини, соғлиғини сўради, келиб тушган жойини суриштириди. Меҳмонхонадалигини эшитиб:

— Ўша ерда турмоқчимисиз? — деди.

Содиқ «меҳмонхонада туриб ўқитувчилик қилиш жуда бойваччалик бўллади-ку» дегандек маъноли кулиб, жавоб қайтарди:

— Йўқ. Ишлайдиган мактабим аниқ бўлгандан кеинин, ўша атрофдан жой қарасам деган ниятдаман. Маорифнинг жойи бўлмаса керак?

— Бору, банд. Яхиси, ҳозирча ижарага ўтириб турингу, бир бошпана қуришга ҳаракат қилинг. Биз ёрдам берамиз.

Мудир кадрлар бўлими билан келишиб қўйган экан, кира солиб:

— Мана, ўртоқ Қўчқоров келдилар. Йўлланмаларини беринг, эртаданоқ иш бошласинилар. Сизга эса, ўртоқ Қўчқоров, муваффақият тилайман. Сизнинг тўғрингизда яхши гаплар эшитганман, аминманки, ўшандай ғайрат билан бизни ҳам хурсанд қиласиз.

Бундай ширин-чучмал гапларга Содиқнинг тоқати ўйқ, хижолат тортса ҳам жавоб қайташишга мажбур бўлди:

— Ишончингиз учун раҳмат! Лекин ким мени бунчалик улуғлаб сизга айта қолди, ажаб!

— Еру биродарлар, иннайкейин, жумҳурият муаллимлар кенгашида сўзлаган нутқингиз ҳам эсимда. Тарих фанини ўтиш ҳақида жуда мантиқли гапирган эдингиз.

Содиқ қулоғигача қизариб, ўнғайсиз аҳволга тушди. Индамади.

— Ҳа, айтгандек,— деди мудир, кадрлар бўлимига қараб,— директорига икки энлик хат қилиб беринг, ўртоқ Қўчқоров бу томонларда янги, яхши билмайди, квартира топишга кўмак беришсин. Оилангиз каттами? Қаҷон кўчириб келасиз!

Содиқ иккинчи саволга жавоб бериб қўя қолди:

— Жой топдим дегунча хабар қиласман. Шундай келишганимиз.

— Жуда яхши. Демак, тезлатсин, шундай деб ёзинг директорга.

Кадрлар бўлими ходими муҳим бир нарса бирдан эсига тушгандек иргиб ўрнидан турди, кўзини эшикка тикиди:

— Мирсалим ака ҳали шу ерда юрган эди, кетиб қолмадимикин?

Кадрлар бўлими мудири эшикка елиб чиқиб кетди.

— Мирсалим бунаقا ишларнинг жонини киритади.—
Мудир ён чўнтағидан папирос олиб Содиқча тутди, у чекмаслигини айтгач, бир донасини ўзи лабига қўндириди, гугурт чақиб тутатгунча йўқ эди, кадрлар бўлимининг мудири боя Содиқча дуч келган ғўлабир, сурма ранг дўппили, сертакаллуф кишини бошлаб кирди.

— Мирсалим ака, бу киши билан танишиб қўйинг, бундан кейин бирга ишлайсизлар. Бу кишининг сизга жиндай илтимоси бўлади,— деди мудир, «шу қуш боласи уясидан тушиб кетибди, жойига олиб қўймасангиз увол бўлади» дегандек бир оҳанга.

Мирсалим, район маорифи мудирининг унга иши тушганиданми, ёки табиати шунақами бирдан ешилиб кетди, юзида табассум қалқди, қаддини сал эгиб, қўлини кўксига қўйди:

— Бош устига! Биз танишмиз. Приёмингизга ўзим бошлаб кирган эдим.

Мудир, бемеҳр отанинг совуқ ўғлини эркалашидек бир табассум қилиб қўйди.

Мудир айтганидек, Мирсалим «ишининг жонини киритди». Шу куннинг ўзидаёқ Содиқни мактабга бошлаб бориб, ҳамма билан таништириди. Кейин:

— Дарс жадвалингиз билан танишиб туринг, мен бир соатларда келаман. Илтимос: кетиб қолманг,— деди.

Мирсалим майда қадам билан шошганича чиқиб кетди. Содиқ орқасидан «бунаقا одамлар юриб чарчамайди», деб қўйди. Мактаб илмий мудиридан уни суриштириди: биринчи босқичда илмий мудир ва она тилидан дарс берар экан.

— Дарсидан ҳам кишиларнинг ҳожатини чиқаришни яхши кўради. Оёғидаги куч-қувват бошида бўлганда... билмадим, ким бўларди,— деди илмий мудир,— бирор нарса илтимос қилганмидингиз?

— Бирор жой бўлса девдим.

— Ҳа, бунаقا ишларга суяги йўқ. Дўндириб ташлайди. Томи қанақа бўлсин, тунукалими, тупроқлими, демадими? Полини-чи?

Илмий мудир Мирсалимнинг ипидан-игнаси гача биладигандек, унга кўп иши тушган, ҳаммасини ўзи айтгандек «дўндириб ташлаган» кўринади, лекин унинг лабидан Мирсалимнинг нимасинидир менсимаслиги,

паст кўришлиги, таҳқирлашга яқин бир назарда эканлиги сезилиб турарди. Илмий мудир Содиқ буни пайқаганлигини сезди шекилли, изоҳ берди:

— Ўзи тузук одам. Сал бачканалиги бор, холос. Табиати шунақаки, тўрвасини тешган сичқонга ҳам индамайди. Оиласи кичкина: хотини-ю, бир қизи. Бутун шаҳарни танийди, ярми қариндош-уруфи ёки дўсти. Яхши қизи бор. Бу йил ўнинчини битириб кетди. Қарқиноқдан булбул чиққан. Ўғлингиз борми?

— Ўғлим йўғу, укам бор,— ҳазилга ҳазил билан жавоб қилди Содиқ.— Баҳорда армиядан келган.

— Ниятингиз бўлса, отингизни қамчиланг, тўғриси, отини укангиз қамчиласин.

— Нега укам?

— Совчи билан эр қиласидиган қиз эмас.

Содиқ бундай қизни кўз олдига келтиrolмади. У шунча йил директор бўлган мактабдан бунақасини учратгани йўқ. Минг қилса ҳам бу ер пойттахт, маданияти баланд.

Мирсалим одатдаги шошинқираши билан айтган вақтдан анча олдин келди. Тез юргани шундоқ кўрниб турарди. Оқقا мойил юзлари қизил тортган, манглайида майда тер резалари бор. Лекин қўлидаги қоғоз папкасини қаергадир ташлаб келган. «Уйига ҳам кирниб чиққанга ўхшайди, шу атрофда экан-да!» деган фикр Содиқнинг хаёлидан ўтди. Лекин унинг уйига «мехмон келади!» деб тайинлаб чиққанидан хабари йўқ эди.

Мирсалимни ўз ҳисоби бор. Ўзи билан танишмоқчи бўлган одамдан ҳайиқса ҳам, лекин бирор билан танишувни яхши кўради. Бегона одам билан қўл олишиб танишаётганидаёқ хаёлидан ўтади: «Бир куни асқатиб қолиши мумкин». Шу хаёл билан сертакаллуф муомала қила бошлайди. Бу танишнинг ўнг қўлтиғидан кириб, чапидан чиқади, юзидан табассумини аритмайди. Чойхона олдида бўлса, чойга, ошхона яқин бўлса овқатга таклиф қиласиди. Эпини қилса, ҳақини тўлаб «ўтқизиб қўяди», ўзининг тили билан айтганда, «қўлтиғига сув пуркайди», мабодо ўша одамга иши тушиб қолса, саломаликдан сўнг бир амаллаб шу ўтиришни шама қиласиди.

Худди шундай, Содиқ билан ҳам тезда иноқлашди. Ахир, қўлидан бир иш келмаса, бир нарсасига ишонмаса, қишлоқдан шундай шаҳри азимга келадими! Албатта,

бир нарсаси бор. Ҳаракати бардам, боқишилари тетик. Маориф мудирининг олдида туришини қара, «истасанг иш бер, бўлмаса ўзим топиб оламан!» дегандек виқор билан турибди. Ҳурмат юзасидан тишининг оқини кўрсатмади-я! Бунинг, албатта, бир балоси бор. Ҳали кўтарилиши ҳам мумкин. Бугун ўқитувчи, эртага директор бўлмайди деб ким айтади! Ҳозир унинг ҳеч кими йўқ, ёрдамга муҳтоҷ. Айни пайти.

Бу режасининг дебочаси сифатида йўл ости уйига кириб, қазилик ош буюриб қўйди. Ундан чиқиб асосий ишга киришди: квартира масаласида маҳалла комиссиясига йўлиқди. Яқинини келиб кўрди, биладиганини кўз олдига келтириб, иккитасини танлади. Ишнинг бунчалик тез битганидан хурсанд Мирсалим: «Кўр, сенинг учун қанчалик куйиб-пишяпман» дегандек, Содиқлар олдига кириши билан катта дастрўмолини олиб, юзи ва бўйин терларини артди.

— Сизни кетиб қоласизми деб... Ҳа, айтгандек, сўраб олмабман: томи қанақа бўлсин, тунукалими, ёки ўзимизнинг жайдари — тупроқлиги ҳам бўлаверадими? Биттаси шунаقا, лекин поли ер.

Илмий мудир ўзининг боя айтгани тўғри чиққани учун ялт этиб Содиққа қараб кулиб юборди. Содиқ ўзини аранг тутди. Мирсалим кулгининг маъносига тушумай, сўзини изоҳлади.

— Тўғри-да, сўраган яхши. Ҳар кимнинг ўз диди бор. Масалан, мен қишда тахта полли уйни, ёзда ўзимизнинг жайдаримизни яхши кўраман, салқин бўлади.

— Гапингиз тўғри,— унинг ёнини олди Содиқ.— Квартира кўргани кетганингизни билмадим, бўлмаса сизни икки-икки овора қилмасдан, бирга бора қолардим.

— Ҳечқиси йўқ. Киши кишига яхшилик қилиш учун дунёга келади. Бугун мендан, эртага сиздан...

Шу гапдан кейин Мирсалим Содиқни бошлаб кетди. Мўлжалидаги квартиralарни кўрсатди. Содиққа биттаси ёқди. Бу бир одамнинг алоҳида эшикли ташқариси эди. Икки уй, бир айвон. Сал эскироқ демаса, ўзи бежирим, кичкина ҳовли саҳни ҳам бор.

— Шу дуруст,—деди Содиқ хоналарни айланиб чиқиб,— бу ёғини ўзингиз гаплашасиз-да!

У ижара ҳақи тўғрисида ишора қилган эди, Мирсалим пайқади:

— Хотиржам. Сизга ёққан бўлса бас.

Содиқ ишнинг бунчалик енгил кўчганидан мамнун бўлиб, Мирсалимга миннатдорчилик билдириди. Кўча муюшида яна бир марта ташаккур айтиб, хайрлашувга қўл узатар экан, Мирсалим қўлини олди-ю, қўйиб юбормади:

— Каминанинг кулбалари ҳам шу яқинда. Бугун бизда бўласиз. Барибир борадиган жойингиз йўқ. Мусофирихона (у меҳмонхонани шундай дерди) бир зарурат кунидан тушиладиган жой. Хўп денг. Бу ёғини ҳам айтай: келинингиз ҳам сал огоҳлантирилган. Тиқ этса, кўзи эшикда бўлиб, пойлаб ўтиргандир. Хўп денг.

Содиқ шунча яхшилик қилган одамнинг сўзини ерда қолдиргани ботинмади. Унинг розилигидан Мирсалимнинг боши осмонга етди:

— Сизни маорифда кўрдиму, «шу одам мен боп» дедим. Юлдузингизга юлдузим тўғри келди-қўйди. Бўлмаса, ҳар ким билан иноқлашавермайман. Ҳозир яхшидан ёмон кўп. Дил тортиб гаплашадиган одаминг ишдан бўшамайди. Ҳали сизнинг ҳам ишингиз кўпайиб кетса...

— Истаган киши вақт топади.

— Албатта, албатта! Дилининг яқинлигига боғлиқ.

Содиқнинг тахмини тўғри чиқди. Мирсалимнинг ҳовлиси мактабга яқин экан. Эшикка яқинлашувлари билан Мирсалим олдинга ўтиб, шошинқираганича ичкарига кириб кетди. Бу билан Содиққа «сиз бир оз сабр қилинг», деган маънони англатди. Содиқ буни тушуниб, эшик олдида тўхтади. Эшикка назар солди; ўз вақтида анча кўркам бўлган ўймакор эшик. Албатта, аввал бўёқисиз бўлган. Қейинги вақтда замоналаштириб кўкка бўялгани кўриниб турибди. Ҳатто газета-журнал ва хат учун қорнидан кўндалангига ингичка туйнук ҳам очилган. Қадди паст, япалоқ эшикка бу туйнук бўз кўйлакка садаф тугмача қадагандек ярашмас эди. Содиқ кулиб қўйди.

— Нега тўхтаб қолдингиз, марҳамат!— деди Мирсалим ичкаридан чиқиб. Ваҳоланки, у атайн аввал кириб хотинига хабар берган, хотинининг «бефаросат»лигидан баъзан ҳовли юзида қоладиган жомашов, супургига ўхшаш нарсаларни четга олдирган эди. Эшикка қайта туриб, ҳатто ўрикнинг паст шохидаги қийинки ҳам юлиб олиб, думалоқлаб хотинига отди.

Содиқ Мирсалимнинг орқасидан кириб борганда хотини қўл қовуштириб ариқнинг тепасида турар эди;

салом бериб сўрашди. Уйнинг ижозати хотинда бўлганидек, Мирсалим меҳмонни бошлаб ўтар экан, деди:

— Каравотга ўта қоламиз-да, а, хотин? Е уйга жой қилганмисан?

Мирсалимнинг совунига кир ювиб ўрганиб қолган хотини дарров жавоб қилди:

— Вой, уй дим, ҳовли яхши!

Мирсалим бу билан меҳмонга бўлган эҳтиромини яна бир марта сездирмоқчи эди, ниятига етди. Хотиннинг зийраклигидан хурсанд бўлгандек, Содиқнинг елкаси оша кулиб қўйди. Лекин хотинининг «сохта меҳмондўст бўлмай ўлинг!» дегандек энсаси қотди.

Содиқ квартира қидириб, бир неча ерда бўлганидан беихтиёр унинг назарини Мирсалимнинг ўз ҳовлиси тортиди. Ҳовли у кўрган ҳовлилардан ортиқча фарқ қилмайди. Фақат «замоналаштириб» тартибга солинган, сарангжом. Ҳатто тарновнинг остига сув тушиши учун мусулмон гиштдан жой қилиб, нишабини ҳам олиб қўйилган. Девор остига ётқизилган йўлка бир текис ва кенг; гиштлари ўтмас тешада қириб тозаланган бўлса керак, теша излари сап-сариқ йилтиллайди. Ундан пастда ҳафсала билан ўтқазилган гуллар тизими. Садарайҳон баҳор булутидек ҳурпайиб, ҳожираҳон бақатеракдек кеккайиб, бинафша ранг баргларини очиқ кафтдек тутиб туради. Улар орасида хинанинг қизил оёғи ва чақмоқ гули дарров кўзга ташланади. Гулибеор бўлса, осмонга чиқиб пақ этиб сочилган ранго-ранг мушакдек ёнади.

Рўпарада икки уй. Ўнг томондагисининг бир деразаси ердан бир газ баланд, ганчланган сиркор айвонга очилади. Айвоннинг пешида ўймакор устун. Ўнга қараб Содиқ: «Хунар! Эринмаган устанинг иши», деб қўйди. Айвон токчаларининг ҳаммаси кейинчалик кесак қалаб урилгани ингичка чизиқ бўлиб қолган эзиҳидан кўриниб турибди. Фақат ўртадаги тахмон қолган. Ўнга мажнунтолга ўхшаган қандайдир гул сурати солиниб, бир шохига хум чойнакдек қуш қўндириб қўйилган. Оғзини очиб, сайраб туришидан булбулга, думининг ерга тегиб туришидан товусга ўхшайди. Худди шунга ўхшаган суратни Содиқ болалигида дадаси хизматкор бўлиб ишлайдиган Омил қори юзбошининг меҳмонхонасида кўрган эди. Ҳа, ўша меҳмонхона кейинчалик колхоз идораси бўлди.

Мирсалим меҳмонини ёғоч каравотга тўшалган атлас

кўрпачага ўтқазиб, «одатимиз қурсин» деб қисқагина фотиҳа тортида, ўзи ошхонага ўтиб кетди. Хотинига нималарнидир шивирлаб, орасида бир хўмрайиб, кейин очиқ юз билан каравотга келар экан, меҳмонининг гулларга маҳлиё бўлиб турганини пайқаб, садарайҳонни кафти билан чайқаб атрини таратди.

— Асл нарса, жонивор. Ҳиди ҳам антиқа! — деди ва шохидан биттасини синдириб, Содиққа узатди, кейин қизил гулларни мақтади, улардан ҳам бир нечтасини қайчилаб, ясатиғлик хонтахтанинг меҳмон ўтирган томонига қўйди.

— Сизниңг ҳам дидингиз яхши экан,— деди Мирсалим каравотга чиқиб ўтиргач, нон ушататуриб,— аввал кўрган ҳовлимизни ёқтиармикансиз деб ўйловдим, йўқ, кейингисини, ҳовлисидан сув ўтадиганини танладингиз. Тўғри қилдингиз. Авваламбор, суви яхши, қолаверса, ҳовлисига гул-пул дегандек, кўнгилочар нарсалар экса бўлади. Бай-бай, бунинг ҳидини қаранг. Шунинг сувини сиқса атир бўлади-да, а! Табиатда мўъжиза кўп. Мана шундан сизга иккита қаламча олиб бераман. Анавинисидан ҳам. Униси тўқ қизил, ҳозир сал вақти ўтди. Райхонни шунинг учун экаманки, кузда баргини янчиб олса ҳам бўлади. Суюқ ошга жуда кетади-да! Хўп десангиз, көлинингизга айтаман, тўғрилаб беради.

Мирсалимнинг меҳмон кўнглини олишга астойдил киришгани чой қўйишидан тортиб, Содиқнинг олдига гоҳ сариёғ, гоҳ мураббо, гоҳ хандон писта суринигича, райхоннинг фазилатидан тортиб, эртага у иш бошлайдиган мактаб қўнғирогининг овозини мақташигача ҳамма нарсада сезилиб туарди.

Содиқ ҳали яқинда ионушта қилгани учун унча иштаҳаси бўлмади. Мирсалимнинг тез-тез дастурхонга таклиф қилиб туришига қарамай, ундан-бундан бир-икки чўқилади, асосан чой ичди. Мирсалимнинг нима биландир ивирсиб, ҳовлида юрганини кўриб, чўнтағидаги газетани қўлига олди. Бунинг устига келиб қолган Мирсалимга меҳмоннинг шундай нозу неъматли дастурхонга бепарво қараб, газета ўқиб ўтириши энсасини қотирган бўлса ҳам, ётиғи билан савол ташлади:

— Оламда нима гап, тинчликми?

— Тинчлик. Мана шу Леваневскийнинг топилмаёт гани яхши бўлмаяпти-да.

— Яна шу ҳақда ёзишибдими? — Мирсалим бирор

«ўзинг газета кўрасанми?» деяётгандай қўшиб қўйди:—
Ҳали бугунги газетани кўрганим йўқ.

— Ёзганда қандай! Москва — Шимолий Америкага учишларни уюштирувчи ҳукумат комиссиясининг маълумоти бор. «Красин» пароходимиз Аляскадан Шимолга йўл олибди. Америка учувчилари Руббинс, Старт излашга қатнашибди.

— Дарагини топишолмаптими?

— Йўқ. Об-ҳаво ёмонлигидан йўлдан қайтишибди. Үзимиздан ҳам тўққизта кучли аэроплан сафарбар қилишибди. Булар ичидан Шимолий қутбга учиб бориб келган Совет Иттифоқи қаҳрамонлари Мазурук билан Козловнинг АНТ — 6 аэроплани ҳам бор. Топса ана шулар топади. Об-ҳавонинг сал жўнашиб кетишини кутиб Рудольф оролида турганмиш.

Мирсалим янги олиб келган чойни қайтариб, тинитиб қўйди. Кейин «шамаси тушиб кетмасин» дегандек эҳтиёткорлик билан жилдиратиб пиёлага қуяр экан, сўради:

— Кечаги газетада эди шекилли, шу иш учун Америкадан қандайдир аэроплан сотиб олибмизми?

— Лэроплан эмас, ҳидроплан. Сувда ҳам сузадиган.

— Америкада шунақаси ҳам бор денг!— Мирсалимнинг завқлангани кўриниб турарди. Буни фаҳмлаб, Содиқ изоҳ берди:

— Вақти билан бизда ҳам бўлади!

— Албатта-албатта!— шошиб қолди Мирсалим. Лекин тилини бермади:— Бир машҳур учувчи ҳам учади дейилгани эди.

— Жемс Маттернми? Йўқ, учмабди. Катта пул сўрабди. Ҳозир ана шуни ўқиб, ҳайрон бўлиб турган эдим. Минг қилса ҳам буржуа кишиси-да, пул сўрабди, ҳамма нарсани пул билан ўлчайди. Уялмагани! Ахир биз уни қутқарганда пул сўрамагандик.

— У ҳам шунақа бўлганми?

— 1933 йилда Арктикада қолиб кетганда ана шу Леваневскийнинг ўзи уни ҳалокатдан қутқарган эди.

— Унда пул сўраши жуда ноинсофлик.

— Ноинсофлик эмас, виждонсизлик бу. Совет ҳукуматидек буюк бир мамлакат бутун имкониятини сафарбар қилиб, олий инсонпарварлик билан иш тутиб турган

бир пайтда орага пулни аралаштириш — ўта пасткашлик. Сиз билан биз талабаларимизни ана шу балодан ҳазар этадиган қилиб тарбиялашимиз керак. Бу бизнинг муқаддас бурчимиш.

Бу сўз Мирсалимга ёқинқирамадими, гап чалғитди:

— Олинг, биродар, дастурхонга қаранг, чойингиз ҳам совиб қолди,

Мирсалим Содиқнинг олдидағи пиёлани энгашиб олиб, совиган чойини бир четга тўқди, иссиғидан қўйиб узатди.

Чой охирига етиб қолганда хотини ошхонадан чиқиб кўриниш берди, эри тушунадиган бир тилда узоқдан лабини қўмирлатди. Мирсалим сиполик билан кўзини оғир юмиб қўйди, «яхши» имосини қилди. Кейин каравотдан аста тушиб, ошхонадан дид билан тайёрланган помидор закускани олди, йўл ости ариққа ташлаб қўйилган шишага қўл узатди. Кетидан хотини гулдор хитой лаганда ихчам бўйинтуруқдай қазини норин пичоқ билан олиб келди. Сувда қофози кўчиб кўндаланг ёпишиб қолган ароқни одобсизлик бўлмасин дегандек, хонтахтанинг тагига олиб қўйиб, қазини олдига тортди. Қўлига пуфлаб-пуфлаб, паррак қилиб тўғрай бошлади, ора-сира таърифини қилди.

— Жонивор яхши нарса, кишининг йигитлигини эсинга солади. Қишда-ку қаҳратонга қалқон. Қани энди яхшилаб қартаси билан еб, почапўстинга ўралиб, ойдин кечаси қалин қорда ғарч-ғурч юрсанг.

— Ченада кезсанг-чи,— қўшиб қўйди Содиқ,— ёки овга чиқсанг.

— Бу ҳам маъқул. Сиз овни яхши кўрасизми? Афсус, менинг ўқ товушидан қулоғим битиб қолади.

Содиқ унинг бу гапини ҳазил тушунди.

— Ишқилиб, каклик кабобига тишингиз қамашмайдими?

— Оҳ, оҳ, қани энди кетма-кет келиб турса!

Мирсалим оғзининг суви келиб бир паррак қазини оғзига солди, кейингисини Содиққа тутди:

— Бай-бай-бай, айни вақти экан, олинг!

Мирсалим қазини бутун қондаси билан тўғраб бўлгач, жайдари сиркада ўлдирилган пиёз билан ўртага сурди. Хонтахта остидаги ароқни олиб, чети гулдор бол пиёлаларга бир текисда қўйди.

— Олинг, биродар! Ёмон кунимиз шунга ўхшасин!

Содиқнинг ичкиликка майли йўқ эди. Улфатга кириб қолгандагина битта-яримта оғзига олмаса, бошқа вақтларда эсига ҳам келмас эди. Шу ёшга келиб, бирор шишанинг оғзини очганини билмайди, ўзиникида ичилиб қолса ҳам, кимдир, бошқа одам очади. Одоб юзасидан очишга уринса, ўртоқлари «шунга қолганда талантингиз йўқ, азизим»— деб қўлидан олишарди. Узоқ қийналиб ичишини кўриб, «игнанинг кўзидан қўйяпсизми. Содиқ жон, симирсангиз-чи», деб мазах қилишарди. Шунинг учун у Мирсалим узатган пиёлани олишга олди-ю, ташвишга тушди: билмаган одам «жўрттага таранг қиляпти» деб ўйлаши мумкин.

Мирсалим «меҳмон бошлагани уяляпти» деган андешага борди-да, «мен кетдим» деб битта ташлади. Содиқ «бўш пиёлани ҳазил қилди» деган хаёлга борди. Йўқ, ичибди. Закуска қилаётганда билиб қолди. «Бунаقا ичадиганлари бўлар экану», деганича кўзини чирт юмиб, биринчи қадаҳни ярмигача аранг ютди. Иккинчисини хўплаб қўя қолди. Мирсалим шунча қистаса ҳам «қўлидан келмаслигини» айтиб, узр сўради, ўзининг тортиннисдан ичаверишини таъкидлади.

Одатда ичкиликнинг бир пиёласи кишиларни бир-бирiga танишитирди, иккитаси тилини ечиб, қулфи-дилини очади, учинчиси ҳасрат бошлатади, ундан кейингилари эса, ё мақтанчоқликни уччига чиқаради, ё алам булогининг кўзини очиб, йиғлатади, ниманидир қасам ичириб, дўстлигини пеш қилдиради. Ичкиликнинг не-не гадой топмас кўчаларига кириб чиқсан Мирсалим кейинги йилларда ҳадди сиғадиган кишилар билан ўтиrsa, учинчи-тўртингчини bemalol ичаверар, кимдандир тап тортиб, ичидаги гидири юзага чиқишидан ҳайқса, иккинчисидан нари ўтмас, ўтса ҳам ҳўплаш билан чегараланар эди. Ҳали синашта бўлмаган Содиқ олдида ҳам худди шундай қилди. Иккитадан ортиқ ичмади. Улфатининг ортиқча майли йўқлигини билиб, ҳатто ичишини ёмонлаб ҳам қўйди.

— Кўп ичган билан кишининг шохи чиқади дейсизими! Эрмак қиласиз, девдим, сизнинг ҳам менга ўхшаган ҳафсалангиз йўқ экан. Расмга кириб қолди бу савил, бўлмаса, ичмаган маъқул.

Аслида Мирсалимнинг ичини бояги тушган иккиси пиела ёстиқ жилдига ўралиб қолган мушук боласидек тимдаларди, учинчисини чақираварди. Унинг қўли бенхтиёр

гоҳ шишага, гоҳ тагида жиндай қолган пиёласига кетиб қолар, кўзи закускага қадаларди. Содиқнинг яна бир «сиз ичаверинг!» деган таклифига муҳтож эди-ю, лекин Содиқ «бефаросатлик» қилиб индамас, тўғриси, унинг ҳолатини фаҳмламас эди.

Мирсалим чидолмади, ош келиши билан иккала пиёлага боягидан жонлироқ қўйиб, Содиқни қистади. Уни бир хўплатиб, ўзи эса:

— Ошдан олдингиси яхши бўлади, иштаҳа очади,— дея оқ урди. Меъёридан ошган бу учинчиси Мирсалими ни қора терга пишди.

Бу шаҳарда иссиқ ёзнинг ҳам кечқуруни баҳаво бўлади. Кун ботишга яқин сал дим бўлиб туради-да, кейин фир-фир шамол эсиб қолади, кундузининг бутун хордигини чиқариб юборади.

Мирсалим меҳмонни «ётиб қолсангиз ҳам бўларди, ўз уйингиз», деб кузатиб чиқиб келаётганда кеч шамоли садарайҳонларнинг ичини човуриб, атрини анқитарди. Гулибеор эса, аллақачон кўзларини юмиб олган эди.

Мирсалим ариқ бўйига келишганда Содиқни тўхтаби, гулзорга шўнғиганда эшикдан атлас кўйлакли бир қиз кириб кела берди. Баъзи қизларга ўхшаб четлаб ўтмасдан, тўғри Содиқнинг қаршисига юрди, одоб билан салом бериб, бошини қалқиди. Худди шундай Мирсалим билан ҳам саломлашди. Шунда:

— Келдингми, қизим, қайчини узатиб юбор, бўлмаяпти,— деди Мирсалим.

Қиз қайчини олиб чиқиб, дадасига узатмади:

— Сиз чиқа қолинг, дада, мен ўзим узаман,— деди ва гулни оралаб кетди. Бир зумда бир даста гул узиб чиқди.

— Амакинг билан сўрашдингми? Янги ўқитувчимиз, қўшни маҳаллага кўчиб келяптилар. Борди-келди қиласизлар,— деди Мирсалим Содиқга гулларни текислаб тузатар экан,— сувга солиб қўйсангиз бир ҳафта туради.

Содиқнинг хаёли мактаб илмий мудири билан бўлган суҳбатда, кўзи эса қизда эди: айтганича бор! Ақли ҳам ҳуснидай етукмикан?

Содиқ Мирсалимнидан тўғри почтага бориб, тўйга хабар қилаётгандек қувонч билан «йўлга чиқинглар» деб уйига телеграмма берди.

4. ИҚҚИСИНИНГ ҲАМ ҚАЛБИ ГУРС-ГУРС УРАРДИ...

— Салом, азизим! Кеча қандай дам олдилар. Эшитдим, эшитдим! Ҳафтада бир келадиган дам олиш кунини ҳам илм йўлига сарф қилибдилар.

Мирсалим ўқитувчилар хонасига шундай сўзлар билан кириб келди ва дивандаги ўтирган Содикқа қўйини узатди. Ў ҳар вақтдагидак шоду хандон ва юзи тўла табассум эди. Содикканинг қўйини узоқ қўйиб юбормай турди, бу билан ўзининг ҳурматини алоҳида чертиб кўрсатмоқчи бўлди.

— Шундай қилмасак бўлмайди. Дарслик билан киғояланиш жўжаларни катакла боқишдек гап. Баъзан ташқарига ҳам чиқариб туриш керак, кўзи очилади, ўзи топиб ейдиган бўлади.

— Офарин! Жуда тўғри ўхшатдингиз. Қалай, экспонатларга бойми... бойитишибдими? — Мирсалим бу тарих музейини кўрмаганини яшириш учун шошиб қолди,— мен ўтган йили кўрганимда алча камбағал эди.

— Йўқ, яхши. Лекин ўтмиш кўп ўринни олиб қўйгани экан.

Мирсалим ўзининг ҳам шундай нарсаларни яхши кўрганини ва талабаларининг илми учун қайғурувчи қилиб кўрсатмоқчи бўлди:

— Афус, бизнинг фандан музей йўқ. Бўлмаса мен ҳам...

— Шу музейлар сизга ҳам бўлаверади.

Мирсалим бу музейларнинг нимаси унинг «она тили»-си учун бўтаверишини фаҳмлаб етмаган бўлса ҳам, унинг фикрига қўшилди, бирор синфни олиб боришни кўнглига тугиб қўйди. Бунинг сабаби бор эди. Содикканинг мактабга келганига ҳали ҳеч нарса вақт бўлгани йўқ, лекин текисликдаги тепадек кўзга ташланиб қолди. Мана, кечадам олиш кунининг баҳридан кечиб саккизинчи синфни тарих музейига ўзи олиб борди. Бўлмаса пионер вожатийга ҳам топширса бўларди. Ундан олдин бир синф билан «Гамлет»ни бориб кўрди. Нимасидир дарснинг керак эмниш. Нимаси керак. Мирсалим ҳалигача тушуниб етмайди. Тўғри, «Бой ила хизматчи»га олиб борганида дарров фаҳмлаган эди: камбағалларнинг ўтмишда қандай яшаганини кўрсатмоқчи! Яна бир синфга Тупроқ қўрғон билан нураб қолган мадрасани томоша қил-

дирибди. Қўшнининг товуғи ғоз кўринади дегандек, Со-диқнинг бу оддий ишлари Мирсалимнинг кўзига уни бир пофона кўтариб қўйди, шу билан бир вақтда ғашини келтириб, рашкини уйғотди. Бир ҳафта мактабда бўлма-са ҳам ўрни йўқланмайдиган бир-икки ўқитувчининг чет-четдан «мусоғир доно» деб кесатганини ҳисобга ол-маса, кўпчилик Содиқнинг атрофида. У дарров каттага ука, кичикка ака бўлиб қолди. Мактабга тааллуқли ни-ма масала бўлса аралашади. Лекин ҳеч ким «нега сен ҳамма нарсага човлингни соловерасан?» демайди. Шун-дай бўлиши керакдай унга қўшилишади. Демак, унинг йўли тўғри: унинг изидан бориш керак, унинг бағрига кириш керак. Курмак бўлиб сув ичib туриш мумкин.

— Ҳа, айтгандай, Содиқжон,— деди Мирсалим унинг ёнига ўтираётib,— менда бир-икки китоб бор. Тарихга доир. Шуни сизга кўрсатаман, деб неча ўйлайман, ҳеч мавридини тополмайман. Кеча олиб бориб бирпас ҳор-диқ чиқариб келай десам, маърифат сайрига кетган экансиз.

Мирсалим кутганидек, Содиқ китобларга қизиқиб қолди. Лекин «диди айвонини тахмонига солдирган су-рати бўлса, китоби нима бўларди», деб ўйлади. Шундай бўлса ҳам, сўради:

— Қандай китоблар экан? Олиб кела қолмабсиз-да.

— Битта-яримтаси бу алмисоқдан қолган китобларни нима қилиб кўтариб юрибди демасин, дедим. Бири «Бо-бирнома», Қозон босмаси, яна бири Герман Вамбери-нинг «Саёҳатнома»си.

Содиқ бу китобларининг таърифини эшитгану, кўрмаган эди, жуда қувониб кетди:

— О, жуда бадавлат экансиз-ку. Қачон қўлга тушира қолган эднингиз.

Мирсалим «биз ҳам чакана эмасмиз» дегандек сал кибрланиб қўйди:

— Ишқибозли...

Содиқ «бу ҳам ичидан пишган экан-ку», деган фикрни кўнглидан ўтказди. Ҳар кимда ҳам «Бобирнома» бў-лавермайди. Содиқ «эски мактаб кўрган» бу ўртоғи билан ичida фахрланиб қўйди.

Аслида Мирсалим ростини айтмади, айтиши ҳам мумкин эмас эди. Бу иккала китоб ҳам унинг қўлига тасодиф билан кириб қолган эди. У растада қўш дўкон очиб, теридан бит семириб юрган кезлари бир зиёли ўртоғи,

«кўриб қўйинг, бизнинг боболар қанақа кишиллар бўлган», деб мақтаниб «Бобирнома»ни берган эди. То Мирсалим «мағзини чақиб» ўқигунча «савдо-сотиқ ҳуррияти» тугаб, ўша ўртоғи ҳам йўқ бўлиб кетди, кейинчалик афғонда деб эшилди. Герман Вамберини шундан илгарироқ бир рус таниши меҳмонга қўлтиқлаб келди-ю, эсидан чиқариб қолдирди. У ҳам сўрамади, бу ҳам элтиб бермади, қанақа китоб эканини биланидан сўнг бергиси келмади.

Содиқ бундай антиқа китобларни кўришга жуда қизиқиб, эрталабгача сабри чидамай, кечқурун Қодирни юборди. Кейинги вақтдаги хафақонлиги ҳалигача ёзилмаган Қодир ўтирган еридан вазмин қўзғалиб салмоқлаб чиқиб кетди. Лекин қайтишда бутун бошқа бир одам бўлиб келди. Қўзлари остига яширинган қувонч чақнаб кетай-кетай деб турибди. Содиқ яхши биладики, бундай ҳаяжон ёшликлда, фақат ёшликлда бўлади ва ёшликка яратади. Қодир ариқ бўйинга ўтиб яхшилаб ювинди, нима учундир, артиниш эсига келмай ҳовлига сув сепди, кўмкўк бўлиб униб чиқсан кашнич билан ўсмага сув қўйди, орасидаги бегона ўтларни юлиб ташлади. Ҳозир иззатли меҳмон келадигандек эшик олдиларига юпқа қилиб сув сочиб, кетидан супурди. Кейин уйга кириб ойнага қаради, кийим-бошини тузатди, оладиган куни эртага бўлса ҳам соқолини қирди. Унинг севинчи ичига сиғмас эди, бу шундай севинч эдикц бировга айтиб бўлмайди, айтганда ҳам тушуниши қийин.

У олган узугининг сувга тushiб кетган зумрад кўзини топган эди!

Қодир Мирсалимнинг ҳовлисини кўрмаган эди. Шунинг учун суриштиришга мажбур бўлди. Суриштирганда ҳам шундоққина олдига бориб сўрабди. Устига тўр тўқилган латта копток ўйнаётган иккита қизчанинг биттаси читтак чақонлиги билан югуриб келиб, бидирлади:

— Азида опамникими? Ҳу, анави кўк эшик.

Қодир кўк эшикни аста қоқди. Қиз яна бидирлади:

— Ичкарилик, қаттиқ қоқаверинг!

Қодир қаттиқроқ қоқди. Ичкаридан аёл кишининг «лаббай» деган товуши келди. Кейин эшикда.. ўша.. ўша атлас кўйлакли қиз пайдо бўлди. Ӯша... Қодирнинг адашуви мумкин эмас. Ӯша қомат, ўша қош, ўша кўз. Бу кўзларнинг тенги йўқ. Бу кўзлар бугун мавжудотнинг

барча гўзаллиги ва латофатини, камолати ва саҳоватини ўзида жамулжам қилиб турарди. Ўнда ҳаёт бор, виқор бор, унда қуёш бор, сурур бор. Бу кўзларга боқиш чун эса бир олам журъат керак. Бу тасодифдан Қодирининг ҳуши бошидан учди, тили сўзга буралмай қолди. Бармоғининг учигача жимиirlаб кетди. Нимага келгани жидан чиқиб:

— Сиз шу ерда турасизми? — деб юборганини ўзи ҳам билмай қолди.

Қиз ана шунда Қодирни таниб, ўша кундагидай ёқимли табассум билан деди.

— Ўша куни ўртоқтаримни топиб олдим, сиздан сал нарида дарс тайёрлашаётган экан.

Қизнинг товуши Қодирнинг қулогига гоҳ кирап, гоҳ кирмас эди. У бутун хаёли билан ўша боғда, ўша майса устида турар эди, шу қиз, шу қаршисида ёқимли кулиб турган қиз «олдидан ўтган қизни пайқамайдиган қанақа йигит экансиз» деб таъна қиласади.

Қодирнинг юраги ўша кундагидек бир энтикиб тушди. Ҳамон юзидан табассум аримаган қизнинг юзига тик қаради. Энди у қизга яхшилаб қараб олмоқчи, шунча интизорлиги эвазига тўйиб олмоқчи эди. Лекин бундай бўлиб чиқмади: қурби етмади! Ёниб турган қораичи кенг паттон кўзлар унинг дамини қайтарди. У чор-ночор кўзини олиб қочди, аммо ичини қандайдир илиқ нур тўлдирган, руҳида дардан ариган кишидек енгиллик бор эди. Ана шу енгиллик билан яна бошини кўтариб, сўради:

— Дадангиз уйдамилар?

— Йўқ, меҳмонга кетувдилар. Нима пшингиз бор эди?

— Мен Содиқ аканинг укаларни бўламан.

— Ҳа... — деди қиз бир нарса эсига тушгандек чақонлик билан, — китобга келдингизми?

«Бу қиз қаёқдан билади? Еки дадаси билан акам келишиб, атайнин мени юборишдими?!» деган фикр Қодирнинг хаёлига келди.

— Ҳа, топдингиз! Дадангиз айтиб кетувдиларми?

— Айтмасалар ҳам ўзим биламан! — деди Азиза ўша боғда «олдидан ўтган қизни пайқамайдиган қанақа йигит экансиз» дегандек қилиб. Бу сўздан Қодир яна тилдан қолди, яна қалби ларзага келди. Яна Азиза ўт ташлади:

— Узингиз кириб оласизми, ёки олиб чиқиб берайми? Ойимлардан бошқа ҳеч ким йўқ.

Аскарликда не-не тўсиқлардан ўтиш машқини олган, гобланган йигит, қаршисида турган кўк эшикнинг осто-насидан ҳатлаб ўтишга журъат қилолмади:

— Мумкин бўлса...

— Олиб чиқиб берайми? Хўп бўлади!

Азиза атлас кўйлагининг этакларини чиройли ҳил-пиллатиб бурилиб кетди. Қодир қанча вақт ўтганини билмайди, хазинага йўлиққан гадойдек шошиб қолган эди. Бир маҳал қиз газетага ўралган китоб билан яна ўша ўзи турган ерда пайдо бўлди.

— Кирмадингиз! Ойимлар нега ичкарига таклиф қилмадинг, деб мени койидилар,— дея эркалангансимон бир ҳаракат қилди Азиза.

Қодир қиз билан хайрлашаётib, унда ҳам тил билан айтиб бериш қийин бир ўзгариш сезди. Унинг қорачиги иирик кўзлари ажиб маъюс нурланиб, кафти ёнар, кафтида қандайдир майин титроқ ҳам бор эди. У Қодирнинг орқасидан йўл чизиб қараб қолди. Қейин ҳар вақтдаги-дек тетик шўхлик билан эмас, вазминлик билан орқаси-га маъюс ўгирилиб, тиззаларидан мадор кетган киши-дек аста қадам ташлади. Уч-тўрт одим юргач, қандай-дир ички куч уни яна орқасига қарашга мажбур этди. Ана шунда тез юриб узоқлашиб кетолмаётган Қодир-нинг кўзига кўзи дуч келди. Икки ўртада ўт чақнаган-дек бўлди. Иккисининг ҳам қинидан чиқиб кетай деб турган қалби бир-бирига эшитилгудек гурс-гурс уради.

* * *

Қодирнинг хурсандлиги кеннойиси Жаннатнинг қон қақшаган кунига тўғри келди.

Жаннатнинг шаҳарга келишидан энг катта умиди но-ми кетган докторда эди. Кимга маслаҳат солса, шу док-торнинг номини айтди. Унинг номини эшитган сари Жаннатнинг ишончи ортди. Не-не умидлар билан унинг кабинетини қоқди. Уни ўрта ёшлардаги чийратма ипдек бир хотин қарши олди. Нима учундир, Жаннат бу маш-ҳур докторни кекса, сочининг қорасидан оқи кўпроқ, кўзойнакли деб фара兹 қилган экан, ихлоси қайтгандек бўлди. Аммо доктор ўзининг самимийлиги ва зийраклиги билан унинг аввалги ишончини ўзига қайтарди. Жаннат

кўринган ва боқтирган баъзи докторларга ўхшаб шошмади, паридан-бери у ер-бу срига қулоқ солиб, ўлчаб, дори-дармонга кўчмади. «Сен излаган докторман. Умидсизланма, ҳали боладан қолганинг йўқ. Ҳали қўшалоқ ўғиллар кўрасан» дегандек, юмшоқ гапириб қаршисидаги стулга ўтқазди. Қўлидаги, илгари боқтирган докторларнинг қофозларини олиб, шошмасдан кўздан кепирди. Кейин гапин эридан бошлади. «Эрингиз аввал ўйланганми? Ўйланган бўлса бола кўрганми? Уруғида бефарзанд ўтган борми? Сизнинг-чи? Турмуш қурганингларга неча йил бўлди? Қандай касаллар билан оғригаксиз? Эрингиз яхши кўрадими? Болага меҳри қандай?»

Шундай қатор савол-жавоблардан кейин унинг ўзини кўрди. Турли кабинетларга, лабораторияларга ёзиб берди:

— Вақтида қатнанг!— деб алоҳида таъкидлади. Баъзан у кирган чоқда ўша кабинет ёки лабораторияда докторнинг ўзи ўтирган бўларди. Буларнинг ҳаммаси Жаннатга унга ширин орзуларни етаклаб келарди. У баъзан туғилажак боласига исем танлаб қолар, қандай кийимлар кийгизишни ўйлар, у билан ғойибона гаплашар, уни осмонга отиб эркалар, кулмаганига қўймай қитиқлар, қиқиллаб кулишидан завқланар, унга қўшилиб ўзи ҳам кулар, хурсанд бўларди. Бола бирпаста ёшига тўлади, туғилган куни катта знёфат қилиб беради. Бир маҳаллар таъна қилганларни албатта чақиради. Уларга «мана кўрдингларми, орқаваротдан вайсаганинглар қолди» дейди-ю, ҳаммасини кечиради, фийбатнинг бети қурсин, дейди-ю, апоқ-чапоқ бўлиб кетади. Боласини етаклаб уларникга боради, боғларга ўйнатиб олиб чиқади, айтган ўйинчофини олиб беради, синдирса ҳам, бузса ҳам хафа бўлмайди: қўғирчоқ нима деган нарса!

Жаннатнинг тушига нуқул бола кирарди. Тўргайга ўхшаб узоқдан товуши келарди-ю, ўзи кўринмас эди. «Дононинг йўталида ҳам ҳикмат бор» дегандек, доктор шамалаб ўтган нарсага ҳам астойдил ихлос қўярди.

Лекин бир неча ой ўтса ҳам тушига кирган ингани ўнгига эшиитмас, бутун нияти орзудан нарига ўтмас эди.

Қодир олтин узугининг йўқотган зумрад кўзини ногаҳон топиб, унинг завқида масти бўлиб, айтишга сўз топомай гангиг бурганди Жаннат машҳур докторнинг насиҳатниси кўзида ёш билан тинглар эди. Доктор унга «овора бўлма, сенда бола бўлмайди» демаган бўлса

ҳам, шунга яқин бир нарса айтди. Бу мёрт стаканга қайноқ сув қўйишдек гап эди. Жаннат қирсиллаб кетди. Ўнинг кўнглини қанча кўтаришмасин — бўлмади. Қодир висол дақиқаларининг завқ-шавқида эшик олдига сув сепиб, энди супураётганда Жаннат кўйгил уйи вайрон кириб келди. Остонадан ҳатлаб ўтди-ю, ҳўнграб йиғлаб юборди. Унинг йиғисини ҳаммадан аввал эшитган Адолат хола ошхонадан югуриб чиқди.

— Ҳа, болам, тинчликми?

Жаннат индамади, айвонга ўзини ташлади:

— Кошкийди туғилмаган бўлсам...

Адолат хола фаҳмлади. Деразадан бориб, уйда китобга мук тушиб ўтирган Содиққа ишора қилди:

— Чиқ. Хотинингга доктор бир нарса дедими, кўнгли бузилиб келди.

Ўзи хамир юқи қўли билан ошхонага ўтиб кетар экан, узун «уҳ» тортиб, «эй, худойим!» деб қўйди.

Содиқ елкасига ташлаб ўтирган беқасам тўнини йўл-йўлакай кийганча чиқиб келди. У уйқудан янги турган кишидек хомуш эди. Бутун фикри-зикри ҳали ҳам ўқиётган китобида ва онасининг сўзи диққатини тортмаган бўлса керак, бепарвогина чиқиб, Жанинатнинг айвон четида юзини чангallаб ётганини кўриши билан ҳушёр тортди, кўзи чараклаб, қадамини тезлатди:

— Нима гап? Бирор хафа қилдими?

— Айб сиздамас, менда! Мен ўлгурда, мен бахти қарода! — деди ўкириб Жаннат ва юзини кўрпачага босди. Содиқ гап нима тўғрисида бораётганинга тушунди, хотинининг титраган елкасидан тутди, далда берди... Уларнинг бу ҳаракатини дунё ташвишларидан ҳали бехабар Қодир узоқдан ҳайрон кузатиб турарди. Унинг шодликлари қандай тўсатдан бошланган бўлса, худди шундай бир тарзда тамом бўлди. Азизанинг эшик тубида туришини кўз олдига келтирган эди, кўнглини шодлик эмас, ташвишнамо қайғу босди. Қайғу умидсизликка етаклади...

— Ҳай, жон болам, сен китобга мунақа мукка тушаверсанг ётиб қоласан. Ухла, вақт алламаҳал бўлди, — деди бир ухлаб турса, ҳалигача ўтирган ўғлига Адолат хола. Ўғли Қодир:

— Хўп, ойижон, ҳозир, — деди-ю, жойидан қўзғалмади. Лекин бу жавобдан қаноат ҳосил қилган бечора она, нариги ёнбошига ағдарилиб, кўзини юмди. Салдан кейин унинг «киффа-пиш» деган майнин хурраги эшитилди.

Астпда Қодир дарс тайёrlаётгани йўқ, минг бир азоб билан Азизага хат ёзаётган эди. Қиз болага хат ёзишининг бунчалик қийин эканини у.умрида биринчн марта тасаввур этарди. Нима деса ҳам қўнглидаги қозғозга тушмай қолаётгана ўхшайди, нимасидир стмайди, нимасидир чатоқ. Бошлишининг ўзига қанча вақт кетди: «Севгилим» десинми, ёки «ҳурматли Азизахон!» деб мурожаат қилснми? Ўқиган китобларини эслади: бирортасида андаза олгудек намуна йўқ. Деярли ҳаммасида муҳаббат бор, лекин ҳеч биттаси хат ёзмабди. Демак, хат ёзмаслик керак экан-да! Мен ёzsам қулги бўлмасмикин? Эҳтимол, улар мендан кўра журъатли ва уддабурон бўлишгандир. Йўқ, мен ёзаман. Ёзмасам бу гапларни тилим билан айтольмайман, айтиб ҳам бўлмайди.

Адолат хола бир уйқуни олиб, ўғлини ётишга даъват этганда Қодирнинг хати ҳали ярмига ҳам бормаган эди.

5. ЎГРИ МУШУК

Мирсалим қуюқ хайрлашиб чиқиб кетгач, Жаннат эшикни зарда қилгандек тарсиллатиб ёпди. Эрига деди:

— Бир очилиб ёқсан ҳаводан, бир кулиб боқсан одамдан қўрқ деган. Мана шу ошнангиз яхши одаммас.

— Нега менинг ошнам бўларкан?— ҳазилга олди Содиқ. У хотинининг хафа бўлишига асос кўрмас эди.

— Ахир сизнинг олдингизга келади-да.

— Сенинг ҳам...

Жаннат энсаси қотгандек индамай қўя қолди. Жаннатлар кўчиб келган куни Мирсалим Содиқ билан станцияга машина олиб чиқсан, куйиб-пишиб кўмаклашган эди. Ана шу биринчи кўришдаёқ жибилажибонга ўхшаган бу тиниб-тинчимас одам Жаннатнинг кўзига эски таниш, ҳар кўрганда ғашини келтирадиган танишдек кўринди. Шу-шу уни иқи севмайди. Эшикда кўринди дегунча таъби хира бўлади, сўзлаб турган бўлса сўзи оғизда қолади, юзидан кулгиси қочади. Содиқ шунда:

— Ҳа, бунча? Сенга бир нарса деяётгани йўқ-ку?— деб тегишади. Жаннат ростига кўчади:

— Ўзим ҳам билмайман, нега бунаقا бўламан. Ўгри мушукка ўхшайди.

— Сенинг нимангни ўғирлайди, тентак! — кулди Содиқ.

— Билмасам... — ўз фикрини исбот қўлолмай бўшаши Ҳаннат. Лекин, барибир, кўнглида қори эриса ҳам музи қолади.

Содиқ ҳам Мирсалимнинг талай нуқсонларини кўради, «нуқсонсиз одам борми?» деган ақида билан пâрво қўлмайди. Ундан кейин, кишининг узатган қўлини сабабсиз қандай қилиб қайтаради. Мирсалим ана шу қўл, бу улкан шаҳарга «мусоғир бўлиб» келганда илк марта дўстона узатилган қўл. Бунинг устига, Мирсалимдан яхшилиқдан бошқа нарса кўргани йўқ. Ҳатто «Домовая книжка»дан ўтишдек серқатнов ишга ҳам Содиқнинг қўлини урдирмади, «сизнинг ишингиз эмас бу», деди, икки кунда тўғрилатиб келди. Шундай одамни «меникига келма, хотиним ёқтирамайди сени» деб бўладими? Бунинг устига, у билан ўтиrsa ҳар бир жонда бўладиган турмуш ташвишидан қутулганга ўхшайди, енгил тортади. Мирсалим, мактаб илмий мудири айтгандек, «бутун шаҳарни билади, ярми ё дўсти, ё қариндоши» эди. Содиқ етти ухлаб тушига кирмайдиган қизиқ гапларни ундан эшигади.

Мирсалим бўлса Содиқнинг мавқеи қанча ошса, шунча яқинроқ сўйкаларди. Дарси бирор соат олдин тугаб қолса, бир нарсани баҳона қилиб айланниб юрар, кейин Содиқ билан бирга узун-қисқа бўлиб чиқиб кетарди. Унинг феълини биладиган ҳазилкашларидан бири «Мирсалим aka сирғанса оёқ тираб қолишга жой тайёрлаяпти!» деса, бошқаси «йўқ, соябон дегин, ёзда кундан, қишида ёғиндан асрайди», деб кулгига оларди. Тажрибали бошқа бирори нечукдир, кулгига қўшилмайди, «охири бахайр бўлсин, ишқилиб», дея салмоқларди.

Бугун ҳам Мирсалим ўралашиб, кетолмай қолди. Содиқ дарсдан чиқиб, бўр юққан қўлини ювар экан, қошига борди:

— Калхатни боллабсиз-ку! — деди. Содиқ бошида тушумади, кейин мамнун илжайди:

— Бекорчиликка эрмак.

— Эрмагингиш шунаقا бўлса, астойдил ҳаракат қилсангиз арслоннинг ҳам терисига сомон тиқар экан-сиз-да. Жуда боллабсиз. Худди тиригининг ўзи-я!

— Сомон тиқиши қўлимииздан келади,— кулги билан жавоб қилди Содиқ. Йккиси қотиб кулишди. Айниқса

Мирсалимники баланд чиқди — деразада ўтирган муси-
ча ҳуркиб учди.

Гап Содиқнинг зоология кабинетига ясаб берган кал-
хат чучелоси ҳақида борарди. Содиқ бундан бир неча
кун аввал овга чиққан эди. Ҳеч нарса йўлиқмади. Қуруқ
кетмай, деб калхатга ўқ узди. Калхат ҳам «мен сенга
керакми?» дегандек шалоплаб шундоқ оёғи остига туш-
ди. Ўқ қаерига текканига қизиқиб қўлига олди. У ёқ-бу
ёғини қаради, дарров тополмади, лекин қўлига қон юқди.
Ўқ шундай теккан эдикни, тажрибали овчи Содиқни ҳай-
рон қолдириди. Гарчанд шундан кейин бир неча тустовуқ
отган бўлса ҳам калхатни ташламади. Хотини Жаниат-
га кўрсатиб мақтанди. Чивиндай ўқ заррасидан ҳалок
бўлган, териси бутун калхат Содиқни яна бир фикрга
олиб келди: чучело қилиб мактаб зоология кабинетига
қўйса нима қиласди? Ахир қўлидан келади-ку!

Худди шундай қиласди.

Мирсалим Содиқ билан бошлишиб кўчага чиққач,
мақсадга кўчди:

— Хўп десангиз, бир жойга борардик. Сизни менга
тайинлаган.

— Қанақа жой?

— Борганда биласиз! — Мирсалим чап кўзини қочи-
риқли қисиб қўйди. — Кўнглингизга яна бошқа гап кел-
масин, ҳаммаси ҳамкасабалар.

— Кимники, айтинг-чи аввал?

Мирсалим Содиқнинг иккиланганини пайқаб, отини
қамчилаб қолди. Каерда ва кимники эканини бутун таф-
силоти билан тушунирди, ўз одатича, бир озгина қў-
шиб-чатди:

— Ёмон бўлмайди, мамнун қайтасиз. Мен сизни но-
жўя ерга бошлармидим. — Ўз дўстлигини писанда ҳам
қилиб қўйган Мирсалим то Содиқ розилигини бергуни-
ча отини суруб борди.

— Хотинлар ҳам борадими? — аниқламоқчи бўлди
Содиқ. Мирсалим бу томонини ўйламаганидан шошин-
қираб қолди. У хотини билан бошлишиб юришни яхши
кўрмаса ҳам эл-юртдан кетда қолмай деб, «хўжакўр-
син»га баъзан етаклаб қоларди. Бугун-ку, хаёлига ҳам
келтирмаган эди. Шундай бўлса ҳам тадбирини қиласди:

— Олиб борсак бўлади, ўзи ҳам «оиланглар билан»
деган. Аммо «лекин»и бор...

Содиқ тушунмади.

— Ўғланинг беш ёшга кириш ақидаси... Жаннатхонга қандай бўлар экан... Майли, олиб бора қолинг.

— Йўқ, нотаниш жой. Жаннат ҳам кўнмайди.

Содиқ «тош тушган ерига оғир» деб ўйлади-да, қаттиқ туриб олди, кўнмади. Лекин уйига келиб, кундалик газеталарни кўздан кечиргунча бўлмай, эшик тақиллаб қолди. Чиқса, ёшгина бир йигит. Унга хат узатди. Хат район маорифининг мудиридан бўлиб, мудир уни Мирсалим таклиф қилган хонадондан ёзган, унинг шу йигитча билан бирга келишини илтимос этган. Мудирнинг имзоси ёнинг уй хўжаси ҳам «рад этмаслигинги зига ишонамиз» деб имзо чеккан эди. Содиқ ҳайрон бўлиб қолди. Буни Мирсалим уюштирганини тушунди. Энди нима деб боради? Бормаса месиммаган бўлади. Борай деса, Жаннатга: «Овқатингни барвақтроқ қил, парка чиқамиз»,— деб қўйган. Бир оз ўйлаб тургач, жавоб кутиб турган йигитчага ҳозир!» деди-ю, ичкарига кириб кетди. Жаннатга хатни кўрсатди.

— Боринг. Бормасангиз уят бўлар,— деди Жаннат.

— Парк-чи?— Содиқ «сен ҳам борасанми?» дейиншга, Мирсалимнинг бояги сўзини эслаб, ботнмади.

— Парк бўлса, бошқа вақтда чиқармиз.

Хотинидан истиҳола қилиб турган Содиқ енгил тортиди, тезгина кийиниб чиқди. Эрининг кишиликка киядиган шимини чўткалаётган Жаннат оғзига тахир нарса чиқиб қолгандек юзини буриштириб деди:

— Ҳойнаҳой Мирсалим aka ҳам бўлар... Кўп ичманг!

Содиқ келганда жамоат жам эди. Қаршисига илк қанот ёзиб пешвоз чиққан киши яна Мирсалим бўлди. Кўпдан кўришмаган кишидек қўйини олиб, кейин бошқалар билан таништириди. Ёнидан жой берди. Бир оздан кейин ўрта ёшлардаги ва ҳаётда ўзини тутиб олган уй бекаси ошхонадан очиқ юз билан чиқиб келиб, миннатдорчилик билдириди:

— Раҳмат! Сўзимизни ерда қолдирмабсиз. Қелин қани? Эй, аттанг! Шу баҳона билан танишиб олардик. Янаги галга қолибди-да, ҳа, майли! Майли! Мушарраф! Мехмонга қара!

Содиқ бир ёнида ўтирган аёлга энди разм солди. Узномини эшитган қўшнини сиполик билан унинг олдига турли таомларни яқин сурган бўлди, таклиф этди.

— Олинг, Содиқ aka, сиз қеч келдингиз,— деди. Мирсалим ароқ қўйиб узатди:

— Штрафи билан.

Содиқ Мирсалимнинг сўзини эшитмади. Унинг хаёлини ёнидаги қиз — Мушаррафнинг «Содиқ ака!» дегани тортган эди. «Бу қиз менинг отимни қаёқдан билади?» деган ўйга бориб, ўзидан сўради.

— Шунаقا дейишяпти-ку! Ё исмингиз бошқами?— деди Мушарраф ва исмини янгиш айтиб қўйган кишидек қип-қизариб кетди, кўзини олиб қочди.

— Йўқ, тўғри!— деди Содиқ уни хижолатдан чиқармоқчи бўлиб, лекин шу оснода Мирсалим тутган ароқ тўла рюмкани қанақа қилиб қўлига олиб қўйганини билмади.

— Оқ урасиз!— деди Мирсалим нимадандир жуда мамнун бўлиб.

Содиқ чумоли уясига тушиб қолган пашшага ўхшарди: улкан балх тут остида безатилган дастурхон атрофида ўн беш чоғлик эркак-хотин аралаш ўтиришибди, ҳамманинг кўзи унда. Содиқ узр айтар, бошқалар эса қистар эди. Унинг кам ичишини билган Мирсалим ҳам ёнига тушмас, аксинча, «қўзингизни юмиб, битта симирангиз, вассалом!» деб қораشاқшақдек шақиллаб турарди, бир қўлида закуска. Чорасиз қолган Содиқ бир симириди-ю, ҳаммага тенг бўлди-олди, янги келганини, кишиларнинг унга тикилаётганини унутди. Кейин кўп қатори яна бир-икки ҳўплади. Ҳеч ким ортиқча маст бўлмаса ҳам, ғовур-ғувур авжида эди. Бу маҳалларда энди расм бўлган патефон Тамарахонимнинг «Рўмалим» ашуласини янгратганда ҳамма жим бўлиб қолди. Фақат уй эгасининг эри сал кайфи ошиб, бу пластинкани Москвадан олиб келиш тарихини эзмалик билан қўшнисига тушунтиарди.

Содиқ сўхбатнинг боришидан билдики, бу бежирим ҳовли елиб-югуриб хизмат қилиб турган ўрта ёшли, удабурон ўқитувчи Собирахонники. Беш ёшга кирган ҳам унинг ўғли. Эри уч йил аввал ичкуёв бўлиб кирган. Иккинчи эр. Қаердадир гаражда ишлайди.

Содиқ гоҳ қаршисидаги, гоҳ ёнидагилар билан гаплашиб ўтиrdи. Ёнида ўтирган Мушаррафнинг ўта сиполиги унинг диққатини тортди: шунча зўрлашса ҳам оғзига олмади. Лимонадга қўшиб вино узатишган эди, билиб қолди. Қандай билганига Содиқ ҳайрон бўлди. У жуда зийрак эди. Баъзан ўрнидан чаққон туриб уй бекасига қарашди, «опа! опа!» деб ундан нималарнидир

сўради. «Опа» тўладан келган, юз-кўзи ҳали кўркини йўқотмаган думалоқ юзли жувон. Мушарраф бўлса, акси — юзи ориқ ва узунчоқ. Фақат лаби устидаги холи ҳуснини очиб туради. Лекин Содик Мушаррафни ориқ деб, хато фикр юритганини ўйин бошлангандаги билиб, лабини тишлади. Биринчи бўлиб ўйин бошлаб берган Собирахон ҳовлини бир айланиб келиб Мушаррафни ушлади. То уни кўндиргунча, патефон пластинкани чалиб бўлди. Собирахон югуриб бориб, пластинкани қайта қўйиб келди-да, Мушаррафни тортиклилади:

— Тур, оповси, бу ерда бегона йўқ, ҳаммаси ўзимизники.

Содик Мушаррафнинг нималигини ана шунда кўрди. Кўрди-ю, кишининг юзи қанчалик алдамчи эканига тан берди.

Шундай қизлар бўладики, юзларига қарасангиз, чуваккина кўринади, оёклари чиллак оёқ бўлса керак, деб гумон қиласиз, ортиқча қизиқмайсиз. Кейин бир маҳал кутмаганда қадди-қоматига кўзингиз тушиб қолади. Қомати шундай чиройли, келишгаи бўладики, ўз кўзингизга ишонмайсиз. Шундай келишган қадди-қомат ориқ юзли қизники эканига шубҳа қиласиз, пайт пойлаб юзига қарайсиз. Йўқ, ўшанинг ўзи! Ана шунда у янгича ҳусн кашф этади, латофат пайдо қиласи.

Мушарраф худди шундай қизлардан эди. Буни ўзи яхши билар, керак жойда келишган қадди-қоматини на-мойиш қила оларди. Мушарраф ёлғиз қадди-қомати билан эмас, лаби устидаги кичик — мошдек тимсиёҳ холи билан ҳам фахрланарди. Унинг унча чиройли бўлмаган юзини очиб турган ҳусн калити шу хол эканини биларди. Уни яна ҳам қорароқ қилиб кўрсатиш учун баъзида икки қатор инжудек оппоқ тишларини кўрсатиб, табассум қиласи.

Мушаррафнинг ёшини аниқлаш қийин эди: йигирмада деса ҳам бўлади, ўттизда ҳам. Йигирма десанг — ихчам юз бичими, бу юзга յрашиб тушган қора хол кафиллик беради, ўттизда десангиз — бўйнига тушган сезилар-сезилмас майда ажин ва кўзининг остидаги сўлғинлик гувоҳликка ўтади.

Уялиб, тортиниб ўртага тушган Мушарраф, гарчанд астойдил ўйнамаётган бўлса ҳам, гоҳ-гоҳ мақомга тушиб қолаётган қўл ташлаши ёки бош қимирлатиши

унинг яхши ўйинчилигидан далолат бериб турарди. Буниг Собира опа луқма ташлаб тасдиқлади:

— Ёзилиб ўйнай бер, синглим!

Барибир Мушарраф ёзилиб ўйнамади. Музика охирiga етиб қолганда тўрда, маориф мудирининг ёнида ўтирган чиройли жувонни тутди. «Вой ўлмасам!» деб ўзини олиб қочган бу кўркам жувон қий-чувдан кейин ўртага тушишга мажбур бўлди. Ўйинни қийиб ташлади. Лекин унинг ўйини Содиқнинг кўзига Мушаррафнинг муғомбirona қўл ташлашидек чиройли кўринмади. Бу чиройли жувоннинг мақомида ҳаммаси ошкор, ҳаммаси эл кўзида. Мушаррафникида эса, нимадир яшириқ, нимадир сирли, нимасидир ўзига тортиб, юракни жизиллатиб турарди.

Содиқ ўйинчи жувондан кўзини олиб, Мушаррафга разм солди. У хомуш ва сипо ўтиради. «Унинг ўтириши ҳам ўзгача», деб қўйди кўнглида. Бир маҳал иккаласининг кўзи учрашиб қолди. Мушарраф яна ўшандай сиполик билан олиб қочди, уялгандек қимтиниб қўйди. «Буниси ҳам ўзига ярашади», деди ичиди Содиқ.

Унинг бутун ҳаракатларини Мирсалим зимдан кузатиб турарди. Содиқнинг Мушаррафга маҳлиёлиги пайтида:

— Ҳа, Содиқжон, чапакни олинг!— деб унинг тиззасига шапатилаб туширди. Бу билан «қўймайсиз, иним» демоқчи, ўзининг сезиб турганини билдириб қўймоқчи эди.

Содиқ бу луқмадан хижолат тортиб, қулоғигача қизарib кетди. Мушарраф эса, ўтирган ўрнидан ҳеч нарса билмаган кишидек оғир туриб, орқа томонга ўтиб кетди...

Зиёфатдан қайтиб келаётганда Мирсалим кайфи бор кишидек тусмоллаб, Содиқнинг қўйнига қўл солди:

— Қалай, Мушаррафнинг ўйини ёқдими?

— Қим ўзи?

— Яқинда келган. Ўқишида экан.

— Нимадан дарс беради?

— Собирахоннинг мактабида кутубхоначи. Боодоб жувон дейишади!

— Жувон бўлса эр қилган экан-да!— кутилмаганда чапани ҳазиrl қилди Содиқ.

— Шу ёшгача эр қилмай ўлдими! Йигирма бешларга бориб қолгандир.

— Ҳа, боргандир.

Сұхбат узилди. Қаршидаги новча терак учидаги катта ёруғ юлдуз ҳали-замон ерга шўнгіб кетадигандек пирираб чарақлади. Узоқдаги шаршаракнинг овози, баргларнинг шилдираши бемалол эштилади. Юмшоқ тун киши хаёлини олиб қочгудек сокин. Содиқ бунақа тунни умрида биринчи марта кўраётгандек, ёки эртага такрорланиши асло мумкин бўлмагандек яйраб-яйраб нафас олар, узоқ-узоқларга назар ташлар, атрофига суқланиб боқар эди. Бўғилгандек ёқасининг тугмасини ечди, кўкрагини очди.

— Ажойиб тун,— деди Содиқ.

— Жуда! Бунақаси кам бўлади!

Содиқ индамади, яна ўз ўйига банд бўлиб кетди. Мирсалим зимдан кузатиб борарди: «Содиқ бугун кўп ичиб қўйиб ё қаттиқ чарчади, ё Мушаррафга кўнгли сув ичди». Унга шу кейингиси керак эди. У ўсмоқчилади:

— Собирахоннинг мактабини биласиз-а, анҳорнинг нариги бетида.

— Кўрганман. Яхши спорт зали бор.

— Кутубхонаси ҳам яхши,— мийиғида кулди Мирсалим. Содиқ бу қочириқни фаҳмламади.

— Бўлса бордир.

Бугунги зиёфатдан Содиқда ширин бир таассурот қолган эди. Ана шу тотли таассурот оғушида мамнун келиб, эшигининг зулфини қоқди. Лекин нима учундир уйга киргиси келмас, орқага қайтиб кетгиси, кенг дала-ларда кўкрагини очиб, бор товуши билан ашула айтиб юргиси келарди.

— Бунча шу вақтгача қолиб кетмасангиз. Зиёфат қуюқ бўлди шекилли,— деди Жаннат эшикни очаёттиб.

Унинг қулоғига Жаннатнинг товуши умрида биринчи марта қандайдир дўриллаб, хунук эштилди.

«Нега шу вақтгача буни пайқамаган эканман?»— деди ечиниб, ўрнига кирап экан.

6. ИККИ ДИЛЛИ ВА ИККИ ТИЛЛИ ОДАМ

Собирахон зиёфатга таклиф этар экан, Мирсалим:

— Мушаррафхон, албатта, бўлса керак?— деб сўради. Чунки уларнинг «опа-сингил» эканини яхши билар-

ди. Бу кутимаган саволдан Собирахон ҳайрон қолди. Мирсалимнинг навбатдаги ҳазили деб, тегиши:

— Нима бало, жигарингиздан урдими?

— Урса арзимабмизми?!

— Арзийсиз, ундан ҳам ёшроғига арзийсиз? Мўйчи-накка жабр бўлади холос, гоҳ оқини, гоҳ қорасини тера-вериб.

— Бўяймиз-қўямиз, вассалом!— Мирсалим бўйинни ичига олиб қаҳ-қаҳлаб кулди.

Мирсалим Мушаррафни суриштирганда маълум режани кўнглидан ўтказиб қўйган эди.

Содиқ янги кўчиб келган кезлари уларнинг боласи йўқлигидан Мирсалим ажабланмади. Бир қизга кўнгли тўлмай, ўғил армонида ёниб юрган Мирсалим «дунёда ўзидаң ҳам баҳти қора, худонинг қаҳрига учраган кишилар» борлигини кўриб, шукур қилди. «Яхши куёв кўрсам, шу ўғлим-да!»— деб ўзига тасалли берди.

Лекин Мирсалим бир нарсага тушунмас эди: армон билан ўртаниб ётган бу бефарзанд оила нега бунчалик тинч-тотув яшайди? Бу тинч-тотувлик Мирсалимнинг кўзига ғайри-табиий кўриниб ғашини ҳам келтиради. Бирор ёнган оловда исинишга мойиллик Мирсалимнинг табиатида бор. Лекин буни у яхшиликнинг елкаси оша қиласарди.

Мирсалим аввалига бу «мусоғир оила» билан алоқани пухталади. Меҳмонга айтиб, меҳмонга борди. Меҳмонга боришида хотинига нимта қилиб бериб, ўзи бир жуфт конъякни қофозга ўради. Бу билан хотини кекка-йиши, ўзи мағурланиши керак эди. Дастурхон устида ўзининг баҳтиёрлигини яна бир марта намойиш қилиш учун атайнин бола-чақадан сўз очди:

— Қиз бўлса ҳам бори яхши экан. Мана бизнинг қизимиз онасининг ёнига кириб қолди, уйда бўлса қўлинни совуқ сувга урдирмайди.

Мирсалимнинг тахминига кўра, Жаннат қаттиқ ўқисиши, ўзининг баҳтсизлигидан нолиши, шу билан Мирсалимнинг ғайир кўнглига ором бериши керак эди. Бундай бўлиб чиқмади. Жаннат, кўчадиган яра кўчиб бўлган, ҳар нарсага тегиб зирилламайдиган бўлган бир тарзда гапга аралашди, меҳмоннинг иззатини сақлади:

— Қизздир, ўғилдир, бўлгани яхши. Ҳозирги пайтда ўғил ёққан чироқни қиз ҳам ёқади. Қизинглар яхши, кўриб ҳавасим келди.

— Ўқишини айтмайсизми! Нуқул беш. Тўрт олган куни биз айбордек қовоқ-димоғидан қор ёғади, овқат унут, то саҳар чироғи ўчмайди. Қайта топширади-ю, кўнглига кун тушади.

— Ҳа, айланай, бўладиган бола шунаقا бўлади. Чироғини ўчирсанг, ойдинга солиб китоб кўради. Менинг Қодирим ҳам шунаقا.— Гапга аралашди «Жонболач хола».

Мирсалим яна «олтин қоп»нинг оғзини очиб, мақтанишга тушган эди, хотини стол остидан оёғини босди: «Бас, қалга ўхшаб олтин тароғингизни мақтайверманг!»

Мирсалимнинг хотинига Жаннат ёқиб қолган эди: оғир-вазмин, рўзғор тутиши режали, гап-сўзи маъноли. Шунинг учун эрининг ўтмас болтага кунда тушира бериши ғашини келтирди.

Мирсалим бўлса, «кўриб қўй, мана бунаقا мушфиқ оиласлар ҳам бор дунёда!» демоқчи, бу билан ҳамиша «ҳаётидан нолийдиган» хотинига ўз баҳтиёр турмушини таъкидлаб, миннатдор қилмоқчи эди. Лекин акси бўлиб чиқди. Хотинининг бу оиласга меҳри ошиб, ҳаваси келиб қайтди:

— Мунча аҳил! Бир-бирига муомалаларини кўринг. Боласизлик демаса... Сиз бўлсангиз... сўзингизнинг боши отамнинг гўри...

Мирсалим «ҳақиқатни тушунмаган» хотинидан куфури ошиб кетди:

— Эй лаънати, қачон сенга ақл битади, бу аҳиллик эмас, ғарибу бенаволик.

Мирсалимнинг иккита тили бор эди: бири кўчага, бири ўйга. Ҳозир шу кейинги тили билан гапирмоқда эди. Бу тилнинг бир томчиси бир чеълак сувни заҳарлашга етарди.

Содиқникида ипакларга ўраб пуф-пуфлаб кўкка кўтарилган қизи Мирсалим ўғил кутганда тугилган фарзанд эди. Бувиси раҳматли бераҳм ўғлига ўчакишиб, «қизим азизу мукаффара мабъуди!» деб, исмини Азиза қўйган эди. Ширин кулиб, шўх талпинадиган бўлгунча Мирсалим уни қўлига олмади.

— Ҳой, бемеҳр дадаси, қўлингизга бир мартагина олсангиз-чи, талпинишни кўринг. Ўйингизга этагимда олиб келмаганман-ку!

Мирсалим оғирлик билан «бас!» дегандек хўмраярди. Болани қўлига оларди. Дунё ташвишидан бехабар

бала гурунч доналаридек қўшалоқ тишларини кўрсатиб, қиқ-қиқлаб кулар, дадасининг бино қўйиб, тараалган мўйлабини юлиб олмоқчи бўларди.

— Бунинг ҳалитдан эркакнинг мўйлабига чанг солади... — деди Мирсалим кулиб. Унинг сўзи тугамасдан хотини илиб кетди:

— Ҳа, бўлмаса кўзига чанг солсинми?!

Мирсалим хотинининг устомонлигини тани олди. Хотини ўзи чеккан жафоларига ишора қилган эди.

— Ҳа, ўл! Сенга тилдан берган.

— Тилим бору йўлим йўқ. Остонада сиз турибсанз!

«Хотинни бошидан, болани ёшидан кут!» деган ақидага итоат қилиб яшаган Мирсалим хотинини инқилобдан кейин социдан бураб, ҳовлида судраб юриб урмаса ҳам, ё пичоқни қайратгани, ёки болтага соп солдиргани югурмаса ҳам зуғумини сусайтирмади, зулмнинг ўринини ўзгартирди, холос. Ўринга кирганда тонг отгунча йиглатади, сирдош кишилар олдида жеркиб, силтаб ташлар, бегона олдида хўмрайиб «ҳали сен тўхтаб тур!» дея давомини кечасига қолдирарди. Шундай қилиб, хотинини қайнириб олди, шохини букди. Бунинг устига хотинининг тили қисиқ ери бор эди. Азизадан олдин кўрган қизи ёшига етмай ўлган бўлса, ундан кейин кўрган иккала қизи ҳам нобуд бўлди. Биттаси ўлик тушган бўлса, биттасини энди «ойи»га тили келганда қизамиқ еди. Кейин боладан қолди. Боладан қолишида ўзидан кўра ҳам, аслида Мирсалим айбдор эди. Инқилобдан кейин НЭП даврида, унинг ўз тили билан айтганда, «савдо-сотиққа әркинлик» берилган йиллари Мирсалимнинг ошиғи олчи туриб, теридан бит семириб қолди. У чўнтагида ҳам, бу чўнтагида ҳам жиринг-жиринг пул. Тили бурро, қадами тез. У «ҳой» деса, икки-уч киши бирдан «лаббай» дейди. Ана шунда у босар-тусарини билмай қолди. Бир ҳамсоя дўкондор ўртоғиникида бир конъяк ичди-ю, мазаси оғзида қолди. Унга хуруж қилди. Конъяк эса бузуқ хотинларга олиб борди. Олдинига жуда ширин туолган бу ҳаром бир куни уни қон қақшатди. Бу касални у бир ой қўшни шаҳардаги ўртоғиникида «меҳмон»га бориб ётиб, зўрға пулнинг зўри билан даволаб олди. Бу сирни ўзи-ю, у билан бирга оғриган бир ўртоғи биларди. Ўртоғи шу касалдан ўлиб кетди. Мирсалимнинг эса, бу касал пуштини куйдириб юборди. Шундан кейин ҳам Мирсалим хотинига ён босмади, аксинча, уни қизғанадиган

бўлиб қолди, аввалига эри бўлгани учун кутса, энди бегонага кунчлик қилди, «деразангни кўчага очиб берайми!» деб ўдағайлади.

Савдо-сотиқ тўс-тўполони босилиши билан Мирсалим зийраклик қилиб, муаллимликка урди. Бундан аввал ҳам бу соҳага бош сукқан, фамилиясининг охирига «ий» қўшиб, афандилик қилган эди. Энди фамилиясининг сўнгига «ов» қўшди. Эски танишларидан биронтаси «Мирзоҳидий» деб қолса, «қолоқсиз», даврдан кетда судралиб юрасиз» дей кулади. Ўзи ҳам сипо тортиб, инқи-лоб бўлиши биланоқ «маърифат йўлига жон бағишлаган илфор муаллим»дек зиёли тўнига кирди. «Мутолаага вақт кам қолаётганини» пеш қилиб, кўп дарс олмади. «Илм тоғдаги дўлана эмас, ўзи гуллаб, ўзи пишса, у анжир. Парвариш талаб этади»,— деди. Аслида пинҳона савдо билан шуғулланарди. Савдодан келган фойдани она сутидан ҳалол кўрарди.

Мана шу йиллардан бошлаб уйига ҳам ислоҳ киритди. Шаҳарнинг анави томонидаги кичик ички-ташқи ота ҳовлисини ворислар билан ими-жимида бир ёқлик қилди. «Мен меросга муҳтоҷ эмасман, ота-онам арвоҳи бетинч бўлмасин, шу эзгу иш қиёматга қолмасин, деб қўл урдим»,— деди ворисларга ва мероснинг карт думбасини шарт кесиб кетди. Шаҳарнинг ҳозир турган еридан жой қилди. Ёпиқ қозон ёпиқлигича қолди. «Савдо-сотиқ эркинлигин»да орттирилган давлат латтага ўраб, пўлат қутичада уйнинг тахмони остига тайинлик қилиб кўмилди. Бу «кўргуликлар»га хотини сабабчидек, унинг енгидан тортиб келиб, ғазаб аралаш деди:

— Кўриб қўй, лаънати, иссиқ жонман... Мендан кеин тўрва осиб кўчага чиқасанлар шу бўлмаса!

— Ҳа, мунча! Аввал сиз ўласизми, менми? Миннат қилмай гапиринг!

— Миннат эмас, кўриб қўй дейман!

— Ҳа, кўрдим!

— Ҳеч миннатдор бўлмас экан-да, бу хотин зоти!

— Худо хайрингизни берсин, битта мен учун бўлса...

Ҳеч ким очидан ўлаётгани йўқ.

— Товуқ бўлиб гўнг титасанми?

— Юрт-эл нима бўлса шу!

— Қизинг-чи! Бошида бир тутам сочи-ю, оғзида ўттиз иккита тиши билан биронникига кириб борадими?

— Пешонасидағини кўради! Олтин ўрага солгандан кўра, олтин бахтини сўранг.

Мирсалим қаҳ-қаҳ уриб кулди:

— Бахт — пул-да, жинни! Биласанми, пул нима? Кишиларнинг оёғи тагидаги пружина, сакратиб юргизади. Пули бор фармон билан, пули йўқ армон билан яшайди.

Мирсалим хотинининг эски паранжисини эл кўзи олдида баралла куйдириб ташлаган бўлса ҳам, сандиқдаги қўш банорас паранжини шамоллаттириб туради. Хотинини тежаб кўчага чиқаради. Унинг ўз сиёсати бор: бир иш қилгудек бўлса олдинга ҳам ўтиб кетмас, энг кейинда ҳам қолмас эди. Олдинга ўтиб кетса, «эскилик тарафдорлари»дан, кетда қолса замон зарбидан қўрқарди. Хотинининг паранжи ташлаши, саводсизлар курсига чиқиб ўқиши шу «сиёсат»га амал қилиб олиб борилди. Табнатан қувноқ ва ўйинқароқ, тили бурро ва чаққон хотини давр билан қадам ташлашни истар, баъзан эридан шуни талаб қиласарди. Шунда Мирсалим жеркиб соларди:

— Нима, этагингда менга ўғил олиб келмоқчимисан?

— Ҳамма кўчада юрганлар этагида бола олиб келяптими? Уялинг!

— Олиб келаётган бўлса сен қаёқдан биласан?

— Биламан: кўзим кўр, қулогим кар эмас. Бино қўйганингизнинг биттаси Мулла Нормат эди. Хотини фаришта, кўча бетини кўрмайди, тўпигидан юқорисини оврат тутиб жиякли иштон кияди, дердингиз. Охири нима бўлиб чиқди. Яхши кўрган йигити билан қочиб кетди.. Ҳа, айтгандай, қиличдек ўғил туғиб олибди.

— Ҳаром!— деди бу мушкулот ўз бошига тушгандек Мирсалим.

— Ўз ота-онасига ҳалол. Сизнинг қизингизга совчи қўяётгани йўқ.

— Бир ками шу эди! Уял ёлғиз қизингни шунақаларга тенг кўргани.

Хотини эҳтиётсизлигидан лабини тишлади: у, албатта, кўзининг оқу қораси, биттаю битта қизини шундай жойга келин бўлишини истамас эди!

Мирсалим яқинигнагача хотинини бир қариидошидан қизғанарди. Рашки келди дегунча ё пичоқни қайратгани, ёки болтага сол солдиргани югуради. Ўзи эса ўл-

гудек суюқ, ўз хотинидан кўра бегонага кўпроқ қулиб боқарди. Бир йили томоғидан илинди-ю, кейин нафаси ичига тушиб кетди. Бу бир бегона хотиннинг унга ёзган хати эди.

Эр хўрлигини тоза тортган хотиннинг қўлига бу хат тушгач, Мирсалим ўтиргани жой тополмай қолди. Бисотидаги бутун сўз санъатини ишлатиб, хотиннинг оёғига йиқилди, ўн қатор йирик марварид олиб беришга ваъда берди, қўлига кузур чиқсан ўйинчидек хотини бўш келмас эди.

— Йўқ, олтин косадан қон ичадиган бўлса, менга унинг кераги йўқ. Улар бўлсам ўлдим. Ҳозир мактабингизга олиб бораман, ҳаммага жар соламан. Кўрсин! Билсин! Бу юмшоқсупургининг қанақа найранглари бор! Дод, бу кўча хандон, уй зинданнинг дастидан! Ҳаромдан қайтмайди-ю, яна пинҳон намоз ўқиганига ўлайми! Бу қандай бедодлик, қизининг бўйи етиб келяпти-ю, отаси ўйнаш тутади!

Мирсалим бир энлик этидан тушиб, бу ҳодисани аранг босди, онт ичди, кўз ёш тўкди. Лекин хотин хатни бермади, «жонинг менинг қўлимда» дегандек яшириб қўйди, у сал қуюшқондан чиқди дегунча эсига солади. Стол тагидан унинг оёғини босиш ҳуқуқини ҳам шундан кейин олган.

Бугун ҳам хотини шу ҳуқуқдан фойдаланиб, Содиқникида йўрғалиб кетаётганда тизгинини тортиб — оёғини босиб қўйган, буни Мирсалим тезгина тушуниб, тилини тийган эди.

Бир ҳафтадан кейин Собирахон зиёфатга айтар экан, лоп этиб Мушарраф эсига тушди. Бунинг сабаби бор эди. Чунки Содиқникига ўша кейинги боришида Жаннатнинг «ўғри мушук» деганини эшик орқасидан эшишиб қолган эди. Хотин кишининг гапидан сиркаси сув кўтармайдиган Мирсалим ичиде «тўхтаб тур, сен қисирни» деб яниб, Жаннатни отгани ўқи, кўргани кўзи йўқ эди. Бирдан эсига унинг туғмаслиги тушди-ю, енгил тортгандек бўлди, гўё чигал ипнинг йўқотган учини топгандек яшнаб кетди. Мушаррафни эслади.

Мушаррафни у жамалак сочли пайтидан яхши биларди. Бу маҳалда Мирсалим фамилияси охирига «ний» қўшиб мактабда дарс берарди. Мушарраф унда ўқир эди. Ўз ҳусни ва дуркунлиги билан синфдош қизлардан лолақизғалдоқдек ажралиб турган Мушарраф Мирса-

лимнинг диққатини тортди. У пайти-пайти билан гап ташлаб юрди, сал муваффақиятни пеш қилиб, ўртоқла-ри олдида мақтади. Лекин Мушаррафнинг қулоғига эса «бу мақтовларни оқлаш керак, синглім» деди, ёрдам берди: баъзан ўқишидан кейин олиб қолиб қўшимча дарс ўтказди, унинг фазилатларини юзига айтиб миннатдор қилди.

Мушарраф эсини таниб «бир нарса»га фаҳми етади-ган бўлган кундан бошлаб, ота-онасининг хоҳиши билан эр қилган қизлардан «мушук болага ўхшайсанлар, кимнинг этагига соловорса индамай кетаверасанлар», деб кулиб юрарди. Узи ажойиб эр топиб, ҳамманинг оғзини очириб қўйишни қасд қилган эди. Унинг онаси барвақт вафот этган, отаси бошқага уйланган, инқилобдан кейинги йилларда ўз мавқеидан қўрқиб, чет элга зудлик билан қочиб кетаётганда холаси «бу менинг қизим, болалигида эмизганман», деб олиб қолди, иссиқда еллиб, совуқда пўстинга ўраб катта қилди. Эркаксиз хонадоннинг эрка қизи талтайиб улғаймоқда эди. Мирсалим уни қўзининг остига олиб, ёмон ният билан яхшилик қилиб, қўшимча дарс бериб, пайт пойлаб юрганда Мушарраф дуркунгина қиз эди. Эрталаб туриб, ойнага қараб, ўз ҳуснининг фазилати билан қувониб, нуқсони билан ўксиб юрган чоғ эди.

Мирсалим озми-қўпми Мушаррафнинг ишончига киргач, қўшимча дарсни бир куни уйига кўчирди. Мирсалимнинг лофиға учиб, ҳаммадан кўра яхши ўқийдиган бўлишни ният қилиб юрган Мушарраф, бу гал уникидан қон йиғлаб қайтди: Мирсалим унинг қўйини пуч ёнроқ-қа тўлдириб, номусига тегиб қўйган эди!

Бу ишнинг қанчалик даҳшат эканини Мушарраф Мирсалимнинг ўзини четга олиб қоча бошлаганидан кейин сезди. Чунки Мирсалимнинг «хотинимга кўнгилсизман. Уни қўйиб, сени оламан», деганлари ёлғонлиги билиниб қолган эди. Мушарраф унинг ёқасидан тутди. Ноchor қолган Мирсалим аввалига ялиниди, сабр қилишини илтимос этди, ҳамма билиб кетмасин, деб уни мактабдан олиб, хотин-қизлар билим юртига киритиб қўйди, охири катта бир мукофот эвазига ёқасини унинг қўлидан қутқариб қолди. Мушаррафнинг энди рози бўлишига бошқа сабаб ҳам бор эди. Қайси бир шаҳардан келиб, квартирада туриб ўқиётган қош-қўзи қоп-қора, барваста йигитни яхши кўриб қолган эди. Йигит дутор

чаларди. Мушарраф эса, музикага ишқибоз эди, ўрганишга уқуви йўқ эди. Йигитнинг моҳирона дутор чертиши уни маҳлиё қилиб қўйған эди. Йигит бир кун «дуримга ўйнаб бер!» деб қўймади. Мушарраф қараса бўлмайдиган. Дуторчининг кўзини шоҳи рўмолчаси билан боғлаб қўйиб, ўйнаб берди. Ўз навбатида дуторчи йигит ҳам унинг кўзини боғлаб қўйиб ўпди. Ҳазил билан бошланган ўйин Мушаррафнинг иккита болали хотини бор экан. «Итдан бўлган қурбонликка ярамайди» деди-ю, эмизикил болани ташлаб кетаверди. Уқишни давом эттириши энди мумкин эмас эди. Турли ерда ишлаб юрди, кейин қисқа муддатли кутубхоначилар тайёрлаш курсига кирди. Ўни тугатиб, узоқ районда бир неча йил ишлади, «қор ёғди, из босилди» қилиб ўтган йили яна қайтиб келган эди. Гарчанд Мирсалимга энди даъвоси бўлмаса ҳам, барибир Мирсалим ундан ҳайнқиб юрарди, унинг эр қилиб, тинчиб кетишини истарди. Шу мақсадда уни Содиққа таништирган эди. Таништириш олдидан Собирахон орқали уни тоза пишитган, ҳатто ўзига бир хат ёзиб, пухталаб қўйган эди. Шусиз ҳам бу кезларда Мушарраф тавбасига таянган кишидек ўзини сипо тутиб, тақдиридан нолиб юрарди. Чунки бир эмас, икки бор шўхлик қилиб тили куйган, эндигисини бошлашга юраги дов бермас эди. Собирахон ийлаб юмшатган кўнгли кутмаганда Содиқдан фойнбона сув ичиб қолди. Орқаваротдан суриштириди: у ёмон эмас, минса ҳам бўлади, олдига солиб юрса ҳам бўладиган. Ахир қачонгача бева юради, бевани туюнинг устида ит қопади...

Мирсалим Мушарраф билан иккисини қамти қилиб кўрди. Дон олишуви ёмон бўлмади. Содиқнинг кўнгли қандай? Ёши улгайиб қолган одамнинг қони тез совийди. Қечаги ўтириши, сукланиши кайфники эмасмикин? Йўқ, бу суҳбат — чақилган гугурт бўлди. У ўчиб қолмасдан устига тутантириқ қалаш керак, токи туриллаб ёнсин. Тирноққа зор бўлса, ёнади! Мушаррафнинг кўз сузиши ҳам ёмон бўлмади. Бир қизчалик позу таманно-

си бор. Содиқнинг багрига чўғ ташлади. Бўлмаса, Содиқ, у ййнаган пайтида бунчалик маҳлиё бўлиб қолмас эди. Бундан фойдаланиб қолиш керак.

Бу режасининг ўзига нафи тегадиган томони ҳам бор. Содиқнинг қадам олиши бошқаларнига ўхшамас, узоқса кетадиган кўринади. Ана шунда Мирсалимнинг ўтирадиган тўнкаси баланд ва пухта бўлади-ку. Мабодо, фарзанд кўриб қолса борми, Мирсалимнинг бу яхшилигини то қиёмат эсдан чиқармайди!

Шуларнинг ҳаммаси Мирсалимни зуд билан ҳаракат қилишга даъват этарди. У кечиктирмади. Эртасига пайт пойлаб, Содиқни холи учратди. Гапни яна ўтиришнинг ёққан-ёқмаганлигидан бошлаб, бир учини Мушарраф томонга эгиб келди.

— Яхши ўтди,— деди Содиқнинг сўзини тасдиқлаб Мирсалим.— Руслардан хотин-қизлар билан бирга ўтиришни ўрганганимиз ёмон эмас. Баъзан дилинг тортганига гап ташлайсан. Умуман, мажлисга руҳ киритади.

Содиқ нимага имо-ишора қилаётганини сезса ҳам, жавоб бермади. Мирсалим очиқ ҳужумга ўтди:

— Айниқса сизнинг ёнингиздагиси сутга чайқагандеккина эди.

— Исми нима, Мушаррафиди?

— Ана холос, дарров кимлигини ҳам эсингиздан чиқараёздингизми? У бечора ҳаммани унутиб, сизга қошкўзини сузиб ўлди-ю, сиз бўлсангиз... Кўйинг-э, бунаقا бепарво муносабатда бўлманг, бечорага жабр қиласиз.

— Жабр қилмаслик учун нима қилишим керак?— деди Содиқ ҳазил қилиб.

— Бир марта «аканг айлансин!» деб сочини силаб қўясиз-да, вассалом!

— Шу етадими?— яна тегишди Содиқ.

— Етмаса... яна бирор чораси топилиб қолар! Ўзи ҳам шу кунда жуда кўзга яқин бўлибди: суйса суйгундай, куйса куйгундай. Билмадим, кимнинг бахти-да!

Мирсалимнинг тахмини тўғри чиқди. Қанча тегизиб гапирмасин, Содиқ тузук бир қаршилик кўрсатмади, кўрсатишга ҳам ожиз ўхшарди. Дадаси «уйлантириб қўяйми, ўғлим?» деса, «ўзингиз биласиз, дадажон!» деган гўл боладай бўйнини солиб тураверди. Шундай пишиқ, кўпни кўрган кишининг дарров әгилиб келиши

Мирсалимни «бечора, бир турткига муҳтож бўлиб юрган экан» деган фикрға келтириди. Вақт топиб уларни биринки «тасодифан» учраштириди.

Аслида Содиқнинг кўнгли Мушаррафдан сув ичib қолган эди. Шундай бўлса ҳам оила Жаннатнинг таклифи билан кейинги кунларда фарзанд асрашга қарор қилган эди. Буни эшишиб, Мирсалимнинг капалаги учуб кетди. Энг яқин кишини ўнгланмас хатодан қайтараётгандек куйиб-ёниб, исботга кириши:

— Бу ишингиз хато! Мутлақо хато! Бировнинг боласини асраш — белидан куч-қуввати кетган одамнинг иши! Худога шукур, ҳали сиз ёшсиз, пушти-камарингиз бутун, белингиз тўла бола. Донолар «етим қўзи боқсанг оғзи-бурнинг ёғ этар, етим бола асрасанг оғзи-бурнинг қон этар» деб бекорга айтмаган. Саттор бойваччанинг ҳангомасини эшийтдингизми? Қизи асранди эди-да! Унашиб қўйган жойида, очилиб қолиб, куёв айнаб кетди. Минг қилганда ҳам бегона бегона-ю, ўзингники ўзингики! Бўлмаса, Саттор бойвачча ўзи емай едириб, ўзи киймай кийдириб, қофоздаги қантдай боққан эди. Йўргакда олиб асраган эди-я, бечора. Кишилар ёмон! Эгри ишни эллик йил ўтса ҳам унутмайди. Энди нима бўлди. Қиз номусга қолди, Саттор бойваччанинг боши ҳам! Дунёда шундан ёмони йўқ! Ҳа, Содиқжон, шу томонларини яхшилаб танангизга ўйланг. Саттор бойваччанинг куни бошингизга тушганда пешонангизга урганингизнинг нафи йўқ, унда кеч бўлади.

Илоннинг оёғини санаган Мирсалим Содиқни шунаقا авраб ташладики, бечора лом-мим деёлмай қолди. Унинг исботига шак келтиролмай:

— Хўш, нима қил дейсиз? — деганинч ўзи ҳам билмай қолди.

— Бошқага уйланинг! — деди шартта Мирсалим. — Мана Мушарраф, қаршингизда кокилини ёзиб турибди. Ёмон эмас, неча оғиз солганга йўқ деган эмиш. Сизга майли борга ўхшайди. Ажаб эмас қўшалоқ ўғил туғиб берса! Шунча тортган ғам-ғуссаларингиз эсингиздан чиқиб кетади. Эй, Содиқжон, киши дунёга бир келади, пушти-камар ҳам ҳар вақт бирдай туравермайди, унинг ҳам охири бор! Оёғи катта сиғганни, оёғи кичик севганни кияди. Сизнинг севиб киядиган пайтингиз, кийиб қолинг-да!

Мирсалим ҳамма нарсани арчилик шафтолидай Со-

диқнинг оғзига солиб қўйған, унинг «қилт» этиб ютишигина қолганга ўхшарди. Масаланинг бунчалик енгил кўчиши Содиқнинг қалбидағи чўғни чақнатиб юборди. Унинг хаёли беихтиёр яна Мушаррафга кўчди. Унинг чой ҳўплашидан тортиб, келишган қадди-қоматини кўз-кўз қилиб юришигача, момиқ қўлларини мулоимгина узатишидан тортиб, хандон солиб кулишигача — ҳаммасини тарозига солиб кўрди. Мирсалимга узил-кесил бир нарса демаган бўлса ҳам, ундан яшириб Мушарраф билан кўришди.

Мирсалим эса ҳар дуч келганда Содиқнинг қўлтиғига сув пуркай бериб, тобига келтириб олди. Энди Содиқ Мушарраф билан ҳар кўришганда ундан бир фазилат топар, ҳар сўзидан бир ҳикмат қидирар эди.

— Қишилар қиз олиш учун хотинини қўйди, дейиш масмикин?

— Қизиқмисиз? Одамларнинг сиз билан қанчалик иши бор! Суриштирдим: беш кунгина эр қилган экан.

— Нега беш кунгина?

— Уни ўзидан сўрайсиз! — зарда қилгандек деди Мирсалим ва баланддан келди. Чунки Содиқнинг қармоққа юрагининг қоқ ўзгинасидан илинганига шубҳа қилмас эди.— Қиз бўлса... деб бир таънадан қўрқасиз, беш кунгина умр қилган экан, десам, яна ҳадиксирайсиз. Станциянгиз борми ўзи!

Содиқнинг нафаси ичига тушиб кетди.

— Эй дўстим, Содиқжон, азизим,— деб яна таърифа тушиб кетди Мирсалим.— Ёш хотиннинг нимасини айтасиз! Қаҳратонда писта кўмирил сандалга жийла данаги тутатиб ўтиргандек маза бўлади. Биласизми, Содиқжон, бурунги замонларда одил подшо қариса, ёшга уйлантиришар экан. Сабаб: ёш хотин эрни ўшартишар эмиш. Киши ёши улғайған сари асални яхши кўради, айниқса сиз билан бизнинг ўшда жуда кетади. Ёш хотин ҳам мисоли асал. Оғзингда таъми қолади. Чакирганингизда «лаббай, акажон, шу ердаман, нима ишингиз бор эди», деб бедана юриш қилиб, қошингга келишига нима етсин! Ноз қиласа ярашади, йиғласа ҳам кулаётгандек ҳузур қиласан киши!

Мирсалимнинг гапи Содиқнинг қулоғига кирмас, у Мушаррафнинг фикр-хаёли билан банд эди. Унга қарши оғиз очишдан ожиз эди.

7. ЖАННАТНИНГ КЎЗ ЁШЛАРИ

Машҳур доктор «мана, паттангни ол, сенда бола бўлмайди» демаган бўлса ҳам Жаннат ўзича тушунган, энди фарзандсиз ўтар эканман, деб йиғлаб қайтган кундан бошлаб, Содиқ билан иккисини боғлаб турган оила ипининг жуда ингичка тортиб қолганини, кичик бир эҳтиётизиз ҳаракат орқасида узилиб кетишини сезиб, юраги беziллаб юради. Содиқ Собирахонникидаги зиёфатдан ширакайф қайтиб хотинининг «бунча шу вақтгача қолиб кетмасангиз! Зиёфат қуюқ бўлди шекилли?» деган гапига жавоб қайтармасдан, индамай ўтиб кетиши шу ингичка ипининг яна таранг тортилиши эди. Эри ўзгарган эди. У шу кечадан кейин қайтиб ўзига келмади. Қамган, ўйчан бўлиб қолди. Фарзанд асраш ҳақида гап очилгандан бир оз ён босиб келган бўлди-ю, яна индамади. Шунда Жаннатнинг юраги яна бир зирқираб кетди.

Содиқ ўзининг ўзгарганини сезар, Жаннатнинг кузатиб юрганини билар, қийналар эди. У Жаннат билан шундай ажралиш керакки, бу қўйди-чиқдининг оқибати кўнгилсизликка бориб тақалмасин.

Пайшанба куни ишдан қайтаётib, юраги сиқилди-ю, ўйлда жиндай вино ичди. Ҳар кунгидек онаси, Қодир, Жаннат билан кечки овқатга ўтирди. Лекин унинг безовталигини Жаннат сезди. Сезди-ю, индамади. Содиқнинг кўзига кўринмасдан алланималар билан ошхона томонда ивирсиб юрди. Қоронги тушиб, Адолат хола чироғини ўчириб ётгандан кейин, уйга кириб келди. Индамасдан чироқни ўчириб, ўринга кирди. Бирпас жим ётди. Кейин Содиққа ўтирилиб, гап бошлади:

— Сиз ўзингизни ортиқча қийнаманг. Ҳамма гапдан хабарим бор. Мен сизнинг ўмрингизга зомин бўлмайман. Мен бир кунимни кўриб кетарман.

Жаннатнинг бўғзига қандайдир думалоқ нарса тиқилгандек нафаси бўғилди...

Содиқ қоронгида кўринмаса ҳам унинг йиғлаётганини сезиб турарди. Айни вақтда унинг кўз ёш тўкишига ўзи сабабчи эканини билганидан, шошиб қолди.

— Йўқ... йўқ... мендан яширманг. Мен розиман. Мен рози!

Жаннат ўриидан туриб, ташқарига чиқиб кетди. Эшик олдида нам бурнини кетма-кет икки марта тортиб қўйди.

Содиқнинг Жаннатга қанчалик раҳми келмасин, ма-саланинг бунчалик енгил кўчишини кутмаганидан, ган-гиб қолди. Жаннатнинг кетидан чиқишини ҳам, чиқмас-лигини ҳам билмади. Чиқса, уни овутиши керак, «ҳамма-си ёлғон, сен ишонма» дейиши керак, чиқмаса раҳми ке-лади, шунча йиллик қадрдони, умрида бирон марта хафа қилган эмас. Ўрнидан аста туриб, деразадан қаради. Ҳовли ёруғ. Ариқ бўйидаги ўрик ости қатиқ тўкилғандек олаачалпоқ ойдин. Ана, ўрикнинг шохи тепасида чарақ-лаб турган юлдуз шўнғиб кетди. Ундан қолган олов из-дан ўрик шохининг учи чақилган гугуртдек ловиллади. Жаннат ариқ бўйида, орқасини уйга қилиб ўтиради. Юзини муздай сувга ювган бўлса керак, бошидан пешо-набоғини олиб, соchlарини текислади. Салдан кейин ўр-нидан туриб орқасига қайтди. Содиқ дарров ўрнига ки-риб, ҳеч нарса билмаган кишидек кўзини юмди. Қўлида пешонабоғи билан хомуш кириб келган Жаннат уйнинг ўртасида бирпас тик туриб қолди, пешонабоғини танғи-ди. Кейин ўринга кириб, Содиққа орқасини ўгириб ётди.

Эртасига ҳамма гапни қайнанасига айтди. Адолаг хола учун ўғли ҳам, келини ҳам қўлларининг бармоғига ўҳшарди, қайси бирини тишлиласа оғрирди. Шунинг учун Жаннатни юпатар экан, ўғлининг шаънига тегадиган бир нарса демади. Ўғлини оқлаб, келинининг хунибий-рон бўлиб турган қалбини ҳам тирнамади. У Жаннатдан хурсанд ва мамнун эди: келин бўлса шунчалик бўлардида! Лекин ўғлига ҳам жони ачирди, унинг бефарзанд ўтишини истамас эди. Эшиқдан ҳориб-толиб кириб кел-ганда «дада!» деб бўйнига осиладиган, бутун чарчоғи-ни ёзиб, кўнглини чоғ қиладиган бирор фарзанди бўлма-са қийин. Ўзининг ҳам невара кута-кута кўзи тўрт бўлди. Тўртта хотин бир ерга тўпланса, «келинингизнинг бўйи-да бўлмадими?» деб сўрашгани сўрашган!

Шулярнинг ҳаммасини хаёлидан ўтказган «Жонбо-лам хола» айни ҳеч бирига қўйишни истамади. У яхши-ликдан бошқа нарса кўрмаган одамга қилинадиган чу-кур самимият билан Жаннатга деди:

- Пешонангиз, болам...
- Бирор жой толгунимча шу ерда тура тураман, ха-фа бўлмайсиз,— деди Жаннат.
- Қаёққа борасиз, жон болам, мен сизни ҳеч қаёққа юбормайман. Аввал келиним бўлсангиз, энди қизимсиз. Қизсиз эдим, қизли бўлдим. Ё Содиқ бир нима дедими?

— Йўқ, у киши ҳеч нарса деганлари йўқ. Мен ўзим рухсат бердим.

Адолат холанинг хўрлиги келди. Кўзига ёш олди. Кўнглида «эй, худойим, бир тирноқни аямасанг нима қиларди шу бечоралардан!» деди. Келинини бағрига босди. Иккиси туғишган она-боладек аччиқ йиғлашди.

...Жаннат Мушаррафнинг ҳомиладорлиги сезилгунча, Адолат хола ёнида қолди, орқа эшиқдан кириб-чиқиб турди. Кейин ўзи билан бирга ишлайдиган мураббиянинг уйига кўчиб кетди. Энди Адолат хола ҳам индамади. Фақат у эшиқдан чиққач «бечора!» деб қўйди, кўзинга ёш олди.

* * *

Кўчада Мирсалимнинг хотини Жаннатни учратиб қолди. Унинг эри билан ажралишганидан хабардор эди. Кўнглини сўради. Кутілмаган жавобни олиб, гангиб қолди. Жаннат дардини кимга айтишини билмаган одамдек асабий титраб, аламини сочди:

— Ҳаммасини қилди-қилди Мирсалим ака қилди. :Эримни йўлдан урди. Бу дунё-ю, у дунё икки қўлим у кишининг ёқасида. У кишига ҳам худонинг кўрсатадигани бордир! Кўрсатмаса асти розимасман! Эримда айб йўқ. Баҳтига тузуккинаси бўлса майли-я! Суюқоёқроқ деб эшитаман.

— Вой, дарров уйланяптилар ҳамми? Кимга?

— Эрингиз айтмадиларми, боши-қошидалар-ку!

— Эрим ўлсин, мошхўрдага қатиқ бўлмай! Қаҷон кўрсанг бирорни туйнуғида боши. Жувонмарг, ўз аравангни тортсанг-чи, бирор билан нима ишинг бор!

Мирсалимнинг хотини кўнгил сўраганидан ҳам хижолат бўлди. «Кўча хандон, уй зиндан» эрининг қилиқларини билса ҳам, бу сирдан бехабар қолган экан. Жаннатга раҳми келиб, эрини оғзидан қўймай ўхшатиб қарфади, кўзига ёш олди, уни юпатди. Хайрлашаётуб, яна эрини қора ерга киритди:

— Бу юмшоқсупурги ўлгур, нега эрингизга бунақа елим бўлиб ўляпти, девдим-а, тагида бир балоси бор экан-да! Қув-да, жувонмарг, менга ҳам сездирмапти. Содиқ акамнинг ўзлари ҳам дум бериб турган эканларда, дарров хўп дебдилар-қўйибдилар.

— Билмадим!.. — бўшаши Ҙаннат. Чиндан ҳам у масаланинг бунчалик тез ҳал бўлиб боришидан бехабар, тўғриси, ҳайрон эди!

Хотини кириб келганда Мирсалим бозордан олиб келган учта пўстдумбанинг иккитасини тозалаб, сувга солиб қўйган, уччинчисини ариқ бўйидаги толга қоқилган михга илиб энди тозалашга киришган эди. Хотини эшикдан тўғри унинг олдига бўрди:

— Ҳой, менга қаранг, тўғри йўлингизда юрсангиз бўлмайдими? Бироннинг уйи билан сизнинг қанчалик ишингиз бор. Ҙаннат қарғаб ўляпти!

Мирсалим «Ҙаннат» исми аралашгандагина гап нима тўғрида бораётганини фаҳмлади. Бугун у жуда хурсанд эди. Пишпакка юборган моли омон-эсон етган, шериклари «айни вақтида келди» деб хабар қилишган эди. Бу хушхабарнинг чўтали сифатида бугун бозор айланган, пўстдумба харид қилган эди. Хотинининг «дағдағаси» барибир унинг руҳини туширмади, лекин эҳтиёт чораси кўришга чақирди. Агар ҳозир хотинига баланд келмаса, балога қолади. Унинг жон калити бўлган «машҳур хат»ни ишга солиши, шармандасини чиқариши мумкин. (Бу лаънати хатни йўқ қилиб ташлай, деб шунча қидиради— тополмайди!)

— Нима! — деди дағдаға билан Мирсалим ва қўлидаги личноқни зарб билан ариқ бўйига санчди, ирғиб ўрнидан турди. Хотини ургани турди, деб қўрқиб кетди.— Кўчада бирор хотин қўйса ҳам мен айборми! Тилни тийсин!

Хотинининг нафаси ичига тушиб кетди. Мирсалим баланд келиб, хотинин силтаб ташлади, айбни Содиқнинг ўзиға ағдарди:

— Ёш хотинни кўнгли тусаган у киши-ю, мен айбормишиманми! Ажабо! Сен нега у манжалаки билан кўришиб юрибсан! Гаплашгани ўша қисирдан бошқа одам топмадингми?

Хотини индамасди. Биладики, бундай пайтларда унга бас келиб бўлмайди. Ҳозир эркак — авра, хотин — астар, деб турган пайти. Яъни авра ҳеч қачон астардан юқори бўлмагандек, эркак хотиндан ақл ўрганмайди. Бир дўқ билан попуги пасайган хотини ўзича пўнғиллаб қўйди:

— Ҳамма эркакларнинг аҳволи шу: ёшроғини кўрса, илиқади-қолэди. Ҙашнатхон қаңдай жувон эди!

— Бас қил, сендан гап сўраётганим йўқ. Нега сенга

алам қиласди, икки туғиб бир қолганингми! Қисир хотинни деб бефарзанд ўтсинми!

Хотин индамасдан уйга ўтиб кетди. Мирсалим «енгдим!» деб, ариқ бўйига санчилган пишоқни олиб, сувда чайқади:

— Ҳой, онаси, мана буни тузлаб қўй!— деди тоғора-чадаги тозаланган пўстдумбани ўзидан нарироқ суреб.

Хотин ҳали аламидан тушмаган эди, деразадан товуши келди:

— Ёв келдими, тузланар!

Бу гал Мирсалим индамади.

8. ҚАРҚИНОҚДАН ЧИҚҚАН БУЛБУЛ

Қодирнинг мактуби Азизанинг баҳмал гулни кўрганда ҳаваси келиб, узиб ҳидлайдиган бўлганидан бери эркак кишидан олган биринчи хати эди.

Хатнинг қўлига тегиши ҳам қизиқ бўлди. У институтдан хурсанд қайтарди: бугун уйидагиларга билдирамасдан ёзилған танца тўғарагининг илк машғулотига қатнашган, «ўрганиш жуда қийин бўлса керак» деб ваҳима босиб юрган танцанинг илк ҳаракатларини ўрганган эди. Бу дастлабки муваффақият лабига қандайдир ашула қўндирган, шуни трамвайдан тушиб хиргойи қилиб келарди. Бир қиз бола қаршисидан чопиб келиб, олдида тўхтади: «Мана шу хат сизга экан, ҳув анави амаким бердилилар»,— деди. «Қайси амакинг?»— деган эди, қизча чопиб келган томонига қараб лабини тишлаб қолди. «Вой, қочиб кетибдилилар», деб йиғлагудай бўлди. Азиза хатни олишга мажбур бўлиб қолди, олмаса қизчанинг йиғлаб юбориши мумкин эди. Қизча ёлғон гапириб, хижолатга қолган кишидек: «Рост, ҳу анави теракнинг ёнида турган эдилар. Сизга ўҳшаб қўлларида папкалари бор, бошларида шапкалари...»— деди. Азиза қизчани хижолатдан чиқариш учун хатни олиб, «менинг бошимда шапкам йўқ-ку» деб кулди. Қиз ҳам кулди. Орқасига хурсанд чопиб кетатуриб яна бирдан тўхтаб, бақириди: «Аналар, ана. Ўзларни келяптилар».

Қодир йўлкадаги қатор теракларининг панасида келмоқда эди. Азизанинг унга кўзи тушиши билан ток юргандек бўлди. Қизча билан гаплашган чоқдаги хушнудлик ўринини қандайдир номаълум қўрқув олган, бу қўрқув рангига таъсир қилиб, қонини қочирган эди. Қодир

етиб келиб, Азизадан кўра дадилроқ бир алфозда саломлашди. Иккиси ҳам саломдан кейин ерга қаради. Азиза нинг қўли портфелининг бандини мушукдек тирнарди, Қодир эса чўнтағидаги дастрўмолини зўр бериб ғижимларди. Ғижимлашдан тўхтаб, уни шартта қисди-ю, гап бошлади:

— Кечирасиз, Азизахон, бирор кўриб қоладими деб қизчадан...

Шу сўздан Азиза тетиклашди:

— Ҳозир кўрмайтганмикин? Ўтиб турганлар «биров» маслигини қаёқдан биласиз: манг, олинг-да, ўз қўлингиз билан бошқатдан беринг? Нималар ёзгансиз? Жуда қалин-ку.

Азиза чўнтағига қўл тиққан эди, Қодир хатини рад этиб қайтиб бераётгандай шошиб қолди.

— Майли, майли, тура берсин. Бундан кейингисини...

— Ие, ҳали яна ёзмоқчимисиз? Шоирмисиз, мунча ёзишини яхши кўрасиз.

...Қодир ҳафсаласи пир бўлиб уйига қайтди. Кечаси билан ажриққа ағанаб чиқди. Баланд дорга осилиб қўймадими? Хат ёзмаган бўлса ҳам гўрга эди! Ҳаммага кўрсатиб, «мана, аскар йигитнинг аҳволи» деб масхара қилиб юрса-я. Ҳеч хомлигим қолмас экан-да! Хўп, кўнглинг кетган экан, аввал суриштир, йигитсан, дадил босиб бор. Тилинг билан шарт-шарт айт, қўй, вассалом! Хатга бало борми!

Минг хил хаёллар билан мияси ачиб кетган Қодир, қандай қилиб ухлаб қолганини билмади. Бир маҳал қараса, тепасида ойиси турибди:

— Тур, болам, бугун ухлаб қолдинг-ку. Танинг соғми?

Қодир апил-тапил кийиниб, институтга чопди. Бугун кечагидан енгил, ширин орзулар руҳини эркалар эди. Ана шундай ҳолат икки жуфт дарс ўтгунча вужудини қоплаб турди.

Охиригина дарснинг қўнғироғи унинг қулоғи остида чалингандек жуда қаттиқ эшитилди. Юрагини ҳовучлаб ташқарига чиқди-ю, хатда тайинланган жойига боришини ҳам, бормаслигини ҳам билмай қолди. Оёғи орқага тортса, юрагининг аллақаерида бир кичкинагина илмоқ-қа илиниб турган куч олдинга ундар, йўлига нур сочгандек бўларди. «Нима бўлса ҳам бораман, тайин қиллимми, бораман! Рост гапга таъна йўқ!»

Қодир тайинлаган жой Азиза: «Олдидан ўтган қизни пайқамайдиган қанақа йигит экансиз»,— деган ер эди.

Қодир боғнинг дарвозасини кўриши билан бир энти-киб кетган бўлса, тайинланган ерга яқинлашган сари юрагининг уриши тезлашди, ўзини босиш учун жимилилаб гулларга оқаётган ариқдан икки ҳовуч муздай сув ичди. Сув ҳовуруни босиш ўрнига, тер бўлиб бетига тепди, буриқтириб юборди...

Шундай ташвишлар билан етиб келган жойда ҳеч ким йўқ эди. Фақат эгри-буғри бир нечта излар бор.

Азиза у кутмаган томондан, ердан чиққандек бирдан пайдо бўлиб қолди. Юзи тўла таббассум эди. Қўл узатиши билан гинасини сочди:

— Шунақа вақтга тайинлайсизми! Етиб келгунча ўпкам оғзимга тиқилди. Ҳаммани ўзингизга ўхшаб уч паргина ўқийди дейсиз-да, а? Қўшимча бир пар ўлгурнинг ярми ордона қолди. Сизни деб, бир соат кейин доктор бўладиган бўлдим.

Қодир узр сўради, унинг узрини қабул қилмагандек Азиза яна ўпкалади:

— Бир соат бўлса ҳам, ўзим олдинроқ инженер бўлай дейсиз-да, а? Бўлиб бўпсиз! Бундан кейин бунақаси кетмайди. Яна шунақа вақтга тайинлассангиз, ўзингиз чўпингизни чайнаб ўтира берасиз, мен дарсимни тугатиб келаман.

Чиндан ҳам Қодир Азизани кутиб, сап-сариқ қуруқ ўтни беихтиёр эрмак қилиб тишлаётгани устига у келган эди. Шу гапдан кейин хижолатда бир четга улоқтириди.

Азизанинг эркин гапиришлари унинг шубҳаларини бир зумда кучли шамолдек учирив кетди. Қиз кўпдан синашта бўлиб қолган кишиси олдига келгандек ўзини бемалол тутар, гини қиласи ҳам олди. Бу унинг табиати эди. Мактаб илмий мудири Содиққа «қарқиноқдан булбул чиққан» деганда, Азизанинг ана шу хислатларини кўзда тутган эди. Бу хислат унинг болалигидан бор. «Азизу мукаррам бўлади», деб Азиза номини берган марҳум бувиси ўзи кўзи очиқлигига на отаси, на онасига бийлатди. Ўзи юваб, ўзи таради, ўз ёнида олиб ётди. Қиз онасига тортиб, шаддод бўлиб ўсади. Отаси онасига ўхшатиб, шохини синдириб, қайириб олмоқчи бўлган эди, бувиси йўл қўймади, «бигина қиз ҳам сенга ортиқчалик қилиб қолдими!» деб баланд келди. Сал эсини таниган-

дан кейин Азизанинг ўзи бошвоини бермай қўйди. Бу вақтда қазо қилган бувининг ўрнини она босди, бобишлилаб эрига бийлатмади. «Кўйинг, ўқисин, яйрасин, ҳам қизимиз, ҳам ўғлимиз»,— деди баъзан ёлвориб. Бу вақтда илмли ўзбек қизлари идораларда кўриниб қолган, ўз тақдирларини ўз қўлларига олиб, эркакларга «қани, менинг жойимдан нарироқ сурилинг», деб дадил даъво қиласди. Мана шу нарсалар таъсир қилдими, ёки қизининг ўзи ҳақини талаб қилиб олганиданми, ҳарнечук, Мирсалим ҳар вақтдагидек бақириб-чақириб болтанинг дастасига ёпишмади. Ўзига қўйиб берди, лекин босгани изига тўрт кўз бўлиб турди. Кўрдики, Азиза шўх бўлгани билан одоб доирасида, ўғил болалар билан чумчук боласи қидириб теракларга чиқса ҳам, бекинмачоқ ўйнаса ҳам, қувлашса ҳам, ҳақини юборадиган эмас. Ҳатто болалар ундан ҳайиқишиади, эр болалар уни эмас, у болаларни йўл-йўриққа солаётганга ўхшайди. Мактабда-ку, ўқиши яхши, лекин сал тўполончилиги ўқитувчиларни баъзан ранжитарди. Бир куни фарзанддан тили куйган бир муаллим ўртоғи Мирсалимга нолиб, «фарзанд бўлса сизнинг Азизангиздек қобилиятли, пишиққина бўлса экан» деб қолди. Бу хушомад Мирсалимга жуда ёқиб кетди, «менинг бола тарбия қилишимни орзу қиладиганлар бор экан», деб лабининг таноби қочди. Азиза эркин ва шўх ўсади. Бўйи чўзилиши билан бир оз ҳаё тортиб, қуолган бўлса ҳам, барибир ўзи айтган ернин кесади, деганини қилдиради. Тўққизинчи синифдалигига онаси бир куни совчи келганини айтиб, ҳар қандай қиз ҳам уйига совчи келса фахрлангандек, Азиза ҳам хурсанд бўлар деб ўлади. Йўқ, аксинча, Азиза совчини юмма талаб берди, энди келса косов олиб қувшини айтиб, кетидан нима учундир жиндай йиғлаб ҳам қўйди. Шунча кунчлиги билан Мирсалим: «Аёлдан пайғамбар чиқидими! Шаҳар олиб берармиди?»— деган гапларга қулоқ солмади. Азиза ўнинчини битиргандан кимдир «шундай аълочи ўқишини давом эттирмаса, отонасига лаънат келади» деган бўлса, яна бири Мирсалимнинг ўзига: «Бир қизингиз ўнта ўғилга арзийди, доктор қилинг, яхши ҳунар»,— деди. Мирсалимнинг ўқитиши нияти йўқ, «керак бўлса эгаси чаласини ўқитиб олар» деган фикрда эди. Шунча гапдан кейин гангиг қолди. Ўқитмаса, «тушуниб туриб, ўз қизини уйга ўтқазиб қўйди» деган таънага қолади, ўқитай деса, барибир

бировнинг ҳасми, кундан-кун хархашаси кўпайялти. Да-даси ўй-ўйлаб, охирига етгунча Азизанинг ўзи масалани ҳал қилиб қўя қолди. Медицина институтидан анкета кўтариб келди, консультация кунлари жадвалини кара-воти тепсига осиб қўйди. Мирсалим «бу қандай бўлди?» деган эди, хотини «ўзидан сўранг» деб жавоб берди. Ўзидан сўраган эди: «Докторликдан яхши ҳунар йўқ дунёда» деб фахрланди, китобини кўтариб, имтиҳонга тайёрлаингани бир ўргончиликга кетди. Мана у севган институтининг дастлабки курсида.

— Институтда ўқищ қизиқ бўлар экан,— деди Азиза портфелини ликиллатиб. — Муаллимлар гапириб-гапириб чиқиб кета берар экан. Сўраш йўқ. Такрорлаш йўқ.

— Ҳаммасини битта қилиб кейин сўрашади.

— Мен мактабдагига ўхшаш бўлади, деб юрар эканман. Қизиқ.

Азизанинг очиқлиги Қодирни ҳам тилга киритди. Лекин, бари бир, ташабbus Азизанинг қўлида эди. У севган йигитнинг эмас, қадрдои ўртоғининг олдига келгандек тортинмай ўтирас, гап-сўзларини ҳам тарозига солмасдан, пардозини келтирмасдан дангал гапириб юбора берарди.

Қодир аслида шўх қизларни яхши кўради, рус қизларнинг эр болалар билан апоқ-чапоқ бўлиб яйраб юришларига ҳаваси келар, «бизниkilар қачон шунаقا бўлишар экан», деб кўнглидан ўтказиб қўярди. Азиза ўша қизларни сал-пал эслатиб туради. «Лекин ўшалардай шўхлиги беғуборми? Бирорта чаққон чалиб кетмагани!»— деб ўйлади у. Бошини биринчи марта дадил кўтариб, Азизанинг юзига узоқ тикилди. Азиза қизариб кетди, «юзимга сиёҳ тегибдими?» деб жажжиғина дастрўмолчасини қўлига олди. Бу қизариш Қодирнинг фикрини бутунлай ўзгартиб юборди: қизнинг табиати шўх, эркин•катта бўлган, у беғубор!

Кўз олдига Мирсалим келди. Уни бир-икки марта кўрган эди. Иккисини солиштирди: икки дунё! Қизиқ, шунаقا ҳам бўлар экан-да!

— Ҳеч дадангизга ўхшамайсиз,— деди Қодир Азизанинг ёниб турган юзларига қараб. Азиза «қанақа эканман» деб ўтирмади. Гап нима тўғрисида кетаётганини фаҳмлади шекилли, шартта жавоб қилди:

— Бизнинг дада омихта: эскичага эски, янгичага янги!

Шу зумдаёқ Азиза соатига қараб, деди:

— Вой, алламаҳал бўлиди-ку, кетмаймизми!

Қодир Ализанинг ёнида борар экан, ўйлар эди: нима қилиши керакки, бундан кейин кўришиб туриш мумкин бўлсин. Баҳона топди:

— Азизахон, баъзан-баъзан бирга дарс тайёрлаб турсак, қаршимасмисиз?

Азиза тўғри жавоб бермади:

— Бундан буёқ папкамда нуқул одам суяги бўлади. Чўчимасмикинсиз?

Аслида Қодир чўчир эди:

— Йўқ, нега! Бемалол!

Қодир унинг розилигини олгандек яшиаб кетди. Демак, Ализанинг кўнгли унга мойил, хатининг мазмунига тушунган, ҳозир севмаса ҳам кейин севади.

— Ализанинг «бундан буёқ папкамда нуқул одам суяги бўлади, чўчимайсизми?»— деган гапини Қодир «мендан қўрқмайсизми, мени хушингиз ёқтирадими?» деган маънода тушунди. Бу тушунча бундан сал вақт аввал жуда узоқда турган Ализани шундоқ ёнига келтириб қўйган, унга бениҳоя ҳурмат уйғотган эди. Бу тушунча уни қанот бўлиб учираши, булбул қилиб сайратиши керак эди.

Қодир Ализанинг ёнида бораётуб, йўлкага эгилиб тушган толнинг пастки шохидан бир хивич синдириб олди. Азиза уни бояги сариқ гиёҳ сингари оғзига солиб ўйнайди, деб ўйлади шекилли, оппоқ тишларини ярақлатиб кулиб, огоҳлантириди:

— Оғзингизга солманг, пўстлоғи аччиқ бўлади.

Қодир бу меҳрибонликдан мамнун бўлиб, бошқа нарсадан гап очди:

— Мен сизни ўша атлас кўйлагингизда келасиз, деб ўйлаган эканман.

— Сабаб?— деди Азиза. Қодир сабабини аниқ билмас, шундай келиши керак, деб ўйлабгина қўя қолган экан.

— Қайдам...— очиғини айтди у.

— Ё сиз атлас кўйлакни яхши кўрасизми?

Қодир кутилмаганда журъат қилди:

— Йўқ, ичидаги қизни! Атлас кўйлакли қизни!

Азиза бўш келмади:

— Сизга теккан қизнинг ўёри қурир экан, эримга ёқай, деб ёзда ҳам қопдек атлас кўйлакка ўралиб...

Кулишди. Бу кулишдан орада ҳеч сир қолмагандек бўлди.

Катта кўчага чиқиш билан Азиза бирдан тўхтаб деди:

— Бас, асалнинг ҳам ози яхши, бўлмаса томогингизни бўғади, босқи қилади. Мен кетдим. Кеннойингизга салом денг.

— Ойимга-чи?

— Ойингизга ҳам, акангизга ҳам! Ҳа, айтгандек,— Азиза икки қадам қўйган еридан қайтди.— Кеннойингиз билан акангиз ажралишибдими? Нима бало, Тошкентга борсам қўйман, деб юрган эканларми?

— Билмадим. Бўлмади шекилли-да,— чайналди Қодир.

— Шунча йилдан кейин-а? Кўп ғиди-биди бўлармиди? Кеннойингизга ойим бирам ачиняптилар, дилдор жувон эди, дейдилар.

— Яхши хотин эди. Бола кўрмади, холос,— шу кеиниги сўзни қиз болага ноўрин айтиб қўйдим, деб Қодир шошиб қолди, сўзни бурмоқчи бўлди:

— Сизларникида ғиди-биди кўп бўладими?

— Бизнинг дада ҳазил эмас-да, Мирсалимбойвачча дейишади ўз оти билан. Шу маҳал бизни кўриб қолсалар борми, оҳо... мен кетдим, хайр.

— Хайр!

Қодирнинг хаёли Мирсалимга кўчиб, бундоқ қараса, Азиза кетиб қоляпти. Шунда эндиги учрашув кунини келишиб олмагани эсига тушди. Кетидан юѓурди:

— Азиза! Менга қаранг!

Азиза ҳозир келиб тўхтаган трамвайга чиқиш ниятида елиб бораради. Орқасига бир ўгирилиб:

— Чоршанба, соат беш!— деди ва яна тезроқ чопиб кетди. Қодирга ҳам шу керак эди, тўхтаб, узоқдан кузатиб турди. Трамвай жойидан қўзғалиб, олдидан қўнғироғини жиринглатиб ўтиб кетгунча ундан кўзини олмади, Азизанинг ўзини кўрмаса ҳам қўлини силкиб турди. Трамвай кўздан фойиб бўлиши билан бирдан юрагида қандайдир бўшлиқ, эслаган сари ҳувиллайдиган бўшлиқ сезди. Хат берганидан бери чеккан изтиробларининг барчаси бекорга чиқиб, Азиза билан учрашгани, унинг қувноқлиги, шўх қочириқлари эсига тушиб, яна юраги завқ-шавқ билан тўлди. Катта кўчада бир ўзининг илжайиб турганини пайқаб, шарт орқасига

бурилди. Яна севгилиснинг хаёли билан уйига жўнади.

У катта бир имтиҳондан ўтгандек хурсанд эди!

* * *

Қодир Азизани севиб қолгандан бери безовта. Авваллари уни кўришга, сухбатига интилса, энди негадир ҳайиқади ундан. Қандайдир ножӯя бир ҳаракат ёки эҳтиётсизлик орқасида айтилган ноўрин бир сўз билан озор етказиб қўяётганга ўхшайди. У билан учрашганда ўзини жуда эҳтиёт қиласди, ушлайдиган ери жуда иоқулай шиша идиш ёки бир сават тухум кўтариб кетаётган одамдек, қадамини санаб босади. Имтиҳонга бораётган студент сингари, гаплашадиган гапларини ҳижжалаб кўради. Кўча-кўйда бирор қизнинг товуши уникига ўхшаб кетса, юраги шув этади, нур тезлигига бир нарса бағрини тилиб ўтгандек бўлади. Лекин муҳаббатининг ёзиқсиз ва тақрорланмайдиган қонунлари уларни ўз оқимига солиб, гоҳ боққа, гоҳ кинога бошлар, гоҳ мажнунтол сояси — сув қирғоғида эртак айттирас, ойдин кечаларни кездирар, шеър ёдлатиб, ашула айттирас эди. Семестр тугаб, имтиҳоннинг бошланиши уларни яна ҳам яқинлаштириди. Иккисининг уйида ҳам дарс тайёрлаш учун шароит кўнгилдагидек бўлмаганидан шаҳар кутубхонасини танладилар. Энди ваъдалашиб, соат белгилаб ўтиришмайди. Қим олдин бўшаса тўғри шу ерга келаверади. Бу ерда иккисининг ўз столи пайдо бўлиб қолди. Улар келиши билан банд бўлса бўшатишади. Улар қаттиқ тартиб билан дарсга киришишади, ҳар соатда ўн минут танаффус. Бу танаффус кутубхонадан чиқиб, унинг ёнидаги камқатнов кўчада ўтказилади.

Қодир танаффус вақти бўлганини имо қилиб, Азизага соатини кўрсатди. Азиза кўзи билан «хўп» ишорасини қилди-ю, яна китобга шўнғиди. Қодир оёғининг учинда юриб, ташқарига чиқди. Кеча ёққан қор кўча ўрталарида эриган бўлса ҳам, четларда бир-икки энлик қалинликда оппоқ оқариб турарди. Боядан бери конспект тузиб, бармоқлари толиққан Қодир бир қисм қор олиб, юмaloқлади. Иссиқ хонадан чиққанлиги учун қор қўлига совуқ туюлган бўлса-да, қандайдир ҳузур баҳш этди. Қодир қорни гоҳ осмонга отиб илиб, эрмак қилиб

туар экан, ҳориган кўзларини пирпиратиб, пальтосини елкасига ташлаганича Азиза чиқиб келди.

— Мени урмоқчимисиз? — ҳазилга олди Азиза.

— Йўқ, сизни урганин.

— Мени ким урибди?

— Мабодо...

— Мени ҳеч ким урмайди. Ая-бувилаrimизнинг еган калтаги ҳам мендақадан юзтасининг умрига етади, Нега индашмаган экан, улар ҳам косов олиб солиша бўлмасмиди?

— Хўп, косов эмас, теша олиб югуришди ҳам деяйлик, кейин нима бўлади? — кулди Қодир.

— Ҳисоб-китоб!

— Ҳисоб-китобни ким қиласди. «Дунёда нима ёмон: қайтиб келган ёв билан, қайтиб келган қиз» деган отасими, ёки бир эркакка шариатан тўртта хотин вожиб деб турган қози поччами?

— Сиз бўлганда нима қилардингиз? — Азиза синамоқлик билан сўради.

— Ўша вақтдами? Ҳаёт шу экан, деб кўп қатори чоригимни судраб оҳ-воҳ билан яшайверардим.

— Мен бўлсан чидамасдим. Уйни тут, кирини юв, боласини боқ-да, яна урсин. Йўқ, мен чидамасдим. «Бас, тўйдим» деб бошимни олиб чиқиб кетардим.

— Қаёқقا? Яна битта шунақасининг олдигами?

— Йўқ! Мен бошига кўтарадигани топардим, Топардиму мен ҳам уни бошимга кўтарардим.

— Циркдаги акробатларга ўхшаб, бир-бирларингни навбатма-навбат бошга кўтарар экансизлар-да? Бу ўйин ўша вақтдан қолган экан-да, а, Азизахон? — ҳазилга олди Қодир.

— Мен астойдил гапирсам, бу киши... Эркақсиз-да, эркакларнинг ёнини оласиз, — ўксигандек бўлди Азиза.

— Ўша вақтда яшаган бўлсан, жон деб хотин-қизларнинг ёнини олган бўлардим, лекин барибир қўлимдан ҳеч бир иш келмас эди. Шундай фикрли кишилар ўша вақтда ҳам битта-иккита бўлган, кулга тушган кесакдек кўринмаган. Тузум шунақа эди, — деди Қодир Азизанинг кўнглини олмоқчи бўлиб. Азиза ҳамон ундан ўпкалагандек, шахтидан тушмаган эди.

— Тузуми ўлсин!

— Улиб бўлган ҳалциям!

- Барибир ўлганига ишонмайдиганлар, ўзи ўлса ҳам ҳидини олиб қолганлар бор.
- Бу тўғри!
- Яна ўзларини културний қилиб кўрсатганлари-га ўлайми! Ёлғон гапиргани уялишмагани!
- Бир шоир айтган экан: «Ёлғоннинг тахтида шоҳ бўлгандан, ростгўйнинг чорбоғида гиёҳ бўл», деб.
- Мен ҳайронман, наҳот ўша одамлар «ёлғон гапирганимни ҳеч ким билмайди» деб ўйлашади? Дунёда ёмон кўрганим ёлғон билан қўрқоқлик! Ёлғонлари кўзларидан шундоқ кўриниб туради.
- Кўринмайди деб ўйлашади-да!
- Бекор! Масалан, мен дарров биламан. Товуши қандайдир ғалати эшитилади, юзими, кўзими, ҳаракатими, ишқилиб, бир нимаси «Ёлғон! Ёлғон!!» деб туради.
- Доносиз-да,— яна ҳазилга олди Қодир.
- Доно бўлсам, бошчаноғини папкамга солиб, лотинча нечта номи бор экан, деб каллаи саҳардан ёд қилемидим.
- Доно ҳам аввал ўрганади, кейин ўргатади, Азизахон.
- Шунақами, билмаган эканман. Вой, гапга тушив кетиб, вақтни тuya қилибмиз-ку!— соатига қараб, юрганича ичкарига кириб кетди.
- Қодир киргандага у китобга мукка тушган эди.
- Вақт — севги дояси. Қодир буни кунлар ўтган сари севинч билан ҳис қилиб бораарди. Кўнглида бўлган шубҳа ўрнини ишонч, иккиланиш ўрнини қатъийлик олиб, Азизага бўлган муносабати самимийлашиб, меҳрибонлик чин муҳаббат қоясига кўтарилимоқда эди. У энди Азизанинг шўхлик ва эркинлик сирларини билади. У ҳаётда ўз ўрнини топиб яашагина эмас, керак бўлса уни жон-жаҳди билан ҳимоя қилиш қобилиятига эга. Худди шундай севгисини ҳам қадрлай билишига, севги билан яшаб, севги билан фахрланишга ишончи комил. Бу ишонч эса, Қодирни ўзини эркин тутишга, журъат билан ҳаракат қилиш, ўз севгиси билан қизнинг юракбағрини тўла-тўқис забт этиб олишга ундар эди. Лекин у қанча уринмасин, шошмасин, Азиза юрак қопқасини кенг очмас, «шошган қоқилади» дегандек қия тутарди, холос. Бундан унинг узоқни кўзлаганлиги, ўз баҳтининг ҳеч қаёққа қочиб кетмаслигига ишонганлиги кўриниб турарди.

Бир куни кинодан қайтишар экан, Қодир Азизани ёшларга хос иштиёқ билан қаттиқ қўлтиқлаб олган, ёшлардагина бўладиган мароқ билан «йирик мавзулар» да суҳбатлашиб келарди. Қизда ҳам турмушнинг «икирчикир» ларидан кўра мана шундай дилкашликка майли кўпроқ сезилар, буни ҳар суҳбатида англаш мумкин эди. Азиза бошлаган суҳбатни давом эттириб, хулоса ясандек деди:

— Мен бахтнинг юрак билан топилганинигина ташоламан. Бу чин баҳт.

— Мен унга ақл ҳам қўшилса, меҳнат шерик бўлса экан дейман.

— Фикрларимиз бир-бирига яқин.

— Яқин эмас, аслида битта. Фақат масалага турли томонлардан яқинлашяпмиз. Сиз «юрак» билан деганда, меҳнатни инкор этмайсиз, ақлни унга шерик тутасиз, шундаймасми?

— Албатта.

— Демак, фикрларимиз яқин, лекин ораларимиз узоқ холос.

— Узоқ,— деди Азиза бирдан бенхтиёр. Лекин бу ўринсиз жавобнинг маънисига тушуниб қолиб, қизарниб кетди. Шу аснода Қодир асл мақсадга қараб ҳужум қилиб қолди:

— Йккимизга битта фамилия етгани ҳолда, негадир ҳалигача иккита қилиб юрибмиз.

— Ёқмай қолсин!— лабини луччак қилиб эркаланди Азиза,— нега эркаклар бунаقا шошади?

— Шошмайди, ташаббускор бўлади. Ё қизлар ҳам таклиф этишадими?

— Билмасам. Астойдил севган ва севилганига ишонганидан кейин, нима, айби борми?

— Масалан, сиз ташаббускор бўла олармидингиз?

— Нега энди!

— Бўпти-да! Йигитларни айбситманг. Таклиф этиш йигитлик бурчига киради.

— Менимча, шу ҳуқуқни қизларга ҳам бериш керак.

— Сабаб?

— Сабаби шуки, йигитлар бу масалада ҳар вақт чуқур ўйлашмайди. Оқибати хунук чиқиб, ажralиб кетишганда ҳам ўзининг аҳволи қизникига нисбатан тузук бўлишини ҳис қилиб туради. Бу устунлик эса, баъзан

яхши ўйламай, ҳавас билан муҳаббатнинг фарқига бормай иш тутишларига сабаб бўлади.

— Бу тўғри, лекин қизлар бу мажбуриятни уддалай олармикан, сизга ўхшаганлар кўп эмас-да.

— Инқилобдан бир-икки йил бўлса ҳам аввал түғилганинг сезилиб турибди, димоғингизга феодализм ҳиди кирган-да, анқиб қоляпти,— деди Азиза кафтидаги Қодирнинг қўлини «тушундингизми?» дегандек сиқиб. Кетидан ўзининг шўх кулгиси билан кўчани тўлдириди.

— Мен шубҳаланаётганим йўқ, Азизахон, эҳтиёт чорасини кўряпман,— жилмайди Қодир:— Кал тарангунча тўй тарқалади дегандек, севган қизиниң таклиф этишини кутиб, соқолларимизга оқ тушмаса дейман.

— Тушмайди!

— Тушмайдими? Бўлди, мен кутаман.

Ҳазилнинг бирдан жиддий тус олиши Азизани чўчишиб юборгандек бўлди, ялт этиб Қодирнинг кўзига қаради, бу икки кўз нодир китобнинг қўш варағидек бир-бирини яхши умид, яхши ният билан тўлдириб турарди, уларда ҳаёт ва ишонч тўла бир завқ порларди.

Қодир Азизанинг қўлтиқлаб бораётган қўлини тирсаги билан ўзига тортиб, қаттиқ сиқди.

Биринчи курсни иккиси ҳам кўнгилдагидек тамомлаб, каникулга чиқиш олдида бир хунук иш бўлди. Навбатдаги имтиҳонни бериб, хурсанд бўлган Азиза институтдан чиқиб, тўғри Қодирнинг олдига борди. Шўхлик билан деди:

— Бугун мени ўйнатинг.

— Хўп, жоним билан! Қаёққа борамиз?

— Истаган ерингизга!— Азиза унга ишонган ҳолда иҳтиёрини бераётганини кўзи билан таъкидлаб турарди.

— Марҳамат!— деди-ю, Қодир уни маҳкам қўлтиқлаб кетди. Азиза чиндан ҳам хурсанд, у серқатнов катта кўчага бошласа ҳам индамас эди, бошқа вақтда бўлганида «бу кўчадан юрмаймиз, тоши йирик» демаганида

• ҳам қўлини тортиб олган бўларди. Магазин витриналарини томоша қилиб, ялги чиққан модаларга назар ташлаб, ўзаро муҳокама қилиб боришар экан, қаршидан лоп этиб Азизанинг дадаси Мирсалим чиқиб қолди. Азиза унинг ўзига кўзи тушган-тушмаганини билмайди, лекин яшин тезлигида Қодирнинг қўлтиғидан қўлини сугуриб, магазинга ўзини ургани эсида. Мирсалим худди шу магазиндан харид қилиб, нариги эшигидан чиққан эди. У

пинагини бузмай келиб, Қодирнинг саломига бошини чайқаб алик олди:

— Акангизга салом денг!— деди бамайлихотир. Лекин унинг товушидаги титроқ буларни кўрганидан хабар бериб турарди. Ранги оқаринқираган Қодир:

— Хўп!— деганча оёғи чалишгандек юролмай қолди. Мирсалим ўтиб кетгандан кейингина бир ерда тўхтаб қолганини билди. Бундоқ қараса, Азида магазиннинг нариги эшигидан чиқиб, одамлар орасидан пилдираб елиб кетяпти. Қодир унга эргашди. У етиб борганда Азида қайилишдаги йўғон теракка орқаси билан суянган, ранги дока бўлиб кетган, оғзини каппа-каппа очиб нафас оларди.

— Ҳа, мунча?— деди Қодир уни ўзига келтириш ниятида.

— Ие, бу кишини қаранг. Дадам-а!!

— Дадангиз бўлса...— Қодир гап тополмай қолди. Азида илиб кетди:

— Юринг, кетдик, кетимиздан келиб қоладилар.

— Йўғ-э...

— Сиз дадамни билмайсиз... Юринг. Балога қолдим.

Қодир нима деб Азизага далда беришни билмас, очиғи, ўзи ҳам бу кутилмаган учрашувдан гангид қолган эди. Шунчалик ўзини тутиб Мирсалимга салом бериб сўрашганидан қойил эди.

Азида олдинроқ шошиб, ундан сал кейинда Қодир елиб борар экан, Қодир деди:

— Мени танийдилар-ку.

— Танийдилар... Таниганлари билан қизимни кўчада қўлтиқлаб юргин деганилар? Сиз ҳам қизиқсиз.

— Бир нарса дермикинлар сизга, а?— ташвишга тушиб қолди Қодир. Шу кўчадан бошлаб нима қиласардим. Айб менда. Азида ҳам «қўйинг» демади, деб ўзидан койинарди. Бу кўнгилсиз учрашувнинг оқибати нима бўларкин?

— Менга-ку, ортиқча бир нарса демасалар ҳам, ойимга жабр. Бутун заҳрини ойимга сочади, боши таънадан чиқмайди.— Азизанинг ўксигани ҳаракатидангина эмас, товушидан ҳам билиниб турарди.

Азизанинг бутун севинчлари чилпарчин бўлиб, Қодир билан совуққина хайрлашиб уйига жўнади. Қодирнинг юрак ютиб, «мен сиз билан бирга бораман, ҳаммасини очиқ-ойдин айтиб қўяқоламиз» деганига кўнмади.

Лекин уйига яқинлашган сари юрак уриши тезлашди. Бу ахволда уйига кириб борса, онасининг ўти ёрилишидан қўрқиб, бир ўртоғиникига кириб, бир оз нафасини ростлаб олмоқчи бўлди. Унга бора туриб яна айнади, орқасига қайтди. Пастликка тушиб сой бўйида бирпас ўтирди. Бирдан дадиллашиб кетди: «Хўш, мен нима гуноҳ қилдимки, бунча қўрқаман! Севган йигитим билан қўлтиқлашиб келаётган эдим, холос. Шу айбми? Нимаси айб? Керак бўлса очиғини айтишим мумкин. Наҳот, шу ёшга келиб ўз севгингни ҳимоя қилиб ололмасанг. Уят! Уят, Азиза! Тур! Тур, ўрнингдан! Ташвишланма, севиб, севилганингдан қувон, хандон солиб юр. Кишилар кўрсинг, ҳавас қилсан». (

Қалбида уйғониб, жўш урган бу фахрланиш ва дадиллик унга қанот боғлади. У ўрнидан ирғиб туриб, этагини қоқди, ҳалигина маҳзун ўтирганидан ўзи кулиб йўлга тушди. У шундай кўринадики, уйга кириб дадаси гап очгунича ўзи сўз бошлаб, очиқ-оидин қиласидиган, ҳақ-ҳуқуқини ҳимоя қилиб, кибрланадиган эди. Боя маъюс ўтган кўчаларидан ишонч билан бориб, эшиги тагига келганда яна нимадир журъатини ўғирлагандек бўлди, хавотирланиб, эҳтиётлик билан уйга кирди. Ҳовлига кириб биринчи кўрган нарсаси даҳлиздаги уни тўмтоқ қора ботинка бўлди. «Демак, у шу ерда, мендан олдин келибди» деди-ю, жавобга ўзини ҳозирлади. Шу аснода онаси уйдан чиқиб келиб, уни айвонга ишора қилди. Азизанинг юраги «шув» этиб кетди: демак, достон бошланган!

— Дадам келдиларми? — деди Азиза айвонга ўтгач. Унинг ранги бир оз оқарган эди. «Ҳа» жавобини олиши билан яна алланечук бўлиб кетди:

— Сизни уришдиларми? — деди онасига раҳми келиб Азиза ва онасининг юз-кўзига қаради. У хомуш эди.

— Нимага уришади? Даданг «Азизани кўрдим» деди, холос. Бир нарса бўлдими, айт қизим? Нега безовтасан?

— Бошқа ҳеч нарса демадиларми? — яна ўсмоқчилади Азиза.

— Йўқ! Ўзи нима гап? Кишини бунча хит қиласан, айтақолсанг-чи?

Азиза яна аърофда қолди. Очиқ-оидин онасига айтай деса, бу кутилмаган ҳодиса уни ҳам турли фикрларга олиб бориши мумкин, айтмай деса, онаси қистаб қўйма-

япти. Бундан кўра дадасидан эшитганда яхши бўларди, у вақт бунинг ёнига тушар, яккалақ қолган қизини ҳамоја қиласади, чунки киши доим заҳмат чеккан кишига раҳм қиласади. Ҳозир эса, «даданг билса, нима бўлади,вой ўлмасам?» деб жим ётган илоннинг бошини қўзғаб қўйиши мумкин. Шунинг учун Азиза «ҳали тагига олиб кетаётгани йўқ, бир куни эшитар» деган фикр билан гапни чалғитди:

— Иккита-учта ўртоқларим билан хохолашиб келаётгани эдим.

— Ҳа, болам, шунга шунча ташвишми! Сенга ўхшаб кўчада хохолашиб юрадиган ёшлар камми! Мен бир парса бўлган эканми дебман.

— Нима бўлиши мумкин, ойижон?

— Ким билади, яна...— она у ёғини айтольмади, тўғриси, айтиши ҳам мумкин эмас эди, чунки у эрининг бундай нарсага муросасиз эканини биларди.

Азизанинг бу ёлғони эрталаб очилди. Дадаси кечаси айтибди. Азизанинг юраги яна кеча эшикдан кириб келганидагиdek дук-дук ура бошлади. Дадасининг нима дегани ва нима хулёса чиқарганини билиб олмоқчи бўлиб ойисининг кўзларига термилди, уни кузатди. Ойисининг юзида аламнинг аччиқ изларини кўрмай кўнгли бир оз таскин топди. Шундай бўлса ҳам:

— Дадам нима дедилар, айтақолинг, ойижон?!— деди ва то онасининг оғзидан жавоб чиққунча нафаси қайтиб кетди. Она кулди:

— Кўрпа-ёстиғингни қоплай бер, деди.

— Бу нима деганлари?

— Қизингни тўй қиласади дегани да, нима бўларди, она қизим.

— Йўғ-э, наҳотки. Шундай дёдиларми? Сизни тоза уришгандирлар «қизинг саёқ бўлиб кетибди» деб.

— Йўқ, йўқ, қизим. Индаганлари йўқ. Дадангга ҳам инсоф кириб қолди, тушунади. Лекин сенга менинг айтадиган гапим бор: ёшсан, ҳеч нарсани билмайсан, ёмон кўп ҳозир...

— Вой, унақа эмас, яхши йигит ойи!— Онасининг сўзини бўлди қиз.

— Эшитдим, эшитдим. Минг яхши бўлгани билан бегона, сўзига учма, ўзингни маҳкам тут!..

Сиркаси сув кўтармас дадасининг бунчалик «олижаноблик» қилиши жуда ғайри табиий, Азизанинг ақлига

сиғмас эди. Азиза дадаси кечака кўриб қолмаганида ҳам бу сир бир куни очилишига кўзи етар, катта бир «қийчув» билан газак олиб, кейин тинчишини, ўзиминг кучи ва ҳаракати билан тинчишини кутиб юрарди. Бу тўғрида ўзининг режалари ҳам бор эди. Лекин бу «мудҳиш» воқеанинг бунчалик енгил кўчиши уни ҳайратда қолдирди. Аввалига «дадам менга ишонади» деб ўйлади, кейинидан бу ҳолни дадасининг замонага қараб иш тутаётганига, маданиятли бўлиб қолганига йўйди. Аслида бу иккиси ҳам эмас эди. Мирсалимнинг ўз режаси бор эди: бир ҳафтаки мактаб директори кетади, ўрнига Содиқ бўлади, деган миш-миш тарқалди. Тагини бундоқ сурнштирса, жони бор, шундай тайёргарлик кетяпти. Содиқ ким? Қодирнинг акаси! Акаси бўлганда ҳам булар жуда бир-бирига меҳрибон. Мушаррафни рўпара қилиб, бир марта миннатдор қилиб қўйган бўлса, қудалиги нур устига аъло нур бўлади. Бунинг устига Қодир ҳам ёмон йигит эмас. Бир-икки гаплашганида яхши таассурот қолдирган, шу вақтнинг йигити бундан ортиқ бўлмайди! Тепасида оталик қилувчи қозиги маҳкам акаси бор. Онаси ҳам меҳрибон, ширин сўз камипир.

Мирсалим кечака Азиза билан Қодирни учратганда аввал бургадек бир сапчиб тушган бўлса ҳам, шуларни ўйлаб, нафасини ростлаб олди. «Қўлтиқлашиб юриш, ўзиганилашиб тегиш, битта менинг бошимда эмас, юрга келган тўй!»— деди ва шундай турмуш қилиб тинчиб кетган ёшлардан бир-иккитасини эслаб кўнгли таскин топди, худодан ўшаларнинг йўлини сўради.

Азиза онасининг гапларини эшишиб, қанча хурсанд бўлган бўлмасин, янги унашилган қиздек дадасининг кўзига кўринишга ботинолмай бир ҳафта четлаб юрди. Буни дадаси «қизим юзимни ерга қаратмайди» деб тушунди, яна хотиржам бўлди, шундай бўлса ҳам хотининг: «Қизингга айт, бошвоини қаттиқ тутсан, ўз намига ўзи сирғалиб юрмасин»,— деди. Хотини: «Вой, қизимиз унақа қуруқ хазон эмас, сал елга учадиган»,— деб қизининг ёнини олган эди, Мирсалим силтаб берди: «Ўзинингдан катта бир нарса деганда хўп де, шаталоқ отаверма».

«Хўп! Хўп, дадаси!»— деди бечора хотин ноилож қолиб.

Азиза онасидан эшитган хушхабарни ўша куниёқ оқизмай-томизмай Қодирга етказди. Кечаси билан гувалак устида ётгандек безовта бўлиб чиқсан Қодирнинг

кўзига олам яна ўз ҳуснини кашф этди, ҳатто аввалгидан серфайз ва кўркам кўринди. Шодлигини баён этишга сўз тополмасди. У Азизани уйига кузатиб келар экан, нуқул дерди:

— Ростданми, а, Азиза, ҳеч ишонгим келмайди. Кечаси билан «шу вақтда Азизаларницида нима бўлаётган экан?» деб ўйлаб чиқибман.

— Ёлғон! Ёлғон! Тилёғламалик қилмай қўяқолинг! Хуррагингиз бизникидан эшитилди. Уз қулоғим билан эшиздим,— деди Азиза жўрттага.

— Ёлғон бўлса Карл Маркс билан Энгельс урсин!— қасамнинг бу янги хилидан иккаласи мамнуш кулишди.

Одатдаги хайрлашадиган ерга борганда Азиза таққа тўхтаб: «Бас!»— деди.

— Яна озроқ, ҳу анави қайрағочгача кузатай!— деди Қодир ўша ергача кузатмаса ҳеч бўлмайдиган бир оҳангда. Азиза:

— Бугун бунча меҳрибонсиз!— деди-ю, йўлида давом этди. У Қодирнинг хурсандчиликдан ичган жиндай виносига ишора қилган эди.

— Қачон меҳрибонлик қилмовдим?

Азиза индамади. Садақайрағочнинг соясида тўхтаган Қодир Азизани гапга солиб туриб, ўзига тортди. Буни кутмаган Азиза шошиб, икки қўлини унинг кўкрагига тиради:

— Қодиржон ака, сизга нима бўлди... Бирор кўриб...

Қодирнинг қулоғига гап кирмас, энтикиб уни ўзига тортар, Азизанинг қаршилиги щунчаки нарса эканини қалби билан сезиб турарди

— Дод дейман!.. Қўйворинг!— дер Азиза, лекин ўзи ортиқча қаршилик кўрсатмай Қодирнинг бағрида кулиб турарди.

— Одам йигинг, қўрқкан номард!— деди Қодир ва унинг лабига ёпишди. Қаршилиги астойдил бўлмаган Азиза ёлворишга тушди:

— Секинроқ, бирор эшигади!— деди ва пайт пойлаб унинг бағридан чиқиб қочди:— Ёмон киши экансиз, энди ҳеч сиз билан учрашмайман.

— Учрашадиган кишинингизнинг исмини айтинг, билиб қўяйлик,— тегишиб қолди Қодир. Азиза ҳам бўш келмади:

— Исмими? Исми майнараст Қодиржон!

Азиҳа елиб кетар экан, ҳилпиллаган этагининг шамоли Қодирнинг юрак чўғларини янада яллиғлатарди. Ойсиз тун сокин ва оромбахш эди!

Қодир ўшиш мазаси лабида қолганлек тамшаниб қўйди.

9. ХУШОМАД ЗИЁФАТИ ВА АРЗ

Мирсалимнинг фикрича, кишилар кўнглига олиб кирадиган йўлнинг бошида арақ солнинг шиша туради. Бу шиша кўп мушкулни осон қилади. Баъзан ақл ўргатадиган бир жилд китобнинг ишини яримта арақ бажариши мумкин. Мирсалим шундай яшаб келган эди, ҳали ҳам шу йўлни тўғри билади. Содиқнинг шиша билан бўлмаса ҳам, шиша турган дастурхон, такаллуф билан анча майлини олди. Жаннатни қўйдириб, Мушаррафга уйлантиришга мусассар бўлди, бағрига кирди. Мана бугун яна унинг бағрида қимирламайдиганроқ бўлиб олмоқчи. Бунга сабаб — Содиқнинг бундан бир-икки ой илгари директор қилиб тайинланниши эди. Аввалги директор билан апоқ-чапоқ эди, сал иложини топди дегунча Мирсалим шишага қўл узатарди. Шиша ўлгур шунаقا кучли дорики, не-не доғларни ювиб кетади. Бўлмаса Мирсалимнинг нимаси кўп «иши чиқиб» қолиши, «касал» бўлиши, баъзан ота-оналарнинг унинг дағаллиги устидан арз қилиши кўп. Кечагина шунақалардан биттаси рўй берди. Яна бўлиши мумкин. Чунки дарс вақтида Мирсалим асабийлашиб кетадиган, арзимаган нарсага болаларни қаттиқ койиб синфдан қувиб чиқарадиган одати бор. Бирор ерда нўмайи учраб, кўпроқ тортиб қолган куни-ку, эртасига дарсни ўлди деяверинг!

Буларнинг давоси янги директор билан муомалани созлаб юриш ва шиша. Биринчиси бўлиб турибди, лекин иккинчисини анчадан бери рўёбга чиқаргани йўқ. Аввал Содиқни «чиллалик» деб безовта қилмади, кейин ўзининг юриши болалаб кетди. Шунда ҳам Содиқнинг тизгинини ўзича қўйиб юбормаган бўлиб «Содиқжон-чи, Содиқжон» қилиб турди, баъзан тегишиб «ёши қанақа бўлар экан, куёв бола» деб ишшайиб қўйди, кечқурун уйига келиб иккита қази билан битта катта пўстдумба юборди. Мана бугун Содиқни чақириб оғзини мойлаб қўймоқчи, бунга баҳона Мушаррафни чорлашга ўхшаган бир ўтириш.

— Сен Мушаррафни чақир. Яхшилаб дастурхон ясат!— деди Мирсалим ишидан қайтгач, «амал тўни»ни ёчиб, қора беқасам чопонини елкасига ташлар экан. Хотинининг фаши келди. У Мушаррафни, жилпангламай ўлсин, Жаннатхон қанақа оғир-вазмин жувон эди, деб ёқтирмас эди, унга мулозамат кўрсатиш эса, яна оғир ботди. Бундан ташқари, шундай ёш бир нарсанинг капката кишига тегиши ҳам ғашини келтирас, эрининг ҳам унга ҳаваси келиб, патагига қурт тушиб қолганга ўхшарди. Бир куни Мушаррафни кўриб келиб, уни сочига оқ оралаб қолган Содиққа таққослаб, энсаси қотди, кечаси эрига деди:

— Унинг нимасини яхши кўради Мушарраф? Бурун лойтовоқдай, ёши анчага бориб қолган бўлса...

Мирсалим эриб турган эди, хотинининг бағрига қўлини юбориб, жавоб қилди:

— Сен билмайсан, жонгинам, баъзи хотинлар эркакнинг ҳуснидан кўра эркалашини яхши кўради.

Эрининг иссиқ қўли баданига хуш ёқкан хотин:

— Содиқ aka яхши эркалайдиганлар хилидан эканими?— деди.

Мирсалим бу кутилмаган саволдан совук сувга шўнғигандек бўлди, буни «мўмин-қобил» хотинидан кутмаган эди. У бунақа сўзларни бегона хотинлардан эшифтган, унда хуш ёқкан, яна эшифтиси келган пайтлари бўлган. Лекин хотининикига чидолмади:

— Бас, оғзингни бепаровуз қилма!— деб жеркиб ташлади. Хотинининг, «эrim деб бир оғиз гапни ҳам яйраб гапиролмайман», дея хўрлиги келди:

— Ҳа, мунча, менинг оғзим қопми, бөғлайсиз?

Меҳмон чақириш таклифи хотинига ёқинқирамаганини пайқаган Мирсалим эрталаб четдан айлантириб олиб келди:

— Ёшлигингда довучча тेरганимисан?

Хотин ҳайрон бўлди.

— Термаганимисан? Бошинг нимага қоронги бўлган эди! Довуччагамиди?

— Ҳа, йўқ. Гилватага. Нима эди, айта қолинг?! Мунча резинкадай чўздингиз.

Мирсалим ўз кашфиётидан мамнун жилмайиб изоҳ берадиган шохи. Уни тортсак юқоридагисининг ўзи

эгилиб келади. Тушундингми? Бурга тутишга ҳам бармоқни ҳўллаш керак, хотин! Тушундингми?

— Ҳа, тушундим, Содиққа хушомад деб қўя қолсангиз бўлмайдими!

— Бу хушомад эмас, тентак, одамгарчилик.

— Одамгарчилик ўлсин золдирга ўхшаб нуқул ишшабга думаласа.

Мирсалим қараса, хотини яна чўзадиган, ниятига лутур етказиб, ташвишга қўядиган. Дарров синалган одати— дўққа ўтди:

— Тушундингми?

Эрининг резинкадай чирт узилиб кетадиган феълини билган хотин дарров чўкди:

— Тушундим.

— Тушунгган бўлсанг, ҳозирлигингни қўра бер!—деди Мирсалим буйруқ бериб ва уйга бурилар экан, яна дўнғиллаб қўйди:— Хотин кишининг узун тили уйга баҳтсизлик олиб кирадиган зина, деб сенга неча марта айтдим! Йўқ, ҳеч қулоғингда турмайди, кишининг жанини очирганинг очирган. Тавба!

Бу Мирсалимнинг сал туриб ярашишга кўрган тайёрлиги эди. Чунки, хотини аразлаб дастурхонни кўнгилдагидек тузатмаслиги мумкин. Шунинг учун уйдан кийиниб чиққач, очиқ чеҳра билан ҳазил қилган бўлди:

— Мушарраф бирам очилиб кетибди.

Хотин аламидан тушмаган эди, чақиб олди:

— Хоҳлаганини еб, ярашганини кийиб юргандан кейин, у очилмай мен очиламанми!

Мирсалим ўринсиз ҳазилидан пушаймон еди.

— Тилинг кесилсин, тўғри гапга ҳам қилич бўлмай!

— Ҳавасингиз келдими, сиз ҳам ёшроғига уйлана қолинг.

— Қани эди!—кўнглидаги рўёбга чиқаётгандек тиржайди Мирсалим.

— Еқмай ўлсин! Сиз эркакларда уят борми, ишшайгана илиқасизлар... Бўйи етган қизингиз бўлса...

Хотинининг ўз тақдирига хўрлиги келди шекилли, кўзига ёш олди.

— Вой тентак, ҳазил-ку!— юпатди хотинини Мирсалим куйдирган калладек ишшайиб.

— Дилингизда бўлмаса тилингизга чиқармиди.

— Менга ўхшаган ит ғажиган суюкни бошига урадими. Ҳаммаси тилда, хотин,

Хотин ишонч ҳосил қилгандек баланд келди:

— Қани қилиб кўринг, нақ соқолингизни битталаб юлай.

— Қорасиними?— деди Мирсалим қўш хотинлик афанди ҳақидаги машҳур латифани эслаб.

— Ҳаммасини ҳам!— деди хотини бунга тушунмай.

— Бўлди! Бўлди! Унар-унмасга диққат бўлиб, киши ни қийнама. Мен Содиқникига бориб келаман.

Мирсалим бошидан сурма ранг дўпписини олиб, ки-загини чўзди-да, қайта кийди, нимадир демоқчи бўлиб туриб, кўча эшикка қараб юрди. Бирдан орқасига бурилиб:

— Тушундинг-а!— деди. Бу савол эмас, таъкидлаш эди. Хотини яна эрининг дафтарини очтираслик учун бошини сал силкиб маъқуллаб қўя қолди.

Мирсалим Содиқнинг эшигига Мушаррафни учратди. Келин қошда ўсма, кўзда сурма, жиякли атлас лозимда сувга чиқиб келарди. Унинг ҳар қадам босишидан «менга ҳавасинг келсин, мен шунаقا чиройлиман» деган маъно ёғилиб турарди. Мирсалим кўнглида «яна очилиб кетибди-ку!» деб қўйди, вужудининг аллақаери жимирилаб кетди.

Мушарраф келинга хос назокат билан салом бериб сўрашди. Унинг ўз турмушидан мамнунлиги кўзининг табассум билан ёнишидан тортиб, челяк тутишигача, ҳаммасида ошкор кўриниб турарди. Мирсалим буни фаҳмлаб, «ёшга уйланиб Содиқ ютган, десам, аксиға ўхшайди-ку! Нуқсони эрсизлиги экан-да!..» деб кўнглидан ўтказди. Мушарраф «менда ишингиз йўқми? Йўқ бўлса, нозимда куйинг» дегандек хушнуд жилпанглаб турарди. Мирсалим сўради:

— Содиқжон уйдами? Нима қиляпти?

— Ҳовончада сув талқон қиляптилар.

— Қодиржон-чи?— Мирсалим ҳам ҳазиллашди.

— Қодиржонми? Қодиржон ҳўқиз боласини ов қилгани кетган.

Мушарраф «яна ким керак сизга?» дегандек жилпанглаб турган эди, Мирсалим Содиқнинг чиқиб қолишидан ҳадиксираб, ичкарига кирди.

Бу — Содиқ яқинда кўчиб кирган, европача солинган, тўрт хонали, олдида боғчаси ҳам бор ҳовли эди.

Китоблар полига бетартиб уйиб қўйилган хонада Со-диқ нимадир ёзиб ўтиради. Мирсалимни кўриб ўрни-дан турди, қўлини олди.

Содиқ қилиб ўтирган ишидан жуда хурсанд ва мам-нун эди. Ана шундай хурсандлик билан Мирсалимга гап ташлади.

— Омади келган кишисиз-да, айни вақтда келдин-гиз. Сайловчилар билан бўладиган суҳбатингиз учун яхши бир материал топиб қўйдим.

Мирсалим қилган илтимоси эсига тушиб жуда қи-зиқди:

— Хўш-хўш?

— Шу йил бошида Ўзбекистон ССР конституцияси-ни қабул қилган фавқулодда шўролар VI қурултойини Тошкент хотин-қизларининг вакиллари табриклаган эди. Шунда бир хотин жуда чиройли гапирган эди. Ана шу нутқни топдим. Мавжуда Абдураҳмонова номзоди рўйхатга олинган бизнинг округга жуда кетади. Мана буни қаранг, ҳақиқатан ҳам, жуда қизиқ материал.— Содиқ стол устидан ёзганини олиб ўқиди: «Тошкентда ўттиз минг ўзбек хотин-қизлари саводсизликни битириш курсларида ўқимоқдалар. Улар «ўқиган — гулиston, ўқи-маган — гўристон» деган мақолни эсга олиб, шу йил Тош-кентни ялпи саводхон шаҳарга айлантиришга сўз берди-лар... Илгари «ўнта хотин бир қозон қайната олмайди» дер эдилар. Қандай кулгили сўзлар! Нафис ва гўзал сўзаналар тикиб турган бу қўллар милтиқ тутишга ҳам тайёр. Машина ва станоклар бошида турган қизларимиз отларга миниб, бир томчи қонлари қолгунча севимли Ватанимизни ҳимоя қилурлар»,— Содиқ ҳамсуҳбатига қаради,— жойидами?

Мирсалим маъқуллаб, бош силкиди:

— Назаримда, шу қурултойда паранжи ҳақида ҳам гап бўлган эди.

— Тўғри. Ана шу вакиллар қурултойдан паранжи ёпинишни тақиқлаш тўғрисида декрет чиқаришни, қиз-ларни 16 ёшда эрга бериш тўғрисидаги эскирган қонун-ни қайтадан кўриб чиқиб, 18 ёшга етказишни сўраган-лар. Мана, ҳаммасини ёзганман Марҳамат!

— Ўзингиз-чи?

— Ўзимга ҳам бор. Сайлов ташвиқотини жонли фактлар билан шундай олиб бориш керакки, конститу-циямизнинг жаҳонда тенги йўқ демократик ва инсон-

парвар конституция экани, шу қонун асосида сайланадиган депутатлар халқ хизматкори бўлажагидан ҳар бир сайловчи қаноат ҳосил қилсин.

— Бунинг учун сизга ўхшаган кишиларни сафарбар қилиш керак,— хушомадомуз илжайди Мирсалим.

— Сиз ҳам чакки эмассиз.

Мирсалим Содиқ узатган қофозни бувлаб, ёнига солар экан, «шунаقا материалим камроқ эди», деб яна илжайди. Кейин Содиқ яқинда кўчиб кирган бу уйнинг у ёқ-бу ёғини қандайдир бир кузатиш билан кўздан кечириб, деди:

— Шу уйни сизга беришиб жуда яхши қилишди, узукка кўздек ярашди!— Лекин бу «текин уй»га файрлиги келаётгани қўй кўзларининг тубида кўриниб турарди. «Ёш хотин. Директорлик. Яхши ҳовли-жой! Берганга қўшалоқлаб...» деб янди ичиди. Аммо тили мойланган пириракдек айланар эди:

— Биз ҳам уйда ёлғиз. Зерикамиз. Қелин пошша билан эртага бир бизниснинг боринглар.

— Эртага....— ўйлаб қолди Содиқ,— аввал сизлар келинглар.

— Биз келиб турибмиз... Тўйда шу ерда эдик.

— Эртага боролмасмиз. Мушарраф бир нарса деяётган эди. Қани, мен ўзидан...— Содиқ ташқарига чиқиб кетди. Мирсалим кетидан ўйлади: «Мушарраф қўлига зағчадек қўндириб олибди-ку ҳалитдан!»

Олдин Содиқ, салдан кейин очилиб-сочилиб Мушарраф кирди.

— Мирсалим акам овора бўлиб ўзлари айтиб келган бўйлсалар у ёқни қўя қоламиз.

Мушаррафнинг «Мирсалим акам!» дегани унинг қулогига шундай хуш ёқдики, «сенинг шу тилинг учун кунда айтиб келишга тайёрман, акаси», деб юборишига сал қолди, ўрнидан сал туриб миннатдорчилик билдириди:

— Бошим осмонга етди, раҳмат, келин!

Мирсалим, ови ўнгидан келган овчидаи уйига хурсанд қайтди. Лекин Содиқнинг баҳти унинг юрагини ўртаб юборган, кўнглида қандайдир нотинч ғулув уйғонган эди.

— Қалай, келишадиган бўлдими?

— Ҳа, келишади. Бошқа жойга ваъдалари бор экан-у, Мушарраф: «Мирсалим акам ўзлари овора бў-

либ келибдилар, олдин шу кишиникига борамиз», деб туриб олди,— мақтанди Мирсалим.

Хотинининг назарида, Мушарраф кунда меҳмонга борадигандек кўринди:

— Мунча меҳмонга боришни яхши кўрмаса! Қариса эшик санаб юрадиган хотинлардан бўлади шекилли. Ҳозирданоқ қайнанасини ҳеч нарсага бийлатмай қўйганмиш. Уял, кеча келиб, бугун шунаقا қилишга.

Бахти хонадоннинг уйидан ўтган бу чакка Мирсалимнинг ғараз билан ёниб турган юрагига малҳам бўлиб томса ҳам, сир бермасдан хотинини қайирди:

— Унчалик эмасдир. Сен кўчадаги гапни ичкарига олиб кирма, эшитган қулоққа хунук!

Содик айтилган вақтда Мушарраф билан келди. Эшикда икки буқчайиб кутиб олган Мирсалим Мушаррафнинг кийинишини кўриб: «Яна хотинимдан балога қолдим!»— деб қўйди. Мушаррафнинг бағрига шамол тегиб қолган эди. Оёғида баланд пошина амиркон этик, унинг қўнжи атлас лозим устидан илак пайпоқ кийган чиройли болдирини сиқиб турарди, шу кунларда энди расм бўлган гулдор қрепдешин кўйлак тақимга шамол елпиб, таранг кўкрагига ҳусн бахш этарди. Бошидаги чамандагул дўппининг жияигига майда соchlарининг чиройли жингалаги тармашар, пардоз билан нурланган оппоқ юзда қоп-қора хол янада ўзгача қоралик кашф этган. Чаккасидаги жувон гажаги минг бир ноз билан қулоғига нимадир шивирларди.

«Кеча кўрганим ҳам бир нави экан», деб кўнглидан ўtkазди Мирсалим ва Мушаррафдан анқиган яхши атир-упаларнинг ҳидига маст бўлиб уйга йўл бошлади. Ўй остонасида кутиб олган хотини кечаги гина-кудуратларни унтиб, очиқ юз билан меҳмонларга салом берди, Мушарраф билан қуchoқ очиб кўришди.

Мирсалим уларни уйга, уй эмас, чиройли бир қўғир-қоқхонага таклиф этди. У эски, бурун солинган бўлса ҳам, замонга мос slab ислоҳ қилинган. Тоқининг устига фанер қопланганидан гулдор шили паст бўлиб қолганга ўхшайди. Рўпарадаги қўшалоқ тахмонга шкаф қилинган, бирининг ойнасидан духоба, атлас кўрпа, якан-доз ва жилти синъкага солинган парқув ёстиқлар кўришиб турибди, иккинчисига кийим-бош осилган. Токчалар камайтирилиб, уларга ҳам жавон қурилган, ичига идиш-сёқ қўйилган, қопқоғи тўнтариб терилган ҳаво ранг

чойнакларнинг биттаси жўмрагига каттакон хитой қоғоз гули тиқилган. Яна битта токчада оқ рух самовар «мен савлатман» дегандек ярқираб турибди. Ҳамма тахмон-токчалар қулф-калитли. Токчалардан холи деворга қизил оёқ гилам осилган. Унинг тепасида иккита сурат бор, бирни Мирсалимнинг ёшлигига тушган чақмоқ телпакли, иккинчиси Азизанинг шу кунларда тушган сурати эди. Кира беришда, чап томонда обрез бўлган бўлса керак, пол қоқилганда унга қопқоқ қилингани кўриниб турибди.

Буларнинг барчаси сепсиз эрга теккан Мушаррафнинг кўзини ёндириб юборди. У эрининг оёғини стол остидан аста босиб, «кўряпсизми, кишиларнинг уйи қанақа» деган ишорани қилди. Содиқни эса, Мирсалимнинг китоблари қизиқтиради. Унинг назарида, «Бобирнома» каби антиқа китоби бор одамнинг бой кутубхонаси бўлиши шарт. Китобларни қаерда сақларкин? Бегона кўздан четроқда туар экан-да!

Мушарраф шкаф-тахмондаги кўрпа-ёстиқларни сабаб, суқланиб, деворда чўғдек ёниб турган гиламга назар ташлар экан, қайнанаси билан бўлган ҳангома эсига тушиб кетди. У бир куни полдаги гиламни қоқиб-тозалаб, деворга осар экан, Адолат хола «қўйинг!» деб розилик бермагандек бўлди. Шунда Мушарраф «маданият» деган, хола эса «маданият шу бўлса ўлсин, жон болам, оёқ остидаги гилам деворга, киши бошига осиса», деб кулган эди.

Мушаррафнинг кўзлари ёниб томоша қилишидан Мирсалим жуда мамнун, лекин Содиқнинг бепарволигида ҳайрон эди. Шунда Содиқ кутилмаган саволни бериб қолди:

— Китобларингиз қаерда? Токчаларингиз китоб қўядиган экан!

— Китоб... китобларни... китобларимни нариги уйда сақлайман.

— Болалар титмасин дейсиз-да?

Гарчанд уйда майда болалар бўлмаса ҳам, Мирсалим эвнини топди:

— Ҳа, албатта! Қариндошлар, Азизанинг ўртоқлари келиб туришади...

Їўқ китобларни бор қилиб, Содиқни ишонтирганидан кўнгли таскин топган Мирсалим, меҳмонларни дастурхонга қистади, гапга чалғитди.

Меҳмонлар ўтириши билан хотини Мирсалимга кўзини ташлаб, «фотиҳа қилиб юборинг» ишорасини қилди. Мирсалим пайти келганини билиб, қўлини очди, кетидан қўшди:

— Янаги йил шу пайтларда учта бўлиб келинглар. Содиқ ўнғайсизланди.

Сал ўтмай Мирсалим битта конъяқ, битта винони тўртта рюмка билан келтириб ўртага қўйди. Хотини эса, уй-жойдан нолиб, эрини ношудликда айблар эди.

— Қизимизнинг бўйи етиб келяпти. Шу ерда тўй қилиб бўладими? Асти рози бўлмасман. Олдин яхши жой қиласиз! Шартим шу! Эшитдингизми, дадаси.

Мирсалим индамай конъякни усталик билан очди. Аввал Мушаррафга қўймоқчи эди, Содиқ қайтарди.

— Бўлмаса, винодан.

Қадаҳларга қўйилиб бўлгач, Мирсалим ҳамон булбулигўёлик қилаётган хотинини қайирди:

— Бўлди! Бўлди! Содиқжон уй тақсимот қилмайдилар. Қани, рюмкангни ол, Мушаррафхон билан уриштири, қўшалоқ ўғиллар ният қил.

— Сиз шунаقا дейсиз-да, одамлар уй-жойга қарайдиган бўлиб қолган,— деди хотини рюмкани ола туриб.

Мирсалим Содиқ билан уриштирап экан, деди:

— Нафсам бирга қараганда бу уй эмас. Сизларни-ки — бу бошқа.

— Алмашамиزمи?— деди Содиқ. Мирсалимнинг ҳаваси келаётганидан атайлаб.

— Туф-туф-туф! Ўзингизга буюрсин, азизим,— Мирсалим «шу сўзингиз ерда қолсин» деган мазмунда бир чеккага туфурган бўлди, қадаҳини жиринглатиб уриштириди. Бир ҳўплаб ерга қўйган хотинига тегишли:

— Сени ҳеч маданиятли қилолмадим-да! Ана Мушаррафхонни кўр, симирди-қўйди.

— У киши ёш, исча ярашади...

Мирсалимнинг меҳмон чақиришдан мақсади ўзининг яна бир фазилатини кўрсатиб қўйиш бўлганидек икки рюмкадан ичилгандан кейин, филофи билан қозиқда осиғлиқ турган танбурни олиб, «созли тордан нозли куй чиқади» дегандек зерикмасдан созлади, «нима чалиб берай!» деб сўради, лекин жавоб кутмасданоқ, «Чаман йинглар» куйини бошлаб юборди. Чиндан ҳам у танбурни яхши чертарди. Умрида биронта музика асбобини қўлида тутмаган, лекин музикага жуда ишқибоз Содиқ

завқланиб тинглади. Икки рюмка винони охирги томчи-сигача симириб, кўзлари чарақлаб, юзлари яна бир кўрк кашф этган Мушарраф-ку, аллақачон маҳлиё бўлиб қолган эди. Мактабдалигида шунча уриниб, дуторда «Вақвақа тўрам»дан бошқасини ўрганолмагани ҳали-ҳали алам қиласарди. Бирорта музика асбобини чалишни билган одам, унинг назарида, дунёда ҳеч армони йўқдек бўлиб кўринарди. Чунки бундай одамлар қайфудан бегона, сал юраги сиқилса куй билан ёзади! Узи билмаганига яраша эри чалса кошки эди!

Икки машқдан кейин Мушарраф яна бирор нарса чалиб беришни ўтиндиди.

— Ё энди сиз оласизми? — деди эрига тегишиб.

— Панжа йўқ, — кулгига олди Содиқ.

— У кишиникининг хизмати бошқа: ов милтиқнинг ҳепкисини яхши босади, — деди Мирсалим Содиқни ҳимоя қилиб.

— Чиройли хат ҳам ёзади денг! — деди Мушарраф ҳазилидан алланечук бўлган эрига ялпоғланиб. Лекин бу сўз бадхат Мирсалимга тегиб кетган эди. Унинг жиззакилиги тутди:

— Буни сиз яхши биласиз. Бизларга ҳеч хат ёзмаганлар.

Мирсалим «мен сени биламан, тўйинггача тоза донашсансан» деб таъна қилмоқчи эди, уни Мушарраф шундай тушўнган бўлса-да, бошқа ёққа бурди:

— Албатта! Бирор ёққа кетсалар тез-тез хат ёзадилар. Тўғрими, Содиқ aka?

Содиқ жавоб қайтармади. Хотинининг бачканаликлири фашини келтирган эди. Содиқнинг бу ҳолатини Мирсалимнинг хотини фаҳмлаб, «бас қилинг» дегандек, стол остидан эрининг оёғини босди.

Мирсалим дарров ўзини ўнглаб, танбурни чертди. Лекин аввалги завқ билан куй таратмас эди...

Мирсалим Мушаррафнинг бу қочириғини меҳмонлар кетгандан сўнг ҳам унупотмади. «Директорнинг хотиниман. Шу ҳушингга келадими?» дегандай бўлиб, жил-панглашига асти чидамас эди, унга алам қиласарди.

* * *

Директор қилиб тайинлашгандан кейин, Содиқ аспирантурага кириш ниятини эндиғи йилга қолдирди. Гарчанд унинг бу шаҳарга кўчиб келишдан бир муддаоси

шу бўлса ҳам, райкомга чақириб айтишгач, «Партиянинг иродаси шу бўлса розиман», деди-ю, ўзига хос шижоату куч-қувват билан ишга шўнғиб кетди. Иш тифиз пайтларда кечқурун қолиб ишлади. Ана шунга ҳам талайгин на вақт бўлибди. «Бўлса бўлар, бўлмаса ғовлаб кетар» қабилида ишлайдиган бир-икки ўқитувчининг кўнгли олинганинни ҳисобга олмаса, кўпчилик ундан хурсанд. Буни коллективда ташаббус уйғонишидан, ўқиш-тарбия сифатининг яхшиланишидан кўриб турибди.

Содиқ шуларни хаёлидан ўтказиб ўтирас экан, каби нет эшиги тақиллаб қолди.

— Мумкинми? — эшик тирқишидан хотин кишининг боши кўринди. Содиқ ичкарига таклиф этса ҳам у киришга тортинарди. Содиқ ўзи бориб, эшикни кенг очиб уни ичкари киртди-да, яна ёпиб қўйди, хотинга жой кўрсатди:

— Қелинг!

Хотиннинг бутун вужудидан маҳзунлик ёғилиб турарди. Салқиб тушган қовоқлари ўйқусиз ўтган тундан хабар берса, маъюс кўзлари «забун бир ҳаётнинг гувоҳиман» деб ўксирди.

Хотин бошидаги рўмолининг учини ҳимариб туриб, сўзлаш ўрнига йиғлаб юборди:

— Улар бўлсан ўлдим. На менга, на болаларга тинчлик бор,— икки куннинг биринча дилсиёҳлик. Чой қайнатсан ҳам тагига олдирдинг, деб жанжал. Сиз ўша бир койиб қўйганингиздан кейин анча тузук бўлиб қолган эди, кейин... сиздан кетгандан кейин яна...

Содиқ хотинни энди таниди. Унинг эри Фаҳриддин Шукуров аввал шу мактабда муаллим эди. Анча шалоқ. Хотини у энди директор бўлган кези ҳам арз қилиб келган, шунда эри билан яхшигина гаплашиб, тўғри йўлга солиб олган эди. Лекин бу тўғри йўлдан юришга унинг бардоши етмади, оқибат, яқинда бўшатиб юборишга мажбур бўлган эди. Демак, яна эски изга тушиб олган.

— Нима дейди, бирор мақсади борми? — аниқламоқчи бўлди Содиқ.

— Мақсадини айтмайди, излагани жанжал, топгани уриш. Бир кун рўшнолик йўқ. На ичганимда, на еганимда ҳаловат бор. Улар бўлсан ўлдим. Болаларга жабр бўлиб кетди. Ўзингиз бир нарса демасангиз... сиздан ҳайқади.

Содиқ ҳайрон бўлиб, қўлини энгагига тиради. Пичоқ

суюкка тақалган бечора хотинга ширин сўзлаб, қўйинни пуч ёнғоқقا тўлдириб юборишнинг қизиги йўқ. У маслаҳатга эмас, ёрдамга муҳтож. Ёрдам қилиш учун эрига учрашуви керак. Эри бўлса, ҳозир бошқа мактабда ишлайди. Модомики, ўзида ишламас экан, унга бир сўз айтиш нокулай. Шармандага шаҳар кенг — уни беҳурмат қилишиб қўйиши мумкин. Лекин Содиқ унинг беҳурмат қилишидан чўчимади, шундай бўлса-да, маслаҳат солди:

— Нима қил дейсиз, синглим?

— Сиздан ҳайиқади... Инсофга чақириб қўйсангизмикин...

— Қейин, арзга борибсан демайдими?

— Утган сафар индамовди.

Хотиннинг бу жавоби Содиққа яна далда берди. Шундай бўлса ҳам, хотиндан бутун воқеани суриштириб олди, хотиннинг ўз камчиликларини ҳам айтиб, маслаҳат берди.

— Қарс иккى қўлдан чиқади, синглим, сиз ҳам ҳадеб тиклашаверманг. Инсон тили ҳар қандай ханжардан ўткир! Севдирадиган ҳам тил, бездирадиган ҳам тил.

— Вой, айланай, ўн сўзидан биттасига жавоб қайтарсан, дунёга ўт кетади-ку! Сўз бошламасимдан «гапингдан турун ҳиди келади» деб оғзимга уради. Яна ўзидан эшитарсиз-ку, чўғни қоғозга ўраб бўлармиди!

Хотин яна болаларига жабр бўлганини, дадаси эшикдан кириши билан дағ-дағ титрашларини айтиб, йиглаб юборди.

— Худойимдан ўргулай, тилаганга бола бермайди, безнганга қўшалоқлаб...

Хотиннинг бола ҳақидаги гапи Содиққа қаттиқ таъсир қўлган эди. У, шу болалар ҳаққи ҳозир хотиннинг эри билан гаплашишга қарор қилди. Хотинни эшиккача кузатиб, соатига қаради. Телефонда унинг мактабда бор-йўғини суриштириди.

— Кетиб қолмасин, мен ҳозир етиб бораман,— деди. Поездга чиқаётган одамдек шошилинч билан эшикка отилди.

Туяниг пайпоги, отнинг одими улкан дегандек, Содиқ от юриш қилиб «бегона» мактабга етиб келганини билмай қолди. Дарвоза ёнидаги кичик эшикдан кириши билан, болаларнинг қий-чуви «шу ер мактаб!» деб турарди. У девор остига ётқизилган ғишт йўлкадан борар экан, ўйларди: нимадан гап бошлишим керак. Шундай

гаплашувим керакки, сих ҳам, қабоб-ҳам куймасин. Албатта хотинининг ҳамма гали рост эмас, арзга борган доим қўшиб-чатади, ўзи истамаса ҳам алам ва жаҳл шунга мажбур этади. Аввал эрининг улфатларини билиш керак, яхши яхшига ёндаштиради, ёмон йўлдан адаштиради.

Лекин Содиқ айтгандек бўлиб чиқмади. Содиқнинг келаётганини эшитган Шукуров қисқа бўйини чўзиб, олдинига «менинг аравамга шатак керак эмас», деб жўнаб қолмоқчи бўлди. Мактаб илмий мудири жавоб бермагач, «шу одам ҳам ҳар нарсага човлисини сола беради-да», деб бир оз бўшашди. Кейин яна тажанглаши. Қўзи уришқоқ хўроzinинг тожисидай қонга тўлди. Худди шунинг устига Содиқ кириб келди. Самимий кўришиб, энди мулојим гап бошлаган эди, бургадек сакраб тушди:

— Содиқ ака, худо хайрингизни берсин, менга оталик қилманг. Ҳар қанча насиҳат бўлса отамдан олиб қолганман.

— Йўқ, эшитасан!— деди қатъий қилиб Содиқ ва баланддан келди:— Гап ёлғиз сенинг оиласнг ҳақида эмас, совет ўқитувчисининг ахлоқи ҳақида. Тарбиясиз киши бошқани тарбиялай олмайди. Ахлоқдан лофт уриши пуч.

• Шукуров кўрса, Содиқ қалтис жойидан олди, куч эгмаганин сўз эгадиган. Бирпасда ели чиққан пуфакдек бўшашиб тушди.

— Уйдан безибман. Уйда ўтирсан юрагимни бирор сандиққа солиб, қулфлаб қўйгандек бўлади. Хотининг ҳатто кулгани ҳам кўзимга хунук кўринади.

— Сен чучмал гап қилма,— деди Содиқ уни ўзига яқин тутиб.— Бу ҳаммаси ичкиликнинг оқибати. Асадларингни бўшашибтириб юборди. Нима, хотин қўймоқчимисан, бешта боласи билан-а! Одамларнинг юзига қандай қарайсан? Қадамингни ўйлаб бос, бола, жар ёқасига келиб қолибсан. Эр хўрлиги — ер хўрлигидан ёмон! Тўғри бўлсанг, сояңг эгри тушмайди, ўзингни оқлама! Ахир мен сени энди кўраётганим йўқ.

Шу кейинги жумла Шукуровнинг эсига анча нарсани туширди: худди шундай масала юзасидан унинг тили бир куйтан, гарчанд мактабдан қувилмаган бўлса ҳам, «ўз хоҳиши билан» бўшаб қочган эди. Мана ўша унга таниш узун қўл ҳозир ҳам унинг гирибонидан тутиб турибди. У, бу мактабда яна масала қўйдириши мумкин.

Кўйдирибгина қолмай, ўзи иштирок этиши, астар-ав-

расини ағдариб ташлаши турган гап. Ана шундан кейин у Содиқни меҳрибонлиги, оиласининг ғамини еганлиги учун эмас, ундан қўрққанидан тилёғламалик билан ҳурмат қила бошлади. Айбини бўйнига олди, узр сўради, гап орасида «янгам ҳам келинингизга жиндай насиҳат қилиб қўйсинлар, қуш тилига қуш дарров тушунади», деди. Лекин қўйнига каттагина алам тоши солиб олди. Ичидা «хаф сеними, тўхтаб тур!» деб қўйди.

10. МИРСАЛИМ МУШТУМИНИ ТУГДИ...

Ҳамма гап Мирсалимнинг бир ҳафта йўқ бўлиб кетишидан бошланди. Үнинг устидан рапорт кўтариб кирган илмий мудир: «Бу ҳолва, бундан қизиқлари ҳам бор» дегандек гап қилиб, Мирсалим доим директор қаноти остида яшаб келганидан арз қилди ва «мана энди сизнинг ўтигиниз билан кириб, кулингиз билан чиқиб турибди»—га гап келтирди. Ҳеч қачон қаноти остидан бундайларга паноҳ бермаган Содиқ учун бу оғир гап эди. Демак, Мирсалим уни қора тортиб ўқиш-тарбия ишига путур етказяпти. Бу яхши эмас. Бунга Содиқ муроса қилолмайди. У Мирсалимнинг қайтишини кутиб, дастлаб ўша илмий мудирнинг ўзи билан бафуржа суҳбатлашмоқчи бўлди.

Содиқ, «Дарсдан кейин қолинг, озгина гап бор», деганда сал ҳуркиган илмий мудирнинг кўнглидан турли гап ўтди. У дўсти Мирсалим устидан арз қилганим аччиқ данакдек меъдасига ботмади шекилли, деб ўйлади, лекин айтган сўзидан қайтмоқчи эмас, аксинча, бутун тафсилоти билан фош қилиб ташламоқчи бўлиб директор олдига яна кириб борди. Дириекторлик креслосида ўтирган Содиқ ўрнидан туриб, пастга, илмий мудирнинг ёнига ўтди.

— Боя гапимиз чала қолгандек бўлди,— дея сўз бошлиди Содиқ.— Назаримда, сиз Мирсалим акани менга яқин тутиб, баъзи гапларни ямладингиз. Менинг у кишига яқинлигим рост. Мен бу шаҳарга келганимда қаршимга илк салом бериб чиққан ва одамгарчилик қилган шу киши бўлди. Ҳали ҳам борди-келдимиз бор. Лекин бу, уни ҳар вақт ҳимоя қиласман, мактаб эшигига мих қоқиб кетса ҳам индамайман, деган гап эмас. Мени директорликка тайинлашганда, аллакимларни паноҳингда тут, пешонасини сила дейишмаган, дейишмайди ҳам, дейиш-

ган вақтда мен мактабни олмас ҳам эдим. Менга, ўша ердаги ўртоқлар билан мактабни кўтар, дейишган. Сиз билан менинг виждан бурчимиз ҳам шу. Сиз билан биз бир дараҳтмиз, ҳуснимиз бўйимизда эмас, мевамизда, мевамиз шу болалар. Демак, шундай экан, кечаги гапни батофсилик гаплашсак дейман, токи Мирсалим аканинг нуқсони газак олиб кетмаса, вақтида олдини олсак.

Илмий мудир Содиқдан бунчалик гапни кутмаган, ўз дўстини силаб-сийраб қўя қолар, деб ўйлаган эди. У Содиқнинг гапини кўнглида муҳокама қилди, муҳокама қилган сари тузланган гўштии чайнагандек тагидан ма-заси чиқиб келарди. Унга қанот битди. У ҳам очиғига кўчди:

— Мирсалим аканинг мактаб ишига ёзда қўли совуқ қотади! Қачон кўрсан кимнингдир пинжида, тош бўлиб сув оқкан томонга думалайди. Бир нарса деб бўлмайди, директорнинг қўятигидан бошини чиқариб илжаарди. Ҳозир ҳам кишилар шундай фикрда, кечирасизу, «Содиқ акани уйлантирган тўйбоши ҳам — шу, директор қилган далолатчи ҳам — шу» деб қарашади. Маорифдагиларга ҳам ювош мушук бўлиб юмшоқ суркалгани суркалганди! Мавқен пастроқни-ку, кнопка қилиб босиб юборишига тайёр!

— Дарси қалай?— деди Содиқ суҳбатни Мирсалимнинг ишига бурмоқчи бўлиб.

— Дарси кам, сифати миёна. Лекин қачон кўрсанг, илм дўлана эмас, ўзи гуллаб, ўзи пишса, у — анжир, парвариш талаб қиласди, деб юради. Болаларга баҳо қўйишда жуда серҳиммат. Лекин афсус, баҳо билимнинг мезони деб тушунмайдиганлардан. Сиз келмасдан сал илгари икки боланинг ўзига эмас, отасига қараб баҳо қўйибди.

— Бу нима деганингиз?

— Отаси ўртоғи экан.

— Бу ахир...— Содиқнинг нафаси сиқилиб келди, нафрлати уйғонди.

— Гап шунда-да! Қейин, кўп «ишилари чиқиб» туради. Бир-икки дарсларига ўзингиз кириб кўринг, бўлмаса, менинг гапларим жуда фийбатга ўхшаб кетди.

— Бу фийбат эмас, иш юзасидан шундай гаплашмасак, унда нима бўлади. Йўқ, сиз бемалол гапираверинг.

Лекин илмий мудир бошқа галирмади «мана, мен дардимни айтдим, давосини қани, сен қандай топар экан-

сан», дегандек унинг оғзига қараб турди. Хайрлашиб чиқиш олдида:

— Кўпларнинг оғзини боғлайдиган унинг дастурхони! Илдизи чукур!— деб қўйди.

Бу гап Содиққа «сен ҳам дастурхонига учма» бўлиб эшитилди, ичидан зил кетди.

Содиқ яна бир нечта ўқитувчилар билан сухбат қилди. Бири: «Мирсалим ака мактабга дарс бериш учун эмас, кўриниш беришга келади. Дарсига инқиллаб кириб, болалардан нолиб чиқади. Дарсидан бошқа мактаб менини тан олмайди, ёзда қўлинни совуқ сувга ургани эриниади» деса, бошқаси эса уни тўлдирди. «У киши тошбақа эмас, товуқ. Тошбақа мингта тухум қўйса ҳам индамаиди. Товуқ битта тухум қўйиб оламни бузади». Яна бири: «Мирсалим аканинг тили билан дили бир эмас. Ёлгонни чин, чинни худо урдириб гапиради. Лекин машнати зўр, дастурхони — қалқони! Мактабдан оладиган билан бундай яшомлайди!»— деди.

Содиқ ўртоқларнинг сўзи билан ўзининг кўрган билганларини чоғишилди: уларнинг гапида жон бор. Коллектив уни хуш кўрмайди, тўғриси, у коллективга қўшилмайди, бир поғона юқори юради. Шунинг учун унинг нуқсонлари бўртиброқ кўринса ҳам ажаб эмас.

Содиқ Мирсалимдек эски муаллимнинг аравадан тушиб қолишини истамасдан, турли тадбирлар ўйлаб юраркан, унинг келганини эшилди. Уйга қайтса Адолат хола:

— Мана буни Мирсалим ўртоғинг бериб юборибди!— деб олдига иккита катта сур тўш қўйди. Тузи юзига тепиб, мойи сарғайиб кетган тўш иссиқдан йилтилларди. «Буни менинг оғзимни мойлаш учун юборган, албатта», деб ўйлади Содиқ ва ўзини жуда ноқулай аҳволда ҳис қилди. Қайтариб юборай деса, онаси билан Мушаррафга нима баҳона топади-ю, Мирсалим қандай тушунади? Олиб қолса, эшигтан қулоққа хунук. Ўқитувчиларнинг юзига қандай қарайди?

Бу орада Мушарраф луқма ташлаб қолди:

— Қаёқдан топаркин бунақа тансиқ нарсаларни? Тунов кунги қазисини қаранг: оғзингга тушмай эрийди-я!

Бу луқма Содиқнинг тилини боғлаган эди:

— Бир четга олиб қўй, нима қилиб бу ерда ётибди,— деди ижирганиб.

— Айтинг, тунов куни уйида олдимизга қўйганига ўхшаган қазидан бир-иккита топиб берсин. Келди-кеттига

жуда яхши-да!— деди Мушарраф сур тўшни олиб кетар экан. Бу чипқон устига дарддек, Содиқдан жуда ўтиб кетди:

— Аввал шуни еб туринг!

— Ҳа, мунча! Қеладиган меҳмон битта меникими? Сизнинг обрўйингиз.

— Мен обрўйимни дастурхон билан эмас, меҳнатим билан топаман!

— Меҳнат... меҳнат... Меҳнат билан топгунча белларингиз қайшиб кетади. Ҳозир кишилар сердастурхон, серсовға бўлиб кетган. Тунов куни ҳам шунаقا деб бир ўртоғингизниги тузукроқ совға қилдирмадингиз.

— Киши уялади ахир, пеш қилганга ўхшаб...

— Юрт-эл шунаقا, нимасидан уяласиз!!— деди Мушарраф.

Содиқнинг хаёлида ҳамон Мирсалим ва сур тўш эди. Нега юборди? «Бирдан қайтариб юборсам, унинг ҳеч нарсадан хабари бўлмаса, кўнглига ёмон гап келиб элбурундан орани бузиб қўймайин. Зўр келса, ҳақини олади, қайтага қазисининг пулинни ҳам қўшиб бераман!»

Мирсалимнинг ҳамма гапдан хабари бор эди. Эсини танибдики, унинг қулоғи бошқаларнинг гапигагина эмас, ўзи тўғрисидаги сўзларга ҳам айғоқчилик қиласади. У гарчанд «яқин жигарим тўсатдан вафот этибди, йўлга чиқ, деган телеграмма олдим», деб важ кўрсатган, кетиш олдидан хотинига яхшилаб тайинлаган бўлса ҳам, масала бошқа ёқда эди. Телеграмма олгани ва унда хунук хабар борлиги рост, лекин хабар кишининг вафоти ҳақида бўлмай, олдини олмаса бир эмас, бир неча кишини, шу жумладан, Мирсалимни ҳам майиб қилиши мумкин бўлган ташвишли бир хабар эди. Унинг яширин савдо шерикларидан бири қўлга тушган эди. Унинг касри Мирсалимга ҳам тегиши, уни муккалатиб юбориш хавфи бор эди. Шунинг учун Мирсалим хабар топиши билан ҳеч нарсага қарамай йўлга тушди. Иш анчачувалган эди. Бирини ака, бирини ука, деб минг эшикка кириб чиқди, зимдан иш тутди, маблағ совурди. Хуллас, ўпқоннинг олдини олди, хотиржам бўлди. Лекин иш битгач, қайтаверишга, биринчидан, «бир келиб қолибсиз» деб ёру дўстлари қўймади, иккинчидан, ўзининг ҳам «оёғини бемалол узатиб» уч-тўрт кун майшат қилгиси келиб қолди.

Уйига қайтса, мактабда дув-дув гап. Олдинига

ишонмади, Содиқни орқа қилди, у учун тузган дастурхонларини эслади, кейин билса тўғоннинг бошида туриб, сувни лойқалатаётган Содиқнинг ўзи! Очиқ кўкрак кериб, майдонга чиқишига кучи етмайди. Содиқдан хафа бўлиши бефойда, у тепада, бу пастда. У қўлининг тирсагидай, ёнида бўлганида ҳам барибир тишломайди! Яхиси аламни ичга ютиш, заҳарни дилда-ю, шакарни тилда тутган маъқул. Шу қарорга келганидан кейин, ҳеч нарсадан хабарсиз кишидек, иккита сур тўшини корзинкага солиб юборди.

Унинг иши сал ўнгидан келмай қолса, таҳорат қилиб намоз ўқийдиган одати бор эди. Шунинг учун, эрталабки намоз қазо бўлганидан пешинга таҳорат олди, ичкари уйга кириб жойнамоз устида узоқ ўтириди, тиловат қилди. Кечки овқатни барвақтроқ қилдириб, шом билан хуфтонни қўшиб ўқиди. Бу орада ўқишидан қайтган Азиза радиони қўймоқчи бўлган эди, диққинафас бўлиб турган онаси қайтарди:

— Отанг нохуш, эртага қўярсан, қизим!

Мирсалим нохушлигида уйда қадамлар санаб босилар эди. Азиза оёқ учида бошқа хонага ўтиб кетди.

Мирсалим ён соатини шимининг липа чўнтағидан олиб қаради. Кейин узоқ фотиҳа тортиб, ўрнидан турди, жойнамозни йиғди. Хотинига аччиқ чой дамлатиб бўй пиёла ичди-да, «бир жойга бориб келаман» деб чиқиб кетди. Кетма-кет Азиза радиони қўйиб юборди:

— Дадамни шунаقا кўрсам бирам юрагим сиқиладини! Нима қилиби? Нега хафалар?

— «Ичимни топ» даданг айтармиди!— деди онаси ўксисб.

Азиза онасига далда бермоқчи бўлди.

— Ҳа, ўзлари ҳам унар-унмасга қуруқ хазондек гуриллаб ёнаверадилар!

Мирсалим Содиқнинг эшигини хурсанд кишидек, дадил қоқди. Эшикни очган Қодир салом бериб, ичкарига таклиф этди. Мирсалим Қодир билан сўрашиб, беларво одамдек гап қотди:

— Хўш, иним, ўқишлиар яхшими? Қийналаётганингиз йўқми? Нима янгиликлар?— ундан жавоб олмай, ҳовлида дуч келган Адолат хола билан сўраша кетди:— Ҳа, она, бардаммисиз, тетиккина юрибсизми? Мушаррафхон қўлингиздан ишингизни олиб, яйраб қолдингизми?

- Шукур болам! Ўзинглар тинчмисизлар?..
- Шукур! Шукур! Бундоқ келинни бошлаб бормай-сиз, қадрдөнлик шунақа бўладими!
- Борамиз, вақти-соати билан, болам! Тинч бўлсанглар бўлди!
- Тинчмиз, тинч.

Уларнинг товушини эшитган Содиқ «ўзи ҳам келиб қолди-ку» деб кўнгли алланечук бўлганича, Мирсалимнинг қаршисига чиқди. Мирсалим анча вақт кўришмай соғиниб қолган қадрдонлардек сал букилиб икки қўллаб кўришди, қуюқ сўрашди. Мезбон кўрсатган ерга ўтиргандан кейин кутилмаганда икки ўртага жимлик чўқди. Содиқ уни ҳамма гапдан хабардор деб гумон қиласа ва сўз бошлашини кутарди. Мирсалим эса, ундан эшитмоқчи, ҳеч ким йўқ жойда арз-додини айтиб, ёлвормоқчи. Лекин иккала томон ҳам гап бошламади, Содиқнинг бошлаш нияти йўқ, масалани мактабда кенг муҳокама этмоқчи, бошқаларга ибрат қилиб, бундан фойдаланиш истаги бор. Шунинг учун унга масаланинг бу ерда очи-лишидан очилмагани маъқул. Ўртага дастурхон ёзилиб, чой келса ҳам гап бу масала томонга бурилмади. Мирсалим «вафот этган» қариндошларининг фазилатларини айтиб, кўзига ёш олди:

— Бешта сагири шомдаги чумчуқдек чирқиллаб қолди. Хотини ўтли-шудли бўлса ҳам гўрга эди. Топиб-тутиб турган эри ўлибди-ю, йиғлашни билмайди!

Шундан кейин Мирсалим гапни мактабга айлантириб келиб, Содиқнинг носинашта коллектив билан ишлаши нақадар оғир бўлишини алоҳида таъкидлади. Но-мини айтмасдан баъзи ўқитувчиларнинг ношудлигидан, ишидан, қилмишидан нолиди. Содиқ гапнинг кераксиз жойдачуваб кетишидан чўчиб, уларнинг номини сўра-мади.

— Сизга ниҳоятда қийин, жуда қийин. Сизни адаштиришлари мумкин. Лекин сиз тажрибали, кўпни кўрган тадбирли кишисиз. Ўрнингизда мен бўлсан борми? Дўстни ўзимга душман қилиб қўярдим. Сиз зийраксиз, тадбирлисиз, етти ўлчаб бир қирқасиз. Кишининг қадрига етасиз, меҳнатни улуғлайсиз. Мана шунингизга қойилман, қандингизни уринг!

— Ҳали нима иш қилибмиз, қандимизни урамиз?—
Фаши келди Содиқнинг. «Эшитибди», деди ичида.

— Йўқ, унақа деманг. Зоология кабинетига яна учта

экспонат ясаб берибсиз, шу кичкина гапми? Шу вақтга-
ча бирор қилганмиди? Йўқ!

— Биладиган одам бўлмаган, бўлмаса...

— Йўқ, билганда ҳам қилмас эди. Бошқа биладиган
ишларидан нимани қилишди. Ҳеч...

Содиқ сўзини бўлди:

— Дурадгорлик-чи? Тарих кабинети-чи? Гулзор-чи!
Ҳеч бирига пул сарф қилганимиз йўқ.

Мирсалим бўш келмади.

— Тўғри... Лекин сизники бошқача. Худди тирик бў-
рининг ўзини қилиб қўйнисиз-а!

Мирсалимнинг кўйиб кетгани яққол кўриниб туарар-
ди, у бир вақтдаги чаққон ва тадбиркор кишига ўхша-
мас, жуда саёзлашиб қолган эди.

Мактабда, ўзи йўғида бошланган гап-сўзнинг олдини
олиш ниятида келган Мирсалим шунча тил чайнаб ҳам,
муродига етолмади, «шунчаки гап шекилли, тинч ётган
илоннинг бошини қимирлатиб нима қиламан» деган қа-
рорга келиб, ўрнидан қўзғалди.

Содиқ уни кузатиб, кабинетига қайтиб кирав әкан,
Герман Вамбери китоби билан «Бобирнома»га кўзи туш-
ди, шу китобларнинг Мирсалимда бўлганига ишонма-
ди, у бундай китобларни ўқийдиган кишига ҳеч ҳам
ўхшамас эди.

— Вой, Мирсалим акам кетиб қолдиларми, корзин-
каларини бериб юбормоқчи эдим,—деб кириб келган
Мушарраф эрининг орқасидан у ўқиётган китобга кўз
ташлаб, бурнини жийирди.— Ҳалиги айтганимни Мир-
салим акамга тайинладингизми?

— Нимани? —ҳайрон бўлди Содиқ.

— Сиз -шунақасиз, менинг гапларим қулогингизда
турмайди, хаёлинги қаёқда эди? Қази демадимми?

«У нима дарда юрибди-ю, сен нима орзуда» деган
фикрни кўнглидан ўтказди Содиқ, гапни қисқа қилиш
учун:

— Айтдим!— деб қўя қолди.

Содиқ Мирсалим устидан тушган рапорт ва ўқитув-
чиларнинг фикрларини дарров ўртага солиб наридан-
бери бир ёқлик қилиб ташламоқчи эмас, ўша фактлар
асосида кузатиш олиб бориб, кенг муҳокамага қўйиш
мақсадида арқонни узун ташлади. Бу гаплардан хабар
топган Мирсалим беш-ён кун фаол бўлди, ўзи раҳбар
бўлган синфнинг мажлисини ўтказди, ота-оналарни ча-

қириб суҳбатлашди, ҳатто иккитасининг уйига бориб дарс тайёрлаш шароити билан танишди, мактаб деворий газетасининг навбатдаги сонини чиқаришда бош бўлди. Буни кўрган илмий мудир, «директор суҳбатлашиб, та-нобини тортиб қўйибди», деб тушунди, ўқитувчилар орасида «Кесакдан чақмоқ чиқди» деган ибора тарқалди. Мирсалимнинг инсофга келиб қолганидан хурсанд, Содиқ, «қани энди бир дарсига кириб кўрай», деб қўнфироқдан ўн беш минут кейин синфиға кирди, бир четга ўтиб ўтирди. Не кўз билан кўрсикни, Мирсалим дарс ўтмас, синфни бошига кўтариб дафтар муқовасидаги суратлар орасидан совет сиёсатига қарши сўз ёки белгилар қидиртирап эди. Бу иш жуда катта аҳамиятга эга нарсадек Содиқ киргандан кейин ҳам тўхтамади, балки «мана-мана, мен топдим», деб аллақандай белгини кўрсатган болани елкасига қоқиб, зийраклика мақтади, бошқаларни ҳам шундай ҳушёрликка чақирди. Содиқнинг энсаси қотиб чиқиб кетди. Қўнфироқ чалингач, Мирсалимни кабинетига тақлиф қилди.

— Бу қанақа бўлди, Мирсалим ака, бир ҳафталаб дарснинг қолиб кетгани етмагандек, яна бунақа бема-загарчилик.

Мирсалим чумчуқдек бир силкиниб олди:

— Бу ҳушёрлик дарси, ўртоқ Қўчкоров!— деди Мирсалим ўзининг ҳақлигига шак келтирмаган кишидек расмий оҳангда.

— Ҳушёрлик?.. Қўйинг бу bemâningarchiilikni! Дарс ўтинг! Қечагина программа катта, вақт кам деб нолиб юрган эдингиз, бугун...

Содиқнинг зардаси қайнаб бошқа сўз айтолмади. Қўлидаги қаламни стол устидаги ойнага кети билан «чиқ» этиб уриб, ўринидан турди:

— Шундай бўлсин, Мирсалим ака!— деб юмшатди.

Мирсалим, нима учундир, бу гал кўксига тушиб кетган бошини аранг кўтариб, эшикдан чиқди.

Навбатдаги педагоглар кенгашида Содиқ унинг камчиликларини тилга олиб, ўртоқлик маслаҳатлари берди, дафтар муқовасидаги суратлар орасидан қандайдир сўз ёки белгилар қидириш ҳушёрлик эмаслигини таъкидлаб кулди, шунда бир ўқитувчи:

— Мирсалим акамнинг хурофотга қарши кураш методлари ҳам алоҳида!— деб луқма ташлаган эди, ҳамма кулиб юборди. Кейин маълум бўлдики, рўзада Мирса-

лим папкасида ион олиб келиб болаларга бир тишлидан бериб юрганмиш. «Ҳа, бу нимаси?» дейишса, «рўзага қарши курашяпман!» деб астойдил керилган эмиш.

Ёрилиши лозим бўлган бу яранинг ситилганидан мактаб коллективи хурсанд бўлди. Лекин Мирсалимнинг боши эгилган бўлса ҳам чўнтағида қўлини муштлаган, кўксидаги кек ўйғонган эди. Ҳаммасини Содиқдан кўрарди.

11. ҚАЙФУ ТИЗГИНИДАГИ СЕВИНЧ

Ун беш йил фарзанд орзусида ўртанган юракнинг ўн олтинчи йили ота бўлишини билгандаги севинчини, ҳаяжонини тасаввур қила оласизми? Албатта, йўқ. Босидан кечиргангина билади!

Мушарраф бир куни Содиқни жуда хурсанд кутиб олди, ёш қизчалардай эркаланиб, қўлини унинг бўйнига ташлади:

— Бир хушхабар айтсан, нима олиб берасиз?

Хотинининг бачкана қилиқларини ёқтиргмаган Содиқ:

— Айтганинг!— деб қўя қолди, ортиқча парво қилмади.

— Йўқ, отини айтасиз,— яна ёпишди Мушарраф.

— Айтганинг дедим-ку.

— Ростми? Айтганим бўлса, йигирма қатор йирик дур марварид олиб берасиз. Кечадан бери кўнглім нордон нарса тусайди!

— Ростми? Ростингни айт, ростми?— Содиқнинг тили бошқа сўзга келмас, кўзида ёш йилтиллар эди. Севинч тиззаларидан дармонини зулукдек сўриб, у бўшашиб стулга ўтирди. Бу дунёда ундан баҳтли одам йўқ эди!

Мушарраф ҳомиладор бўлганидан кейин очилиб кетди. Жиндек бағбақа солди. Оққа мойил юзлари таранг тортиб, қўш билак узукли момиқ билаклари, бўғин оралари бўғирсоқ, гўштдор узун бармоқлари пўрсилдоқ, лаблари ўзга чирой касб этди. Айниқса тўши тирсиллаб, ҳар қандай кўйлак кийса ҳам ўзининг виқорини намоийиш қилиб туради. Содиқ Мушаррафнинг бутун гўзаллиги ва латофатини туғиладиган болада кўрар, унинг завқи билан хушнуд, ҳаваси билан маст эди. Мана шу нозик торнинг пардаларини Мушарраф яхши тушунар,

унга қўл келган, уни вақти-вақти билан истаганича чертиб турар, ҳар чертиши эса Содиқнинг тинчлигини бузарди.

Мушаррафнинг кўнгли ғўра тусаган кундаи бошлаб Содиқнинг тиэгини хотинига ўтиб қолган эди. Ғўрадан бошланган эркалик қўш олтин билагузук буюртиришга, марварид харид қилишга, кетма-кет кўйлак тикиришга, пальтонинг сонин учтага етказишга бориб етди. Оёқ кийинмининг-ку сони йўқ. Бошлаб «фигурамни сақлайман», деб баланд пошна олдирди, кейин «докторлар айтди, баланд пошна бўлмас экан», деб паст пошна тикириб қўйди. Тиш докторининг «ҳозир сизнинг тишингизни арралаб бўлмайди, бўшалганингиздан кейин ўзим яхшилаб қўйиб қўйман», деб ёлворишига кўнмасдан, битта сўйлоқ тишини баҳона қилиб яна тўртласига тилла қоллатди. У бир ҳафта амиркон туфлисини гарчиллатиб таниш-билишлариникида кўз-кўз қилиб юрди. Олма ургини ивтишиб, унинг шираси билан чеккасидаги келинилк гажагини қармоқ нусха қилиб елимлади... Ой-куни яқинлашган сари унинг феъли-авторида шу вақтгача яшриниб ётган нуқсонлари кўзга ташлана бўшлади. Бу нуқсонининг ҳар бири бир инжиқлик, бир кўнгилсанзик ёки бир ортиқча харажат бошлаб келарди. Содиқ айтганига қулоқ солмаса, аввалига «ҳа, билиб қўйинг, болангизнинг қулоги чиноқ бўлиб қолса мендан эмас, ўзингиз мен айтган нарсамни олиб бермаяпсиз», деб эркаланар, «хотин ҳомиладорлигида сиқилса, кам-кўстлик тортса нуқсони болага уради», деб эшитган Содиқ қаршилик қилмас, у бошлаган кўчага юриб, у очган эшикдан магазинга кирди. Кўнгли тусаган нарсани едириди, ҳавас қилган либосни кийдирди. Аввалига ҳавас ва зарурат билан бошлаган бу ишлар кейинчалик зуфумга, дағдағага айланди. Бундай пайтда Мушарраф ер телинар, ҳали туғилмаган болани минг балога гирифтормилар, каравотга ўзини отиб соатлаб йиғлар эди.

Бугун эрталаб ҳам Мушарраф ниманидир баҳона қилиб дилисиёҳликни бошламоқчи бўлган эди, Содиқ айтганини оғзига тутди-ю, у қаёққадир чиқиб кетди. Орқасидан ҳайрон қараб қолган Содиқ онасига нолиди:

— Бу қандай бўлди, ойн!

— Қўй, жон болам, хафа қилма! У ҳозир икки йўлнинг ўртасида ўтирибди,— деди Адолат хола Мушаррафининг ой-куни яқинлигига ишора қилиб.— Аслида «айб ўзингда, бошида маҳкам тутмадинг, менга фарзанд туғиб берар экан, деб оғзига қарадинг, эркалаб, суйилтириб юбординг»,— демоқчи эди, лекин дамини ичига ютди. Шундоқ ҳам дили вайрон бўлиб ўтирган ўғлига раҳми келди, мисол келтириб, инсофга чақирди:

— Қиши турадиган уйнинг тўрт бурчаги бор, болам, икки бурчагидан бол, икки бурчагидан зардоб оқади. Болидан лаззат кўрган зардобига ҳам чидаши керак, жон болам. Ҳамма Жаннат бўлавермайди. Гулни деб, тиканни ҳам суғаради, киши. Беташвиш уй қайдা бор, жон болам. Кўзи ёриса, бола билан ўралашиб, тинчиб қолар. Қаттиқ гапирма.

— Кейин ҳам...

— Йўқ, жон болам, худо хоҳласа кейин яхши бўлиб кетади. Баъзи хотин иккιқатлигига шунақа инжиқроқ бўлади. Омон-эсон қутулиб олсин.

Содиқ унинг кўзи ёригандан кейин яхши бўлиб кетишига ишонмасди. Чунки унинг тантисиқ ва инжиқлиги ҳомиладорлигидан эмас, характерида эди. Адолат хола келинининг ёнини олиб, қанчалик меҳрибонлик қилмасин, Мушаррафининг ортиқча харажатларидан хурсанд эмас эди. Шунинг учун сотиб келинган ота ҳовли пулининг чўғи ўчишини кўриб, «қўли очиқ» ўғлидан ўпкалади, бу билан ҳам қаноат қилмай: «Қодирнинг ҳиссасини бу ёқса бер»,— деб бир қисмини олиб қўйди. Буни эшигтан Мушаррафининг жони-фифони чиқиб кетди:

— Дод, кундошдан баттар қайнана дастидан! Қий сам гўримга орқалаб кетаманми, ўғлингнинг обрўйи! Директорнинг хотини бўла туриб, сарпойчан юрайми! Бўз кияйми!

— Бўзни сиз билмайсиз, бўз нималигини биздан сўранг, жон болам!

Бу оиласининг тинч қўрғонидан илк гишт кўчиши эди, кейинчалик гишт эмас, бутун-бутун деворлари ларзага кела бошлади. Адолат холага тушган илк оғирлик, кейинчалик Содиқнинг бўйнига ағдарилди. Икки гапнинг биринда эрининг ишудлигидан, тизгинини онасига бериб қўйганидан, эркак бўлиб орзу-ҳаваси йўқлигидан, ишдан бошқани билмаслигидан, ҳатто ёнига ўтирсанг китоб-дафтар ҳиди келишидан нолиди.

Мушарраф ўлгудек кунчи эди. Бир томсндан қараганда кунчиликка ҳам ўшамас, бу эрининг елкасига миниб олиш учун бир баҳонадай кўринарди. Умрида қизғаниш нималигини билмаган, бегона хотин билагини тутмаган Содик учун бу жуда алам қиласар, айбсиз айблангандек виждонини қийнарди. «Наҳот кўча кўрган хотин ҳам шунақа кўр бўлса», деб куфури ошарди. Содиқнинг кеч қолишдан юраги безилларди. Бугун ҳам район маорифи бўлимидаги имтиҳонларга тайёргарлик масаласи муҳокама қилинар экан, сўзга чиқувчиларнинг баъзилари мажлисни чўзиб юборди. Ўйни огоҳлантириб қўймаган Содиқнинг юраги фаш, табиати хира эди. Кеининг нотиқларнинг сўзини деярли эшифтади. Ундан сўзга чиқишини сўрашган эди, соатига қаради. Қоронги тушгани деразани кўрсатди. Мажлиснинг чўзилгани етмагандек, маориф мудири иши борлигини айтиб уни олиб қолди. Иши ўша мажлиснинг давомидек бўлди, Содиқнинг янгилигини таъкидлаб, ҳаммага маълум йўлйўриқни берди. Мажлису йўл-йўриқдан хуноби чиқсан Содиқ бурнидан тортса йиқилгудек силласи қуриб уйнга етиб келганида вақт алламаҳал бўлган, Мушарраф қозогидан қор ёғиб ўтиради. Унинг авзойини кўрди-ю, яна достон бошланадиган бўлди, деб ичкари уйга индамасдан ўтиб кетди. Ечинаётуб Мушаррафнинг бошлайдиган «дниёдиси»дан юраги бозиллар, унга ўзича жавоб тайёрлар эди. «Эй, тавба, қандай кунга қолдим?» деганича емакхонага чиқиб келди.

— Тузукроқ овқат қилувдиларингми? — деди столга ўтираётуб кўзлари киртайиб кетган Содиқ.

Содиқ кутганидек эрининг кеч қолишидан минг хаёлга бориб, ҳар хотинни гар, ҳар жувонни ўйнаш тутиб ўтирган Мушарраф ўсмадан қора айёр қошлиарини чимириб, бижғиди:

— Меҳмон қилган бойвучча ош дамлаб бермадими?

Бир очга, бир касалга тегма дегандек, Содиқнинг зардаси қайнади, титраб турниб ачитди:

— Менинг қучогимдан чиқиб боргунча тагига олиб кетибди, еёлмадик.

Мушарраф бу аччиқ билан айтилган гап эканини билса-да, пўрсилдоқ лаблари кўкариб, тўнини тескари кийгандаги Адолат хола кириб қолди. Унинг салобати Мушаррафнинг оғзига қопқоқ бўлди-ю, лабини қийшайтирганича ошхонага ўтиб кетди. Овқатни «тақ» этиб эри

олдига қўйди. Лекин Содиқнинг иштаҳаси бўғилиб бўлган эди, қўлинни ҳам урмади.

— Ол, жон болам, совиб ҳам қолгандир. Ишинг кўпайиб кетдими, кеч қолдинг бугун?

Содиқ боши билан тасдиқлади, ошни олдидан суриб ўрнидан турди. Унинг гапиришга ҳам мажоли келмас эди.

«Оҳ болаларим-а, болаларим, умрнинг қадрига етмаган болаларим», деганича Адолат хола ўз бўлмасига кириб кетди. «Шамол келини»нинг феъли унга маълум эди.

Содиқ шу куни диванда ётиб қолди. Унинг фарзанд кўриш севинчи қайфу тизгинида эди.

12. ТИРНОҚ ОСТИДАН КИР ҚИДИРИБ...

Педагоглар кенгашидаги гаплар Мирсалимга ўрма қамчи бўлиб теккан эди. Унинг суяк-суягигача зирқираб, узоқ вақтгача аламдан титраб юрди. Бу ишни Содиқ бошлаб берганига сира чидамас эди. «Содиқ ким? Кечагина кўчини орқалаб келган келгинди! Пайтава бошга чиқиб, бугун директор. Шундай шаҳри азимда ўсиб-унган кишиларга ақл ўргатади, йўл бошлайди. Наҳот шу ердан биронта таги-тахтли, аччиқ-чучук тотиган бир одам топилмас эди! — деб ўйлай бошлади Мирсалим, — шунча соясига кўрпача солиб, қаршисига пешвоз чиқдим, дастурхон ёзиб, конъяқ қўйдим, бари бир «келгинди»лигига борди, қадримга етмади. Яхши одам бўлганингда, хўп, шу хатолик мендан ўтган экан, секин чақириб, ўз қулогимга айтиб қўя қолмайсанми? Уйинггаку катта бошимни кичик қилиб әгиб бордим, гап бошладим — шу-етмасмиди! Дўст-душман ўртасига олиб чиқиб нима қиласан, нодон? Сен шохимга ошкор болта урсанг, мен зимдан остингга сув қуяман. Менинг ҳам шунаقا йўлларим борки, бир куни пешонангга «оҳ!» деб урганингда биласан! Майли, қилмиш-қидирмиш! Бошладингми, жавобини ҳам кут!»

Мирсалим ана шундан бошлаб Содиқнинг изига тушди, қилдан қийиқ, тирноқ остидан кир қидирди. Аввал унга Содиқнинг Жаннат билан боласиз бўлса ҳам тинчтотув яшаши ғайирлик қуртларини қимирлатиб қўйган бўлса, энди бир «келгинди»нинг обрўй орттириб, мактаб директори бўлиб ўтириши, кундан-кун мавқеи ошиб бориши, йўлидаги хас-чўпларни бераҳмлик билан сиди-

риб ташлаши унинг ғашини нафратга, аламини ғазабга айлантирас эди. У пайт пойлаб чалишини мўлжаллаб, заҳрини дилида, шакарини тилида олиб юрди. Ташқаридан кўрган одам бу икки дўст орасидан қора мушук ўтганини пайқамас эди. Содиқ эса, бу гапларга иш юзасидан бўладиган танқид деб қараган, эртасидан унутиб, бояги-боягича муомалада бўлиб кетаверганди.

Буни Мирсалим ўзича тушуниб, биринчи босқичи ўтди, энди иккинчисига замин ҳозирляяпти, деб ҳадиксираб юрди, ўзича тадбирлар кўра бошлади. Зарур топган бир-икки идорага Содиқнинг «ишлар»дан анснимка ёзи, ҳадди сиққан кишилар орқали турли миш-мишлар тарқатиб турди. Энди у аввалгидек кимгадир орқа қилиб, дарсига бепарво, жамоат ишларидан четлаб юрмасди. Мактаб ишига боши билан шўигиган бўлиб, Содиқнинг қадамини санайди, ҳар сўзидан бошқа бир маъно излайди. Содиқ ташаббус кўрсатиб бошлаган ҳар ишнинг охирда «вой»и чиқишини тўрт кўз бўлиб кузатар, кетидан қуварди, лекин «пичноққа илингудек» тузук нарса қўлига кирмас, бу эса унинг баттар жаҳлини чиқарар, асабини қақшатар эди. Аммо Содиқ билан аввалидек аҳилга ўхшар, уни бальзан уйига таклиф ҳам қилиб туради. Аслида унинг муносабатида қори кетиб, музи қолган эди.

Баҳор чиқиши билан Содиқ бошлаган ташабbusлардан бири мактабнинг орқасидаги бекор ётган каттагина майдонни обод қилиш бўлди. Ботаника муаллимини чајнириб: «Тажриба боғи қилсан қалай бўларкин?» деган эди, у «қаин эди!» деб яшнаб кетди. Бу фикр шу вақтгача ўзининг хаёлига келмаганидан сал хижолат тортгандек ҳам бўлди. Шанбалик қилиб бошланган бу эзгу иш колективнинг қўллаши билан яхши натижә берди. Майдонга турли мева кўчати, хонадонларда кам бўладиган гул ва чечаклар экилди, тажриба станциясидан нозик декоратив ўсимликлар келтирилди. Болалардан навбатчилар тайинланиб, ҳар синфга участка бўлиб берилиди.

Бу ҳаракатни эшитган Мирсалим «Зора бир нарса чиқиб қолса», деган умидда ҳовлининг бурчида занг босиб ётган кетмонини наридан-бери тозалаб, иш бошига келди.

— Келинг, Мирсалим ака,— деди Содиқ ва ённдан жой кўрсатди.— Шу ерга бир жуфт анжир экамиз.

«Анжир» сўзи Мирсалимнинг «илм дўлана эмас, ўзи

гуллаб, ўзи пишса, у — анжир, парвариш талаб қила-
ди» деган ўз сўзини ёдига туширди. Туширди-ю, хаёли-
ни аллақаёқларга бевош етаклаб кетди: «Демак, Со-
диқ менинг пайимга тушган, яна иш чиқармоқчи, акс
ҳолда шу вақтда менга анжирни писандада қилмаган бў-
ларди».

Мирсалим авайлаб юрган ярасини уриб олган ки-
шидек бўлиб кетди ва ҳеч нарса демасдан Содиқ кўр-
сатган ерга чуқур қазий бошлади. Ваҳоланки, Содиқ-
нинг хаёлига ҳеч қандай фикр келмаган, чиндан икки
туп анжир экиш мўлжалланган эди. Ўша икки туп ан-
жирнинг биттасини келтириб, ўзи тайёрлаган ерга сал
ёнбошлатиб ўтқазди, иккинчисини Мирсалимга узатди:

— Бу сизга!

Содиқ иккита ғиштни устма-уст қўйиб ўтиради, бир
кафт нам тупроқни олиб қўлида эзрилади, ундан баҳор
ҳиди келарди. Ҳашар қайнаб турган атрофига қаради:
ҳар жонда бир уйғониш, бир завқ. Баҳор ҳар қалбга
кириб боргандек, баҳор ҳавоси ёшликни эсга солгандек
ёқимли ва юмшоқ. Энди бўртган куртакларнинг кўрки
бир олам. Бир жуфт қалдирғоч осмонда чарх уради:
«Юр, биз билан бинафша кўзи милтиллаган боғларга,
чучмома, лола кеккайган қирларга, малла ранг сой бўй-
ларига!» дегандек, худди бошининг устида вижирлайди,
аллақаёқларга учиб кетиб йўл кўрсатган бўлади.

Содиқнинг баҳор завқига маст хаёлинини майдондаги
юқори синф болаларининг қий-чуви бузди. Улар нима-
нидир талашар эдилар. Содиқ етиб борди. Майдоннинг
четида қачонлардир отхона вазифасини ўтаган эски
бостирма бўлиб, уни бузиш мўлжалланган эди. Бузи-
шаётуб унинг бир бурчнда қалдирғоч уясини кўриб қо-
лишибди. Бир шаддодроғи:

— Ҳеч нарса қилмайди, бошқа жойга қуриб олади
уясини,— деса, бошқаси:

— Увол! Шунча меҳнат сарф қилган!— деб қарши-
лик билдиради.

— Баҳорни ёмон кўрган одам қалдирғоч уясини бу-
зади!— деди бир бола ва «менинг қўлим бормайди» де-
гандек кетмонини бир четга улоқтиради.

Болаларнинг куйиб-ёниб тортишувларига завқ би-
лан қулоқ солиб турган Содиқ, шоир табиатни бола би-
лан яна бирининг елкасига қўлини қўйиб кулди. Улар-
нинг фикрини қувватлади:

— Тўғри, баҳорни ёмон кўрган қуш уясини бузади!

— Гулхонани қаерга қурамиз бўлмаса?— деди бояғи шаддод бола ҳайрон бўлиб. Унинг куйганича ҳам бор эди. Бу нураган бостиurmани олиб ташлаб, ўрнига хонаки гул ва гиёҳлар учун жой қилиш мўлжалланган эди.

— Бизнинг гулхонамиз шаҳримизнинг генерал пла-нида йўқ. Нариги томонга олиб қурсак ҳам бўлади,— деди Содиқ кулгига олиб, ғолиб чиққан томон чапак чалиб қувонди.

Буларнинг барчасидан хабардор бўлиб турган Мирсалимнинг юраги эзилиб кетди: «Бир паррандага раҳми келади-ю, мени шу қалдирғочча ҳам кўрмайди, тинчимга чанг солгани солган!». Шунда яна бир бошқа қабиҳ фикр хаёлига келди. «Ҳа-ҳа,— деди ичида у,— нима учун қалдирғоч уясини буздирмаганингни биламан. У Маккадан келган! Болалар ўртасида динни яширин ташвиқот қиласан». Худди шундай, деб бир идорага ёзишини кўнглига олиб қўйди.

Мирсалимнинг қора ниятидан хабари йўқ Содиқ унинг ёнидан ўтар экан:

— Шундай ажойиб қушнинг уясини бузишмоқчи-я, болалари тушкур!— деди.

— Макка қуши денг!— дея тегишган бўлди Мирсалим, мақсади эса «Макка» сўзини одамлар оғзига тушириб қўйиш, керак бўлганда Содиқка тўнкаш эди.

— Гап Маккаданми, бошқа ёқданми келганида эмас, умуман, болаларда паррандага меҳр уйғотиш керак.

Тушлик жуда кўнгилли ўтди. Ҳар ким олиб келган нарсасини ўртага ташлаб, боқقا ток очишга чиққан боғбонлардек яирашиб ўтириб, тамадди қилишиди.

— Икром отамни чарчатиб қўйдик!— деди бир ёш ўқитувчи қаршисида терлаб тамадди қилаётган кекса ўқитувчига тегишиб.

— Отамиз, чинор,— деди у кишининг кўнглини кўтариб Содиқ.— Минг йил яшаган чинорлар ҳам ҳар йили бир барг ёзиб, илдиз отади. Икром отам-ку...

Бошқа бири унинг сўзини бўлди.

— Отамнинг иликлари тўқ.

— Сиз чиқмасангиз ҳам бўлади, девдим, йўқ, рози бўлмадилар!— деб гапга аралашди илмий мудир.

— Бир эзгу иш қилиб, кайфини суриш ҳам ўзи бир

даврон, болам!— деди Икром ота, ўз ишидан мамнун эканини билдириб.

— Шу гапдан кейин бир кекса боғбоннинг ҳикояси эсимга тушди. Кўнглингларга олмасанглар айтиб бераман,— деди Содиқ пиёласидан сўнгги қултум чойни ҳўплаб.

— Айтиб беринг, Содиқжон, дўстнинг аччиқ сўзидан нодон хафа бўлади!

Икром отанинг бу холис сўзи «иштонсизнинг чўпдан ҳадиги бор» дегандек, Мирсалимга тегиб кетди, ичида «менга кесак отмаган сен сассиқ чол қолувдинг», деб тишини тишига босди.

— Шунақа баҳор кези экан,— гап бошлади Содиқ.— Соч-соқоли оппоқ бир мўйсафид кўчат ўтқазаётса, оғзига кучи етмаган бир бойвачча ўтиб қолибди.

— Ота, қариганингизда кўчат экяпсизми?— дебди.

— Ҳа, яхши нав эди.

— Ҳали мевасидан ҳам умидворман денг!

— Бўлмасам-чи!

Мўйсафиднинг жавоби бойвачча йигитнинг энсасини қотириб, жаҳлини чиқарибди, ичида: «Наҳотки шу мункиллаган чол кўчати мева бергунча яшаса» деб ўйлабди-ю, бойваччаларга хос ғуур билингдан менсимай:

— Шу кўчатингизнинг мевасини ўзингиз тотисангиз хотиним талоқ бўлсин!— дебди ва отига қамчи босибди. Бечора чол орқасидан «ҳой-ҳой болам, қасам ичма!» деганича қолаверибди. Ииллар ўтибди. Кўчат улғайиб ҳосилга кирибди, мевасининг донғи атрофни тутибди. Ўша бойвачча йигит бу боғнинг таърифини эшишиб келибди. Қараса, ўша мункиллаган чол ҳали тирик, йигитни танимабди, олдига дастурхон ёзибди, мева узибди.

Такаббур йигит мевадан тотиб туриб:

— Узингиз ҳам олинг, ота, таом эгаси билан ширин,— дебди.

— Йўқ, болам мен еёлмайман.

— Нега? Сабаб?

— Сабаби шуки,— дебди чол,— шу мевасининг кўчатини ўтқазаётган йилим бир йигит ўтиб кетатуриб «мевасини ейишга умрингиз етса хотиним талоқ бўлсин», деган. Шу йигитга жабр бўлмасин деб емайман, болам.

— Олаверинг, ота, ўша йигит мен бўламан. Уйга бориб хотинимни қайта никоҳләб оламан!— деб узр сўраган экан. Шунақа, биродарлар, иўчат кишининг умрини

чўзади. «Ўлимни ўйлаган иморат солмайди» дегандек, ноумид киши кўчат ўтқазмайди.

Ҳаммага ёқсан бу ибратли ҳикоя, Мирсалимга яна бир факт бўлди: «Ёшларга талоқ ҳақида ахлоқсиз ҳикоялар айтиб беради!»

Мирсалим бундай икнр-чикирларни яширин имзо билан ёза бериб чарчади, қараса сезиларли натижа йўқ. Кута бериб тоқати тоқ бўлди. Бу орада Мушаррафнинг кўзи ёриб, Содиқнинг боши осмонда: ўғил!!

Шу ўтда ёниб бутун ёзни ўтказди. Имкон борича Содиқнинг сояси бўлиб, ажралмасликка уринди, у билан бир-икки овга ҳам чиқди, ўзи бошлаб қишлоқдаги дўстлариникига меҳмонга олиб борди. Ниманки, сал қалтис ёки қалтисликка бурса бўладиган сўз оғиздан чиқса, ёки воқеа бўлса қоғозга олди, қўшди-чатди, «материал»га айлантирди. Барнибир булар уни қаноатлантирмас, куя бўлиб емириш эмас, гурзи бўлиб бошинга тушишини, қоқинтиришини эмас, умбалоқ оштириб йиқитишни орзу қиларди. Ўйлаб-ўйлаб унинг хатти-ҳаракатидан кўз-қош чиқариш эмас, тўғридан-тўғри туҳмат қилишга жазм этди. «Олдини олмасам, бу лаънати, орқамга қоқиб туриб, кетимга тепганини ҳам билмай қоладиганга ўхшайман. Йўқ, у тепгунича, мен уни қулатишм шарт!»— деди Мирсалим ўзига-ўзи ва бунга қаттиқ киришди. Бунга Мушарраф жуда қўл келарди.

Минг бир режа тузиб, Мушаррафнинг йўлинни пойлади. Шу кунларда ўзича турли хаёлларга бориб, ҳар таниш хотинни эрига ўйнаш тутиб, фифони осмонга чиқиб юрган Мушарраф Мирсалимнинг сўзига бўйинни эгиб, қулоқ солди.

Илоннинг оёғини санаган Мирсалим узоқдан сиполик билан айлантириб келиб, деди:

— Биринчи хотинини қўйиб, сени олган, сени қўйиб, бошқасини ололмайдими! Ҳозир ошиғи олчи турган пайт: ўи етти яшарга совчи қўйса йўқ демайди, худо ҳақи йўқ демайди! Бола ҳам кўзига кўринмайди. Ҳали кеч эмас, олдини ол... Бу бепарволигингда ундан ажрабиб, икки қўлнингни бурнингга тиқиб қоласан.

Мирсалимнинг сўзига лақقا учган Мушарраф шошиб қолди:

— Қандай қилиб?

Мирсалим жўрттага ўйлаб қолди. Жуда мушкул ишдек манглайнини ишқалади.

— Эрингни унақа-бунақа күч эголмайди. Мактаб, маорифга бориб юришингнинг фойдаси йўқ. Тўғри райкомга кир. Бўлган, бўлаётган воқеанинг ҳаммасини айт, яхшироқ таъсир қилиш учун бир оз қўшиб-чатсанг ҳам бўлади. Нимаки десанг— фойданг. Тезда қайириб беришади.

— Ростданми?— дардига даво топғандек Мушарраф яшиаб кетди. Кейин бирдан иккиланди:

— Тағин...

Мирсалим унинг нима демоқчи эканини дарров фаҳмлаб, гапиртиргани қўймади:

— Бу ёғидан хотиржам бўл, ҳеч нарса қилмайди. Шунақа қилиб, эрини қайириб олган қанча хотинларни биламан. Мана, мени айтди дерсан, кейин хурсанд бўласан. Кейин эвазига...— Мирсалим шилқимлик қилди. Мушаррафнинг юрагига бунақа гаплар сиғмас эди, унинг энгагига чўзган қўлинин қайириб ташлади.

— Мунча!— деди Мирсалим ўтган кунларни эслаб,— энди бегона бўлиб қолдикми?

Мирсалим нияти бузилиб келаётан бўлса ҳам, ҳозир мавриди эмаслигини эслаб, асл мақсадга қайтди.

— Бирдан-бир йўл шу—райком. Яна ўзинг биласан. Эр менга эмас, сенга керак. Ундан ажраб қочсанг, бунақа эрни энди тушингда кўрасан.

Мушаррафнинг назарида, Содиқ уни ҳали-замон ташлаб кетиб қолаётгандек бўлди. Олдини олиши шарт бўлиб қолди: ҳайнтдан кейин хинани ачангга бер!

Мушаррафнинг лақقا тушганини кўрган Мирсалим унга йўл-йўриқ берди, ҳатто райкомга гапни нимадан бошлаб, қандай тамом қилишгача ҳаммасини уқтириди.

Мушарраф эртасигаёқ Мирсалим аниқлаб берган соатда секретарнинг эшигини қоқди. Зарур иши бўлишига қарамай секретарь кўзида ёш билан кирган бу маъюс хотинини қабул қилди, ҳатто креслосидан туриб келиб, унинг рўпарасига ўтирди:

— Келинг, синглим?— деди секретарь «арзингизни эшитишга тайёрман» деган маънода. Мушарраф ўпкаси тўлиб турган кишидек энтикди, бурнини тортди, пастга энгашиб кўз ёшини артган бўлди.

— Улар бўлсан ўлдим, турмуш шунақа бўладиган бўлса тоқ ўтганим яхши. На уйқуда, на еган-ичганим-

да ҳаловат бор; қўлнм косов, сочим супурғи. Эшикда оёғи товушини эшитсан, азроил келаётгандек дир-дир титрайман. Гап эшитмаган соатим, калтак емаган куним йўқ.

— Эрингиз ким? Қаерда ишлайди?

— Вой, сизни биласиз, деб ўйлабман. Содиқ Қўчқоров, 113-мактабининг директори. Мен иккинчи хотиниман, баҳти қаро бўлмасам хотин қўйганга тегаманми! Аввалги хотини бечора ҳам қонзардоб ютиб ўтган экан.

Секретарь столидан қофоз олиб, нималарни дир ёзиб қўйди, кейин сўради.

— Сиз ўзингиз ишлайсизми?

— Ишлардим, кутубхонада ишлардим. Ишлатмай қўйди: «Чиққанимда чопонимни тутиб, кирганимда қўлимдан олиб турсанг бўлди, қачон хотиндан пайғамбар чиққибди!»— деди.

Секретарь «ҳимм» деб яна нимадир ёзди қофозга. Буни кўрган Мушарраф яна лаби-лабига тегмай бидирлаб кетган эди секретарь тўхтатди:

— Тузук одам деб эшитган эдим-ку, уни...— деди секретарь, хаёл сурган кишидек.

— Ташқарига шоду хандоц, бир-икки кўрган одам ичини бида қолмайди. Мен ўлгур ҳам, шунақалигини билмаганман, ширин сўзига учиб, мана энди бош ургани жой тополмай, ёшимни оқизиб юрибман.

Секретарнинг иши тифиз бўлса керак, соатига қараб, иргиб ўриндан турди.

— Хўп, синглим, сиз бораверинг, бу ёғини ўзимиз гаплашиб қўямиз, турмушингиз яхши бўлиб кетади, хафа бўлманг.

Мушарраф яна «ўлар бўлсан ўлдим!»ни такрорлаб эшикдек чиқди.

Бу ифвонинг заҳри Содиқقا бир ҳафтадан кейин билинди.

Бу вақтда Содиқ юқори синф болалари билан шаҳар четидаги колхозда паҳта терар эди. Бир ҳафта бурун шивалаб ўтган ёмғир ва кетидан бошланган совуқ паҳтакорларни шошириб қўйган, шаҳарга ёрдам сўраб, илтимос қилингаша мажбур этган эди. Содиқ ҳар йилгидай болаларни муаллимларга қўшиб чиқаришдан кўнгли тинчимай, ўзи олиб чиқди. Уларни иссиқ жойларга ўрнаштириди, колхоз раҳбарлари билан гаплашиб иссиқ совуфининг гамини еди. То болалар кўнишиб, иш юри-

шиб кетгунича ўзи улар билан бўлди, ёиларида юриб пахта терди. Щу кунларнинг бирида «Район партия комитетининг секретари шаҳардан чиққанлар ҳёти билан танишиб юрганимиш» деган гап тарқалди. Эртасига Содиқ ўқувчилар билан ҳашарга чиққан колхозга келди. Болаларнинг турган ерларини, терган пахталарини кўздан кечиргач, Содиқни қўлтиқлаб бир четга олиб ўтди. Содиқ унинг хатти-ҳаракатларидан хавотир олмаса ҳам, секретарнинг бугун ўзи билан аввалгидек очилиб сўрашмаганидан, қовоғи солиқроқ юрганидан ҳайрон бўлди, «чарчаган бўлса керак» деб ўйлади, парво қилмади. Лекин секретарнинг қовоғи солиқлигининг сири улар бир четга ўтгандан кейин очилди. Секретарь гапни айлантириб келиб, Мушаррафнинг арзига шама қилди.

— Ҳеч нарса тушунмаяпман, ўзи нима гап? — деди Содиқ ҳайрон қолиб.

— Узингизни гўлликка олманг, ўртоқ Кўчқоров, ҳеч ҳам ярашмаяпти. Сиздан буни кутмаган эдик! Яхшимас! Яхшимас! Тарбия ўчоғининг бошидасиз-а! Коммунист!

Содиқнинг ўлимдан хабари бор, лекин бу туҳматдан хабари бўлмаганидан калтаклаб ташланган кишидек гангид қолди.

Содиқ кутилмаган бу зарбадан шундай ҳолатга келдики, секретарнинг хайрлашган-хайрлашмаганини кейин ўйлаб, эслолмади. Барчаси мудҳиши тушга, охири йўқ тушга ўхшар, ундан ҳеч уйғониб кетолмаётгандек қийналарди. У жуда шошиб қолди. «Наҳотки Мушарраф устимдан арзга чиққан, туҳмат қилган бўлса!» — деб ўйлади.

Содиқнинг Мушаррафдан шубҳаланишга қиттай ўрни бор эди. У Мушаррафнинг кўзи ёригандан кейин кишининг гашини келтирадиган бачканга ҳаракатларидан қайирниш мақсадида бир-икки койиган, тўғриси, маслаҳатлар берган эди. «Наҳот шу холис ниятим Мушаррафга мушукнинг жунини тескари силагандек ёқмагану, ковушини судраб арзга чиққан бўлса!» — Мушаррафнинг бундай туҳматлар билан район партия комитетининг секретарига чиқиши ҳеч миясига сиғмас эди. — «У бўлмаса ким бўлади? Секретарь ичидан тўқимайди-ку!»

Содиқ кечгача гангид, қиласар ишини билмай юрди,

муаллимни деб, пионерлар вожатийсини чақирди, идорага деб, хирмөнга кетиб қолди. Ахири болалар дала-да қайтгач, овқатларини едириб, шаҳарга тушиб чиқмоқчи бўлди. Аммо салдан кейин бу фикридан қайтди. Бугун тушиб борса яхши эмас, аламдан ёниб турибди. Жаҳл устида хотинини хафа қилиб қўйиши мумкин. Буни у истамас, лекин масалани очди қилиши керак. Ҳозир эса, асабим бардош беролмай қолади, деб қўрқарди у. Ана шу нарса уни йўлдан қайтарди, биринки кун обдон танасига ўйлаб, Мушаррафга қандай қилиб билдирищнинг силлиқ йўлини топишга қарор берди. Итининг феъли эгасига маълум бўлгандек, Мушаррафнинг пайраҳадек гуриллаб ёниб кетишини у яхши билади, ахир.

Учинчи куни Содиқ уйига тушди. Эшикдан кириб бориши биланоқ ҳаммаси кўзинга ёзиб қўйилгандек хотинининг кўзига боқди. Қай кўз билан кўрсинки, унда ҳеч қандай ўзгариш йўқ эди: Мушарраф эрининг юзидағи безовталиктин пайқаб:

— Тинчликми? — деди. Бу шундоқ ҳам ўз ҳаракатидан хижолат тортиб турган Содиқни ёлғон гапиришга мажбур қилди:

— Кеча сал тобим қочди.

— Шамоллагансиз. Иссиқ кийиниб кетинг демадимми! Докторга кўриндингизми?

— Ҳа, дори берди, бугун тузукман! — охиригача ёлғон гапиришга қарор қилди. Аммо ёлғон чўзилиб кетса уддаломаслигини билиб, ўғли Маратни қўлига олди, лўппи юзларидан ўпди, «мени соғиндингми, ўғлим?», деб унга гап қотди. Бола ҳам дадасининг гапига тушунгандек балиқникига ўхшаган тищсиз оғзини очиб кулди, талпинди. Арзанда ўғлининг бу ширин қилиқлари ҳам унинг хаёлидан мудҳиш тушга ўхшаган лавҳани чиқаролмас эди. У ҳамон хотинининг ҳар бир ҳаракатини кузатар, кўнглида «у ҳали мени бехабар, деб билса керак» деган фикрда эди.

Эрининг бевақт келганидан ташвишланган Мушарраф қайнанасининг «суюқ овқат қилинг, танамиз яйраб ичайлик» деб қайнаттирган овқатини ошга айлантиromoқчи бўлди.

— Барвақтроқ келганингизда икки қозон осиб юрмас эдим! — деб ўпкалади Мушарраф.

— Борини қайнатавер! Ўзи нима эди?

— Суюқ. Мошхўрда. Ойимлар қатиқлаб ичайлик, деган эдилар. Райхон ҳам кертиб қўйғанман.

Содиқ тошкентлик бўлмаса ҳам мошхўрдан яхши кўрар, ҳатто ариққа солиб қўйиб, сал ачитиб ичарди. Шунинг учун ошга айлантиришга розилик бермади.

Овқат ўтди. Мушарраф чой дамлаб келиб, пиёлани уч марта чайқаб ташлагандан кейин, қўйиб эрига узатди. Сўнгра «концерт вақти бўлибди» деб радио қулогини буради. Йиғлаган боласининг оғзига кўкрак солиб ўтириб, радио тинглади. Концерт тамом бўлгач, уни паст қилиб, Маратни Содиққа узатди:

— Бор, дадангга бориб тургин, ўғлим, даданг эртага яна кетиб қоладилар, гаплаш, нималар кўриб келдингиз, дегин. Мен қозон-товоғимни ювиб олай,—деди Мушарраф ва: «Эрим хабар топибди» деган ўй билан тилёгламалик қилди: «Нега одамга бунақа қилиб қарайсиз! Бунақа одатингиз йўқ эди-ку, ё жиндай тортиб келганмисиз?»

Чиндан ҳам Содиқ хотинидан кўзини олмас, қалбини ўртаб ётган гумонига далил қидирар эди, иложини топса, юрагига назар ташлаша ҳам тайёр эди.

У ўғлинин қўлига олди. Ўғли қўлида-ю, хаёли секретарни таъналарида эди. «Ажабо! Ҳеч қандай белги йўқ-ку! Наҳот Мушарраф шундай усталик билан бу ролни ўйнайтики, мен уни пайқаб одолмасам! Мумкин эмас!»— деб ўйлади ва хотини ошхонадан келгандан кейин, тусмоллаб бир-икки тош отиб кўрди. Бундай ҳам бир иш чиқмади. Лекин хотинига ошкора айтиб, подадан олдин чанг чиқаришни лозим топмади. Бир оз сабр қилишга, ипнинг ўзичувалаб қолишнин кутишга қарор қилди.

Мушарраф эса, гўё ҳеч нарсадан хабари йўқ кишидек, оғзидаги «Бухорий» сақиҷни қарсиллатиб чайнар, Содиқнинг «қўй, уят бўлади» дейнишига кулиб «тишни тозалайди, буваларимиздан қолган тиш чўткаси», дерди:

Лекин Мирсалим, секретарнинг Содиқ билан қилгац кўнгилсиз суҳбатидан хабар топган, бу иши самара бера бошлаганидан қувониб, бағрига шамол тегиб қолган эди. Секретарь орқали қилинган тазиик юқоридан тушгани мушт, энди остидан ҳам сув қўйини зарур эди. Буни Мирсалимнинг ўзи бошлади. Нахта терими вақтида қолиб кегган дарсларни қандай қилиб ўтишга бағищлан-

ган педагоглар кенгашида сўзга чиқди. Директорни болалардан кам хабар олди, шу пайт ичнда мактабда ҳам интизом сусайиб, давомат пасайиб кетди, пахтадан қочган болаларга чора кўрмади, деб айблади.

— Директоримизнинг бир оёғи у ёқда, бир оёғи бу ёқда бўлиб, оқибат яхши бўлмади. Биз пахтадалигимизда тўққизинчи синфдан бир қиз эрга узатилибди. Бунга бошлаб директор, қолаверса, биз айбормиз. Ўқишини битиргандан кейин тегса, боши туйнукдан чиқиб кетмас эди.

Мажлис охирида Содиқ ўз адресига айтилган сўзларни самимият билан қабул қилди, коллективни ўзига ёрдам беришга чақирди. Лекин у Мирсалимнинг шунча іапни дадил айтганига ажабланарди. У шу мактабга келганидан бери Мирсалимнинг тик туриб, журъат билан айтган илк танқидини эшлиши эди. Бундан қувонди, демак, кишиларда ташаббус, жонкуярлик уйғониб келяпти. Бу яхшиликка!

Лекин ўзи ҳақидаги яхши фикрни Мирсалим Содиқ билан бирга қайтаётганда уч пул қилди.

— Кўнглингизга олмайсиз-да, Содиқжон,— деди у,— ишнинг нағини кўзлаб бир оз товонингизни босиб қўйдим ибрат бўлсин, дедим.

— Жуда тўғри қилдингиз. Ҳар ким ўз айбини билса қорни ёрилиб ўлади, деган ган бор. Қўрсатдингиз, мана энди кўплашиб тузатамиз.

— Шундайку-я... лекин баъзилар танқидни нотўғри тушунишади. Қани ҳамма ҳам сиздек оқ кўнгиллик билан қабул этса... Дўстнинг юзига танқид қилмаслик, рақиб бўлиб чўнтақда мушт кўрсатиш билан баробар,— деди катта бир ишни бошлаб берган кишидек, бир йўсинда Мирсалим. Лекин унинг бир кўзи: «Сен менинг тинчимни буздинг, оромимни олдинг. Изинга тушганим-тушган!»— деса, бир кўзи: «Бошлиқларни танқид қилиш арслонни ўпишга ўхшайди, даҳшати кўп, роҳати йўқ!»— дерди. Тун бўлгани учун Содиқ унинг кўзларини кўрмас, фаразли фикрларини уқа олмас эди.

Муюшга борганда қуюқ хайрлашишди, ҳатто Мирсалим «ойим билан келин пошшага салом деңг, ўғилчани ўпиб қўйинг!»— деди.

Содиқ миннатдорчилик билдириди.

Бу хилда сусткашлик кўрсатиб бораверса, эрта-индин Содиқ яна ёнбошига олиб шунаقا отиши мумкин-

ки, унда ё ўнгланиб олади, ё йўқ. Нима қилиш керак? Бу мушкул савол эди. Бу мушкул саволнинг жавобида ёниб юрар экан, бирдан Фаҳриддин Шукуров эсига тушди. Паст бўйлик, оқ-сариқдан келган бўлса ҳам зардаси тез Шукуров аравага энди кирган отек ўйноқлаб, ҳар томонга ўзини уриб, нима қилишини билмай юрарди. Мирсалим уни учратиб, қўйнига қўлини солди, пешонасини силади, «ўзингни ўтга, сувга урма, акаси, бунинг йўли бор», деди, етаклаб кетди. Бундай пайтда кишининг кўнгли бир оғиз илиқ сўзга муҳтож бўлади. Шу илиқ сўэни Мирсалимдан эшигтан аламдийда Шукуров олди-кетини суриштирмай унинг етовида бўлди-қолди. Мирсалим унинг этини аста-секин ўлдириб бориб ишончига кирди, дардкашига айланди.

— Пешонамиз шўр бўлмаса,— деди бир куни унга,— бир келгинди тўрга чиқиб, сиз билан биз пойгакда қолармилик!

— Ана шунисига мен ҳам чидамайман!— деб юборди тўлиб турган Шукуров.

— Балли! Лекин нолиш билан иш битмайди. Бунинг йўли бор.

— Йўли бор?— косови қисқалик қилиб турган Шукуров бит кўзларини ҳамсуҳбатига тикди.

— Мен унинг кўп сирларини биламан. Қалинлик пайтларимизда кайф аралаш оғзидан гуллаб қўйган. Лекин менинг бир ўзим билганим кифоя эмас. Баъзиларни сиз ҳам кўриб юрибсиз, масалан, яхши ўқитувчиларни қувғин қиляпти. Илгариги мактабида хотин-қизлар озодлигига қарши чиққан, атайлаб ёш қизларни эрга бердириб юборган экан. Бу нима деган гап? Бу советга қарши иғво.

— Бўлмасам-чи!— лаққа тушди тўлиб турган ҳамроҳ.

— Эшитишимча, ўз шаҳрида булар бир нечта бўлишган. Ишчуваладиган пайтда бу ёққа қочган. Бу ер сер одам-да, тўдага аралашиб кетаман деган. Кўриб турибсанзки, яна ўша файри қонун ишини қиляпти.

— Хўш, энди нима қиламиз дейсиз?

— Фош этиш керак. Бу бурчимиз ахир.

Бит кўз Шукуров «қандай қилиб?» дегандек кўзини лўйқ қилиб олди. Мирсалимга айни шу нарса керак эди.

— Албатта ошкора қарши чиқиб бўлмайди, унинг

Йилтироқ сўзига ишонганлар бизга гап бермайди. Бунинг битта ўёли бор: зимдан иш тутиш.

— Зимдан?

— Ҳа, зимдан. Органга икки энлик қилиб ёзиб ташланса кифоя.

Шукуровнинг чўчинқираганини сезган Мирсалим дарров тўнини ўзгартирди:

— Бу бизнинг бурчими! Наҳот шундай ишларини билиб-кўриб туриб, лом-мим дейишни лозим топмасак. Уят! Жуда уят!!

Шукуров бўшашиб тушди, Мирсалим яна унинг қўлтиғига сув пуркаб, тайёр қилиб олди.

Булар ёнига кўмир ўғирлаб қўлга тушган мактаб хўжалик мудири қўшилди. Мирсалим уни ҳам «бир арава кўмир одамнинг хуними! Қишиларда ҳукуматга қарши норозилик туғдириш учун атайлаб қиляпти» деб ийлаб юрган эди. Уч бош қовушди. Бир ўтиришда Мирсалимнинг котиблигига ёзиб ташланди. НҚВДга ёилган бу хат Мирсалим кутганидан ҳам яхши, тўла чиқсан эди. Шунинг учун бўлса керак, имзолар чекилиб бўлгач, таъкидлаб қўйилди:

— Ҳаммамиз ҳам ўз хоҳишимиз билан қўл қўйяпмиз-а, яна кейин айнаб юрмайллик. У идора ҳазилни ёмон кўради: нақ бошларинг кетади!

— Сўз битта! Ҳезалак тонади! — деди дадилланиб Шукуров. Лекин хўжалик мудири хомуш эди.

13. КЎНГИЛСИЗЛИКЛАР

Иккинчи чорак тугаб, болалар қишки каникулга чиққандан бери Содиқнинг кўнгли жуда ғаш, иши ҳеч ривож топмайди, ривож топса ҳам қадр топмайди. Бўлмаса озмунча ишлар қилиб қўйдими! Унинг ўрнида бошқа одам бўлса районга байроқ бўларди: мактаб ремонтини мудатидан аввал сифатли қилиб тугатди. Тежаб қолган пуллига спорт майдончаси қурди, минг ёққа елиб-югурниб тарих кабинети билан физика кабинетини кўнгилдагидек қилиб жиҳозлади. Завхознинг қақири-қуқури билан банд бўлиб ётган катта подвалнинг ярмини ремонт қилдириб, Суфетга берди-да, буфет ўрнини кутубхонага қўшиди, унинг ёнини қироатхона қилди. Юқори синф болаларининг кучи билан ғишт қўйиб, турли тўгаракларнинг ишлаши учун ҳовлининг бир четига алоҳида иккича-уч хона

қурди. Узи лой кечиб ишлади. Ёшроқ ўқитувчиларни ҳам сафарбар қилди. Бу ишларни самарали тугатгани ҳақида район раҳбарларига ўз вақтида рапорт берди. Қелиб кўришиб, маъқуллаб кетишди, район маорифи бўлимнинг мудири: «Қани энди сизга ўхшаган ташаббускор директордан кўпроқ бўлса!»— деб қўлини сиқди. Лекин... лекин шундан бир оз вақт ўтгач, район ўқитувчилар конференциясида на унинг номи, на мактаби тилга олинди. Сўз сўраган эди, рўйхатга ёзишди-ю, сўз беришмади. Сабабини сўраб, район маорифи бўлимнинг мудирига мурожаат қилган эди, «навбат келмади, ёзилганилар кўп эди», деб тунд жавоб қилди. Содиққа унинг жавобидан ҳам ўзига рўйхушлик бермасдан гапириши қаттиқ ботди. «Хаёли бошқа ёқда шекилли», деб ўзига тасалли берди. Конференция тугаб, энди кўчага чиққанида унинг мактабини яқинггинада мақтаб газетага ёзган кишини кўриб қолди. У Содиқнинг қўлини сиқиб кўришди-да, шундай илфор мактаб ҳақида конференцияда бир оғиз ҳам гапсўз бўлмаганидан ажабланганини билдириди.

— Ҳа, ростанам,— деди газета ходими нимадир бирдан эсига тушганда бўладиган шошинқираш билан,— мана, докладда ҳам сизнинг мактабингиз билан номингиз, нима учундир, қизил қалам билан ўчирилган.

Ходим газетада берадиган ҳисоботида фойдаланиш учун олган район маорифи мудири докладининг ўша саҳифасини очиб кўрсатди. Чиндан унинг мактаби ва номи қизил қалам билан босиб ўчирилган, лекин ўқиши мумкин. «Ким ўчирган, нимага ўчирган?» деган фикр Содиқнинг хаёлига келди ва мухбирдан сўради:

— Ким ўчирган бўлиши мумкин?

— Ким докладни қизил қалам билан кўриб чиққан бўлса, ўша бўлади-да,— деди мухбир мужмалгина қилиб. Бу унинг чин жавобими ёки ҳазил қилияптими — билб бўлмас эди. Унинг ҳазил қилиши мумкин эмас, чунки кечагина мақтаб ёзгани учун докладда тилга олинмаганилигидан редакцияда унга сўз тегиши мумкин.

Педагогика журналида Содиқнинг «Ўзбекистонда босмачиларга қарши кураш даврини қандай ўтиш керак» деган мақоласи босилаётган эди. Бир куни редакция телефон қилиб, корректурасини кўриб беришни илтимос қилди. Корректурани кўздан кечириб, қўлини қўйиб, редакцияга миннатдорлик билдириб чиқиб келаётганида муҳарририга йўлиқиб қолди. Муҳаррир унинг мақоласи-

дан жуда хурсанд бўлганини айтиб, фаол қатнашиб туришини илтимос қилди:

— Журнал сизларники, ўзинглар фаол қатнашмасанглар ким ғамхўрлик қиласди!— деди у ва бундан кейин ёзмоқчи бўлган мақолаларининг мавзуи билан қизиқди. Содиқ боши кўкка етиб уйига қайтди. Унинг журналда унчалик фаол қатнашув нияти йўқ эди, муҳаррирнинг илтимосидан кейин имкониятларини хаёлидан кечирди. Бир-икки мақоланинг тахминий режасини тузди, ўз тажрибасидан мисоллар эслади. Унинг руҳи енгил, ўзи хурсанд эди. Лекин бу хурсандлик ҳам узоқ чўзилмади: журналнинг ўша сони чиқди-ю, Содиқнинг мақоласи чиқмади. Содиқ ҳайрон бўлиб, редакцияга телефон қилди. Котиб:

— Мен билмадим, муҳаррир олиб қолибди,— деган жавобни айтди. Пайт топиб муҳаррирга учрашиди, ўтган гал қадрдан дўстлардек самимий гаплашган муҳаррир бу гал нотанишдек совуқ кутиб олди. Унинг сўроғига бепарволник билан:

— Келаси сонлардан бирида берамиз, жой етмай қолди,— деди. «Гап тамом, чиқиб кетишинг мумкин» дегандек ўз ишига тутинди. Содиқнинг «хайр» дейишига ўтган галдагига сира ҳам ўхшамаган бир тусда жавоб қайтарди. Содиқ чиқиб кетгач, кетидан келиб эшикни қаттиқроқ ёлиб қўйди. Лекин мақола келаси сонларнинг бирида ҳам чиқмади, кейинчалик ҳам унга «жой топилмади». Бир йиғинда шу журнал котибини учратиб қолди. Ундан:

— Ўзи нима гап?— деса, у ҳам ўз навбатида:

— Ўзи нима гап?— деди. Иккиси ҳеч нарса билмас эди. Муҳаррир «берамиз» дермишу, мундарижа тузәётган вақтда эсига солса, «тура турсин» деб орқага силтармиш, сабабини айтмасмиш.

— Унга ҳам бирор телефон қилганмикан?..— деди котиб редакцияси учун хижолат тортгандек ийманиб.

Хуллас, мақола босилмай қолиб кетди. Бошқасини ёзишга Содиқнинг қўли бормади. Бу орада район партия комитетининг секретари билан анави кўнгилсиз учрашув бўлиб ўтди.

Буларнинг ҳаммаси Содиқнинг асабини эговлар, ташаббусини бўғар, руҳини туширар эди. Буларнинг ҳаммаси буғдоига тушган митадай вақт ўтган сари билишарди. «Омади кетган кишининг аталадан тиши синади»

дегандек, у нима иш қилса кетига кетарди, бурунлари қўллаб-қўлтиқлайдиганлар четга чиқиб турадиган бўлиб қолди. Бу орада ҳамқишлоқ партизан ўртоғи Болтақул-нинг қамалганини эшилди. Уни халқ душманига чиқариб, район партия конференциясида роса қоралашибди. Бу ҳабар Содиқни яна шошириб қўйди: наҳот, босмачилар билан курашда уч бор ўқ еган Болтақул душман бўлса!

У ҳеч нарса тушунмас ва тушунтирадиган ҳам йўқ эди. Ўйлаб ўйига етолмас эди.

Шундай дилхитлик билан иккинчи чоракни тугатди. Унинг кўнгли ғаш ва хира, чироқ ёқса ёришмайди. Тилаб-тилаб топган арзанда ўғлининг гоҳ эмаклаб, гоҳ йиқила-қўпа тетапоя қилиб келиб эркаланишлари ҳам баъзан юрагига сифмасди.

Эрининг кўнгил ғашлигини писанд қилмаган ёки фаҳмига етмаган Мушарраф эрталаб барвақт туриб, наридан-бери ионушта тайёрлади-да, Маратни унинг қўлига тутди:

— Бола битта меникими, манг сиз ҳам боқинг! — деди карашма билан, — кўйлагимдан хабар олиб келай. Бола деб кино-театрлардан қолганим-қолган, модадан ҳам қоламанми? Кеча келган ўртоғингиз хотинининг кўйлагини кўрдингизми, битта костюм пулига тикирибди, яна сеники қимматга тушди, дейсиз.

Содиқ индамай болани тиззасига олди. Мушарраф-нинг енгилтаклигига «ўрганиб» қолган эди. Агар ҳозир қаршилик қилгудек бўлса, ана унда кўрасиз! Пиёлани чойнакка, лаганин косага уриб, айюҳаннос солади, кўз ёши қиласди. Лекин барибир Содиқ бугунги тўполондан қутулмади. Уйни наридан-бери йиғиштириб, нима учунидир, кўйлагидан хабар олгани ҳамон кетмаётган Мушарраф, бир маҳал ишшайиб келиб, эрининг қулоғига шивирлади:

— Пул бермайсизми, битимга олиб келаманми?

— Ўтган куни олганинг-чи, нимага сарф қилдинг?

— Ўйнашимга олиб бориб бердим. — Бирдан қайнаб кетди Мушарраф. У шундай баланд келиши билан эрини босиб олишга ўрганиб қолган. Оғир табиатли Содиқ ҳар галгидек адидаги боришга юраги йўқ, шундай бўлса ҳам, аччиқ ҳақиқатни айтишга мажбур бўлди:

— Ўша тортмадагидан бошқа пулим йўқ. Унинг кепрак жойи бор. Подпискадаги китобларимни олмаганимга анча бўлди.

— Ҳа, оларсиз, шу муллалигингиз ҳам етади.

— Йўқ-йўқ, у пулга тегма! Рўзғорга зарур бўлиб қолади.

Ана шундан кейин Мушарраф тўнини тескари кийиб олди. Уйни бошига кўтарди:

— Яхши кўрганингиз бор, худо урсин, бор. Бўлмаса мени бунақа хор қиммас эдингиз. Қани эндп ўша манжалақини бир тутиб олсан эди, ҳар битта мўйинни битталаб юлардим.

— Ҳай, уят, секин! — деди қўшнилар олдида номусдан Содиқ.

— Ўниш тутиш уятмасу, гапирса уятми! Уялмайман. Нега уялар эканман! Сиз уялинг. Дод, бу қандай бедодлик, кўчада айшини қилиб келиб, уйда хотининга зуғум қилади.

Содиқ бардош қилолмади:

— Бас, шаллақилик қилма, тутганингда гапиргин!

— Тутаман, тутмасдан қўймайман ҳам. Мана кўрасиз, тутаман.

Бу Мушаррафининг биринчи жанжални эмас эди. Унинг мақсади битта: нима бўлса бўлсин буюртирилган кўйлагини бугун олиб келиши керак, ҳозир Содиқдан пул ундириши шарт.

Бундай пайтларда Содиқнинг кўзига ҳеч нарса кўринмайди. Қўни-қўшнилар эшитишидан номус қилади. Шармандага шаҳар кенг, дегандек Мушаррафга барин-бир, у баттар баланд келади.

Содиқ «вайсасанг, вайсаб ўл» деди-да, кўчага чиқиб кетди. Унинг орқасидан ҳам Мушарраф шаллақилик қилиб қолди:

— Худо олсин ўша манжалақини!!!

Эри чиқиб кетгандан кейин ҳам «манжалақи» анча бақтгача Мушаррафининг оғзидан тушмади. Заҳрининг қолганини қайнанасига сочди. У бечоранинг айби, Мушаррафининг ёнига тушиб, Содиқни койимагани! Жанжални ёмон кўрган бечора қайнана кўрпа бўлиб иккаласини ёспмоқчи, кўприк бўлиб тинчитмоқчи бўлди:

— Жон болам, ёш эмассиз, бир боланинг онасисиз. Оғир бўлинг, эшитган қулоқ нима дейди, бу уйдан йиғи товуши чиққан эмас.

— Ҳа, ўша түғмас қисир келинингизни мақтамай қўя қолинг, унинг тили қисиқ эди. Шунинг учун ўғлин-

гиз нима деса, сигирдек бўйинни солиб тураверган. Мен Жаннат бўлмайман. Мен Жаннат эмасман. Эр хотининг ҳуқуқи баробар. Болага зор эди, мана туғиб бердим, энди у ҳам менинг айтганимни қилсан. Нега қилмайди?

— Айтганингизни қилмай нима қиляпти, жон болам!

— Уйда ўтириб ҳеч нарсани кўрмайсиз. Мундоқ қўчага чиқинг, одамларнинг кийиниб юришларини кўриб оғзингиз очилиб қолади.

— Сизники ҳам кам эмас, шу яқиндагина иккита кўйлак тиктирдингиз, бу модадан қолди деб янги туфли олдингиз. Болам бечоранинг битта ўзи топгани нимага ҳам етсин.

— Ўғлингизга айтинг, рухсат берсин, ишлайман,— деди Мушарраф гўё ишласа эрига қарам бўлмайдиган кишидек кибрлазиб.

— Ўғлим бечора ишламанг деяётгани йўқ. Шу вақтгача ишлатмовдими! Бола сал ўзини тутиб олсин деяпти, холос.

— Бу бир баҳона. Мени уйга ойимқиз қилиб ўтқазиб қўймоқчи! Бир манжалақини топган-да, юрганимни кўриб қолмасин, дейди. Кўрмай бўпман, ернинг тагида бўлса тоғиб оларман.

— Ҳай, жон болам, бу нима деганингиз, яхши гапга ҳам фаришта омин дейди, ёмон гапга ҳам. Эрингизнинг обрўйини тўкманг, обрўйини тўкиб яна шу эр билан яшайсизми? Ё бошингизни олиб чиқиб кетасизми? Чиқиб кетсангиз майли-я, бўлмаса қўни-қўшнининг кўзига қандай қарайсиз? Уят-эй! Қўни-қўшнидан номусга ўлдим. Кунда жанжал, кунда тўполон. Бир кун уриш бўлган ердан қирқ кун барака кўтарилади, дейишади.

— Ҳа, минг қилса ҳам ўғлингиз-да, жонингиз ачийди, ёнини оласиз. Мен етим... оёқ остидан чиққанман...— Мушарраф ҳўнграб йиғлаб юборди. Ўзининг гапига ўзи чидолмасдан ер тепинарди. Бўлмаса бечора қайнана унинг етимлигини пеш қиларлик бирор сўз айтгани йўқ.

— Етим ҳам худонинг бандаси, жон болам, тавба дейиш керак. Ҳеч ким сизнинг юзингизга солаётгани йўқ. Мен қўш етим боққанман, киймаганимни кийдириб, емаганимни едириб боққанман. Шукур қилинг, ҳаммаси орқа этакдек орқада қолади. Ярашганини кийинб ҳоҳланни еб юрибсиз. Сизни ҳеч ким етим деяётгани йўқ.

— Башарамга қаранг, куявериб-куявериб, ит мужиган ошиқдек бўлиб кетдим. Хўрлик хотинни, хароблик ҳайвонни хунук қиласди, деб шуни айтади-да. Чиччалогимга тақадиган узугим ўрта бармоғимдан тушиб қоляпти.— Мушарраф ип ўраб бармоғига тақиб қўйган узугини кўрсатди. «Мана-мана!»

— Айби йўқ, жон болам, яқнингинада бўшалгансиз, эмизиклисиз, ҳамма билади. Бир террида қўй неча семириб, неча озади, жон омон бўлсин,— деди қайнана. У ёш болалик хотиннинг ороми бўлмаслигини жуда яхши билар, келинига ачинарди ҳам: ахир невараси жуда сер йифи. Баъзан туни билан йиғлаб чиқади, Мушаррафни ухлатмайди, бунинг устига онасидан ажралмайди, «оғзимдан кўкрагингни олма» дейди. Ўйнаса ҳам онаси ning олдида ўйнайди, Мушарраф сал кўздан жилди дегунча, йиғлайди. Адолат хола баъзан ичида «онасининг худди ўзи, лўли» деб қўяди.

Адолат хола келинининг йиғидан қизариб кетган кўзига, юзларига чаплашиб кетган сурмасига, упа-элиги-га, тўзиган сочига қаради. Ичида «ставба, хотин деган ҳам шунаقا бўладими» деб қўйди. Шунда бирдан кўз олдига Жаннат келини келди. «Фаришта экан, бечора, билмаган эканман» деган фикр ўтди хаёлидан. Мундоқ ўйлаб қараса, Жаннат шунча йил турмуш қилиб, эрига бирор марта тикланиб келмапти-я! Бундоқ хотин ҳам бўлар экан-ку, дунёда! Ҳар тўқисда бир айб дегандек, худо бечорани тирноқдан сиқди. Биттагина қулини ўша муштипардан аямаса, нима қилар экан. Дунёнинг зап ишлари бор-да.

Адолат хола ўйларига якун ясагандек «яхши жувон эди Жаннат» деган фикрни кўнглидан ўтказиб, ўз хонасига ўтиб кетди. Шу орада Марат йиғлаб қолди. Адолат хола, «менга эргашди шекилли» деб, қўлига олган эди, баттар бағиллади. У бир марса чаққандек ёмон йиғларди.

— Ҳай, келин пошша, болангизга қаранг, ўпкаси узилди,— деди Адолат хола Маратни эплолмай.

Мушаррафнинг ичкири уйдан товуши келди, лекин хола уни тузук эшитолмади. «Чиқиб қолар ҳозир» деган ўй билан барча эркалаш сўзларини ишлата бошлиди. Невара қулоқ солмас, ҳамон бўғилиб йиғларди.

— Ҳа, болам, мунча бўғиласан, бирор уряптими сени. Ҳозир онанг чиқади!

Она чиқмасди. Адолат хола шошиб қолди. Маратни кўтариб, деразадан келининг қаради: у уйнинг тўридағи тош ойна олдида бамайлихотир пардоз қиларди. Ҳали-вери чиқиш нияти ҳам йўқдай эди.

— Ҳа, бас энди, қолганини кейин қиларсиз, боланинг ўпкаси узилиб кетди,— деди жаҳли чиққан қайнана юмшоқлик билан ўзини босиб. Мушарраф эшитмаган кишидек бепарволик билан пардозини қиларди. Ана шунда Адолат холанинг зардаси қайнаб кетди:

— Ҳой, ойиси, сопол товоқни кейин безарсиз!

Мушарраф нимадир деб ғўдирланди-ю, ўрнидан қўзғалмади. Марат қанотини ёзиб талпинар эди. Адолат холанинг сабр косаси тўлди. Мушаррафининг жойидан қўзғалмасдан ғўдирланиши тўлган косани тоширди:

— Ҳой, ноинсоф, сизга гапиряпман, бола қийналиб кетди. Шу маҳалда пардоз қисталон бўлмай, ўлсин!

Мушарраф қорни тўқ одамнинг дастурхонга келишидек ҳафсаласизлик билан деразага яқинлашди: чеккасидаги майдаги соchlар жингалак қилиш мақсадида ўраб-ўраб боғлаб қўйилган, қошга тортилган қалам қулоққа бирор фийбатни айтишга шошилгандек тилини чўзиб турибди, лаб устидаги хол яна ҳам қорайтирилган, юз ўртаси қизартирилб, роса упаланган.

Буни кўриб Адолат холанинг энсаси қотди: шу вақтда пардоз ўлгурга бало борми! Ҳали кўрсанг гўсала, ҳали кўрсанг...

Мушарраф деразанинг ёпиқ бир қанотини очиб, ўғлини олар экан, дўнгиллади:

— Ҳа, мунча ўдағайлайсиз, ўғлингизники ҳам етади.

— Ўғлим бечора ҳеч ўдағайламайди-ку, ўзи йўқнинг мунча орқасидан тош отасиз. Ёлғон гапиргани уялсангиз бўлмайдими, жон болам.

— Ҳа, сиз билмайсиз, сиз қўрмаганда қиладилар,— деди Мушарраф ёлғонни ҳам дўндириб.

— Содиқжон қувлиқ, шумликни билмайди,— деганича Адолат хола орқасига қайтиб кетди. Мушарраф Маратнинг оғзига кўкрак солар экан, қайнанасига тегизиб ачитди:

— Сен ўлгур ҳам мунча йиғлайсан, болаларга ўхшаб мўлтайиб ётсанг бўлмайдими?

— Сиз ҳам оналарга ўхшаб тўйғизиб эмизсангиз экан; лик этиб унга турасиз, лик этиб бунга турасиз.

— Ҳа, мен шунаقا енгилман.

Адолат хола унинг пичингига индамади. Шунинг ўзи етарли эди. Мушарраф анча вақтгача жигибийрон бўлди. Маратни силтади, «нега тишлайсан, жувонмарг» деб атайнин қайнанаси эшитгудек баланд овоз билан қарғади. Хола индамади-ю, ичиди «норастани қарғамай, қарғишинг ўзингга урсин» деб қўйди. Бу Мушаррафнинг биринчи қарғиши эмас, эри сал кечикиб келса ҳам шу болага ёпишади, эри билан уришса ҳам шу бола гуноҳкордек минг балога гирифтор қилади. Болани турткилаб эрининг ғашига тегади, «ҳай!» дегудай бўлса балога қолади, «ишингиз нима, сизнинг жонингиз оғриб туғибсизми?» деб юзига чопади. Содиқ индамай қолади, гап қайтариш бефойда эканини билади. Адолат хола шундай пайтда ўғлининг оғирлигига қойил қолади, лекин ичдан зир кетаётганини сезиб «бу қандай бедодлик!» деб юборгиси келади. Тилаб-тилаб олган невараасининг бунчалик хор бўлишига асти чидамайди. Мана ҳозир ҳам Мушаррафнинг қарғишини эшитиб кўз олди туманлашиб кетди. «Эй худойим, шу болани Жаннатга бера қолганингда нима қиласарди», деб нолиди. Лекин оғиздан бехос чиқиб кегганидан ташвишланиб, уй томонга қарди: хайрият эшитмади!

Адолат хола катта ўғли Содиқ билан неварааси Маратнинг қисматидан ачиниб кўзига ёш олди. Хотинининг жанжалидан бош олиб қочган ўғли қаёққа кетди экан? Мактабда иши йўқ, бугун уйда дам олмоқчи эди. «Бунча пешонанг шўр бўлмаса, болам!» дея Адолат хола қўлига ишини олди.

Кеча Адолат хола «шамол келиннимнинг шу бемехрлиги бўлса неварамни касал қилиб қўяди», деб Маратга пахтали нимча бошлаган эди. Мушарраф: «Кимнинг эскиси! Менинг болам бунақа эски-тускини киймайди» деб жирканган ва бу сўз холанинг кўнглига оғир ботиб: «Майли жон болам, киймаса киймасин, бироннинг эскисимас, Қодир амакисининг нимдошгинә костюмини бузган эдим, амакисидек катта йигит бўлиб юрсин, деб яхши ният қилиб тикаётган эдим. Яна ўзинглар биласизлар», дея йигиштириб қўйган эди. Адолат хола мундоқ ўйлаб қараса, бургага аччиқ қилиб кўрпани куйдирадиган. Кеча ўғли ҳам эшитиб маъқул топди. Келини, баъзи бир келинлардек чеваргина эмас, игна-ипга қўли қовушмайди. Келин бўлиб тушибдики, йиртиқ-ямоқ холанинг қўлида. Уялмасдан эрининг пайпоқларини олиб чиқиб тўқиб-

ямашни таъкидлаганига ўласан киши. Хола «тўқиб-ямаш қанақа, жон болам?» деса қўли билан кўрсатиб, тили билан тушунтиради-ю, игнага қўли келмайди. «Ямоқ-ясқоққа ўрганинг, болам, мени сизга боғлаб бўриб қўйгани йўқ, пишган ошдек нарсаман, бир куни лиқ этиб ўтаман-кетаман» деса, «бо худо, бир камим йиртиқ-ямоқмиди», деб кеккайди, тилини бермайди.

Адолат хола шуларни ўйлаб нимчани тикар экан, ёшдан кўзойнаги хиралашди. Уни олиб, дока рўмолининг учига артди. Сал ўтмай яна хиралашди, яна артди. Хола ўпкасини тутиб ололмас эди. Шундай бўлса ҳам, бир амаллаб ўзини чалғитиб, ишга уриниб кетди. Қанча вақт ўтганини билмайди, бир маҳал муандоқ қараса тепасида Мушарраф турнибди: ясан-тусан, лабида сохта табассум. Қўлида минг бир тўполон билан ўтган ҳафта эрига олдирган тивит рўмол. Чаккасин инг майдада сочла-ри жингалак-жингалак.

У, «кўйлагим эзилмасин, кигизнинг гарди юқ-масин» дегандек эҳтиёт билан энгашиб Адолат холанинг тиззасидан нимчани олди. У ёқ-бу ёгини кўздан кечирди:

— Бу кечаги эмас, шекилли,— деди сохта табассумими бузмасдан Мушарраф. Адолат хола унинг тилёғламалигини тушуниб, индамай қўя қолди — Мушаррафга ҳам худди шу керак эди. У чаққонлик билан қаддини ростлаб, кўча томонга бурнилди. Лекин одоб юзасидан бўлса ҳам қайнанасидан ижозат сўрашга бўйни ёр бермади, фақат кетаётган ерини билдириди:

— Машиначига бориб келаман!

Бу сўзда «Маратга қараб тур» деган фармойиш ҳам бор эди. Қайнанаси индамади. Фақат кўнглидан ўтди: «Қиз хотин — уй хотини, жувон хотин — йўл хотини!»

Мушарраф шу кетганича кечки олов маҳалида келди. Адолат хола ўчиққа олов ёқкан, Содиқ Маратни ўйнатиб ўтиради. Мушарраф қўлтиғидаги қофозга ўроғлик буюми билан тўғри уйга ўтиб кетди. «Марат йиғламадими, яхши ўтирибдими?» дейиш хаёлига ҳам келмади. Бирпасдан кейин бирор уйнинг деразасини аста-аста тақиллатди. Содиқ ўғирилиб қараса, янги кўйлакда Мушарраф турнибди. Табассум билан шивирлади:

— Ярашибдими?

Содиқ эрталаб тўс-тўполон қылган хотинининг мунчалик енгилтаклик билан иштайиб турнишидан уялиб

кетди. «Ойим кўрмаяптими» дегандек хижолатда ошхона томонга қаради: хайрият, онаси ичкарида экан!

Сал ўтмасдан Мушарраф уй кўйлагида чиқиб келиб, эрталаб ҳеч нарса бўлмагандек қайнанасига эшилтирмасдан эрига уқтира кетди:

— Ҳозир шу фасон мода бўлган. Этагини кўрдингизми? Битирмагунча машиначининг ҳам ҳоли-жонига қўймадим. Зарурлигини билди шекилли, ҳазон бўлгур, ўн сўм ортиқча берсам, рози бўлмай яна беш сўмимни олиб қолди. Майли, есин-ичсин тўймасин, шу беш сўмимга рози бўлмадим. Барибир буюрмайди.

Содиқ елга совурилган ўн беш сўмга ачинмас, онасининг эшишиб қолиб, кулишидан уялар эди. Ичида «бас қила қолса-чи!» дерди-ю, айтишга ботинмас эди. Содиқ гап чалғитди:

— Мен келсам Марат бирам йиглаляпти. Қасал бўлиб қолдими, деб қўрқиб кетдим. Ойим печенъени сувга ивтишиб бериб зўрга овутдилар.

— Ҳеч нарса қилмайди. Кўп йиглаган боланинг кўзи қора бўлармиш. Кўзи қора бўлса ёмонми! Ўзингизники ҳам қора-ку, мен қора кўзни яхши кўраман.

Мушарраф жуда хурсанд эди. Содиқнинг кўнглидан «кайфи йўқми?» деган фикр ўтди.

— Ўзинг қаерда эдинг? — хаёлидан ёмон фикр ўтиб сўради Содиқ.

— Машиначиникида.

— Шунча вақт-а?

— Йўқ,— дея эркаланди Мушарраф кўзини сузиб,— ундан чиқиб бир қиз ўртоғимниги кирдим. Анчадан бери кўришмаган эдик. У ёқдан-бу ёқдан гаплашиб ўтиридик.

Содиқ ана шунда Мушаррафнинг кайфи борини пай-қаб қолди. Кўзига қон қўйилди, узатилган оёғини йигди.

— Қайфинг бор-ку! — деди ғазабдан титраб.

Мушарраф эрининг гапидан ҳайиқмади, аксинча, ўзгача бир нозу карашма билан қих-қихлаб кулиб:

— Шариат-ку хотинларга ичишни ман қиласди, қонун ҳам ман қиласдими! — деди. Эрининг ўзгарганини кўриб, яна ялланглади:

— Хафа бўлманг, жоним, жиндай вино ичдим. Қечаси орқаларингизни яхшилаб силаб қўяман!

Содиқ хотинини танимас эди!

Содиқ эрталаб хотини билан астойдил гаплашмоқчи

бўлиб, пайт пойлаб турганда қишлоқдаги тоғасининг газфот этгани ҳақида телеграмма келиб қолди. Беш тоғаси ичида энг кичиги ва севиклисининг бирдан вафот этгани уни шошириб қўйди. У шу тоғасини жуда яхши кўрар эди, ўқиш йиллари ундан хабар олиб турган ҳам шу тоғаси эди.

Аввалига Адолат хола билан Содиқ йўлга чиқмоқчи бўлишди. Лекин Содиқ онасининг нафас сиқиши касали совуқ тушгандан бери тез-тез такрорланиб турганидан розилик бермади. Она «бормасам уят, эшитган қулоқча хунук» деб туриб олди. Содиқ нима қилишини билмай икки ўт ўртасида ҳайрон экан, онасидан хабар олиб турган қўшни врач жонига оро кирди, «кечагина ўтган юрак приступидан кейин узоқ сафарга чиқишингиз ҳеч ҳам мумкин эмас, ўзингизни, ўғилларингизни ўйланг», деб шахтини қайтарди. Чор-ночор дами қайтган она бир-икки аччиқ-аччиқ йиғлаб, индамай рози бўлгандек бўлди.

Онасининг ўксисб қолаётганини кўрган Содиқ яна бир нозик пардани чертиб, унга далда берди, кўнглини кўтарди.

— Келинингизнинг шу турқи бўлса, болани касал қилиб қўяди! Сизнинг шу ерда бўлганингиз яхши,— деди.

Она йиғлаб-сиқтаб ўғлинни эшиккача кузатиб чиқди. Маратни унга тутиб:

— Оғзига тупуриб кет буни, келгунингча ичикиб қолмасин!— деди.

Содиқ онасининг сўзини қайтармаслик учун ўғлига энгашаркан, у мени олади, деб қанотини ёзди, талпинди. Иримини қилиб қўяқолмоқчи эди. Мушарраф гап қотди:

— Ола қолинг, ҳали қачон келасиз! Соғинишни биладиган бўлиб қолди.

Содиқ хўмрайиб хотинига қаради. Гапни чўзмаслик учун Маратни қўлига олиб ўпди. Болани хотинига узатар экан, Мушарраф эрининг қарашига бардош беролмади, кўзини четга олишга мажбур бўлди. Нима учундир, Маратнинг онасига боргиси йўқ, ҳамон Содиқга талпинар эди. Эр-хотин ўртасидаги бу совуқ манзарани пайқаган Адолат хола:

— Дадангга эргашадиган бунаقا одатинг йўқ эдику, болам, сенга нима бўлди?— дея неварасини ўғли қўлидан ўзи олди.

Марат, гўё дадасини бундан кейин уйида ҳеч кўрмаслигини сезаётгандек ҳамон унга талпинар, қўлини чўзар, қўлини қайтарса, ўзини отгундек бўлар эди, дадаси билан кета қолгиси келарди.

Содиқ уни онаси қўлида яна бир ўпид, шошганича йўлга тушди.

— Кўрганларга салом дегин! — гапириб қолди она.

Оҳ, бечора она, болангнинг бундан кейин кимларни кўришини билсанг эди, уларга балки салом айтмаган бўлардинг!

14. КУТИЛМАГАН ҚОРА КУН

Поездда бора-боргунча Содиқнинг хаёlinи гоҳ хотинининг кечаги қилмиши, гоҳ тоғасининг етим қолган беш боласининг тақдирни олиб қочди. Тоғаси нимадан вафот қилди экан? Касал бўлса эшиятган бўларди-ку! Энг катта боласининг ёши нечада эди? Онласи қийналаб қоладиган бўлди-да. Уича қийналмас, кенойим пишиқ, юмишкор, куйди-пишди. Бир ҳунарнинг бошини тутиб олади. Совхоз улардан хабар олиб турар, кенойимга тузукроқ иш топиб берар. Тогамнинг обрўйи яхши эди-ку. Совхозим деб кунни кун, тунни тун демас эди, бечора!

Мушарраф нега бундай ўзгариб қолди? Бирор алам ўтган ери борми? Ё бирор یўлдан урдими? Мен уни хафа қилгудай бирорта гап қилганим йўқ, у арзимаган нарсадан ўт чиқараради. Кеча ҳам худди шундай бўлди. Мана бугун йўлга қўшнисидан қарз қўтаришга мажбур бўлди. Хотини шундай бўлмаса қўшнисига сарғайиб пул сўраб чиқмас эди. Эрнинг аҳволига ҳам назар сол-да, подон. Бор бўлиб сендан аясам, бу бошқа гап. «Эрка қилиб боқилгап текис ерда қоқилар» деб шуни айтса керак-да. Нега мен унинг шунаقا тантиқлигини гзвал билмадим? Ҳаммасини қилди-қилди шу Мирсалим қилди. Шу ўртага тушмаганида бунчалик шошқалоқлик иш бўлмас эди. Қўзимни боғлаб қўйдими, нима бало. Йўқ, ўзимдан ўтди!

Содиқ шундай сўнгги йўқ ўйлар билан жойига чўзилди-ю, хаёл сурдими ёки туш кўриб ухладими — фарқига бормади. Лекин купесидан чиқса, қўши nilар поишшта қилишяпти, уни таклиф этишди. Шундан у кеча кечқурун ҳеч нарса емасдан ётиб қолганини эслади,

қорни очганини сезди. Ювиниб келиб қўшиларининг нонуштасига қўшилди. Аммо иштаҳаси бўғилди. Қўшилар оила ҳақида суҳбат бошлишди. Япасқи буруни бири баҳсга якун ясагандек деди:

— Шарқ доноси яхши айтган, бундан ўтказиб бўлмайди: яхши хотин, жон озиғи. Ёмондан ўзи асрасин! Хотининг ёмон бўлса, сенинг жаҳаннаминг шу дунёда!

Содиқ, суҳбат унинг оиласи ҳақида кетаётгандек баҳсчиларга назар ташлаб чиқди. Ҳеч кимнинг у билан иши йўқ... «Мендан бошқа ҳам хотин жабрига учраган бор экан. Қайси бири экан? Шу япасқининг ўзими? Е анавими? Иккисига ҳам ўхшамайди. Хотинидан жабр кўрганнинг ранги бунақа хушрўй ва тиниқ бўлмайди. Анави чиройли, қилтириқ мўйловлидир. Хотини қизғанса керак-да!»

Содиқ поезддан тушиб, тоғасиникига етиб келгунча кун пешиндан оғиб, ўлик чиқарилиб бўлган эди. Фарёд уриб, қаршисига илк чиққан кенойиси бўлди. Унинг соchlари тўзғиган, бош яланг, белига қора шол рўмолини икки айлантириб ўраган, рангидан қон йўқ.

— Тоғангиздан ажралиб қолдик, Содиқжон! Шўри-миз қуриб қолди, Содиқжон! — деб унинг елкаларига қўлинни ташлаб йигларди. Унинг товуши хирплар, кечадан бери фарёд уравериб бўғилган бўлса керак.

Содиқ кенойисини свутмоқчи бўларди-ю, ўзи ўпкасини босиб оломлас эди.

У тоғасининг таъзиясида уч-тўрт кун қолиб кетди. Ёшгина қўшини йигит ҳар куни шинелда чиқиб Содиқ билан эшикда турди. Исми Қобилжон экан. Оёғида ҳарбийча кирза этик. Бошида манглайидан юлдузи олинган шапка. Ўзи қиздай мулоим ва хушмуомала, келган-кетганга букилиб салом беради. Содиқ уни ҳарбийдан яқинда бўшаб келган фараз қилиб, меҳрибонлик билан:

— Бирор ишга жойлашганингиз йўқми ҳали? — деган эди, у йигит ҳарбий хизматдан отпускага келганини айтди:

— Яна бир йил бор.

— Хизмат қаерда?

— Узоқ. Жуда узоқ. Олатоғдан ҳам кўринмайди, — деб кулгига слди йигит.

Қобилжон Содиқ келганидан бери ўзини унга яқин олиб юрарди. Фотиҳага келганларни кутишда ҳам унинг

ёнида, ионушта ёки овқатда ҳам унинг ёнида. Шунинг учун Содиқ ундан сўрашга журъат этди:

— Сир денг! Айтиб бўлмайдими!

Аслида Содиққа йигитнинг қаерда хизмат ўтаётганнинг қизиги йўқ эди. Нима учундир, бир-икки кундан бери унинг кўнгил ғашлиги, юрак сиқилишга айланди. Кимгадир нималаридир гапиргиси келади, алланималардан ҳикоя эшитишни кўнгли тусайди. Бирор юрагини сандиққа қулфлаб, калитини олиб кетиб қолганга ўхшайди.

Қобилжон келувчилар оёғи товсилгандан кейин уйига чиқиб кетиб, қош қорайганда фаргонача беқасам чопонга ўралиб кириб келди. Салом бериб, Содиқ кўрсатган ўринга ўтирди. Содиқ узатган чойни ҳўплаб, гап бошлади:

— Боя сиз менинг хизмат еримни сўрадингиз. Одамлар олдида айтишга бўлмай, қизиқчилик қилиб қўя қолдим. Аслида сир. Ҳаммага гапириб бўлмайди. Сиз зиёли одамсиз, тушунасиз, сизга айтсанм бўлади. Хизматим шимолда, ўн икки ойи қишу қолгани ёз. Арестантларни қўриқлаймиз, сиёсий арестантлар, ҳалқ душманларини.

Содиқнинг уларга жони ачимади. Душман бўлгандан кейин елкасига коқиб, бошини силайдими! Қетмоннинг дамини босмаса, сопи пешонасига тегмас эди.

Содиқ кечаси билан ухломади. Мудҳиш туш кўрди.

Содиқ эрталаб юваниб меҳмонхонага чиқса, болаликда кўча чангитиб бирга ўсан, босмачиларнинг додини берган бир ўртоғи ўтирибди. уни кўриб анча кўнгли ёришиди. Фотиҳага келган бу ўртоғи Содиқ билан қўл сиқишиб қўришган бўлса ҳам, «азада ярашмайди, бели боғлиқнинг дили боғлиқ» деб ўйладими, очилиб гапиришмади. «Одамлар оёғи товсилиши билан эшикка бор, кутаман» деб кетди. Содиқ ваъда бериб қолди. Фотиҳага келувчилар оёғи тийилиши билан, йўл олди.

Она қишлоғининг ҳар бир гиёҳи таниш. У суқланиб атрофга назар ташлаб бораарди. Якка чўп кўприкдан ўтиб, энди сўлга бурилиши билан хаёlinи ёшлик ўйлари олиб қочди.

У худди ана шу ерда илк марта Жаннатни учратган. Сочвонини қўлига олиб келаётган ўйинқароқ ёш қиз қаршисида пайдо бўлиб қолган кишидан юзини бекитаман, деганда аллақаёқдан қувалашиб чиққан

иккита ит уни қўрқитиб юборган, сочвон эмас, бошидаги қизил сатин паранжиси ҳам тушиб кетган эди. Шу маҳал етиб келган йигит, четлаб ўтиб кетиш ўрнига ерда ётган паранжини олиб, қизга узатганди.

— Вой, ўлмасам, қанақа кишисиз ўзи! — деган Жаннат юзини бекитиш ўрнига қип-қизарип, ҳаё аралаш боқиб турарди. Содиқ ҳам бўш келмади:

— Кўриб турганингиз кишиман-да, энди мендан қочмасангиз ҳам бўлади, синглим! — деди.

— Нега қочмас эканман, қўйинг-е! — деган Жаннат юзини сал четга буриб, бошига паранжисини илди.

— Паранжингизни кўрса кучуклар яна қайтиб келади, — тегишиди Содиқ.

— Қайтиб келса сиз бор-ку. Наҳот мени шта талашиб, кап-кatta одам қараб турсангиз?

— Ундан бўлса эшигингизгача қўриқлаб бора қолай. Қиз бу кутилмаган таклифдан чўчиб:

— Йўқ - йўқ! Ўзим кетаман, — деди.

Қиз сапчиб икки - уч қадам қўйди-ю, яна одимини секинлатди. Ана шунда Содиқнинг юраги алланимани сезгандек гуп-гуп уриб, унинг ортидан унгади. У юрагининг амрига бўйсуниб, қизга етиб олди... Ана шунда икки ёшнинг қўзи беихтиёр тўқнашди. Шунчалик журъят билан кетидан етиб келган Содиқ тилдан қолгандек бир сўз айтломас, умрида биринчи марта бегона йигитнинг юзига тикилиб қараган қиз ҳам ўзини бир неча лаҳзага унуди... Қейин яна бир хилват топиб учрашишди... Қейин Содиқ унинг паранжисини олиб ташлатиб, ўқитди, қайнаб турган ҳаёт қўйнига тортди... Ана у ишлаган боғча. Оппоқ бўлса ҳам ботаётган қўёшининг нурида қизил тортиб турибди. Унинг ўзи-чи? Ҳозир қаерда экан?

Шу лаҳзада, ажралганидан бери илк марта Жанната астойдил раҳми келди. Ўзига-ўзи ёмон қўриниб кетди.

Қандай бедаво хатога йўл қўйганини бутун вужуди билан ҳис этди...

Ўртоғи уни очиқ юз билан қарши олиб, ичкарига таклиф этди. Олдига дастурхон ёзар экан, гап қотди:

— Оббо, дўстим-эй, шундақа қилиб пойтахтлик бўлиб олдим дегин? Ишларинг яхшими? Ўйланибсан, фарзанд кўрибсан деб эшиздим. Фарзанд муборак! Тўйинингга ҳам айтмадинг, энди биратўласи «фарзанд қутлуғ» қилиб борар эканмиз-да.

— Марҳамат, бош устига.

Содиқнинг хомушлигини кўрган ўртоғи аввалига бу ҳолни тогасининг вафоти туфайли деб тушунди. Кейин сұхбат қизиб, анча ёзилишиб ўтиргандан кейин ҳам ро-йиш бермаганидан ажабланди. Унинг кўнглини очмоқчи бўлиб, район янгилигини айтди.

— Биздаги янгиликни эшитганмисан?

— Қайси бирини? Ёзмасанг қайдан эшитай.

— Диловархўжа қўрошишининг қўлга тушганини!

— Қачон? Йўғ-е! Ҳали ҳам тирик эканми, лаънати?— бирдан тетикланди Содиқ.— Қайси кавакда ётган экан? Мен уни ўлиб кетгандир, деб юрувдим.

— Мен ҳам! Эсимдан чиқиб кетган экан. Бир куни идорада ўтирасам телефон қилиб қолиши. Мен ҳам сенга ўхшаб ишонмадим. «Лаънатининг башарасини бир кўриб қўяй, тоза бизни овора қилган эди», деб борсам, йўқ, марказга юборишган экан.

— Бу ёққа нима қилиб дайдиб келиб қолибди?— Яна қизиқди Содиқ.

— Буни билмадим. Туғилган ерини соғинганми.

— Бунақа одамлар соғинишни биладими!

— Бўлмаса ажал қувиб келгандир-да!

— Бу бошқа гап. Отишса керак.

— Бўлмасам - чи!

— Ўша йиллар эсингда борми? Лаънатилар билан ўзимиз ҳам тоза қувалашдик - да. Ҳафталаб отдан тушмас эдик - а.

— Шундай қилмасак бўлмас эди - да!

Икки жанговар ўртоқ қилич ўйнатишган йилларни узоқ эслашиб ўтириши. Диловархўжа номини эшитиб чехраси бир оз ёришган Содиқ, ош сузилиш олдидан яна хомуш тортиб қолди. Бунинг сабабига ўртоғи тушунмасдан, яна соғлигини, ишларини сўради. Маъқул жавоб олгандан кейин, деди:

— Нима учундир сени орган суриштириб юрибди. Тинчмисан?

— Нима деб суриштиради?— парво қилмасдан деди Содиқ,— орган қизиқадиган бирор ғалат иш қилиб қўйибманми?

— Билмасам, мен ҳам ҳайрон бўлдим. Ишларинг яхшими ўзи? Яхши бўлса бўпти-да. Органинг сен билан менга даҳшат соладиган ери йўқ.

— Албатта,— деди ишонч билан Содиқ.— Балки Диловархўжанинг иши юзасидан керак бўлдимми?

— Эҳтимол,— унинг фикрига қўшилди ўртоғи.— Шундай бўлса керак.

Содиқ партизан ўртоқлари Болтақулнинг тақдири билан қизиқиб, ҳамсұхбатидан суринштирган эди, у ҳам ҳеч нарса айттолмади, елкасини қисди:

— Орган қўлга олган. Бир нарса деб бўладими!

Икки жанговар ўртоқ қўл сиқиб хайрлашганда ҳулкар оққан, тун салқини этни чимчиларди.

Содиқ эртасига қий-чув билан хайрлашиб йўлга чиқди. Лекин оёғи уйига тортмас эди. Поездга чиқса ҳам, орқасига қайтгиси келаверди. Мушарраф билан бўлган дилсиёҳлиқданми... ёлғиз ўғлини хаёлига келтириб кўрса ҳам, дили ёришмади. «Тавба, ўзи нима гап? Бу ниманинг белгиси?»— деди ўзига ўзи. Қейин бу жинни ҳисдан кулгиси қистади, ўзича масхаралангандек қаҳ-қаҳ уриб қўйди. Поездга кечаси чиққани учун узоқ фикр юритишга вақти бўлмай, ухлаб қолди. Эртасига поезддан тушди. Машина кира қилди.

Содиқ кўзига таниш бинолар бир неча йил кўрмагандек чиройли, файзли кўринарди. Азим теракларни энди кўраётганга ўхшайди. Кутмаганда кўзига ярқираб, ажойибот тўла мўъжизадек бўлиб диққатини тортади. Ана, таниш, неча марта сайд қилиб юрган хиёбонлари. Яланғоч дарахтларда қарғалар учиб-қўнади, ерда қор йўқлигидан осмонга нола қиласди. Осмон булат. Ана, шамол булатни йиртиб, ундан қуёш кўзи билан бирпастгина мўралади. Яна булатни аллақаеридан йиртиш ниятида хира кўзи малла бўз парда орқасидаги чироқдек ёнди.

«Шаҳарни айланмаганимга анча бўлди ўзи ҳам», деб қўйди ичида. Шунда Мушаррафга уйланиш олдидан тез-тез шу томонларга чиқиб тургани ёдига тушди. Ана, улар ўтирган скамейкада бошқа бир жуфт ўтирибди. Уларнинг елкаларигина кўринади. Шу маҳал кимдир унинг отини айтиб чақириб қолди. Худди Мушарраф чақиргандек юраги орқасига тортиб, «шув» этиб кетди. Товуш келган томонга қаради. Машина эндигина бурилган тор кўчанинг йўлкасида Содиққа нотаниш бир ориқ йигит турарди. Унинг ёнида — қачон Содиқни кўрса оғзи тўла олтин тишини йилтиллатиб, ажойиб тиш доктори топганини мақтайдиган бир эзма муаллим. Ориқ йигит у билан хайрлашиб, машинага яқинлашди. Ў оддийгина кийимда, галстук таққан.

— Милицияга кириб чиқсак,— деди у ранги оқарин-кираб. Содиқ гап ким ҳақида кетаётганлигини билмай, аниқламоқчи бўлди:

— Менми, шоферми? Шофер бўлса мен қолай.

— Йўқ, сиз билан бирга кириб чиқамиз.

Машина Содиққа кўпдан таниш кўчалардан ўтиб бориб, темир дарвоза олдида тўхтади. Машинанинг сигналига ичкаридан ҳарбий формадаги киши чиқиб, шофер ёнида ўтирган ориқ йигитга қаради. У, ўзлари тушунадиган бирор имо қилди шекилли, тезда кириб кетиб, дарвозани очди. Уни кутиб олган командир, икки ҳарбий йигит билан тор коридордан бориб, бир хонага олиб кирди. Уни ўтқазиб, ёнида икки ҳарбийни қолдирди. Ўзи чиқиб кетиб, унвон жиҳатидан ўзидан каттароги билан кириб келди. Янги кириб келгани қўлидаги папкада бир қофоз олиб, Содиққа узатди:

— Ўқинг, қўл қўйинг.

Содиқ қайси кўзи билан кўрсинки, бу республика прокурорининг уни қамоққа олиш ҳақидаги санкцияси эди. У бўшашиб, нима қилишини билмай қолди, ҳарбий киши яна эслатди:

— Қўл қўйинг.

Ярим соатдан сўнг Содиқ ботинкасининг иплари олинган, шимининг темир илгаги кесилган, бегалстук боксда ўтиради. Тушими, ўнгими...

15. ЙИҒИГА АЙЛАНГАН АлЛА

«Данагидан мағзи ширин» дегандек, Адолат хола неварасига бутун меҳрини тўкиб, эркалаб ўтиради, унга қўшиқ айтарди:

Маратжоним хон-хони,
Кўкаламзор майдони,
Ҳамма ёмон кўрса ҳам,
Бувигинасининг жони!

— Ҳозир Маратнинг дадаси келади. Қани Маратга пималар олиб келаркин дадаси: жажжи оёқларига этикчами, белига қийиқчами, ё бошига телпакчами? Данангга «ашшалом алайкум, дадажон, сизни соғинидим», дейсанми? Ачалом қиласанми?

Ширин болам, шакар болам,
Асқар тоғда битган лолам,
Ендан чиққан ён қозигим
Ширин-шакар жон озигим.

Қани, қани, битта кулсан, бувижонини битта ачом қилсан! Бувиси айлансан бўйларидан, азамат ўғлим! Тўю томошаларингни кўрай, илойим! Кам бўлма!

Адолат холанинг тили тилига тегмас, неварасини гоҳ қуchoқлаб бағрига босар, нафаси қайтиб, товуш бергунча қўйиб юбормас, гоҳ лўппи юзларидан ўлиб «қийнарди», гоҳ кўкка отиб кулдиради.

Кечки овқатга олов ёққан Мушарраф ошхонадан чиқиб келиб, қайнанасининг қаршисида тўхтади. Холанинг завқ билан неварасини эркалашига ҳаваси келди.

— Бугун Маратни жуда бошқача эркалаб қолдингиз, ойи, яхши туш кўриб турдингизми?

— Ҳа, болам, хурсанд бўлмай нима қилай, мана кута-кута неварали ҳам бўлдим. Энди Қодиржоннинг бошини иккита қилиб олсан эди, гўримда оёғимни узатиб, тинчгина ётардим. Ҳай, айланай келин, эрингиз келганда яна эски дафтарни очманг. Ўтган ўтди, орқадаги гап — охурдаги нишхўрд. Очилиб-сочилиб қарши олинг. Худога шукур, болали бўлдингиз; эрнинг қўлида-ю, уйнинг тўридасиз. Ҳа, шундай қилинг, жон болам! Вой, чукинг кесилгур, ҳамма ёғимни расво қилдинг-ку! Бу иззатларга сиймоқ керак дедингми, болам тушмагур! Манг, олинг, бошқа иштон кийгизиб беринг. Дарров кийгизиб беринг.

Адолат хола Маратни Мушаррафга бериб, кўйлагининг ҳўл бўлган ерини чайқаш учун тутамлаганича чиқиб кетди. Вақт ўтиши билан гина-кудурат эсидан чиққандек, Мушарраф эрини соғинган, кечадан бери тиқ этса кўзи эшикда эди. Шунинг учун қайнанасининг насиҳатлари баъзи вақтдагидек ғашини келтирмади. Маратни ундан олар экан:

— Уяти йўқ бола, бувингга ҳам гуноҳ қиласанми!— деди эркалаб ва уриш ўрнига бағрига босиб, юзидан ўпди. Ташқаридан Адолат холанинг товуши келди:

— Мушаррафхон, бу ёққа қараворинг!

Мушарраф чиққанда маҳалла комиссиясининг котиби билан икки киши ҳовли ўртасида турарди. Котибнинг ранги сал оқаринқираган, қараашлари ташвишли,

у икки кишининг бири томларга қарап, биттаси қўлини чўнтағига тиққанча Мушаррафнинг етиб келишини кутаётганга ўхшарди. Мушарраф салом берди, юраги аллақандай бахтсизликни сезаётгандек гурс-гурс ўриб, эти жимиirlаб кетди, «нима гап?» дегандек котибга қаради. Котиб ноҳуш хабарни айтишга тили бормади шекилли, ёнида тургантарга имо қилди:

— Булар келишган экан...

Кўлини чўнтағига солиб тургани келиш мақсадини айтиб, уйни тинтув қилишга ҳужжат кўрсатди.

— Ўзлари қани?— деди титраб Мушарраф.

— Ўзи ҳам келиб қолади,— деди новчаси.

— Бўймаса, ўзлари келсинлар, сизлар чой ичиб туринглар.

— Иўқ, раҳмат, биз бошлайверамиз. Вақт зиқ!— деди биттаси мулойимлик билан ва Мушаррафнинг йўл бошлишини кутмай ичкарига қараб юрди.

«Ўзи тинчликми, болам?» деганича Адолат хола эшик олдидаги тошдек қотиб қолган эди.

«Ўзи ҳозир келиб қолади» билан бошланган тинтув тун оққанда тугади. У икки киши Содиқ белги қўйган, четига ёзган, остига чизган, варағини қайирган китобларнинг ҳаммасини бир бўғча қилди. Унинг конспектларини ҳам олиб кетмоқчи бўлган эди. Мушарраф:

— Буни бермайман, эрта-индин дарслари бошланганда нима қиласилар?— деб туриб олди. Новчаси:

— Келишда ўзи билан олиб келади!— деди ва шеригига «қойил қилдимми?» дегандек кўзини қисди.

У бири ўрта бўй, оқ-сариқдан келгани (кейинчалик Қодир актдан исмини билган Пушкарёв) бир четда ранги бўздек оқарип ташвишда ўтирган Адолат холага тез-тез қараб қўярди. Унинг назаридаги кампир жуда ҳолдан тойиб бораётганга ўхшар, ҳали замон қўлидан бола тушиб кетиб, ўзи ҳам муккалаб йиқиладигандек кўринарди. У Қодирни секин ёнига чақириб:

— Валерианка йўқми, кампирга озгина ичириб қўйсангиз!— деди.

Қодир ана шундагина онасининг жуда ўзгариб кетганини, мадореиз қўлларининг титраётганини пайқади, бир пиёла муздай сув тутди.

— Ҳа, болам, онанг энди дардда адойи тамом бўладиган бўлди, буларнинг келиши яхшиликка эмас...— деди

ди она ва ҳўнграб йиглаб юборди. Онанинг кўз ёшлари маржон бўлиб қўлидаги Маратнинг кўксига томарди.

— Йиғламанг, эна! — деди Пушкарёв фотосуратларни бир ерга йиғиб, газетага ўтар экан. — Қўчқоров бугун-эрта келади, унда озгина гапимиз бор.

Содик бугун ҳам, эртасига ҳам келмади, бир ҳафта, бир ой ўтгач ҳам келмади...

Шу куни Адолат холанинг оққан кўз ёши то умрининг охиригача тинмади!

1. АЙБСИЗ АЙБДОР

Содиқ қулоч ёэса деворларга қўли етгундек боксда нима гаплигига фаҳми етмай ўтирас эди. Бошига келган биринчи фикр «қаерда ва қачон жиноят қилган эдим?» деган савол бўлди. Ҳаётида битта-яримта иуқсон ёки ишида камчиликлар ўтган бўлиши мумкин, лекин буларнинг ҳеч бири жиноят эмаслигига амин. Шундай бўлса ҳам, бутун ҳаётини хаёлидан бир-бир ўтказди. Бу энг тўғри йўл эди.

Эсини танибдики, қўли қаттиқ, дили юмшоқ отаси йил ўн икки ой Омил қори юзбошиникида чорикор ишларди. Куз келганда юзбоши чети қайрилган червонларни текисласа, отасининг чўнтағида ҳар вақтдагидек шамол ўйнарди. Уларнинг супрасидан сичқон ҳазар қиласарди. Текиннинг миннати кўп, меҳнатнинг зийнати, деб ҳеч нолимас, бутун умидини ўз билаги билан, ўз тилағидан кутар, жуда мўмин-қобил одам эди.

Ҳазилкаш ўртоқлари икки бўйра ерга ариқ тортиб туз эккан, кўкариб чиқмаганда хафа бўлган содда киши шу Қўчқор ака, деб ҳазиллашар, баъзан Содиқни ҳам «туз экканнинг ўғли» деб юришар эди. Лекин унинг тўнғич ўғли Содиқ унақа содда чиқмади. «Меҳнатнинг зийнати бировга-ю, миннати бизгами, йўқ, кетмайди»,— деди у. Отасининг кетида юриб Омил қорининг молларини боққан кунидан бошлаб, ўз ҳаёт йўлини қидирди. Отасининг очган йўли, онасининг бичган тўни торлик қилиб қолди унга. Томчи тошни тешади, деб керак бўлган жойда ўз ҳақини талаб қилди, қўрқмади. Унинг энг биринчи «исёни» Омил қори отига мингандан, жило-

вии ушлаб, оёғидан олиб юбормасликдан бошланди.
Отаси:

— Ундай қилма, болам! — деганда:

— Уддаласа минсин! Мен от минганимда жиловини бирорга ушлатмайман! — деб жавоб қилди. Буни эшигтан юзбоши: «Остонамга оёқ босмасин!» — деди. Содиқ унинг айтганини қилди. Кўрса салом бермади. Бир кунн Омил қори:

— Саломинг қани, бадбахт, еб қўйдингми? — деган эди:

— Айби йўқ, тақсир, есам еб қўйгандирман, камбағалчилик... — деб қулди. Қори унинг бунчалик ҳозиржавоблигига ичидатан берса ҳам, жеркиди:

— Зумраша! Беодоб!

Содиқ индамай унинг орқасидан кулиб қолди. Қорининг бўйни барглари сидириб ташланган тол новдага ўхшарди. «Нега у сира семирмайди? Бирор етилтириб берганинг ейиш енгилу, ҳазм қилиш оғир бўлади шекили-да», деган хulosага келди ўзича Содиқ. У ақлини бот таниган эди. Омил қори кутганидек, отаси илтимос қилганидек, юзбошининг эшигига бош уриб бормади. Кўчада кесак тепиб, тупроқ чангитиб ҳам юрмади. Бўш қолганда балиқ овлашга берилиб кетди. Тутган балигини ўзларидан анча нарида бўлган темир йўл разъездидаги ўрисларга бериб юрди. Улар ҳам Содиқни қуруқ қўйишмади.

— Мехнатнинг қадрига ўрис етади! — дерди у. Шундай қилиб, ўша разъезддан иш топиб олди. Олдинига бир рус стрелкачининг атрофида ўралашиб юрди. Кейин маошли рабочий бўлиб қолди. Бўш кунлари улар билан тез оқар Қорасувда балиқ тутишди, тўқайда тустовуқ отишди. Содиқ бу атрофни яхши билганидан, рус тилига анча тушуниб қолганидан, керагида таржимонлик қилишидан разъезддагилар ҳам уни ёқтириб қолган эдилар. Омил қори унинг «ўрис бўлиб кетгани»ни биринки марта отасига таъна қилиб, бир кўрганда ўзига ҳам айтди, худди унинг аччиқ гапига кўзи учиб тургандай, Содиқ бир ўрис ўртоғининг кепкасини ўйин қилиб келмоқда эди. Қори уни тўхтатди:

— Бу нимаси!

Содиқ Омил қори сўзини тугатгунча маъносига тушуниб, гапни бўлди:

— Шапка, тақсир, шапка!

— Мусулмон боласига ўрис шапкасини кийиш уят!

— Кармонингиздаги пул-чи, тақсир, у ўрисники эмасми? Подшоҳ-чи? Номини ҳар куни хутбага қўшиб ўқийсиз, бу майлими?

— Подшоҳ, подшоҳи аъзам...— деди дудуқланиб қори, кейин фикрининг калавасини зўрға топиб олди.— Оқ подшоҳ ҳазратлари бошқа, шапка киядиган бу ўрисларинг бошқа.

— Тўғри, тақсир, бу шапкани киядиганлар ҳам шунақа дейишади.

Чиндан ҳам бир-икки йилдан кейин оқ подшоҳ билан бунақа шапка киядиган ўрисларнинг бошқа-бошқа кишилар экани ҳаммага аён бўлди. Шунақа шапка кийганлар аввалига оқ подшоҳни, кейин оқ подшоҳсиз оқ подшоҳ йўлини тутадиганларни таҳтдан ағдариб ташлади. Шунда Содиқ енгига қизил боғлаган, кўкрагига қизил лента тақсан кишиларни кўрди. Улар қизиқ нарсалар тўғрисида гаплашарди. Бунақа гапларни Содиқ авваллари ҳам эшитган, лекин у вақтда аллакимдан қўрқа-писа секин-секин гаплашар эдилар. Энди бўлса барада!

Сал вақт ўтмай гарби-шимолдан эсган шабада Содиқ турган ерларнинг могорини ҳам тозалади. Шўролар ўз ҳукмига кирди. Лекин унинг ҳукмидан бўйин товлайдиганлар ҳам топилиб, хуруж қила бошлашди. Омил қори юзбоши малла ранг салласини чор қирра тақдўзига алмаштирди. Ўзи босмачиларга чиқиб кетмаса ҳам, тўртта отини бериб юборди. Намозни қавм билан мачитда эмас, ўз уйида ўқийдиган бўлди. Хутбага оқ подшоҳнинг муборак номини қўшмаса ҳам, оқ подшоҳчиларни дуо қиласи, пинҳон дуо қиласи.

Ана шунда Содиқ разъезддаги руслар ва кўкрагига қизил лента тақсан ўзбек чавандозлари билан бирга босмачиларга қарши курашга чиқиб кетди.

— Биз етимларнинг холи нима кечади?— деб бўйнига осилиб йиғлаган онасига:

— Етимлигимизни билдирамаслик учун, бошқалар етим қолмаслиги учун кетяпман!— деди. Унинг отаси оқ подшоҳнинг бузилган кўпригига ёғоч кесиш учун бир неча йил илгари мардикорликка олиб кетилган, кетганидан бери сувга отилган тошдек бедому дарак эдк. Баъзилар қайтди. Лекин қайтмаганлар кўп. Қайт-

маганларга қишлоқ аза очди, қора кийди, лекин Адолат хола аза очтирамди, ахир қуруқ йўталишга ҳам куч керак. «Қафсан кийган кетади, капалак кийган келади» деб туриб олди, ҳамон умид қилади. Бир оқ яктагини келса кияди, деб тишида тишлаб юрди, ҳар баҳор чиққанда бир қоқиб, шамоллатиб, дадаси қизлигига қилган нурсизгина сандиққа яна солиб қўярди. Аммо Содиқ дадасидан умид қилмайди: тирик бўлса дараги чиқиб қоларди. «Қўпргини тузатаман деб, тегирмонга тушиб кетган. Унинг тегирмонидан омон чиқмаганлар озми!»

Оқ подшоҳнинг қора думи бўлған босмачиларга қарши қонли курашга отланиб, ёнига қилич таққанида Содиқ ерга урса, кўкка сакрайдиган йигирма яшар олов йигит эди. От елдириб, қилич ўйнатди. «Қизил командир» номини олди. Мустақил бўлинма олиб, Диловархўжа қўрбошини қувди. Йигитларини тумтарақай қилиб тор-мор келтирди-ю, ўзини тутолмади... Бир неча йил давом этган бу курашдан у коммунист бўлиб қайтди.

Юрт тинчиб, ариқлардаги сувларнинг ранги тиниклашгандан кейин турли лавозимларда ишлади. Бундоқ қараса, амал ҳар ким миниб кетаверадиган от. Сўнгра у қунт билан ўқиди. Ўқиб-ўқиб, ўқитувчи бўлди. Китобсиз уй— чироқсиз тун. Ҳар уйга бир эмас, бир неча чироқ керак, чироққа чироғбон керак. Ҳали ёритишлиши лозим бўлган талай уйлар бор.

Эшикнинг шарақа-шуруқ қилиб зарб билан очилиши Содиқнинг хаёlinи бўлди. Чегара қўшини формасидаги аскар остонаяда турар эди: соқол-мўйловини тоза қирган, гимнастёркасига оппоқ ички ёқа тиккан, камарининг мис тўқаси, фуражкасининг юлдузи қия тушган чироқда кўзни олгудек йилтилларди. У Содиқни бошлаб, юқоридаги хоналардан бирига олиб кирди-да, ўзи чиқиб кетди.

Оддийгина бир хона. Қунга тескари томонда итальянча дераза. Эшикдан кираверишда, чапда стол. Унда телефон, сиёҳдон. Бошқа ҳеч нарса йўқ. Стол ёнида ўтирган лейтенант Содиқни олиб кирган аскарнинг қўлидаги қофозга қўл қўйиб берди. У йигирма беш ёшлардаги гавдали, елкаси кенг, баланд бўйли йигит эди. Сочи тўкилиб битганми ёки кам қолганидан қирдириб юрадими, тақир боши деразадан тушган ёруғда жез қалпоқдек йилтилларди. У аввал Содиқни бурчакдаги

табуреткага ўтиришини буюриб, уни бошдан-оёқ кўздан кечирди. Содиқ лабларини қисиб, термилиб турарди. Лейтенант Содиқнинг бардошини синамоқчи, кўзлари билан қалбининг тубига тушмоқчи, уни титмоқчи, унда нима борлигини билиб олмоқчига ўхшар, киприк қоқмас эди.

— Мен сизнинг терговчиниз Чухановман. Ишиңгиз менинг қўлимда. Ишонаманки, ортиқча гожлик қилмасдан, ҳаммасини ўзингиз гапириб берасиз.

«Ишиңгиз менинг қўлимда» жумласи «тақдирингиз менинг қўлимда» бўлиб эшитилди Содиқга. Наҳотки шу ёшгина йигит унинг тақдирини ҳал қилса!

Терговчи қўй кўзларини ундан олмасдан яна салмоқлади:

— Тушунарлими?

— Тушунарли-ку, ўртоқ Чуханов...

Чуханов сапчиб тушди:

— «Ўртоқ Чуханов» эмас, «гражданин терговчи!»

Содиқ бунга ҳайратда қолди-ю, индамади, сўзини тузатди:

— Гражданин терговчи...

Чуханов сохта жилмайди.

— ...Мен ҳеч нарсага тушунмаяпман: ўзи нима гап?

— Тушуниб қоласиз! Қисқа қилиб айтганда, сизни Давлат хавфсизлигини сақлаш органи қамоқقا олган. Буни тушунарсиз?

— Тушунарли. Лекин қандай жиноятим учун!

Терговчи унинг сўзини илиб кетди:

— Бунисини ўзингиз айтиб берасиз. Қанча тўла айтсангиж, шуича яхши...

— Тушунмадим.

— Бу ерда тушунмайдиган ҳеч нарса йўқ. Гап бирор ҳақида эмас, ўзингиз ҳақингизда, яъни Содиқ Кўчкоров ҳақида. Наҳот ўзингизнинг ишларингизни ўзингиз билмасангиз. Қизиқ.

Содиқ совуқ сувга шўнғигандек бўлди. Яккама-якка қиличбозлик қилиб турган пайтда қўлидан қуроли учиб кетган кишидек бўшашиб тушди: қаршилик кўрсатиш учун қўлида қуроли йўқ, таслим бўлишни эса асти истамасди.

Унинг ҳар бир ҳаракатини синчиклаб кузатиб, таҳлил қилиб турган терговчи, соатига бир қараб қўйдида, бугунги суҳбатга якун ясади:

— Беринг, сизга жой тайёрлаб қўйишган бўлса керак, яхшилаб ўйланг, ҳаммасини ўйланг. Ўйлашингизга истаганингизча вақт берамиз, шошмаймиз.

Чиндан ҳам унга жой тайёрлаб қўйилган экан. Уни терговчи олдидан олиб тушган аскар тўғри камерага бошлаб борди. Бу камера кундузлари ҳам чироқ ёниқ турадиган узун ва тор коридорнинг энг охирида, ўнгда эди.

Содиқ каравотга ўтирди. Бошини икки қўли орасига олиб, ўйга толди. Инига чўп тиқиб тўзитилган аридек, ўйининг тартиби йўқ, бири тугамасдан иккинчиси босади. Учинчиси иккинчисини қувиб чиқаради, яна бири келиб унга қоришиб кетади.

Терговчи Чуханов, ўзи айтганидек, кечаси ҳам, эртасига ҳам чақирмади, гўё Содиқقا ўйлаш учун имкон берган эди. Дам олиш кунидан кейин эса нонушта ўтар-утмасданоқ, чақириб қолди. Курсига ўтиришга рухсат бериши билан:

— Хўш, яхши дам олдингизми? — деди. У пичинг қиляптими ёки чиндан аҳвол сўраяптими — Содиқ тушунмади. — Ўйлаб бўлгандирсиз, албатта. Қани энди бошлайлик. Чўзганингизнинг фойдаси йўқ.

— Нимани бошлаймиз, менинг сизга айтиб берадиган ҳеч қандай жиноятим йўқ.

— Яна фойдаси йўқ гапни бошлайпсиз, ўзингизни қийнаяпсиз. Жинояти йўқ одам бу ерда нима қилилади!

— Ўртоқ... кечирасиз, гражданин терговчи, сиз қандай тушунсангиз, тушунинг, лекин бу ерда ноҳақлик бор. Мен норозилик билдираман. Рухсат беринг, Марказий Комитетга мурожаат этаман.

Содиқ кутмаганда терговчи ўрнидан турди:

— Боринг, яна яхшилаб ўйланг, ҳали вақтимиз бор.

Чуханов уни яна жойига тушириб юборди ва бир неча кун чақирмади.

Содиқ терговчининг бунчалик жим бўлиб кетишини ўзича тушунди: қўлларида етарли ҳужжат йўқ, нима қилишни билишмайди, чиқариб юборгани эса гап сўздан қўрқишишади. Еки уларни тўғри йўлдан тойдирган туҳматчининг таъзирини бериш билан бандмикан?

Бу фикр қоронғи ўйга чироқ олиб киртилгандек, Со-

диқининг кўнглини ёритиб юборди. У бугун-эрта чиқиб кетади. Душман учун мўлжалланган бу камерада чин душман ётади. Душман учун бу ҳам кам.

Содиқнинг ўйига ўғли келди. У ҳамон йўлга чиқиши олдиагидек эшик бўсағасида қулочини ёзиб талпиниб турибди, гўё бола дадасининг ҳали-бери қайтиб келмаслигини билгану, сўнгги марта дадасининг меҳрига тўйиб, нафасини, исини, ҳидини олиб қолмоқчи бўлиб иштилганга ўхшарди. Аслини олганда ёлғиз ўғли билан ораси олис ҳам эмас. Бир соат келар-келмас йўл. Эҳтимол, онаси уни етаклаб шу девор орқасида юргандир. Ана, бола йиғиси эшитилгандек бўлди. Содиқнинг қулоги дингайди. Йиғлаган ўғли, унинг ўғли, ёлғизи, арзандаси! Нега йиғлади? Айб онасида, унар-унмасга болани туртаверади. Шундай севимли ўғлининг Мушаррафининг қўлида бўлганидан юраги эзилиб кетди. Томонига нимадир келиб тиқилди, аччиқ бир нарса димоғини ёндириди, ачитди.

Неча йиллаб орзиқиб етишилган фарзандини бир кўришга, бир лаҳзагина лўипи юzlари, муноқ кўзларига боқишига муҳтоҷ. Гўё тақдир уни энг ширин орзусига ҳишитириб қўйиб, кейин атайн жазолаётгандек, бешафқат. Унинг бутун орзу-умиди шу болада эди. Ҳаёти у билан гўзал, у билан мукаммал эди. Энди-чи! Ўласа ўйида, ухласа тушида. Ҳеч хаёлидан кетмай қолди. Соғми? Саломатми? Ишқилиб, омон бўлсин. Албатта, кўришади, яқинда кўришади. Унга ўзи тарбия беради. Меҳнатдан ҳайиқмайдиган, қора ишдан жирканмайдиган қилиб таълим беради. Марат ажойиб йигит бўлади, ота келажагини ўз қўли билан унга топширади. Коммунизмдек олий ҳаётда шулар, фарзандлар яшайди. Улар боқий экан, оталар барҳаёт. Эҳтимол, Содиқ ҳам у чоқ невараларини етаклаб, боғларга, хиёбонларга чиқар, суратли китоблар кўрсатиб ўқиб бериб ўтирад. Улар оталар кўрган қийинчиликларни фақат китобдан билажаклар. «Босмачи нима? Ет унсур қанақа маҳлуқ? Нега нонии тарозида тортиб беришган?» деб сўраб қолишса ажаб эмас! Улар ноҳақлик, туҳмат, ёлғон, манманлик, лаганбардорлик, мунофиқлик нима эканини билмайдилар. Булар бари у вақтгача баҳор қоридек эриб битади, тонг уфқидаги тумандек йўқолиб кетади. Содиқнинг бу кўргилиги эса, бирор тұхматчининг иши. Узоққа бормайди. Ҳақ жойини топади.

У шундай ширин ўйлар билан ўзини овутар, яхши кунларини эслаб кўнглини кўтарарди. Ахир куйганинг фойдаси йўқ. Содиқдек кишига ярашмайди ҳам. Ҳали қиладиган анча ишлари бор! «Бўш ўтирган» вақтларида босиб ўтган умрини кўздан кечириб боқса, анча ишлари ҳали қилинмаган, қилингандар ҳам кўнгилдаги-дек эмас. Мактабда ҳам анча имкон бор экану, қилмабди. Ҳаммасини тарозига солиб, ўлчаб, мўлжаллаб қўйди. Чиқди дегунича, шу ишларга киришади. Мактабини район эмас, шаҳарда намунали қилмаса асти ҳисобмас!

Шундай ширин орзу ва умидлар билан бугунни ҳам ўtkазди. Енгил тортиб, ўрнига ётди. Урин ҳам ҳар кундагидан юмшоққа ўхшарди. Эрталаб нонуштадан кейин соқолини олишди. Ўша енгил руҳ билан сартарошга гап қотган эди, у «кимга гапиряпсан?» ҳам демади. «Тўхтаб тур, кўчада кўрганимда бир қизартирай» деб қўйди кўнглида Содиқ. Ундан кейин ҳаммомга туширишди. «Булар ҳаммаси чиқариб юборишга тайёрлик бўлса керак, деган фикр кўнглига келди унинг. Қачон чиқаришаркан? Кундузими, кечасими? Қачон бўлса ҳам барি бир. Лекин қондаларини бузишмагани яхши!»

Шу пайт оғир эшикнинг тамбаси тортилиб, кейин қулфига калит солинди. «Мана кетдим!»— деди юраги сапчиб Содиқ ва иргиб ўрнидан турди.

Назоратчи эшикни очиб:

— Кийининг! Юринг!— деди.

2. ҚИЗ ИСЕНИ

Одам боласи кимга тилёғламалик қилишга мажбур бўлса, ўшани ёмон кўради, тер тўкиб, қўлига киритган муваффақияти унда ҳасад ўйғотади.

Мирсалим ҳам худди шундай. Содиқни ҳар кўрганида бир салом бериб, муваффақиятларидан ёниб юрганида, унинг «бирдан» қамалиб қолиши сал чўчитди уни, ўзи қазиган чоҳнинг бунчалик даҳшатли эканини энди фаҳмлагандек бўлди, уч-тўрт кун таҳорат олиб, намозга зўр берди. Ўзини одамлардан четроқ тутди. Ҳар кўрган одам «ўртоғинг қамалиб қолибди-ку, оранглар жуда қалин эди» ёки «бошини еган ўзинг эмасмисан, жилла бўлмаса сабабини биларсан ахир, бир қошиқдан ош ичардинглар» деяётгандек кўринарди. Лекин ҳеч ким ҳеч нима демади. Фақат кейинги вақтларда актив бў-

либ қолган мактабда баъзи бирорлар ундан ўзини четга олди; бирга йўлга чиқиб қолса, бир нарсани баҳона қилиб чапга бурилиб кетишарди, ҳатто бир куни кекса ўқитувчи Икром отанинг «Фаламис» деганини ҳам ўз қулоги билан эшилди, аммо ботиниб жавоб қайтаролмади. Шунда билдики, бу хилда оғзига сўк солиб яшаши яхши эмас, тиқилиб қолиши мумкин. Ўзинга хос чақонлик билан тўнини ўзгартирди, қаерда тўртта одам бўлса орасига суқилиб, тўдага ўзини уриб, гапга аралашди, ўзини соғдил кўрсатиб, Содиқнинг сағанаасига тош қалади, ҳатто бир мажлисда сўзга чиқиб уни обдан қоралаб бўлгач:

— Мендан порага қази билан сур тўш олган! — деди.

— Қассоблик ҳам қиласизми! — деди кимдир пастдан. Сокин тунда отилган ўқдек кулги кўтарилди. Кутимаган бу луқма Мирсалимни шошириб қўйди; қази билан сур тўш келадиган жойдаги унинг яширин савдо иши очилиб қолаётганга ўхшарди.

— Нега! — деди ўзини ўнглаб Мирсалим, — топиб беринг деган эди, минг мashaқат билан топиб берсам...

— Зўрлаб олибди-да! — яна ўша таниш товуш қичқирди.

— Йўқ, ўзим юборганман... Зўрлаб берганман.

Ушинг чулдираб қолганидан яна кулги кўтарилди. Яна бирор:

— Зўрлаб берган ҳисобга кирмайди, мажбур қилиб олса экан! — деди.

— Мажбур қилган... йўқ... мажбур қилганман...

Мирсалимнинг лудуқланиши узоқ чўзилмади. У гапни бошқа ёқка буриши билан калавасининг йўқотган учини топиб олди. Дастрўмол билан пешонаси ва қизариб кетган бўйинларини артиб, баланддан келди.

— Сиз менга луқма ташлаб сўзимдан адаштирунган. Мен сизнинг мақсадингизни ҳам биламан, халқ душмани Содиқ билан бирга ошхонага кирганингизни ўз кўзим билан кўрганман, бешта кабобнинг учтасини унга бергансиз. Мен бўлсан унинг зулмини тортиб келдим. Талабалар рўзасини ион бериб очтирганимда мени масхаралаб, рўзани ҳимоя қилган ким? Содиқ! Ўқитувчиларни ҳушёрликка чақириб, дафтар муқовасидан ҳар хил тамға, сўз қидиртирганимда мендан кулган ким? Содиқ! Педсоветларда ким менинг обрўйимни тўккан? Содиқ! Мен бу халқ душманининг ҳазилакам жабру жафола-

рини тортганим йўқ! Лекин мен унинг кирдикорларини ичимга ютиб кетавермадим, қаршилик кўрсатдим. Қим бошлаб уни педсоветда танқид қилди? Мен! Бошлаб уни мен фош қилдим, мен синфий ҳушёрлик кўрсатдим. Эсларингда борми, у болаларга «қалдирғоч Маккай мукаррамадан келган муқаддас қуш, уясини бузиб бўлмайди, бузманглар» деганда ҳам, талоқ ҳақида ўқувчи болаларга ахлоқсиз ҳикоялар айтиб берганида ҳам сизлар индамадинглар. Мен, йўқ ундаи эмас, дедим, унинг ёвуз ниятини фош қилдим.

Залдаги сукунатни кекса ўқитувчи Икром отанинг заҳархандаси бузди:

— Керакли жойга ҳам бориб айтганмисан?

Ота сўзини тугатмасдан Мирсалим шошқалоқлаб кестди:

— Айтганман... йўқ, бориб айтишим мумкин. Айтаман...

— Айтмаган бўлсанг, тезроқ бориб айт, яна чиқариб юбормасин!..

Кимдир пиқирлаб кулди, кимдир йўталиб қўйди.

— «Ўртоқ Қўчқоров икки кун кўринимаса, мактаб соқолсиз кишидай бўлиб қолади», деб соясига якандоз солиб юрган ким эди?— деди яна бир ўқитувчи.

— Деганман! Деганим рост, лекин бу гапни тўғри тушуниш керак. Соқол эски одамларда бўлади. Содиқ бўлмаса мактаб йигитлардек яшнаб кетади, деганман. Бу менинг унга қарши олиб борган курашимнинг бир хили эди, замон аравасидан кетда юрмасдан ҳушёр бўлиш керак, ўртоқ...

Мирсалим луқма ташлаганинг номини тополмади, энсаси қотиб ҳеч ким айтмади. Унга-бунга: «нима эди фамилияси?» дегандек жовдирағанча қолаверди...

Мирсалим бундай сўзларни мажлисларда неча бор такрорлаб юрди, кейин район доирасида бўлган бир катта инғилишда ҳам ёзиб келиб, ўқиб берди. Унинг бу «фош қилувчи нутқи» кимгadir ёқди-ю, у обрў топиб қолди. Шу мажлиснинг ўзидаёқ район раҳбарларидан бири уни тилга олиб, қўлтиғига сув пуркаб қўйди. Сал вақтдан кейин унинг мактаб директори қилиб тайинлангани ҳақида маорифнинг буйруғи чиқди. Бу Мирсалимнинг кутганидан ҳам ортиқ эди. Дарров ўзига сиполик бериб, мактабда «ҳушёрлик»ни кучайтириб юборди. Со-

диқнинг вақтида эътибор топган кишиларни чўқилади, Икром отани «ўз аризасига кўра» ишдан бўшатди. Зоология кабинетида Содиқ ясаб берган калхат, бўри, юмронқозиқ чучелоларини «бу халқ душманининг ёвуз ниятли иши, акс ҳолда йиртқич бўри билан олғир калхат, кемирувчи юмронқозиқни ёшларимизга ибрат қилмас эди» деб олдириб ташлади, Содиқни эслатадиган ҳар бир нарсани қириб-қиртишлади, ҳатто «ботаника боғи» деб ном олган мактаб орқасидаги майдонни текислаб юборишига сал қолди, кўпчилик «биз обод қилганимиз» деб қалқон бўлгани учунгина қолди. Оз муддат ичидаги мактабни ўз расаматига солиб олди. Ҳалди сиққанлардан айғоқчи тайнилаб, кишилар орқасига қўйди. Измидан чиққанларни кабинетига чақириб, бигизини тиқди, Содиққа ҳамтовоқъликда айблаб дўқ урди, халқ душманини фош қилишдаги ўз хизматларини пеш қилиди, мўйлов силади. Энди ҳеч ким мактабининг камчилиги ҳақида гапиролмас, гапирган киши минг балога гирифтор бўларди! Бу вақтда Мирсалим сурма ранг дўппини фуражкага, кўйлакни гимнастёрка билан энди эни чарм камарга алмаштирган эди.

Мирсалим мактабни «тозалаб», ўз қолинига солиб олгандан кейин, ўзининг уй ичини бегумон қилиб қўйишга қарор берди. Қизи Азизанинг Қодир билан ҳамон учрашиб туришини билар, бу нарса бир кун эмас, бир куни ўзига путур етказиши мумкин. «Халқ душманининг укасини куёв қилиши ўзини ёниб турган оловга ташлаш эмасми? Мирсалим минг қоқилиб, неча йил орзу қилиб энди минган амалига жони-жаҳди билан ёпишиб олган эди.

Ичидаги у Қодирнинг ёмон йигит эмаслигини биларди. Қизи билан унинг алоқасини бошлаб сезганда ўзини билиб, билмасликка соглан, орқаваротдан кузатган қизининг дидидан мамнун бўлган эди. Бунинг устига, Қодирнинг акаси ҳам чакки обрўга эга эмас эди-да. Энди-чи? Энди бу оила — қора қозон, яқинлашганга қораси юқади. Бунинг устига, Мирсалимнинг ўзи ҳам кутмаган баҳт қуши бошига қўнган пайт. Наҳот икки боланинг қандайдир севгисини деб, мавқендан ажралса. Наҳотки омад нарвонининг илк почаларига энди оёқ қўйганда кўра-била туриб сирғаниб йиқилса! Йўқ, бунга йўл қўймайди! Оталик мавқеи билан бир силтаб, қизини қайтариб олади, кейин мансабида бехавотир ўришашиб ўти-

ради, омади бардош берса, яна юқорига кўтарилиш нияти ҳам йўқ эмас.

Мирсалим бу масалани бир неча кун ўйлаб юргач, охири хотини орқали иш кўришга қарор қилди. Ишдан қайтиб келса, қизи ҳамон ўқишидан келмаган, хотини ҳовлини супуриб бўлиб, ахлатни ҳокандозга олаётган эди.

— Тўплаб нима қиласан, ариққа оқиз қўй-да.

— Вой, ахлат-а! Кишилар ичади, юз-қўл ювади...

— Кишилар... кишилар... Уни олдириб ташлашнинг ўзи бўладими, муллажиринг керак! Ё дадангиздан мерос тегдими!— деди Мирсалим, лекин бугунги нияти эсига тушиб дарров юмшади.— Қе, майли, тўплай бер, мактаб аравасига айтсан олиб кетар. Қани, бу ёққа кел, маслаҳатли иш чиқиб қолди.

Ҳеч маҳал бундай маслаҳатлашиб иш тутмаган эрининг бу сўзи хотини қулогига алланечук әшитилди. «Ишқилиб хайрли бўлсин» деганича нақшли жез обдастада сув олиб келди. Ҳар кунгидай эрининг оёғига озоз қуяр, эри терлаган бармоқларини битта-битталаб орасига қўлини тиқиб ювар экан, гап бошлади:

— Қизингга айт, Қодир билан учрашувни бас қилсин, охири яхши бўлмайди. У дунёю, бу дунё косаси оқармайди, оқартиришмайди. Ўзиники оқармагани оқармаган, бизга ҳам касри уради. Ёниқ қозон ёпиқлигича қолсин, айт, тайинлаб айт қизингга.

Муҳаббат нималпгини билмаган, муҳаббатга иши тушмаган, ҳатто унинг борлигига шубҳа қилган Мирсалим Азиза билан Қодирнинг учрашувига ёшлик ҳаваси деб қараган, икки ориз сўз билан ажralиб кетишига ишончи комил эди. Шунинг учун хотинига йўл-йўриқ бериб, уйга кириб кетди. «Бир оз дам олай» деб ётиб, кўзи илинибди. Бир вақт Азизанинг йиги аралаш бақириб, кимгадир гап ўқтираётганидан чўчиб уйғонди, ташқарига қулоқ солди.

— Бас, даданг уйда, эшитиб қолади!— дерди хотини.

— Эшитса эшитар. Мен дадамнигини эшитдим, дадам ҳам меникини эшитса эшитар,— деди Азиза чўрткесиб.

Мирсалимнинг эти жимирлаб, нафаси тиқилиб келди, устига ёпган чопонини иргитиб ташлаб, дир-дир титраганича ҳовлига чиқиб борди. Дадасини кўриб, айвон четида турган Азиза бошини қуий солди, хотини

«Энди балога қолдим!» дегандек, пастки лабини тишлаб, юзини четга ўгирди.

— Нима гап? Нима лўлилик?— деди Мирсалим худди ҳеч нарса билмаган кишидек ўзини босиб.

Бир оз жимликтан кейин хотини қизига ер остидан қараб олгач, деди:

— Ҳалиги гапингизни айтган эдим...

— Ҳўш, нима дейди, номаъқул маслаҳатмишми!— деди Мирсалим жўрттага қизи эмас, хотинига қараб. Лекин жавобни хотини эмас, Азизанинг ўзи қилди:

— Акаси учун у жавобгар эмас!

— Жавобгарми, ўйқми, менинг ишим йўқ. Унут уни, вассалом!

— Энди ёмон бўлиб қолдими? Қўрқяпсизми? Гап тегадими!

Мирсалим бундай жавобни кутмаганидан, ялт этиб қизининг юзига қаради. Азизанинг кўзларида ўт чақнар, лаблари асабдан қисиқ, «мен ўзимни, ўз севгимни ҳимоя қилилман» деган ирода бутун вужудидан барқуривиб турарди. Фазабдан Мирсалимнинг панжаси муштага тугилди, бўйни чўзилиб, кўзига қон қуилди.

— Ҳа, қўрқаман! Ўша мишиқини деб обрўйим тўкилишини истамайман!

— У мишиқи эмас, ҳалол йигит, меҳнаткаш йигит! Акасининг кимлигини билмайману, лекин унинг соғвиждонли киши эканига бошим билан жавоб бераман.

— Акаси ҳам шунаقا, тили бийрон, усти йилтироқ одам эди.

— Акасини билмайман!

— Зато мен биламан!!— деди ўдағайлаб Мирсалим. Лекин бирор «Ҳа, тўғри, сен уни яхши биласан, бошини еган ҳам ўзингсан» деяётгандек чўчиб кетди. Дарров қарорини айта қолди:— Гап шу: ҳалқ душманининг укасини куёв қилмайман!

— Мен сиздан сўраб ўтирумайман!

— Нима?

Азиза жавоб ўрнида бошини мағур кўтариб чақнаб турган кўзини отасига қадади. Унинг кўзида ҳақсизликка қарши нафрат, исён, изтироб ва ўз ишига ишонч, фидокорлик ёнар, даданинида эса ўжарлик, манманлик ва ғараз, хусумат акси бор эди.

Мирсалим Азизанинг бу тикилишига бардош беролмади, ўз мағлубиятини бақириқ билан яширди:

— Йўқол! Дийдорингни кўрмай! Менинг сендай қизим йўқ!

Хотини фарёд билан бошини чанглаб, Мирсалимнинг оёғига ташланди. Азида вазмин қадамлар билан Мирсалимнинг ёнидан ўтиб, сўрига илиб қўйган портфелини олди. Оҳиста, вазмин қадамлар билан эшикка қараб юрди.

Эртасига онасини безовта қилмаслик учун ётоққа жойлашганини айтиб, одам юборди.

Мирсалим эса, бир ҳафтадан кейин Содиқ оиласи билан турган ва бир вақтлар ҳаваси келиб юрган тўрт хонали ҳовлини Адолат холанинг кўз ёшларига қарамасдан бўшаттириб олиб кўчиб кирди. Мункиллаб қолган, ғам-ғуссадан соchlари оқариб кетган Адолат хола кўчага улоқтириб ташланган юклари устида ўтириб:

— Бу қора кунлар ўтар-кетар, юзингизнинг куйгани қолади, Мирсалим! Содиқжон келса нима дейсиз? Уят! — деган эди, Мирсалим эшитмагандай бўлиб дарвозани холанинг юзига тарсиллатиб ёпиб кириб кетди.

3. ИШОНЧГА ҚИРГАН ТУҲМАТЧИЛАР

Сўнгсиз ширин орзулар оғушида экан, назоратчи эшикни зарб билан очиб, «Кийин! Юр!» деганида қувончдан ичидা «ана, уйга кетдим» деб апил-тапил кийинган Содиқ, сал ўтмай ўзини яна Чуханов кабинетида кўрди.

Терговчи ўз ўрнига ўтириб, стол тортмасидан оқ қозоғ олиб кўздан кечириди. Кейин бошини кўтариб, Содиққа қаради:

— Демак, иқрор бўлмоқчи эмассиз? Фойдаси бўлса давом эттираверинг, ўзингизга қийин.

Содиқ чурқ этмади. Терговчи ўз жойига бориб ўтириди. Телефон қилиб бир кишини ўрнига вақтинча кириб турнишга таклиф этди. Сал ўтмай у одам эшикда кўринди. Янги кирган лейтенант Содиқнинг саломига алик олиб, Чухановнинг ўрнига ўтириди. У тунов куни ҳам бир-икки кириб-чиқиб кетган эди. Шунда кимдир уни Пушкарёв, деб чақирганда, фамилиясини билиб олган эди. У мулойим кириб, Чуханов билан қўл олиб кўришади-да, Содиққа юмшоқ назар ташлаб қўяди, саломига бош чайқаб алик олади.

Пушкарёв ҳозир ҳам Содиққа қараб бир-икки оғиз

жуфтлади-ю, гапирмади. Яна қўлидаги китобини варақлади, қизиқ суратга кўзи тушди шекилли, мийнида кулиб қўйди. Кейин юмшоқлик билан унинг аҳволини сўради, кўнглини кўтарган бўлди.

Содиқ Пушкарёвнинг бу меҳрибонлигидан курортга бенул путёвка олган кишидек қувонди ва айни вақтда хўрлиги келиб кетди. Инсоннинг кўнглини олиш, уни мамнун қилиш учун ахир кўп нарса керак эмас-да!

Пушкарёв буни тушунди, ўрнидан туриб келиб, юпатиш оҳангидаги гапирди:

— Хафа бўлманг, кераги йўқ.

У яна нималардир деб юпатмоқчига ўхшарди-ю, лекин журъат этолмагани кўриниб турарди. Содиқнинг фаҳмича, Пушкарёв бу ерда рўй берастган баъзи ноҳақликларни ўз кўзи билан кўриб турибди, ичидан куяди, аммо бирор иш қилишга, бир иш қилиш эмас, ҳатто айтишга ҳам ожиз!

— Юрагингиз касал эмасми? — деди бир оздан кейин.

— Йўқ, — бош қимирлатиб жавоб қилди Содиқ.

— Унда ҳеч нарса қилмайди, ўтиб кетади, сал толиқибсиз.

Содиқнинг кўзи шу кичик суҳбатдан кейин чарақлаб очилди. Кўзига шу лейтенант дунёда энг меҳрибон киши бўлиб кўринди. Бошини кўтариб, Пушкарёвга қаради. Назаридаги жуда ўзгачадек бўлиб туюлган бу ёшгина йигит оқ-сариқдан келган, кўзлари кўм-кўк, қошлиари сезилар-сезилмас кул ранг, бурнининг учи бирор чертиб қўйғандек тўмтоқ, энгаҳи учли, лаби чўрдек қизил экан. Бунаقا оддий рус кишиларни у кўп кўрган. Улардан қанчадан-қанча ўртоқлари бор эди.

У Пушкарёвнинг кўзига термилиб қолди. Бу кўзлар унга ҳаёт ва истиқбол ваъда этарди, бу кўзлар умид ва ишонч бахши этарди. Бу кўзларда одамийлик ва ҳақиқат ёнарди.

— Сиз ҳам шу ерда ишлайсизми? — деди журъат қилиб Содиқ.

— Ҳа, — деди Пушкарёв ва кўзини китобдан олиб кулимсиради. Бу табассум Содиқда яна жасорат туғдирди.

— Сиз ҳам терговчимисиз?

— Буниси сир, — деди у яна кулиб, лекин салдан кейин қўшиб қўйди: — Сизча кимман?

— Билмасам.

— Мен ҳам терговчиман, албатта.

Содиқнинг фикри равшанланиб, ўйлай кетди: Чуханов ҳам терговчи, бу ҳам терговчи. Иккаласи икки дунё. Биридан кишининг кўнгли сув ичади, иккинчисидан энсанг тош қотади. Пушкарёвга ўхшаганлар бўлгани ҳолда нега Чухановлар бунаقا иш тутади экан?

Содиқнинг Пушкарёвга раҳми келди. Уига ишлаш жуда қийин бўлса керак. Ахир унинг мана ҳозир Содиққа қилаётган раҳмдиллигини Чухановга ўхшаганлардан биронтаси кўриб қолса, индамай турмайди-да!

Пушкарёв китобни бир четга суриб қўйиб, Чуханов тез-тез кўздан кечириб турадиган папкани оғди. Ҳар қоғозни ўқигандан юзи ўзгариб турди. Бу Содиқнинг делоси. У анчагина қалин, кепак рангидағи муқоваси уринган. Содиқ унинг ўз делоси эканини биринчи марта кўрганда ишонмаган, шунча материал қаёқдан йиғилди деб ўйлаган, Чуханов муқовасини кўрсатиб, унинг фамилиясини ўқиб беришга мажбур бўлган эди. Барин-бир ҳали ҳам унинг ичидаги материалнинг ҳаммаси ўзига тааллуқли эканига ишонмайди.

Пушкарёв делони ўқийвериб зерикди шекилли, хўрсишиб ундан бошини кўтарди. Ўрнидан турди. Оғир қадамлар билан Содиқ ўтирган бурчакка келди.

— Ростингизни айтинг, советлардан норози бўлган йилларингиз бўлганми? Ҳеч жиноятга қўл урганимисиз?

— Мутлақо! Хаёлимга ҳам келмаган. Бунинг учун асос ҳам йўқ: бадавлат хонадондан чиқмаганманки, отамнинг Совет ҳукумати туфайли қўлдан кетган молмулкини эслаб, хумори тутса; чет элда бўлганим йўқки, унинг усти ялтироқлигига учсан, ўшандай ҳаётни орзу қилсан; бирорта мафкураси бузуқ одамда ўқиганим йўқки, у мени йўлдан урган бўлса!

Содиқнинг астойдил куйиб-лишиб гапириши Пушкарёвнинг диққатини тортди. У тушундикни, қаршисида уйқудан қолиб, ҳолдан толиб ўтирган киши ҳаётга бефарқ қарайдиганлардан эмас, бундайлар комил ишонч билан яшайди, икки юзламаликни билмайди.

Пушкарёв ана шу хулосасини яна бир тасдиқлаб аниқлаб олмоқчи бўлгандек, Содиқни бошдан-оёқ кўздан кечирди, ҳоргин кўзига бокди, соқоли ўсиб кетган юзларидан нималардир излади. Кейин яна ўз жойига ўтиб, делони кўрди. Елкасини қисиб қўйди.

— Қизиқ, жуда қизиқ...

Шундан кейин орага узоқ жимлик чўқди. Анча ҳушёр тортган Содиқ фикран бир неча марта уйига бориб келди, севган мактабини айланди, дарсга кирди, овга чиқди. Ширин орзулар оғушида маст бўлиб ўтирас экан, Чуханов кириб келди. Қўлида бир варақ қофоз, Пушкарёв чиқиб кетди.

Чуханов стулига ўтириб, Содиқни олдига чақирди.

— Мана буни ўқиб, қўл қўйинг.

Содиқ Чуханов узатган қофозни ўқиди-ю, устидан совуқ сув қўйилгандек ҳушёр торти. Қофоз унинг партия билетини шаҳар партия комитетига топширилгани ҳақида эди.

— Ўчдимми?— дея олди ўзини бу даҳшатли хабардан аранг ўнглаб Содиқ.

— Бўлмасам-чи!

Содиқ шундан кейин қандай қилиб жойига келиб ўтирганини, қофозга қандай қўл қўйганини, қачон уни камерага олиб тушганларини эслай олмайди. Партияларни ҳақидаги тўрт әнлик қофоз кўз олдидан кетмай қолди...

Содиқ ўз ўлимига ўзи аза очгандек, ҳўнграб йиғлаб юборди, бу унинг умрида балки биринчи марта ҳўнграб йиғлаши эди.

Бир неча кун ўтгач уни яна терговчи чақирди.

Содиқ кириб борганда Чухановнинг хонасида Мирсалим ўтирганди. Содиқни кўриши билан сал безовталанди, лекин тезда ўзини ўнглаб, ютиниб олди. «Бу нима қилиб юрибди?»— Содиқнинг миясига келган илк фикр шу бўлди. Ҳаёлида бунга жавоб топгунча, нечундир юраги орқасига тортиб кетди.

Мирсалим қандайдир сохта ишшайиш билан ўрнидан қўзғалиб, саломлашган бўлди.

Содиқ ўтирас-ўтирмас терговчи сўз ташлади:

— Таниш бўлсанглар керак?

— Ҳа, бирга ишлардик,—деди Содиқ бўшгина. Мирсалим боши билан тасдиқлади.

— Таниш ҳам гапми, сирдошлар-ку. Қанча-қанча шишаларни бирга бўшатишган,— гапга аралашди Чухановнинг ёнида ўтирган қораҷадан келган, юзларига ҳуснбузар тошиб кетган новча ёш йигит. Содиқ бу йигитни билади. Фамилияси Сайдуллаев. Буни илк бор эшитганда наҳотки фамилиясининг нотўғри эканини

билмаса, асли Сайдуллаев-ку, деб кўнглидан ўтказган эди. Унинг талаффузидан Самарқанд шеваси яққол сезилиб турарди. У баъзан-баъзан кириб Чухановга кўмаклашади. Ҳатто бир куни Содиқ билан ёлғиз қолиб, «бўйинингизга олинг-қўйинг-да, ўзингизни қийнаб нима қиласиз, сиз куч берган тўнка энди кўкармайди», деган әди. Шу-шу йигитни ёмон кўриб қолганди.

Чуханов «барвақт луқма ташладинг!» дегандек Сайдуллаевга қараб, аввалги юмшоқ товуш билан яна сўради:

— Бир-бирингизга шахсий адоватларинг йўқми?

Бошлаб Мирсалим жавоб берди:

— Йўқ.

— Хизматдаги баъзи бир тўқнашувларни ҳисобга олмасак, албатта, йўқ.

Содиқ шундай дейишга деди-ку, аммо ичидан совуқ ел ўтгандек бўлди. Юраги қандайдир кўнгилсизликни сезаётгандек ҳаприқиб кетди.

— Хизматда бунақа гаплар бўлади, адоватга кирмайди!— чўрт кесди Чуханов.

Ана шундан кейин Содиқ етти ухлаб тушига кирмаган гаплар бошланди.

Мирсалим гувоҳликка келган экан. У шунаقا айбларни Содиққа тақадики, унча-мунча одамнинг тилигача музлаб кетади. Содиқ ўз туғилган қишлоғида бир неча маслакдош кишилари билан советларга қарши ишлар қилган эмиш. Мақсади — ёшларни йўлдан уриш бўлган эмиш. Шу ниятда маориф соҳасига кўчган, қамалган Болтақул унинг ўнг қўли экан. Ўз фаолиятини кенгайтириш мақсадида марказга кўчиб келган, Мирсалимни вербовка қилингаша уринган, у ён босмагандан кейин турли йўллар билан қиса бошлаганмиш.

— Ёлғон! Туҳмат!— бардош беролмади Содиқ.

— Бақирманг! Қўл остингиздагиларга бақирадиган директорлик вақtingиз ўтиб кетган. Мен бу гапларни ўз оғзингиздан эшигтанман.

Мирсалимнинг бу сурбетлигидан Содиқ яна тутақиб кетди:

— Туҳматчи! Фаламис! Бўҳтон қилгани уялмайсизми!

Уни Сайдуллаев қайириб ташлади.

— Совет кишисини ҳақорат қилманг, гражданин Кўчқоров.

Содиқ терговчиларнинг танбехига парво қилмай, ифвогарнийг ўзига ташланди:

— Сенинг-ку тилёглама, ичидан пишганлигинги билиардим, лекин юраги қора, ифлос, иғвогарлигингдан бехабар эканман. Майли, гапир, оғзингга сиққанча гапир, виждонсиз!

Чуханов ишининг бузилиб кетишидан қўрқдими, нима учундири, оғирлик билан орага тушди:

— Кўчкоров! Енгиллик қилманг! Ҳақиқат доим шунақа аччиқ ва залворли бўлади. Шуларнинг барчасини шу вақтгача ўзингиз тартиби билан айтиб беришингиз мумкин эди. Бирорнинг оғзидан эшитиш ва фош бўлиш, албатта, оғир! Начора!

Мирсалим хизматлари эвазига мукофот слаётган одамдек бемалол ўтиради. Лекин қандайдир безовталик юзига шарпа солиб туради. У Содиқнинг юзига боқолмас эди: ё бардоши етмайди, ё туҳматининг сезилиб қолишидан чўчириди. Содиқ эса, аксинча, унинг қарашини овлар, кўзини учратиб, ичига назар ташламоқчи бўларди, пайт пойларди. Охири бунгà мусассар бўлди, ушинг кўзини учратди: Мирсалим бир неча лаҳзага бардош беролди, холос! Содиқ унинг бу беҳаёларча боқинишидан ғаламислик, ифво, туҳматчилик қон-қонига сингиб кетган, қотилликдан қайтмайди, кишилар бошига қора кун солишдан завқланади бу одам, деган ишончга келди. «Эҳ, аттанг, нега аввал билмаган эканман» деб ўкиниб қўйди.

Содиқ қанчалик қаттиқ туриб ўзини ҳимоя қилмасин, Мирсалим шунчалик безбетлик билан унга туҳмат тошларини ёғдирар эди.

Содиқ бу ерда ҳақлигини исбот қилишга қурби етмаслигини билди. Иши судга ошса, ўша ерда узил-кеシリ ғалаба қозонишга умид боғлаб, ўзига далда бериб турганда яна бошқа бири пайдо бўлди. Бу бир вақтлар дарсга ичиб келгани учун Содиқдан дакки еган ўқитувчи Шукуров эди. У Мирсалимга ўхшаш сурбетларча гердайиб ўтирамаган, шартта-шартта гапирмаган бўлса ҳам, Мирсалимнинг айтганларини баъзан тўлдириди, баъзан тасдиқлади. Содиқни мактабдаги ҳалол ўқитувчиларни қувғин қилиш, таъқиб остига олиш, талабалар орасида диний тарғибот олиб бориш (қалдирғочни Маккай-мукаррамадан келган деган, талоқ ҳақида одобсиз латифа айтиб берганмиш), манший жиҳатдан

бузилиб, ёш хотинга уйланиш, очилган хотин-қизларни таҳқирлашда айблади. «Хукумат хотин-қизларни эркақлар билан тенғ қиласман, деб бекор уринади, йигирмата хотиннинг ақли бир товуқникича йўқ. Бир аёлнинг ғийбати қирқта эшакка юқ бўлади», деган эмиш.

— Қачон? Қаерда? — сўради ажабланиб Содиқ.

— Мактабда, коридорда. Мавжуда Абдураҳмонова номзоди депутатликка кўрсатилганда.

Содиқ Шукуревнинг бу туҳматидан ёқа ушлади: — Етавба! — салдан кейин ўзини тутиб олди. — Шукурев, сизнинг туҳматчилигингизга эмас, ит еганини қусади-ку, лекин қўлингизга тарбиялаш учун ишониб топширилган болаларга жоним ачияпти. Эсиз болалар! Эсиз тарбия!

— Сиз ўзингизнинг ғамилигизни еяверинг, — уни чўқилади Сайдуллаев. Унинг кўкрагидаги Осоавиахим нишони қийшайиб, ўнг кўзи остидаги қора холи йилтиллаб кетди.

— Менинг виждоним пок. Итнинг тили теккани билан дарёниг суви ҳаром бўлмайди. Ёлғоннинг оёғи қисқа, узоққа боролмайди, бир куни миси чиқади. Лекин сизларнинг бундай ғаламислар гапига ишонганингларга ҳайронман.

— Халқ душмани Болтақул сизнинг маслакдошигиз эканини унутманг! — чўрт бўлди Чуханов.

— У душман эмас!

— У сиздан кўра ақлли экан: ўзини қийнагани йўқ, ҳаммасини айтиб берди, — деди Чуханов.

«Наҳот, шу гаплар тўғри бўлса! Болтақул душман, ўзи иқрор! Йўқ, мумкин эмас!» — деди ичиди Содиқ ва яна ажабланди.

Содиқ гангиганча камерасига кириб келди. У мудҳиш тушдан уйғонолмаган одамга ўхшарди.

4. ЮЗМА-ЮЗ

Шундай вақтлар бўлдики, терговчи ҳафталаб уни чақирмади. Бир куни яна бир киши билан юзма-юз қилди. У босмачиларга қарши кураш йили унда аскар бўлган экан. Уни Содиқ танимади, сўнгра билса, бир оз кунгина хизмат қилган экан. Анча ёшларга бориб қолган, соқол қўйган, сўйлоқ тишли, бир кўзи кўр, новча бир киши эди. У Содиқни босмачиларга қурол етказиб беришда айблади.

Содиқ мана шу найрангларни хаёлидан ўтказиб, янги камерага кириб келди. Бу камера аввалгидан кенгроқ ва қўш каравотли эди. У биттасига ўрнини ёзиб, иккинчисига қайси «бахтиёр» келар экан, деб кўнглидан ўтказди, кирадиган одамнинг қандай бўлиши уни қизиқтирмайди. У одам зотини кўришга, сўзлашишга муҳтож. Аввалги камерада ёлғиз ётганида ҳафталаб оғзидан бирор сўз чиқмаган вақтлари бўлди-да, ахир.

Учинчи кун прогулкадан қайтса, бир одам ўтирибди, Содиқнинг кирганини кўриб, бошини кўтарди. Саломлашди. Қамоқда бир-бировга бериладиган одатдаги сўроқлар бўлиб ўтди: қачон қамалгансиз? Нимага? Қайси камерадан чиқдингиз? Кимларни кўрдингиз?

Содиқнинг бошлаб кўзига ташланган нарса, ҳамсуҳ батининг хумкалла, дўнг пешоналиги, қошининг қошдан кўра мўйловга ўхшашлиги ва рўпарасидан сочма ўқ егандек чўтирлиги бўлди. Содиқ унинг исмини сўраган эди, нима учундир, исмини эмас, фамилиясини айтди: Бадалхўжаев экан.

У бошлаб суҳбатга мойиллик кўрсатмади. Нимадандир ҳадиксираши, ўзини эҳтиёт қилаётгани, юрагида эса, тўфон ҳайқириги ётгани яққол кўриниб турарди, Содиқнинг:

— Нима иш билан ётибсиз? — деган саволига:

— Эски нарса. Ёшлик хатоси,— деб қўя қолди. Бу като нимадан иборат эканини айтишни истамади. Содиқ уни ўз гази билан ўлчаб, «бу ҳам туҳмат қурбони шекилли» деб қўйди ичида ва унинг юрагини ҳам ўзиникидек ловиллаб ёнаётган ҳисоблаб, унга туз сепишини лозим топмади.

— Туҳмат ёмон! Туҳмат — тошни ёради,— деди унга ачиниб ва ўз гувоҳларининг туҳматини гамириб берди. — Мен босмачига қурол етказиб берган эмишман. Туҳматни қаранг: ҳалок бўлган аскаримнинг милтигини олишга рухсат этмаганмишман. Милтиқ Диловархўжа қўрбошининг йигитлари қўлига тушганмиш, шу қурол етказиб бериш эмиш.

Ўзининг ташвишли ўйлари билан банд, суҳбатга лоқайд қулоқ солиб ўтирган Бадалхўжаев, «босмачи» сўзини эшитиши билан бошини кўтарди, Диловархўжа исми қулогига кириши билан ялт этиб Содиққа қаради.

— Ким дедингиз? Диловархўжа қўрбоши?

— Ҳа, Сиз уни танийсизми?

— Ўша йиллари бир қулогимга чалингандек бўлган эди.

— Сиз ҳам ўша томонларданмисиз?

— Ҳа, сиз-чи?

— Фир-ғир шамол қишлоғидан.

Бадалхўжаев яна қизиқиб қолди. Ҳаёл билан қисиқ кўзлари чарақлаб, мўйловга ўхшаган бароқ қошлари қовоғи устига уюлиб келди.

— Сизни-ку танимаяпман, отангизнинг номлари нима эди? Балки у кишини танирман.

— Босмачилик йиллари «мусулмон командир», «Содик командир» деганин эшитганмисиз?

— Ўша киши сизнинг отангиз эдими?

Содик кулди:

— Йўқ, ўзим.

— Ўзингиз? Йўғ-е!— Бадалхўжаев иргиб тушди.

Чўтири башараси оқаринқиради, чап кўзи пирпираб кетди. Дарров ўзини босиб, гапни бўлди:— Унда неча ёшда бўласиз?

— Айни йигит чоғим, шернинг оғзига кириб чиқ деса, қайтмайдиган чоғим эди.

— Ҳа, давр сургансиз, номингизни кўп эшитганмиз. Хўш, бу ерда нима қилиб юрибсиз?

Содиқнинг ёшлиқ — жанговар йиллари эсига тушиб, руҳи кўтарилиб кетган, қулоқ соловчи бўлса эрталабгacha гапиришга тайёр эди. Ана шу кўтаринкилик билан жавоб қайтарди:

— Бир айланиб кириб қолувдик, чиқиб кетиш қийин бўляпти, эшиги қўшқулфлик экан.

— Қўшқулфлиги-ку, майли,— унинг кулгисига қўшилди Бадалхўжаев,— то кўчага чиққунча етти эшиги борлигини айтмайсизми!

— Санадингизми?

— Мени-ку бу шаҳарга умрим бино бўлиб биринчи келишим, шу ерлик биттаси айтган эди.

— Санабди денг? Шундай қилиб, бизнинг томондан экансиз-да. Нима, ишингиз босмачилик билан боғланганми?

— Зўрлаб боғлашяпти,— деди Бадалхўжаев боягидек гап-сўзга майли бўлмай. Содиқ бошқа титкиламади, сұҳбатдоши ҳам тафсилотини айтмади. Йккиси ўз ўрнида ҳаёл оғушига сингиб кетди. Ётиш олдидан ўрнини тузата туриб, Бадалхўжаев сўраб қолди:

— Диловархўжа қўрбоши қочиб қутулиб кетган денишади, шу ростми?

— Рост. Ўч кун қувиб уддалолмаганимиз. Яқинда қўлга тушган деб эшигандим.

Бадалхўжаев яна жим бўлиб қолди. Кўрпасининг бир четини қайириб, ётиш ҳуштагини кутарди. Гўё унинг юрагида портлаб кетиши мумкин бўлган зўр турғен ётибди-ку, уни кўрпа билан бекитиб, уйқу билан босмоқчилик безовта.

Ҳуштак чалиниб, у ёшига ярашмаган шошмашошарлик билан ўринга кирап экан, яна деди:

— Ушланмагандир. Ушланса эшитиб қолардик. Чакон бўлган дейиншади.

— Қўй туриб, эчки имомликка ўтадими, дегандек, бир нарсаси бўлмаса, қўрбоши бўларниди?

Бадалхўжаев яна индамай қолди. Энди у гапини тарозига солаётгандек, шифтга тикилиб ётар эди. Содиқ-қа орқасини қилиб, ўгирилар экан, луқма ташлади:

— Шу кунда ушлашса нима қилишаркин?

— Билмадим.

— Отишадими?

— Отишлари ҳам мумкин,— деди Содиқ гап рўёбга чиқмайдиган нарса ҳақида бораётгандек бепарвогина.

Бадалхўжаев яна жим бўлиб қолди. Упинг мушукминжоз, ухламай хуррак отадиган одати бор шекилли, кўзи очиқ хуррак торти.

Бадалхўжаев ўз саволидан ўзи рози бўлмади. Кечаси билан ажриқقا ағанаб чиқди. Мижжа қоққани гумон. Содиқ бир уйғониб қараганда ҳам кўзи шифтда эди.

— Ухладингизми?— деди Содиқ.

— Хаёл олиб қочди.

Содиқ бошқа ҳеч нарса демади. Бунаقا кечалар унга таниш, қанчасини тоқи санаб ўтказган.

Эрталаб Бадалхўжаев сўлиб турди. Тез-тез силаб турадиган мўйловсифат қоши билан ҳам иши бўлмади, у болаларнинг тепадиган ланкасидан, қовоғи устида ёпишиб ётибди. У оғир касалдан тургандек, bemажол, камгап эди. Чой томоғидан қувурдан сув ўтгандек, қулт-қулт қилиб ўтди. Шу куни уни терговга чақирдилар. Кечаси яна. Индинига куни билан терговда бўлди. Кейин яна... Ана шу кейингисидан фарёд уриб қайтди:

— Менин худо урди! Тамом бўлдим!— деди эшикдан

кира солиб. Дунёда Содиқдан бошқа мөхрибони йўқдек, унинг елкасига ўзини ташлади. Содиқнинг: «Нима ган ўзи?»— дейишига қулоқ солмас, иуқул пешонасига муштлар, «Худо уриб қолдп мени!»— дер эди.

Содиқ катта одамнинг бундаи йиғисини бринчи марта кўраётганидан, шошиб қолди. Бечоранинг бошига биронта номард туҳмат тоши ёғдириб кетдими? Оқни қора қилиш учун кўп бўёқ керак эмас-да!

— Сабр қилинг, ноумид шайтон.

— Йўқ, сиз билмайсиз. Мен тамом бўлдим.

Бадалхўжаев фарёд уриб, ўз жойига ўтиб ўтириди, бошини узун бармоқлари орасига олиб қаттиқ чангалади, терисини шилиб олгудек чангалади. Шу ўтирганича куни бўйи қилт этмади. Кечаси ухладими, йўқми — Содиқ билмади, лекин анча тетик тортиб турди. Унинг боқиши аламзада, лаби қисиқ, қошлари чимирилган.

— Биласизми, Содиқжон, ким билан бирга ўтирибсиз?

— Йўқ.

Бадалхўжаев кечаги Бадалхўжаев эмас эди, уни бирор тунда алмаштириб кетганга ўхшарди. У човут солишга тайёр, овчидан ҳурккан тулкидек ҳушёр эди.

— Энди яширишимнинг фойдаси йўқ. Ишпим кеча тамом бўлди, судга ошди. Уладиган ҳўқиқи болтадан тоимас, дегандек, менинг қўрқадиган ерим қолгани йўқ, ҳаммаси очилиб бўлди, ҳаммасини очдилар, органга қойилман. Ун беш йиллик ишни хато қилмасдан тасбек доналаридек бир ипга тизиб чиқнишди. Буларда ҳунар катта. Ўша сиз айтган Диловархўжа мен бўламан.

— Йўғ-е!— бармоғини тишлади Содиқ.

— Ҳа, мен, ишонинг! Энди талашадиган ҳеч нарсамиз йўқ. Сиз ҳам бу ерда бекорга ўтирганидирсиз. Бир сабабсиз шудгорда қўйруқ ётмайди.

Содиқ унинг сўзини эшиитмас, қаршисида ўтирган одамнинг ўша Диловархўжа қўрбоши эканига ҳали ҳам ишонгиси келмас эди.

Диловархўжа эса, шу вақтгача ўғирлик молни яшириб келган кишидек, ичиди йиғилиб ётган, йиғилиб ётавериб, тайёр ҳикояга айланиб қолган юрак сирларини бир чеккадан айтмоқда эди. Энди яширишнинг фойдаси йўқ, жиноят ишига тикилган эди.

Ислом байроғининг сопига қизил аскар ўқи тегиб,

шарт синиб тушгандан кейин, иккита жиловдори билан Тоҷикистонга қочибди. Бир жиловдори йўлда жарга юмалаб кетибди. Иккинчси билан ғарифона кийиниб, бир чет қишлоқда, тоғда мусоғир умр кечириб турибди. Бир куни қараса, жиловдори яшириб қўйган қуролини оляпти.

— Ҳа?— дебди.

— Қишлоғимга кетаман. Нима бўлса пешанамдан кўрдим, бола-чақамни соғиндим.

— Ҳой, бола, шўролар билан ўйнашма, қозиқ қилиб қоқиб юборади,— деса:

— Мен камбағалдан чиққанман, пичоқ ўз сопини кесмайди.— дебди.

Мундоқ қараса, боланинг тўқими ўзгариб қолган, сўзга кирадиган эмас.

— Майли, бор!— дебди.— Лекин бир куни қўлингни узатсанг, олмайман, хафа бўлмайсан ўшанда.

— Хафа бўлмайман! Бир еганим ҳам бўғизимда турибди.

Рухсат берибди. Рухсат берибди-ю, унинг қораси кўздан ўчгунча ваҳима босибди. «Менинг шу ердалигимни ҳукуматга бориб айтса-я!»

— Бу таги пастга нима, мен ваъда қилган ботмон-ботмон ердан энди умиди узилган, ким бошини силаса мушукдек ўшанинг тиzzасига чиқиб ётади,— дебди Диловархўжа ҳаром нарсадан жирканаётган кишидек лабини буриштириб.— Ҷақирсам, қайтмайди, бунга ақлим етади. Қувсам қочади. Қўшнимнинг отини бир кунга сўрадиму, олдидан тўсиб чиқмоқчи бўлиб, бошини қўйдим. Тўрдан чиққан беданадай йўргалаб, анча ерга бориб қолган экан. Йўлини тўсдим. Ҳеч кимга ҳеч нарса демаслиги ҳақида қасам ичирдим, худони ўртага солдим. Бундан кейин менинг исмим Диловархўжа эмас, Тошмат эканини, бирор ерда учратиб қолса, шу ном билан аташини таъкидладим. Ҳаммасига хўп деди. Оғаниндеҳ хайрлашиб қолдим, бирор кўрса гумон қилмасин деб, ёнидаги фарғонача пичоғини ҳам олиб қолдим. Сал ғарнини боргандан сўнг орқасидан қараб, яна кўнглим ўрнига тушмади. Буларга қасам нима! Тўхта, пичоғингни ола кет, йўлда керак бўлади, деб олдига бордиму, қорнига солиб юбордим. Ичак-чавоги ағдарилиб тушди. Ҳамманинг жони ўзига керак. Бир ялангоёқни деб қачонгача жон ҳовучлаб юраман.

— Кейин нима бўлди?

— Кейин нима бўларди. У қишлоқдан ҳам бошимни олиб кетдим. Яна исмимни ўзгартирдим. Сочилган насибамни териб еб юрдим. Тунов куни сиз исмимни сўраганингизда қайси бирини айтишни билмай фамилиямни айтгандим. Унда кўп нарсалар ҳали терговда очилмаган эди. Энди.. бари бир... Мен тепкиси босиғлиқ тўппонча қаршисида турибман, «қарс» этиши қолган, холос.

Содиққа энди бу гап таъсир қилмади. Унинг қаршисида оддий жиноятчигина эмас, қотил ўтиради. Шундай бўлса ҳам, бу хунрезнинг бутун ҳаётини билгиси келиб қолди. Қизиқ, нима билан тугар экан?

— Қандай қилиб шунча эҳтиёткорликдан кейин яна қўлга тушиб қолдингиз?

Диловархўжа қўрбоши шу саволга муҳтож бўлиб тургандек, ғазаби қайнаб, купури ошиб, гапира кетди:

— Мен ўзим аҳмоқман, ўзим! Ит ҳидлаб топмас ерда юрган эдим. Нима бўлди-ю, онамнинг касаллигини эшитиб қолдим: онам мени бир кўришга зор эмиш. «Шунча йил ўтиб кетди, ким ҳам танийди. Бир борсам бориб келай» дедим. Йўлга чиқдим. Келсан, чиндан Азроил онамни бир қўлидан ушлаб турибди. Қувонди, йиғлади, тузалгандек бўлди. «Энди мен кетай» десам, эртага ўладиган кишидек: «Сенга илҳақ эдим, ўз қўлинг билан ерга қўй!»— деди. Нима дейишимни билмай, лабимни тишлаб қолдим. Шу куни бир ёмон туш кўрган эдим, тушимга қараганда, кетишим шарт эди. Ноилож қолдим. Онам ўлмай ўлсин, эртасига мени ушлаб олдилар. Мана, ўқинчимдан ўкириб, беш ойдан бери шу ердаман. Онамнинг сўзига қулоқ солиб нима қиласан эканман, ўлгандан кейин мен кўмдим нимаю, бошқа кўмди нима! Она ҳам хотин киши-да, аҳмоқ бўлади. Аҳмоқлиги менинг бошимни еб ўтирибди. Энди буларнинг панжасидан қутулиб бўбман! Қўлга тушибманки, онамни сўқаман. Ҳа, лаънати, интизор экансан, кўрдинг, бўлди-да, йўлдан олиб қолиб нима қиласан!

Ўз фарзанди лаънатига қолган номаълум онага Содиқнинг раҳми келди:

— Бечора она сизни ушлаб олишларини туш биладими!

— Нега билмайди! Шунча йилдан бери писта чақиб,

ёнгоқ ўйнаб юрганимидим. Ватангадолигимни биларди! Энди нима бўлди!

Содиқ қараса, Диловархўжа оқ сут бериб катта қилган ўз онасини яна беҳурмат қиласидиган, ўлигининг устига чиқиб тепадиган кўринади. Онанинг нима гуноҳи бор: от миндириб, қилич тутиб, босмачи бўлгин дебдими! Узингдан кўр.

Содиқ билдики, қўрбоши ҳозир худосини ҳам танимайди, ўз жонидан бошқа нарса кўзига кўринмайди, «Онасидан узоқлашиб меҳри совиб кетган бўлиши мумкин. Бола-чақаси бўлса, уларни севар, ахир ота-ку» деган хаёл билан Содиқ гапни чалғитмоқчи бўлди.

— Онангиз олдида бола-чақангиз йўқмиди?

— Бир қизчам бор эди. Ҳовузга чўкиб ўлганини эшитган эдим.

— Фотиҳасига бормаганимдингиз?

— Бе! Ўлса ўлибида. Азamat ўғил боламидики, уйимнинг чироғи десанг. Қиз бола — қуш. Қанот чиқаргунча қўлингда, кейин тузоқ қўйиб ушлаб ололмайсан.

Унинг бу жавоби яна Содиқнинг таъбии тирриқ қилди. Дунёда қизиқ ёдамлар бор: сигири урғочи туғса севинади-ю, лекин хотини қиз туғса энсаси қотади. Қиз туғилмаса, сенга онаю, хотин қаёқда!

Содиқ бу билан гаплашмай деса, ёлғиз ўтиравериб юраги сиқиладиган бўлиб қолган. Одам товуши сандиқ-қа қулфлаб, калитини ташқарига улоқтирилгандек, димиқдан юрагига теккан енгил шамол эди. Бу ҳол уни яна гапиришга мажбур этди:

— Хотин-чи? Хотин кутиб ўтирган эканми?

— Йўқ. Қиздан кейин уй қилиб кетган экан. Колхозда мишиғини оқизиб юрибди. Номаҳрам деб, мендан лойтовоқдек юзларини бекитдилар.

Содиқ уни яна бева қолган эканми, деб ўйлади.

— Эри қаёқда экан?

— Шу ерда. У ҳам колхозчи экан. Бир кўзим тушди, тиззасигача лой, елкасида кетмон.

Содиқнинг кўнглидан ўтди: ўша тиззасигача лой, елкасида кетмон бўлган меҳнаткаш эри минг чандон сендан яхшидир. Бегоналигида орқасидан шунча гап қиляпсан, хотинлигига сендан нима рўшнолик кўрди-ю, кутиб ўтирганда нима кўрарди. Эсли хотин экан! Меҳнат билан топилган нон beminnat бўлади!

. — У томонларда ҳам бола-чақа қилгачдирсиз, албатта.

— Ҳа, қилғанман. Хотин эмас, чўчқа олганман. Йилига икки марта туғадими-ей! Ҳамма ёқни чурвақа бостириб юборди. Уйга киргани юрак безиллайди: вақири-вуқур, «Бас, бўлди!» десам, худо берса нима қила-ман, дейди. Лаънатига барим тегиб кетса, туғади-я! Мана энди нима бўлди!!

Содиқнинг кўз олдига ёлғиз ўғли Марат келди, у ҳамон сўнгги марта хайрлашганидек эшик олдида қанотини ёзиб, унга талпинади. Бундоқ ўйласа, уни жуда соғинибди, бир эслashiдаёқ кўзидан ёш чиқиб кетай деди. Диловархўжанинг ҳам болаларини соғинган фараз қилиб сўради:

— Болаларингизнинг чағир-чуғурини соғингандирсиз?

— Эсимни танибманки, соғиниш нималигини билмайман. Кўрсам, эсимга тушади-ю, икки кун узоқлашсам, ёдимдан кўтарилади.

Содиқ ажабланди: ўз боласини соғинмайдиган ота ҳам бўладими! Демак, у одам исини ёқтирмайди. Бу одам ҳатто ўз туқсан онасини ҳам соғинишга қобил эмас.

— Болаларингизга жабр бўлибди,— деди Содиқ бир уй болани кўз олдига келтиришга ҳаракат қилиб.

— Болалар... болалар... Болаларга нима! Бир кунини кўриб кетади. Менга жабр бўлди, менга! Эҳ, аттанг, бу томонларга келиб нима қилардим-а!

Содиқ бир маҳал ўқиган шарқ эртагини эслади. Табнат одамни яратганда, бундоқ қараса, янги ҳаёт кўрган мурғак учун кун жуда узун экан. Қисқартириш мақсадида унга уйқуни ҳамроҳ қилибди. У камолга етгандан кейин кўрса, бир уйқунинг ўзи инсон учун жуда кам, жуда зерикарли. У зерикмасин, егаи таомининг таъмини билсин, қадрига етсин деб меҳнатни буюрибди. Меҳнат унинг баҳрини очади, чиниқтиради. Ҳаётига маъно киргизади. Лекин бу ҳам у учун етарли эмас. Сўнгра унга қарши душманни яратибди. Душман эса унинг меҳнати самараларини ҳимоя қилишга мажбур этади, майдонга чақиради, курашга отлантиради. Ана шундан бери уйқу, меҳнат, душман инсоннинг ҳамроҳи эмиш. Тўғри, душмансиз ҳаёт йўқ. Лекин мен душманми? Тўғри, душманлик қилган кишиларим бор. Улар менинг-

гина эмас, бутун бир синфнинг, улкан бир жамиятнинг душманлари. Уларга қарши курашдим, кўп қатори ғалабам билан қувондим. Менинг бу курашим меҳнатимнинг олий тури эди: кураш — меҳнат, меҳнат — кураш! Наҳот энди мен ўша қарши курашганим кишилар сафига ўтиб қолсам. Ҳаммасидан ҳам Диловархўжанинг гапи алам қиласди: «Келадиган еримиз битта экану, жонингизни мунчалик жабборга бериб нима қилардингиз ўша йиллари!»

Диловархўжа қўлга тушган бўлса ҳам, шу ўтиридан мамнун. Бир маҳаллар номини эшилса бир чўчиб тушган «қизил командир» бугун у билан ёнма-ён ўтирибди, бир қозондан атала ичиб, бир ҳуштак билан ётиб туради. «Аслида у ҳам бизга ўхшаган шўроларга тоқати йўқ экану, замона зайди билан ёшлик қилиб, от, қилич, «урра»га қизиқиб юрган экан. Бўлмаса уни ҳукумат қармиди!» деб ўйласа керак.

Диловархўжа қўрбоши ўз фикрига якун ясагандек салмоқлади:

— Сизга ўхшаган ола ичимиздан чиқмаганда, балки...

— Сиз билан «битта-яримта ола» эмас, халқ курашган, бутун халқ. Халқ нима эканини биласизми? Довул! Ҳар қандай тўсиқни йўлидан олиб ташлашга қодир! Ҳали ичимиздан ола чиқиб енгилганимиз, деб юрибман дейг?

Диловархўжа бу сўзларга ишонмас, ишонгиси ҳам келмас эди. Унинг ўз фикри салкам йигирма йилдан бери тинчлик бермайди. Бу унинг метин ишончига айланган, бу фикрни занглашган михдек суғуриб олиш қийин.

— Ҳа, хўп, халқ курашган экан, ҳалқ билан бирга экансиз, нега энди бу ерда ўтирибсиз?

Содиқ неча ойдан бери ана шу саволга жавоб беролмай қийналар эди. Энди бунга нима десин. Туҳмат деса, ишонмайди. Тушунмовчилик деса, шунча вақт давом этадими?

Чиндан ҳам Диловархўжадан қўра, унга қийин эди. Қўрбоши қилган жиноятини билади, нимага ўтирганидаи хабардор. Лекин тақдирга тан бермайди: гоҳ онасига ёпишади, гоҳ қонуннинг узоқ кек сақлашига.

Содиқ-чи? Содиқ ҳайрон. Етти ухлаб тушига кирмаган айблар унга тақалялти. Рад этса, ҳеч ким ишонмайди.

ди. Ҳатто уни Диловархўжа қўрбошидан ҳам хавфли қилиб кўрсатишаپти. Ў онгсиэлигидан босмачи бўлган эмиш. Содиқ эса, онгли, олий маълумотли, атайнин шўроларга қарши курашга отланган ва курашини эсини танигандан бери тўхтатмаган ёт унсур, хавфли душман ҳамиш. Содиқ ҳаммасидан шунисига чидамас эди.

Дунёда ҳалок бўлишига иқрор кишидан тили ўткир ва узун одам бўлмайди. Диловархўжа худди шу аҳволда эди. У ҳеч нарсадан ҳайиқмас, бутун дардини тўкмоқда эди:

— Ҳаммамиз бир бўзнинг учи бўламиз, ука, бойкамбағал — нимаси, мусулмон-кофирин ажратиш керак. Дин оёқ ости бўлиб кетди. Бухоройи шарифдан нима қолди! Амир аркида болалар сигир боқиб юришганмиш. Ичимииздан ола чиқиб, «вой сочимни босиб олман!» дейдиган эркаклар кўпайиб кетди. Ўша вақтда ҳам «андоқ қилодурмиз, муndoқ қилодурмиз» дейдиган кўп эди. Вақти келганда ўнтаси битта пичоқقا соп бўлмайди. Кўрганман бу ҳезимкашларни, ошга қўли, гапга тили узун, холос. Менда битта бедана томоқ, соқоллиги бор эди, жадид. Сал ҳолимиз танг бўлиши билан «юмуши» чиқиб қолди, сичқоннинг инини ижарага олди. Улар тушида шер минади, ўнгидан мушукдан қўрқади. Сиз менинг гапларимдан ажабланманг, Содиқжон, мен ўлган қўйман. Ўлган қўй бўридан қўрқмайди. Ичимда йиғилиб ётганини айтипман. Ичимда қолиб кетганидан фойда йўқ. Ҳеч бўлмаса сиз эшитиб қолинг.

Чиндан ҳам у шунча йил ичидан, ҳатто ўзидан ҳам сир сақлаб келган, кимга айтишини билмай ёниб юрган, ҳеч кимга ишонмаган манфур фикрларини гапириб қолишга шошилаётган эди. Ў курашиб муродига етолмаган, яшириниб удалолмаган аламзада эди.

Содиқ уни қаттиқ қайриб ташлаши мумкин эди. Лекин нима фойда, бари бир унга кор қилмайди, қўндоқда теккан. Содиқ қанчалик ғижинмасин, қулоқ солишга мажбур бўлди. Бошқа жойда бўлганда-ю, ўзи биларди: гапирганига пушаймон қилдириб қўярди! Ўндан кейин, Содиқнинг тили қисиқ жойи ҳам бор: бирга, бир камерада ўтириби, ахир иштони йўқнинг тиззаси ийртиқдан кулишини қаранг, дейиши, жуда бўлмаганда, отдан тушсангиз ҳам, узангидан тушмас экансиз, иним, бу ер қизиллик қиласидан миңбар эмас, деб у ҳам қайриб ташлаши мумкин.

Содиқ Диловархўжанинг мўйловга ўхшаган кесларига боқди. Бу — чин душман. Отилишига кўзи етиб қолгандан бери Диловархўжанинг ичидагарса қолмади, ҳаммасини ахлат идишини ағдаргандек тўқди. Ичини бўшатиб, гўё кўнгли тинчилини. Бўш қолди дегунча, қуръон тиловат қиласи, намоз ўқийди. Жаҳли чиқса, жойнамоз хизматини ўтаб турган рўмолчасини бир четга улоқтириб қолади, ҳалигина укпари олинган уккидек кўзларининг шосоққасини ўйнатиб, бир нуқтага тикилади. Соатларча шундай ўтиради. Ана у ҳозир ҳам, жойига ўтира туриб, бароқ қошини асабий силаб қўйди.

Содиқ шу мўйловсифат қошларга қараб туриб, ўйга толди: қўрбошилигида бу қошларининг бир чимирилиши қанчадан-қанча одамнинг ёстиғини қуригандир!

Содиқ унинг қўрбошилик даврини, кийим-бошини, юриш-туришини ўзича тасаввур қилиб кўрди: бошда чақмоқ телпак, бурама қалин мўйловнинг учи қулоғи тагида, кўкрак очик, ёқасига пилта урилган яктак устидан беқасам тўн, белда қўш-қўш белбоғ, оёғида ағдarma, баланд пошна этик, қўлда кумуш қопланган иргай сопли қамчи. «Ҳайт!» деса, булутни нишон оладиган қорабайир доим эгарлоғлик. Минса қўш жиловдор ёнида. Чилим тутган бошқа-ю, май тутган бошқа. У соясида ўтирган дараҳтнинг шохига беижозат қуш қўнолмайди. У ўтирган ерда қадамлар санаб босилади. Ана шунда кўрсанг эди, бу қошларни! Энди бўлса чўлтоқ супургидек осилиб ётибди.

Содиқ ана шуларни ўйлаб, ўзини унга тенг кўрилганига, у билан бир дараҳтнинг меваси ҳисобланганига чидомлади. Фазаб билан туфуриб, ўрнидан туриб кетди.

— Оғир бўлинг, Содиқжон, сизни отишаётгани йўқку,— деди Диловархўжа.

— Нимамга отади, қайси қилган жиноятимга отади!!

— Агар мен Шўро ҳукумати бўлсам, сизни бундай камерага қўйиш эмас, бу ерга отингизнинг гўнгини тўктирмас эдим. Ҳар мўйингизга бир гавҳар осардим. Буларнинг ана шуниси биз аламзадаларга ёқади. Ғумай билан буғдоїга чақ-аралаш ўроқ солади.

Диловархўжа жилмайиб қўйди, чўтири юзлари йилтиллади, дўнг пешанаси остидаги қаттиқ кўзлари қисилди.

Содиқ бир нарса дейишдан ожиз эди...

Уч кун ўтгандан кейин Диловархўжани судга чақирдилар. Қечқурун унинг ўрин-бошларини сўраб олдилар. Содиқ ҳукм чиқибди, деб ўйлаб, уни отилганга чиқарди. Лекин раҳми келмади.

5. ЎЛГАННИНГ УСТИГА ТЕПГАН...

Сокинликнинг ҳам ўз товуши бор. Бунинг нималигиги қалин деворли, темир эшикли, дераза ўрнида кичик туйнукли камерада ўтирган одамгина яхши билади, бу шунаقا товушки, қулоғингдан зинғиллаб ўтиб, бутун асабларингни қақшатиб, қалбингга электр токидек чирсиллаб тегиб туради.

Тун. Эртага баҳор байрами. Ариқлар лаби барра ўт, бинафшалар ўтган йилдан қолган қуруқ шохлар остидан мунчоқ кўзларини йилтиллатиб тургандир. Ё шўх болалар байрамга олиб чиқамиз деб, териб кетишдимкан? Эртагача яна бодроқдек очилиб қолади. Лола ҳам чиққандир. Қизил гул-чи? Қизил майдон роса ясатилгандир. Кўчалар-чи?

Содиқ шундай хаёллар оғушида ўтирганида, ўзининг қаердалиги ёдига тушиб қолди-ю, уҳ тортди. Ўтиришга сабри чидамай, ўрнидан туриб, асабий бир тарзда у ёқдан-бу ёққа юра бошлади. Кейин яна ўтири. Ташқарига қулоқ солди. Ҳар товуш уни қизиқтирас эди: маъносини англамаса ҳам, инсон товуши қулоғига кириб турса бас. У шундай диққат билан қулоқ солардики, гўё ўзига таниш йўл ёқасидаги дараҳтларда тунаган қушларнинг ҳам юрак уришини эшитишга қодирдек кўринарди. Эрталаб уйғонса байрам овозаси ҳамма ёқни тутган — кўчаларга катта радиокарнайлар қўйилган бўлса керак. Баъзан ўткинчиларнинг товуши эшитилиб қолади. Кишилар шоду хандон. Юртда, жонажон шаҳарда байрам. Бу байрамни шаҳридек севарди у. Ҳозир ўғлини кўтариб, бир қучоқ гул билан Қизил майдондан ўтмасмиди!

Радиодан гоҳ музика янграйди, гоҳ шиор. Парад бошланди. Аскарларнинг шаҳдам қадамидан кейин, тақларнинг ерни ларзага солган гулдуроси эшитилди. Кейин жимлик. Кейин бирдан яна оркестр янгради. Болалар товуши кўчаларни тўлдириди. Эҳтимол, унинг мактаби ўтаётгандир. Одатда, мактабини ўзи бошлаб ўтарди. Купдалик ҳаёти ва байрамини мактабсиз тасаввуди.

вур қилолмас эди. Ўртоқлари: «Онанг мактабда туқ-қанми?»— деб кулишарди, Содиқ эса: «Мен туғилган чоқда мактаб анқонинг уруғи, китоблар бизга ўхшаганларга гапирмас эди»,— деб мамнун жавоб берарди. Қани ўша кунлар? Тушмиди бари? Кишилар унинг ҳақида пима дейишаётганикин?

Ҳамон радио янграйди. Шу радио қаерда экан? Қайси күчада? Нега аввал уни ҳеч эшитмапти! Бу күчалардан кўп ўтар эди-ку!. Ҳаво яхши. Одамлар роса ясанишгандир. Мушарраф нима кийдийкин? Онам-чи? Марат, Маратжон-чи? Унга бирор байрам совфаси олиб беришдимикин? Ёки бўз кўйлакка садаф тугма ярашмас деб, уйда диққат бўлиб ўтиришибдими? Шундай қилишган бўлса яхшимас! Нега хафа бўлишади, эрта-индин чиқиб боради-ку. Мушарраф ўз қилмишларига роса пушаймон бўлаётгандир. Эркалаб боқилган текис ерда қоқилар, деб шуни айтади. Майли, унга сабоқ бўлди, энди қатиқни ҳам пулаб ичади.

Кўлда юрган қўнғир гоз чўл қадрини билмайди.
Чўлда юрган тувалоқ кўл қадрини билмайди.

Жуда тўғри айтилган. Эй, тентак, тикан бўлиб оёққа киргунча, гул бўлиб ёқага санчилгин эди! Энди нима бўлди! Изимга зордир.

Содиқ ҳамон ўзи-ўзи билан гаплашар, гоҳ онасининг қариганда, қора кунга қолганидан ўкинар, гоҳ ёлғиз ўғлини соғиниб, хўрлиги келар, гоҳ Мушаррафнинг енгилтакликларини кечириб, инсофга чақирап, кўргиси келар, гоҳ Қодирга гап тегиб қолишини ўйлар эди. Ташқарида эса, Биринчи Май байрамининг шукуҳини радио карнайлари оламга таратмоқда.

Бугун байрам, шунинг учун бу ердагиларга прогулка йўқ. Содиқнинг кўнгли алланечук бўлиб кетди. У севган юрт, у севган кишилар байрам қиласди, лекин унга халқ байрами куни йигирма минутлик прогулкани ҳам раво кўрмайдилар.

Содиқ қанча ёниб-куймасин, унинг игнаси синик, или узун эди.

* * *

Содиқнинг тергови тугади. Лекин унинг на «советларга қарши фаолияти», на «яширин ташкилотга аъзолиги» исбот этилди.

Шу куни передача олди. Палов, ёғлиқ патир, қанд, пиёз ва беш думалоқ маҳорка. Ичида бирор нарса яшимаганниң, деб патир ушатилган, пиёз кесилган эди. Содиқ дунёнинг шунчалик нозу неъмати борлигини илк марта кўраётган кишидек бақрайиб қолди. Дами қайтиб қолган паловнинг тотли ҳиди димофини ёриб юборгудек анқир, оғзининг сувини тийиб ололмас эди. Ошдан нафаси бир оз ором олгач маҳорканинг нимага киритилганини билмай қолди. «Диққинафас бўлганда чекар, хуморини тарқатар!» деб киритишган. Бу кимнинг фикри экан: онамнингми ёки Мушаррафнинг?

Содиқ шуларни ўйлар экан, хаёли ўргатилган каштардек ўз уйига, хонадонига учди, улар билан ғойибона сұхбат қурди. Сұхбат қурди-ю, уларнинг Содиққа эмас, Содиқнинг уларга раҳми келди: онаси ориқлаб кетган. Сочининг битта ҳам қораси қолмаган. Юзининг ажини яна ҳам чуқурлашган, ёнига янгилари қўшилган. Мушарраф ҳам хафа, «қылмишларимга минг бор пушаймонман» деб узр сўрайди. Марат эса, юриб кетган, парвойи фалак. Ёғоч от миниб, ҳовлини гир айланади. Чапаев бўлиб, ёвни қиради. Қодир уйда йўқ. Кутубхонада дарс тайёрлаётган бўлса керак.

— Маҳоркадан бир чекайлик, биродар.

Ҳамхоналарига маҳорка таклиф қилиш Содиқнинг эсига келмаган экан. Чувалиб кетган хаёлинин йиғиб, уч бўлагини бўлиб олинглар, деб узатди. Ўзи ҳам ўраб чекди. Бадани яйрагандек бўлди. Маҳорканинг шунчалик «каромати» борини энди сезиши! Шундай ҳузур нарсадан бебаҳра бўлиб юрганидан ажабланди. Босиб-босиб тортди. Ярим соатлардан кейин хумори тутиб, яна чекди, кечга яқин яна чекди... Кўзи бироннинг чеканига тушса, қўли маҳоркага югарди. Урганди!

Чекишга ҳеч нарса қолмай, хумори тутиб ўтирган кунларнинг бирида Содиқни юқорига чақириб қолишиди. Қайси кўз билан кўрсинки, Чуханов кабинетида Мушарраф ўтирибди. Уни ёлғиз кўриши билан юраги орқасига тортиб кетди.

— Марат қани? Соғми?

— Соғ-саломат,— деди бўшгина қилиб Мушарраф.

— Нега олиб келмадин? Ойим қани? Тинчликми?

Мушарраф жавобини учинчи саволдан бошлаб, биринчисига жавоб бермади:

— Тинчлик. Бирдан рухсат бериб қолиши. Ойингизни олиб келомадим.

Нега «ойимни» демасдан, «ойингизни» дейди, уйдан кетиб қолган шекилли, деб ўйлади Содиқ.

— Уйдамисан?

— Ҳа, уйда. Кўрган куним қурсин.

— Нима, ойим билан уришдингми?

Мушарраф асл мақсадига замин тайёрлаб, ёлғон тўқиди:

— Гулим кетди, тиканим ундан нари, дейдилар нуқул. Марат билан иккаламизни кўргани кўзлари йўқ.

— Йўғ-э!— онасининг феълинни билган Содиқ ишонмади.

— Кўзингиз билан кўриб, қулогингиз билан эшитмагандан кейин ишонмайсиз-да. Қачон менга ишонувдингиз...

Содиқ ўзи қамалгандан кейин унинг куйиб эт йўқотганини ёки руҳий азоб чекканини кўрсатадиган бирорта белги тополмади. «Олдин куйгану, кейин тақдирга тан бериб, ўзини тутиб олган, ёш эмасми!» деган фикр билан ўзини босди Содиқ. Лекин Мушарраф, нима учундир, Содиқнинг юзига тикилиб боқолмас, нимадир ичини тиранаётгандек нуқул кафтларини бир-бирининг орасига олиб уқаларди.

— Қийналиб қолгандирсизлар. Ишлаяпсанми?

— Ким мени ишга олар эди, ҳалқ душманининг хотинини!

— А?

— Ҳамма ўртоқларингиз юз ўғириб кетган. Мирсалим-ку...

— Нима, Мирсалим?

Терговчи Чуханов уларнинг сўзини узди:

— Ўз оиласвий ишинглардан гаплашинглар. Беш минут қолди.

Мушарраф терговчининг сўзини ўзига берилган танбеҳ ҳисоблаб, асл мақсадга кўчди:

— Менинг... сизнинг олдингизга киришимнинг... киришимдан мақсад... менинг талоғимни беринг.

Содиқ ўз қулоқларига ишонмай, ағрайиб қолди. Мушарраф пипагини бузмай ўтиради. Демак, бу фикрини

чийраб, пишитиб кирган, деди Содиқ кўнглида, ё бирор-таси ўргатдими?

Бу кутилмаган гапдан Содиқни совуқ тер босди, кафтигача совиб кетди.

— Менга қара, — деди у,— мен сени зўрлаб олганим йўқ эди, зўрлаб ҳам хотин қилмайман. Лекин шартим бор.

Боядан бери ерга қараб ўтирган Мушарраф ярқ этиб унга кўзини тикди. Содиқ унга кўзини бигиз қилиб қадади:

— Шартим шуки, болани ташлаб кетасан.

— Ҳаққингиз йўқ! Бола онанини.

— Йўқ, ҳақим бор. Ўгай отаникига етаклаб боришингни истамайман. Онамда қолдир! Гап шу!— Содиқ терговчига боқди:— Мени жойимга тушириб юборишингизни сўрайман.

Содиқ ўрнидан қўзғалди. Мушарраф ҳам иргиб турди:

— Йўқ, менинг жавобимни бериб кетасан! Менга сендақа ҳалқ душмани керак эмас!! Сен билан турмайман! Жавобимни бер! Жавобимни бериб кет!

— Жавобинг ўзингда, шарт ўша!— оғирлик билан деди Содиқ.

— Йўқ, болани бермайман. Энди қайтиб келмайдиган бўлганингиздан кейин ўглингизни... ўғлимнинг қаерда бўлишининг сизга қанчалик фарқи бор.

— Қайтиб келаманми, йўқми, энди бунинг сенга даҳли йўқ. Талоғингни олдингми, кетавер.

Мушаррафнинг талоқ сўраб келиши Содиқ учун дарз косанинг синишидек бўлди. Лекин Маратнинг тақдирни хаёлидан кетмай қолди.

...Янги ойнинг бошида тергов бўлими Содиқни чақириб, маҳсус кенгашнинг қарорини ўқиб эшилтириди. У ўн йилга ҳукм этилган эди!

«Ҳақиқат эўлдир эмас, нишабга думаласа, у қирғиң қўнмас қиядан ҳам ўз жойини топади!» — деди Содиқ ишонч билан ўзига-ўзи.

6. МУШАРРАФНИНГ ҲИРСИ

Содиқ воқеасининг бутун даҳшатини Мушарраф учкуидан кейин билди.

Бошига тушган тақдир гурзисининг нақадар оғир эканини ҳис этди. Дилснёҳликка йўл қўйган онлари

учун ачиниб ўқинди. Энди Содиқнинг оёқлариға йиқилиб узр сўрашга тайёр эди-ю, лекин Содиқнинг ўзи йўқ, сўзи йўқ, кўзи йўқ эди.

Мушарраф бир ҳафта ичидаги озиб-тўзиб кетди, атирупа, улама соч ордона қолди, баланд пошна амиркон этик, атлас лозим эсига келмади. Ҳар куни кечаси билан хаёлнинг минг бир кўчасига кириб чиқади, баъзан ёлғиз ётгани қўрқиб, Адолат холани олиб кириб ётади.

Шунда ҳаёт тазиқларнни кўп кўраверниб, продаси пишиб кетган Адолат хола далда беради:

— Балога сабр, қазога шукур керак, жон болам. Узингизни ўтга, сувга урганингизнинг нафи йўқ. Содиқ-жонгинам, игна топса эгасига топширмагунча кўнгли тинчимайдиган ҳалол йигит эди. Чиқиб қолади. Тушимда раҳматли дадаси от эгарлаб юрибдилар. Манг, Маратжонни эмизинг, жуда қорни очиб кетди.

— Бир оз совий, терлаб турибман.

Адолат хола куни билан қўлидан қўймаган арзанда неварасини онасига узатиб, ўрнидан турди. Нима иш биландир, Содиқнинг хонасига кирди-ю, унинг қозиқдаги чуст дўпписига кўзи тушди. Тобутга ёпилган чопонни кўрган кишидек алланечук бўлиб кетди. Содиқ уни ҳар куни ишдан қайтганда киймасмиди! Дам олиш кунику, бошидан қўймас эди. Қани ўша ўғил! Ёлғизгина фарзандини соғингандир. Ўзи саломатмикин? Очин-тўқин қолмаётганимикин?

Хола дўппини қозиқдан олди, тоза бўлишига қарамай қоқди, ўглининг иси келадигандек бурнига тутиб ҳидлади. Гўдаклигидан ўзига таниш Содиқнинг исидан роҳат қилаётгандек кўзини юмди, очганида ёши дув тўкилди:

— Ишқилиб, ўзинг келиб кийгин, болагинам!

Мушарраф эртасига Собирахоннинг мактабига борди. Унинг баҳтига Собирахон ўзида экан. Уни «ҳа, синглим, суюнган толинг омонат экан», деб ачингандек кутиб олди. Лекин очиляб гаплашмади, кеча қаттиқ чарчаб, бугун бўшашиб ўтирган кишидек бир-икки эснади, ниманидир столи ғаладонидан қидирди, сиёҳдоннинг қопқогини ёпиб қўйди. Мушарраф унинг «кел, синглим, аҳволларинг яхшими, эрингдан дарак борми?» дейишини кутарди — ахир опа-сингил тутинган-ку. Лекин Собирахон бундай қилмади, ҳамон нима биландир паришонҳол шуғулланарди, «қўли тегмас» эди.

— Собирахон опа,— деб гап бошлади Мушарраф-нинг ўзи — отпускада юриб бўлдим, энди ишимни бошласам.

Собирахон шуни аллақачон кутган, жавобини ҳам тайёрлаб қўйган кишидек оҳиста унга қаради. Унинг кўзлари Мушаррафга бегонага ўхшаб кўринди.

— Ие, ҳали хабаринг йўқми, мен сени биласан деб юрибман. Ўз ҳисобингдан неча ойга отпускага чиқувдинг? Ҳа-а,— деди Собирахон ясама хаёл суреб,— айтмовдимми? У штат қисқариб кетган.

Гапнинг тубига тушунмаган Мушарраф:

— Яқингинада кимдир ишлаб юрувди шекилли!— деди.

— Ҳа, кечаги ҳафта қирқишиди. Шунча қилдим бўлмади.

— Вой...— бўшашибди Мушарраф,— энди нима қилдим? Бир томони рўзгор...

Собирахоннинг «Билмасам, ўзинг биласан» дейишга тили бормади, «фалончига учраш» деса, ўзикни ёлғон гапириб, четлатиб турган ҳалқ душманининг хотинини бошқа одам пешонасини силармиди! Баҳона топди:

— Мен бир сурнштириб кўрай, бирор иш топармиз.

— Шундай қилинг, опажон!— ёлворди Мушарраф.

Собирахоннинг сўзига ишонган Мушарраф бир ой ичида икки-уч хабар олди. Ишдан дарак бўлмади, Собирахон «йўқ» демас, нуқул ваъда берарди, бироннинг олдида бўлса, ҳўмрайиброқ, ҳеч ким бўлмаса, сал дилхушлик билан гаплашарди. Шундай қатнашларнинг бирида бир аёл ўқитувчи уни четга имлади. Мушарраф қулоғини тутган эди, у аёл:

— Овора бўлманг, синглим, Собирахон истаса ўрнингиз жойида турибди,— деди. Мушаррафга ҳамма нарса ойдин бўлди-қўйди: демак Собирахон ҳам қора қозондан ўзини четга олиб қочяпти!

Мушарраф бутун гапни Адолат холага айтди.

— Банда қисса маломат, худо қиссин саломат, жон болам. Қиши ёэсиз бўлмайди, бу кунлар ҳам ўтиб кетади, олақарғанинг қағиллагани қолади,— деди Адолат хола келинига чой узатаётуб,— олинг, бир пиёла чой билан икки бурда нон еб олинг, дармон бўлади. Кўчадаги гап-сўзга ҳадеб куйиб-ёнаверманг, дўст куйиб га-

пирса, душман ошириб гапиради. Бирорта кўр бўлғурнинг иғвосига қолди болам бечора! Сиз ҳаммадан хафа бўлаверманг, доим ёмондан яхши кўп, ҳаромдан ҳалол. Ичиди бизга ёчиниб, «жабр бўлди» деб юрганлар қанчайикин! Тили билан айтишга ҳайиқса, нима қилсин, бечоралар!

Ана шундай тили билан ҳам айтишга ҳайиқмайдиганлардан бири — Икром ота шу куни кечқурун эшик қоқиб келиб қолди. Эшик очган Қодир билан қуюқ сўрашди-да, ичкарига кирди, кўрсатилган ерга ўтириб, ҳол-аҳволларини сўради. Содиқни тилга олиб, «АЗамат, покдомон йигит эди!» деб қўйди. Анча гапдан кейин Адолат холага пича пул узатди:

— Содиқжондан олган эдим, вақтида жамғариб беролмадим,— деди узр сўраган бир тарзда.

— Бирорда оласим бор демовди-ку, ё сизга айтувдими, Мушаррафхон? — деди Адолат хола хижолат тортиб.

— Йўқ, йўқ! Менда бор эди, келганда ўзидан сўрарсиз,— яна шошиб изоҳга кирниши Икром ота. Гапни чалғитди:— Ишга кирмоқчи экансиз, келин, мен бир жой билан гаплашган эдим, хўп десангиз, эртага бориб учрашинг, кичик қизим ўша ерда ишлайди.

Икром ота қаерда ва қанақа иш эканини батафсил айтиб берди. Ўрнидан туар экан, Содиқнинг девордаги суратига қараб «қарчифай эди» деб қўйди яна. Кейин Содиқнинг чиқишини аниқ биладиган, бунга сира гумони йўқ кишидек ишонч билан далда бериб кетди.

Мушарраф эртасига Икром ота айтган ерга бориб учрашди ва ишга кирди.

Иш Мушаррафни овутгандек, сўнгсиз мудҳиш ўйлар гирдобидан четга олиб, нафасини ростлагандек бўлди. Вақт қалбидағи аччик алам изтиробларини аста-секин елга совуриб, ўрнини яшаш иштиёқи билан тўлдириб бормоқда эди. Бора-бора эрининг қамалишига кўнишканидек, номини эшитсагина бир энтикиб, бошқа вақтда хаёлига ҳам келтирмай, ҳаётнинг кенг оғушига кириб кетди. Ўйнинг аллақайси бурчагида ётган улама соч яна юзага чиқди, аста-секин упа-элик асл ҳолига келди, қошга ўсма, кўзга сурма тортилди, кўйлак кунига алмаштирилиб, навбат баланд пошна амиркон этиккача бориб етди. Айниқса баҳор табиатнигина эмас, эри қамалгандан бери сокин уйқуга кирган Мушаррафнинг

ҳис-туйғуларини ҳам уйғотди, этига эт, ҳуснiga ҳусн қўшди. Керишса эрининг қучоғини соғиниб, кўзлари сузиладиган бўлди.

Бир дам олиш куни эрталаб Икром отанинг Мушарраф билан бирга ишлайдиган кенжা қизи келди. Ойисининг тайинлаб юборганини айтиб, Адолат холани олиб кетмоқчи бўлди:

— Юриңг! Ойимлар «холанг диққинафас бўлиб ўтиргандирлар, гаплашиб ётиб кетсинлар» дедилар. Юриңг! Уйда ҳеч ким йўқ, дадамлар аммамларникига қишлоққа кетганлар.

Уни Мушарраф қувватлади:

— Боринг, уйда ўтира бериб сиқилиб кетдингиз, бағрингизга шамол тегиб келади.

Ўтган ҳафта ҳам Икром отаникidan одам келганда Адолат хола: «Ҳа, жон болам, менга ўйнаб-кулишини ким қўйибди»,— деб рад этган эди. Шунда уларнинг кўнгли анча олинганини кейинчалик Мушаррафдан эшишган эди. Шунинг учун холанинг қанчалик боргиси келмаса ҳам, йўлга тушди.

— Сиз уйдан хавотир олманг, ҳеч қаёққа бормаймиз,— деди Мушарраф Қодирни ҳам қўшиб. Айвонда дарс тайёрлаб ўтирган Қодир бошини кўтариб тасдиқлади:

— Ҳа, уйдаман. Ишим кўп!

— Уйда бўл, жон болам, ҳувиллатиб чиқиб кетма, кенинйинг чўчийди,— деди Адолат хола неварасини ўпиди хайрлашар экан.— Сен ҳам тўполон қилмай ўтиргин!

Мушарраф Адолат хола йўлга чиқмасидан олдиноқ бошини ювмоқчи бўлиб қатиқ чаплаб қўйған эди, у кетгач ювгани ўтирди. Қодир айвонда ўз машғулоти билан банд, бир вақт бошини чертёжидан кўтариб қараса, кенинйиси ярим тўшини очиб, кир ўра оғзида бошини ювяпти, эти жимиirlаб кетди. Кенинйиси сезиб қолса, хижолат тортишидан ҳайнқиб, ҳовли томонга ёнини қилиб олди. Унинг бу ҳаракатини фаҳмлаган Мушарраф, кўкраги ярим очиқ, сочини охирги марта жомга шалоп-шалоп солиб чайқар ва қўли билан сувини сидирадар экан, эркакнинг ҳавасини келтирадиган бир оҳангда деди:

— Қодиржон, соч ўришни биласизми? Билиб қўйниг, Азизахон келганда керак бўлади,

— Акам сизникини ўармидилар? — деди Қодир ҳазил тушуниб.

— Акангиз ўришдан кўра кечаси силашни яхши кўрар эдилар. Ё сиз ҳам шунаقا қиласизми?

Қодир охирги жумла ўзигами ёки Азизагами тегизиб айтилганини ажратолмаган бўлса ҳамки, қулоғигача қизариб кетди.

Мушарраф сочини ҳўл тараб, бошига омонатгина рўмолча билан танғиб қўйгач, уйга ўтар экан, деди:

— Бошини ювгандан кейин хотин кишининг сочини ҳеч ҳидлаганмисиз? Хушбўй бўлади шекилли-да, акангиз яхши кўрардилар. Сиз-чи? Ёмон кўрмассиз! Ё ёмон кўрасизми?

Қодир индамади. Мушарраф уйга ўтиб кетди. Ойна олдида ўзига оро бериб, сочини таради, пардоз қилди. Чаккасидаги майда соч толаларини эринмасдан жингалак қилди. Юпқа ҳарир кўйлагини кийди, ўзини ойнага солиб кўрди, шундоқ ҳам бутун кўксига ҳусн бахш этиб, тирсиллаб турган тўшини остидан кўтариб янада бўрттириб боқди, улама сочини серкиллатиб, уйнинг у бошиндан бу бошига юрди, ойнадан ўзини кузатди. Кейин ҳовлига чиқиб, иш билан юрган кишидек Қодирнинг олдиндан бир-икки у ёқ-бу ёққа сатанг юриш қилиб ўтди. Адолат хола тушда қозон осганидан Мушарраф кечқурунга чой қайнатиб қўя қолди. Қодирни таклиф этди. У қоронги тушиб қолганидан чертёжни йигиб, китоб мутолаа қиларди. Кеннойисининг таклифига икки марта: «Ҳозир! Ҳозир», деди-ю, китобдан бошини кўтартмади. Мушаррафга худди шу керак бўлгандек, бўйдоқларнинг ҳирсини уйғотадиган бир мақомда юриб борди. Қодирнинг ўқиётган китобини кўрмоқчи бўлган кишидек, орқа томондан ўтиб, атири анқитиб туриб:

— Китобингиз муҳаббат тўғрисида шекилли, бошингизни кўтаролмай қолдингиз — деди. Қодир китобини келган ерида шарт ёпиб, ўрнидан турди, дастурхонга юрди.

Мушарраф гоҳ қошини, гоҳ кўзини сузуб, унинг орқасидан гапириб борар эди, унинг нозу карашмаси ҳатто товушидан ҳам сезилиб турарди.

— Дунё шунаقا экан, Қодиржон, йигит қиз деб, қиз йигит деб ўларкан. Қариганда бунаقا бўлмас-а?

— Билмасам, қариб кўрганим йўқ,— деди нохушлик билан Қодир.

— Қарилик қурсин! Ёшликка не етсин! Ёшсиз, ўйнаб қолинг, айш қилинг. Кейинги афсус бекор. Азизахон билан тез-тез учрашиб турасизми? Акангиз бунаقا бўлиб кетмаганларида шу кунда тўй ҳаракатига тушиб қолармидик. Баҳордагиси яхши бўлади.

— Ўқишини тутгатмагунча...

Мушарраф Қодирнинг сўзини бўлди, чой узатди:

— Яна уч йил! Унгача зерикиб қоларсиз.

Қодир жавоб қайтаришга ийманиб, ноң тишлади.

— Сиз эркакларга маза! Айшингизни қилиб юрсангиз бирор биллиб ўтирибдими, мисқоли камаядими! Азизахонга қийин, қиз бола...

Аёл билагини ушлаб бирор марта хилватга тортмаган тажрибасиз Қодир Мушаррафнинг бу гапларини яхши фаҳмламас, фаҳмлаганда ҳам нима қиласди. Бегона маски, «кет, бетинг қурсин», деб силтаб ташласа! Ундан кейин, кенойисининг оғзи бачканалигини билади, бу ҳақда акаси неча марта койиганини эшитган. Гапирадиган оғиз уники экан, Қодирга нима, вайсай бермайдими! Шунинг учун у наридан-бери чойни ичиб, туриб кетди. Мушарраф эса, унинг ҳар бир ҳаракатини очкўзлик билан кузатар, бақувват билакларига суқланниб боқар эди. Баҳор қонини ўйнатиб, кўзини тиндириб, ҳатто донлашиб юрган бир жуфт мусича ҳам унинг ҳавасини келтиради...

Кеч кирди. Үфқ анордек қизарди. Том четига келиб қўнган «Адолат холанинг мусичаси» бирдан қувалашиб, Мушарраф рўпарасида тарс-тарс тепишиди, «Ачомлашиб ўйнасанглар-чи, жувонмарглар», — деб ўтиб кетди у.

«Бўйдоқнинг ақли икки кўзида бўлади, айниқса, баҳор кези. Жон дейди. Нега жон демасин! Қимдан камлигим бор. Бир ўргатиб олсаму... Бирор биллиб ўтирибдими!» — деди Мушарраф ўрнига кириб ётгач, уйқуси ўчиб. Эти увшандек, ширин керишиб ўрнидан турди. Унинг вужуди ўт бўлиб ёнар, юраги эшитилгудек гурсгурс урар эди. Дераза олдига келиб, Қодир ётган уйга кўз ташлади. Чироғи ўчган. «Қачон ётибди? Нега чироғи ўчганини билмадим? Сезди. Атайин чироғини барвақт ўчирди. Бало!» — ўйлади Мушарраф ва ҳирс билан ҳовлига чиқди. Кўча эшикдан хабар олмоқчи бўлиб, Қодирнинг уйига қулоқ солди. Жимжит. «Пойлаб ётибди», деб ўйлади, яна бадани жимирлаб кетди. У ўғридек оёқ учida бориб, Қодир ётган уйнинг эшигини аста

очди. Шиппагини шу ерда ечиб, ичкарига яланг оёқ кирди. Қодир ҳеч нарсадан хабари йўқ, бемалол ухлаб ётарди. Деразадан тушган ой ёруғи унинг азamat кўкрагини ёритарди. Қодирни жўрттага ўзини уйқуга солиб ётибди, деб гумон қилган Мушарраф ҳирс тўлғофида титраб бориб, чўғ бўлиб ёнган лабларини унинг лабига босиб, жон-жаҳди билан қулоқлади. Чўчиб уйғонган Қодирни еб қўйгудек бўлиб, дер эди:

— Мен... мен, Қодиржон... Ўзим айланай! Жоним қоқиндиқ... Ҳеч кимга айтмайман...

Қодир иргиб ўрнидан туриб ўтирди. Мушарраф ҳамон унга ёпишиб, «мен... мен... ўзим айланай!» дерди, дир-дир титрар эди. Қодир шошиб қолган, тилига сўз келмас эди. Номус кучи билан кеннойисини итариб ташлаб, ҳовлига ўқдек отилди. Салдан кейин кўча эшигининг очилиб-ёпилгани эшитилди.

Мушарраф турган ерида қотиб қолган эди. Бир томондан муродига етолмагани алам қилса, иккинчи томондан кўз олдига қайнанаси лип-лип келар эди. Ҳаммасидан ҳам мақсадига етолмаганига чидолмас эди, йиғлаб юборди, ўзини Қодирнинг каравотига зарб билан отди!

Эрталаб у ишига кетгуннча, «яхши ётиб-турдингларми?» деб етиб келган қайнанасига Қодирдан гинахонлик қилди;

— Ўғлингизнинг борадиган жойлари бор экан, шунча қилсан ҳам мени ёлғиз ташлаб кетдилар. Кечаси қўрқиб ўлдим.

Нима дейишими билмаган Қодир:

— Ҳа, сизга айтиш эсимдан чиққан экан, ойи, бормасам бўлмайдиган иш эди!— деди дудуқланиб. Мушарраф эса, «қойил қилдимми!» дегандек унга кўз қирини ташлаб қўйди.

Ўз тадбирининг муваффақиятли чиққанидан қувонган Мушарраф ишига жўнади. Кечқурун шошиб келиб, наридан-бери овқатланиб, «мажлисим бор» деб пардозандоз билан чиқиб кетди. Уч кун ўтгач яна... Келинининг авзойи бузуқлигини сезган хола ётиғи билан насиҳат қилган эди:

— Ўѓа тиқилиб ўл, дейсизми!— деди.

Хола гапни бошқа ёқдан айлантириб келиб, этини ўлдирмоқчи бўлди:

— Майли, болам, ёшсиз, ўйнаб-кулсангиз ярашади,

уйда тухум босиб ўтириинг демайман. Лекин болангизга жабр бўляпти. Очин-тўкин қоляпти. Баъзи болаларга ўхшаб берганни еб кетавермаса.

— Ҳа, ҳеч нарса қилмайди!

— Ундаи бўлса кўкракдан ажратиб қўя қолинг, зора овқатга ўрганса.

— Ҳалиям шундай қилмоқчиман, ҳамманинг жони ўзига керак: кундузи ишласам, кечаси бу сўрса!

— Майли болам, лекин сал ҳақи бор эди ҳали.

— Ҳақи!.. Ҳақи!.. Ўлар бўлсам ўлдим. Қеч қолсам сиз хўмраясиз, мажлисига бормасам идора...— деди Мушарраф ва бу ишлардан жуда норози кишидек косани товоққа, чойнакни пиёлага уриб, дастурхонни наридан-бери йиғиштириди-да, уйига кириб кетди. Ярим соатлардан кейин қайнанадан сўров йўқ, истов йўқ улама сочини серкиллатиб кўчага чиқиб кетди. Тун оғганда қайтди. Эшик тиқиллаганини Адолат хола эшитса ҳам, атанин алламаҳалгача «сарғайиб ўл!» деб очмади. Буни пайқаган Мушарраф эшикдан кириши билан ўдағайлади:

— Нега мунча тош қотиб ухламасаларинг.

— Ҳа, уйқу ўликка тенг, болам,— деди элагини тешиб кетган сичқонга ҳам озор бермайдиган Адолат хола.

Мушарраф қия очилган эшикдан ёнбошлаб кирав экан, ичкиликнинг аччиқ, қўлансанда ҳиди Адолат холанинг димоғини ёргудек анқиб кетди. Холанинг сабр коғаси тўлиб, уйга киришгач, деди:

— Ичиб турган ошимга кўз ёшларим тўкилгани етмасмиди, келин! Бу нима қилиқ? Уятмасми!!

— Именинада эдим, ичмасам қўйишмади.

Адслат хола унинг изоҳига муҳтоҷ эмас эди, у неварасини бағрига босганича олиб чиқиб кетди. Мушарраф ҳам астойдил «қаёққа олиб кетяпсиз?» демади. Шу кундан бошлаб Мушарраф бошвоғини қайнанаси қўлидан бўшатиб олди. Бу ҳам етмаганидек, «аллакимлар»нинг маслаҳати билан Содиқнинг олдига талоғини сўраб кирди.

Бегона эркакнинг қўлидан унинг бадани сесканмайдиган бўлиб қолган эди.

Уч ойдан кейин Мушарраф Азиза практикада бўлган касалхонага уни йўқлаб бориб қолди. Азиза уйидан кетгандан бери Мушаррафни кўрмаган, фақат Қодир

орқали бу әиланинг бошига тушган баҳтсизликдан ха-
бардор эди. У Мушаррафни очиқ юз билан кутиб олди,
лекин пардозини кўриб ҳайрон бўлди: наҳот бошига қо-
ра кун тушган хотин шунаقا юрса!

Азиза Мушаррафга яхшилаб назар солди: ўзини
ҳам олдирмапти, фақат қовоқларининг остида халтум
ва чуқур чизик пайдо бўлибди. У Азизани бир чеккага
бошлаб ўтди. Жилпанглаб кулиб қўйди.

Азизанинг ғаши келиб, сўради:

— Иш билан келганмидингиз?

— Аввалам сизни соғиндим, кейин... кейин бир мас-
лаҳатли ишим ҳам бор эди...

— Марҳамат!

— Айбга қўшмайсиз...— Мушарраф уялганга ўхша-
са ҳам, лекин енгилтаклик билан жилпанглашини қўй-
мас эди,— Содиқ акангиз унаقا бўлган кезлари гумо-
ним бор эди. Қаттиқ куйганимдан ўсмай қолди шекил-
ли, мана энди яна сезяпман. Шуни бир нарса қилсан
девдим.

Азизанинг суриштиришидан шу нарса маълум бўл-
дики, Мушарраф Содиққа тақаётган бола у айтгандан
кўра ёш, бунинг устига Азизанинг қулоғига кирган гап-
лар унинг гумонини тасдиқларди. Шундай бўлса ҳам
таниш докторини илтимос қилиб, унга Мушаррафни
кўрсатди. Доктор очиқ айтиб қўя қолди.

— Бола иккӣ-икки ярим ойлик.

Бу ошкора гап Мушаррафни Азиза кутганидек шо-
шириб қўймади, ишшайиб қўя қолди. Бу ишшайиш Ази-
занинг шунчалик нафратини қўзғадики, ҳайдаб чиқари-
шига сал қолди. Бу етмагандек Мушарраф:

— Энди нима қилдик, Азизахон? — деб қолди,— ёр-
дам беринг.

— Нимага? — деди Азиза ўзини аранг босиб,— биз-
да abort қилинмайди.

— Таниш-билишингиз бордир. Хафа қилмасман,
хизмати учун мана шу билагузугимни берардим.

Бу сўз ёниб турган оловга қўйилган бир челак мой
бўлди, Азизани тирноғигача ларзага келтириди:

— Дадасига берсангиз, abortчи ҳам топиб беради!
Уятсиз! Шарманда!

Бир ҳафтадан кейин шаҳарнинг кам қатнов кўчала-
ридан бирида хотин кишининг мурдаси топилди; ҳамма

ҳайрон: қўлида қўшбилигузук, сумкасида анчагина пул.
Бирор ери чақа бўлмаган.

Кейинчалик экспертиза аниқлашича, шу атрофда кимдир уйида яширинча аборт қилган. Ҳомиладор абортдан омон чиқмагач, кечаси ўлигини кўчага чиқарип ташлаган.

Бу Мушарраф эди.

7. «СИЗНИ ДЕГАНИМ ДЕГАН, ҚОДИРЖОН АКА!»

Мирсалим қизининг ташлаб кетганига сира чидолмас эди!

Аввал у Азизанинг бунчалик кўнгли қаттиқ деб ўйламаган, ёлғиз ота-онасига раҳми келади, қиз боши билан қаёққа ҳам боради, бугун биронта ўртоғи ёки қариндошиникида ётиб қолса, эртага сувга тушган мушукдек бошини эгиб кириб келади, деб ўйлаган эди. Шунинг учун ортиқ тацвишланмасдан, ҳатто хотини у чиқиб кетгач, қўз ёши билан:

— Дод, бу қандай ноинсофлик! Қайтаринг-чи, қайтаринг! — деб ёлворганда ҳам пинагини бузмаганди. Ҳаммадан унга Азизанинг: «Қўрқасизми? Амалдан тушиб қоласизми?» — дегани алам қиласар, ўз қизининг, яккаю ёлғиз қизининг оғзидан чиққан бу сўз унинг энг позик ерига бориб теккан.

— Қизингнинг томони бўлсанг, сен ҳам бор кетидан, бор! Менга бунақа қиз керак эмас! — деб туриб олди. Айвон четида турган човгумни тепиб юборди, қозиқда илиғлиқ турган сочиқни олиб ерга отди, уйга кириб кетди. Лекин уйда ўтиромлади. Бошини қаёққа уришни билмас, уйнинг шифти паст ва ўзи торга ўхшар, ҳаво етишмасдан бўғилаётгандек безовталанаар эди. Бир ерда ўтиришга сабри чидамас эди. Агар шу чоқ Азиза эшикдан кириб келса, яна ҳайдаб юборишга тайёр эди. Наҳот шу гапларни ўз қизи, бино қўйиб, пуф-пуфлаган қизи айтган бўлса!

Вақт ўтган сари Мирсалим совиб, аслига қайтди, лекин Азизанинг сўзи ва шиддат билан эшикдан чиқиб кетиши қўз олдидан кетмади.

Қизининг феълини эридан кўра яхши билган хотини туни билан йиғлаб чиқди, тиқ этса қулоги эшикда бўлди, ҳатто шифтнинг қаериладидир сичқоннинг қитирлати-

ши ҳам әшикнинг тақиллашига ўхшаб эшилди. Эрига бир оғиз сўз демади. Эрталаб нонуштасини дастурхонга қўйиб, ўзи ўтирумади.

Мирсалим унинг хотинлигига бориб ортиқча ташвишланишига парво қилмай, ишига кетди. Келгунича Азизанинг уйнда бўлишига шубҳа қилмас эди. Лекин у уйга қайтганда Азизанинг ўзини эмас, у юборган хабарни эшилди: у бундан кейин институт ётоғида яшар эмиш!

Бу Мирсалим учун кутилмаган янгилик эди. Қизининг бунчалик бир сўзлигига энди ишонгандек бўлди, жаҳл устида ёнида турган хотинини:

— Мана, ўстирган арзандангнинг қилгани! — деб тарсаки билан қўйиб юборди. Кутилмаган тарсакидан гангиган хотин ҳатто йиғлашини ҳам билмай:

— Урмай қўлингиз синсин! — деди чаккасини ушлаб. Унинг юзида шапалоқнинг изи қолган эди.

Мирсалим қизининг кетиб қолганидан кўра, маҳалла-кўйининг таънасидан кўпроқ қўрқар эди. Эртага биттаси чиқиб, «битта қизини эплаб ололмаган одам, директор бўлиб қаёққа борди!» дейиши мумкин. Шу гап маорифда қўзгаб қолса борми, унда, вассалом!

У шу пайт қизини ўнинчи сиифни битиргандан кейин уйга ўтқазиб қўймагани, жойи чиққанда оёқ-қўлни боғлаб бўлса ҳам эрга бериб юбормаганидан пушаймон бўлди. «Ўқисин, ўғил ўрнини босадиган қиз», деганларнинг ҳаммасини минг балога гирифтор қилиб қарғади, пайти келганда ўч олишни кўнглига туғиб қўйди. Улар дўстлигидан эмас, гўё шундай куннинг унинг бошига тушишини олдиндан билиб, атайнин қўйини пуч ёнгоққа тўлдириган бўлиб кўрниарди.

Энди нима қилди? «Узоқлик қилди, ётоқда ётиб ўқијати» деса, кишилар ишонармикин? Қерак бўлса бундан ҳам яхши важ-карсон топади. Лекин Азизанинг тилини боғлаб қўёлмайди. Уйини, ота-онасини ташлаб кетган қиздан ҳар нарсани кутиш мумкин. Олдини олиш керак!

Чора топди: «Онасини юбориш керак. Бу лаънати-ларнинг тили битта. Йиғлаб-сиқтаса қайтиб келишга унаши мумкин».

Азиза онасини қучоқлаб қарши олди, бир оз кўз ёши ҳам қилишди. Лекин уйга қайтмаслигини қатъий айтди:

— Албатта, ота безорилик яхши эмас. Лекин бошқа

иложим йўқ. Бир томондан, билмаган эканиман, ётоқ яхши, дарс тайёрлашга қулай экан.

Қиз онасининг оғир аҳволда қолганини яхши фаҳмлар, унга жабр бўлганидан хафа эди. Не чораки бошқа йўл тутиши эса, виждонини қийнар, қорани оқ, ёлғонни рост, совуқни иссиқ деб ўзини алдаш бўлар эди. Бу онасининг қийналишидан ҳам оғир бўлар эди. Шунинг учун онасини қуchoқлаб:

— Ойижон! Мен сиздан хафа эмасман. Келиб туринг, соғинтириб қўйманг,— деди.

— Даданг мени тириклайн гўрга тиқади-ку, қизим, бу йўлингдан қайт! Қайси ота қизини койимапти!

— Бу койиш эмас, ойижон, ҳақорат, остида катта гап бор. Қодирни севганим ёки у ёмон одам бўлгани учун эмас, ўзининг амалини, нафсини қизғаниб, мендан узоқлатмоқчи. Бундан ўтар пастлик борми! Агар Қодир ёмон бўлиб, мен уни фаҳмламай юрган бўлсам, дадамнинг бу гапига раҳмат дердим. Ҳозир Қодирнинг қандай аҳволда эканини билсангиз эди! Бу гапларни мен унга билдирганим йўқ, билдириб ҳам бўлмайди. Унга шу кунларда мадад бўлмаган киши дўстми? Йўқ! Қодир ҳалол йигит! Қўнглингиз мендан тўқ бўлсин!

Қизининг жавоби узил-кесил эканига ишонган она бўшашиб уйига қайтди. Эрига юмшатиб: «ётоққа келиб қолдим, энди беш-үн кун турга турай, дарс тайёрлашга яхши бўлар экан» деяпти деб етказди. Мирсалим бу жавобга унча ишонмаса-да, бир оз кўнгли таскин топди. Демак, Азиза одамларга ҳам шундай дейди, бу жавоб эса, Мирсалимни гап-сўз бўлишдан асрайди. Лекин Мирсалим бир ҳафтадан кейин яна куз ҳавосидай бирдан айнаб қолди; кўнглига бир фикр келди: Азизанинг Қодирдан узил-кесил умидини узиб қайтариб келтирадиган бирдан-бир йўл — Қодирни институтдан ҳайдатиш. Шунда у лаънатидан кўнгли совииди.

Мирсалимга бу фикр жуда ёқиб кетди, ўзининг ақлига қойил қолиб, «қичқир хўрозим»ни ғинғиллаганича уйга кириб кетди. Қуриб қолган сиёҳдонга сув қўйди, қофозни найча қилиб, учи билан сиёҳдонни ковлаштириди. Ним ранггина сиёҳ бўлди. Олдинига «шу ҳам яхши. Сиёҳга кам иши тушадиган меҳнаткаш одам ёзибди». деб ўйлайди, кўнглидан ўтказди у, кейин қуриганда яна ҳам рангсиз бўлиб, ўқиш қийинлашувидан қўрқиб, бинифаша ранг қаламдан тарашлаб солди, ҳалиги қофоз

найча билан аралаштири. Яхши эрисин, дегандек, бир оз қўйиб берди, яна «қичқир хўрозим»ни хиргойи қилиб, уйнинг у бошидан бу бошига юрди. Ўз суратининг нақшин рамкасига ўтирган чангни қўли билан артиб, «ёшликда ҳам чакки бўлмаган эканман, телпакни чаккага қўндиришни кўр!» деб фахрланди, йўқ мўйловини силаб қўйди. Деразадан ҳовлига қаради. Хотини ўзича ниманидир пичирлаб, ивирсиб юрибди. Қизи кетгандан бери шунаقا ўзи билан ўзи пичирлаб гаплашадиган бўлиб қолган, баъзан ёнидаги киши bemalol эштадиган қилиб ҳам сўзлаб юборади. Мирсалим хотинининг бу аҳволи қаттиқ хафалигидан эканини билса ҳам, бирон марта кўнглини кўтариб қўймайди, икки оғиз ширин сўзини хайф кўради.

У сиёҳни яна бир аралаштириб, ўтириб ёзишга киришди. У ҳаммага маълум дастхати билан эмас, уни бузиб, ҳарфларга турли шокилалар улаб, бошқа томонга қийшайтириб ёзар эди. Хат Қодир Қўчқоров халқ душмани Содиқ Қўчқоровнинг туғишган укаси экани, бир ҳовлида туриб, бир қозондан ош еб, бир чойнакдан чой ичгани, унинг ҳам «севимли Шўро ҳукуматимизга» хайриҳоҳ эмаслиги тўғрисида борар эди. «Бундай ёт унсурнинг қўли қадоқ, чопони ямоқ меҳнаткаш халқ болалари билан бир партада ўтириб ўқиши биз соғ виждонли кишиларни ажаблантиради. Бундай унсурга билим ўчиқларимизда ўрин бўлмаслиги керак!!!» деган сўзлар билан тамомланди.

Мирсалим хатни қайта ўқиркан, ўзи заковатига қойил қолиб, ишшайиб қўйди, эҳтиёт билан буклаб, конвертга солди. Бирор йўлда очса сезиладиган қилиб, яхшилаб елимлади. Устига Қодир ўқийдиган институтнинг адресини ёзиб, директор номига юборди.

Бир ҳафтадан кейин Қодирни институт директори чақирди. У юраги орқасига тортиб кириб борди. У директор билан ҳеч вақт қамти келмаган, фақат кўрганинагина салом бериб ўтарди. Кабинетда директордан ташқари яна ўқув ишлари бўйича ўринбосари, декан, комсомол комитетининг секретари ва Қодир лавозими ни билмайдиган яна икки киши ўтиради.

Қодир ўртада тўхтади. Гапни директорнинг ўзи бошлади:

— Бизга маълумот тушди. Шуни аниқламоқчимиз. Содиқ Қўчқоров сизга ким бўлади?

Қодирнинг юраги «шув» этиб кетди:

- Акам.
- Туғишганми?
- Ҳа.
- Ҳозир қаерда?
- Қамоқда.

Комсомол комитетининг секретари орага суқилди:
— Нега шу вақтгача яшириб келдингиз?

Директор унга, мен ҳали саволимни тугатганим йўқ эди-ку, дегандек норизо қараб қўйди.

Қодир бундай савол тушишини аллақачон кутган ва бунга жавоб ҳозирлаб қўйган эди:

— Ўртоқ Сталин бола ота учун, ука ака учун жавобгар эмас, деган.

— Мен сиздан ким ким учун жавобгар эканлигини сўраётганим йўқ, нима учун институт коллективидан яшириб келдингиз?

Секретарнинг баланд келиши Қодирни чўктирди, тоvuши титради:

- Яширганим йўқ.
- Бу яшириш бўлмай, нима?
- Ҳеч ким сўрамаса, кимга айтаман.

— Хабар қилсангиз, албатта, яхши бўларди,— деди директор вазмин бир тарзда ва секретарь томонга «Сиздан катталар ҳам бор бу ерда, кўп шаталоқ отаверманг», дегандай назар ташлаб, бошқаларнинг ҳам ўз фикрига диққатини тортди.— Эҳтимол, сиз атайин бекитиб келмагандирсиз. Лекин натижаси яширганга ўхшаб қолибди, шундай деб шубҳа қилишга ўтирганларнинг ҳақи бор.

Фамхўрлик билан бошланган бу салмоқли гап ўпкаси тўлиб турган Қодирнинг тик бошини эгди, қўзига ёш қўйди. Директор ундан яна оиласига доир саволлар сўраб бўлгач, деканга юзланди:

— Қандай ўқийди? Ахлоқи?

— Үқиши аъло, одоби ҳам яхши, аммо мана шу томони сал яхши бўлмапти-да...— деди тил чайнаб декан. Студентлар ичida «Ажойиб одам, студентнинг устига төр қулласа тутиб қолади», деб шуҳрат топган деканнинг бундай латта чайнаши, ҳатто суюб турган директор томонига ўтишга ҳам юраги бетламаётгани Қодирнинг ихлосини қайтарди.

Комсомол комитетининг секретари сўз олиб, Қодир-

га шунақа сифатлар бердики, Қодирнинг ўзи ҳам «гап менинг ҳақимда кетяптими?» деб ёқа ушлаб қолди. Охири секретарь институтдан ҳайдашни талаб қилди. Декан яна эзмаланиб, гапни айлантириб-айлантириб секретарнинг таклифига қўшилганга ўхшаш мужмал бир хулоса чиқарди.

Энг сўнг Қодирнинг ўзига сўз берилди, лекин у шунчалик шошиб қолган эдик, дилидаги гапини тузатиб айтиб беролмади. Ўқишни жони-дилидан севишини, иккни йил армияда шуни ўйлаб куни-тунини ўтказганини айтиб, йиғлаб юборди, ўқиша қолдиришларини ялиниб илтимос қилди.

Директор ўринидан туриб, кабинетининг ўртасига тушди. Бошини қуи эгиб, ёшини маржон қилиб тўкаётган йигитга оталарча қараб қўйди. Бошини кўтариб ёшини артиб қўйиш кўнглидан ўтган бўлса ҳам, журъат этмади. Олдига бориб, елкасидан сал ушлаб, чиқиб кетавериши мумкинлигини айтди.

Қодир эшикни орқасидан ёпар экан, «тамом бўлдим, ўқиш ҳам ўлди» деб кўнглидан ўтказди. Трамвайга тушса юраги сиқилиб кетадигандек пиёда жўнади... Уйига етиб боргунича ҳаммасини муҳокама қилди: акасининг қамалганидан тортиб, Азиза билан бўладиган бундан кейинги муносабатигача, институтга киришга ариза беришдан тортиб, ҳайдалиши (наҳотки!), ундан кейин қиласидан, қилиши мумкин бўлган ишигача — ҳаммасини бир-бир ўйлади, тарозига солди, ўлчади, қирқди. Лекин ҳайдалиши ҳақида буйруқ чиққунча, ҳатто буйруқ чиққандан кейин ҳам ўқишга қатнай бермоқчи бўлди. Барибири шу институтга бир куни яна киради, уни битиради, бу унинг аҳди, орзуси.

Қодир эртасига барвақт келиб, буйруқ ва эълонлар ёпиштириладиган тахтага югурди. У ерда ҳеч нарса йўқ, эртасига ҳам, индинига ҳам ҳеч нарса чиқмади. Лекин ҳафтанинг бошида чиққан деворий газетада унинг пўстаги тоза қоқилган эди. Унинг аудиторияда хўмрайиб ўтиришидан тоғтиб, кутубхонанинг китобини атайлаб кечикиб топширишигача, ўз биографиясини яшириб, халқ душмани акаси билан ҳамон алоқа тутишигача тилга олинган эди. Студентлар ёпирилиб ўқир, бир-бираига пичирлаб нималарни дир тушунтиришар, яна бошқатдан ўқишар эди. Қодир газета олдида туролмади, ташқарига чиқиб кетди. Қасалга ўхшаб уйига

қайтди. Бир ҳафта ётиб қолди. Тузалиб, институтга келганда, унинг ҳайдалгани ҳақидаги буйруқнинг бир чети аллақачон йиртилган, ўтган-кетганинг шамоли уни ҳилпиратарди.

* * *

Азиза билан ҳамётоқ бир қизнинг олдига ўртоқлари келишди. Улар ҳам студентлар экан. Гапдан гап чиқиб, қизлар институтларида кечагина бўлиб ўтган воқеани сўзлашиб қолишиди. Бир студентни аввал деворий газетада дўппослашибди, кейин комсомолдан ўчириб, институтдан ҳайдашибди!

— Жуда қобилиятли студент эди! — деди бири.

— Боодоблиги-чи! — деди бошқаси.

— Совуқ ҳам мевали дараҳтни уради, — деди Азизанинг ҳамётоғи нотаниш студентга ачиниб. — Ҳимоя қилмадингларми, аммамнинг бузоғидай кўзларингни лўқ қилиб туравердиларингми!

— Акаси халқ душмани экан, — деди биринчи қиз.

— Ёнига тушганлар ҳам бўлди, — деди бошқаси.

«Халқ душмани» сўзи қизнинг ҳам нафасини ичига тушириб юборди. Лекин бу гаплар Азизанинг юрагига ташвиш солди, ўзини босиб сўради:

— Ким деган?

— Қўчқоров. Исмини билмадим. Сен биласанми? — шериги ҳам исмини билмади.

— Қўчқоров? — деди ўз қулоқларига ишонмай Азиза, тирноғигача музлаб. — Йўғ-э! Акаси қамалган бўлса, унга нима!

— Сиз уни танийсизми? — деди қизлардан бири.

Азизанинг қулоғи остида тўўпонча отилгандек том битган, ҳеч нарсани эшиитмас эди. Меҳмон қизлар кетгач, у ҳамётоғига аста:

— Фамилияси Қўчқоров бўлса Қодир-да, — деди оғир касалдан энди турган кишидек инқиллаб.

— Йўғ-э, бошқадир! — деди ҳамётоғи Азизани хафа қилгиси келмасдан.

— Кошки эди! Лекин юрагим сезишича, ўша!

Азиза соатига қаради. Ҳамма ерда машғулот тугаган. «Қодир қаерда экан? Бошига шундай оғир кун тушса-ю, мен бехабар қолсам! Нега ўзи ҳам айтмади, ёки «энди нима қилдик?» деб келмади? Қизиқ! Е бошқа Қўчқоровмикин? Бошқадир! У бўлса келарди, дардини

ўртоқлашарди! Йўқ, у эмас! Бошқа, нотаниш одам!» — деб ўйлади Азиза ва ўша нотаниш студентга ҳам ачинди. «Бечора! Энди нима қилади? Наҳот одамлар бирбираига шунақа бераҳм: акаси учун укасини ўқишидан маҳрум қилишса! Наҳотки, ёмоннинг укаси ёки ўғли, қизи ҳам ёмон бўлса! Бу жуда ғалати-ку! Ноинсофлик, бағритошлик-ку! Бундай бўлмаслиги керак. Кишиларга ишониш, эртасидан умидвор бўлиш керак. Ахир инсон балиқ эмаски, зўравони ожизини ютиб, ҳаёт кечира!»

Хаёли узоқларга қанотлаб кетиб, қалбига тушган ташвишни сал унутган Азиза, яна бир оздан кейин қаттиқ безовталаниб қолди: унинг юрагига ташвиш солган студент бегона эмас, ўз кишиси, ўз севиклиси Қодир! Юраги шундай дерди.

— Мен билан бирга бўлсангиз,— деди ҳамётоқ дугонасига. У Қодирниги бормоқчи, эшикни ўзи тақиллатгани уялиб, у қиздан илтимос қилмоқчи эди. Қиз рози бўлди. Лекин бу режаси Азизанинг ўзига жуда эриш кўриниб кетди: «Наҳот шундай пайтда ҳам уятни тиқиб қўйган бўлса!» деб ўйлади ва ўзи ёлғиз боришга қарор қилди.

— Майли, кечирасиз, ўзим бораман,— деди у ва эшикка ўқдек отилди.

Бу шахти Қодирларниги яқинлашган сари пуфакдек бўшаган бўлса ҳам, анча дадиллик билан эшик қоқди. У Қодирнинг ўзи чиқишини истарди. Йўқ, Адолат хола кўриниш берди:

— Келинг, болам?

Азиза салом бериб, елкасини тутди. У дардини қанақа қилиб айтишни билмай турган эди, «Ким, ойи?»— деб Қодирнинг ўзи чиқиб қолди.

Азизанинг эшик қоқиб келишига мажбур этган нарса нима эканини дарров тушунган Қодир:

— Ойи, мен ҳозир келаман!— деганича Азизанинг олдига тушди.

— Вой, ичкарига кирмадингиз-а, қизим, чой тайёр эди!— деганича Адолат хола қолаверди.

Иккиси ёнма-ён борар, иккисидан ҳам нидо чиқмас эди. Қодир шу ҳафта ичидаёқ сўлиб тушган, кўзларида аввалги чақнаш, юришларида дадиллик, туришида фурур йўқ. Хаёл ва ташвиш билан ўтган шу кунлар унинг қадам олишидан тортиб, нигоҳ ташлашигача — ҳамма-

сигача ўз тамғасини босган. Гүё ўзга бир олам кишиси бўлиб қолган эди. Ҳаётдан ўз улушини олишга қодир, шу улушки умидидан қайтмаган, лекин шу умидини қандай қилиб рўёбга чиқариш дардида ёнаётган азamat бир вужуд Азизанинг ёнида борарди. Бу вужуд бутун қалби, куч-қуввати, орзу-эҳтироси билан истиқбол ишқида ёнарди, унга ўз ҳиссасини ҳалоллик билан қўшиш иштиёқида эди. Лекин интилиш йўлида тўсиқ пайдо бўлган, бу тўсиқ уни вақтинча тўхтатган, лекин кетидан қайтармаган ва қайтаролмас эди.

Бунинг барчасини ақли билан кўриб, қалби билан сезиб бораётган Азиза тафсилотини сўрашга ботинмади... Фақат бу кўнгилсиз воқеани ўзидан сир сақлаганинг сабабини билмоқчи бўлди:

— Нега мендан яширдингиз, Қодир? Ишонмадингизми? Қўрқдингизми?

— Йўқ, Азиза, яширмадим, яширадиган ери йўқ. Ишнинг бунчалик терс бўлиб кетишини ўзим ҳам кутмаган эдим. Гангиб қолдим. Кейин сизнинг ўз ташвишингиз ўзингизга етади. Қўйинг, ўзимникини ўзим тортай! Сизга теккан касрим ҳам етади.

— Йўқ, шундай эмас! Демак менинг елкамга тушган оғирликдан еизнинг белингиз қайнитмаган экан-да, мендан яширасиз!

— Йўқ, Азиза, сиз тўғри тушунинг! Фараз қилайлик, мен сизга барчасини айтдим, аламингизга алам қўшдим, бирга хафа бўлдик. Хўш, бундан нима чиқади, менинг ишим ўнгланмайди-ку. Шунинг учун жилла бўлмаса, биттамиз ортиқча ташвишдан холи бўлиб турайлиқ, дедим. Бошқа мақсадим йўқ.

— Шундай қилсан әшитмайди, деб ўйладингизми?

— ...Киши ташвишли хабарни кечроқ әшитгани яхши!— деди Қодир ўзини зўрлаб кулиб.

Улар қаерга боришларини аниқ билишмас, кўз тушиб, оёқ юрган томонга кетишмоқда эди. Олдиларидан хиёбон чиқиши билан Қодир, шу ерга ўтирмаймизми, деган маънода:

— Қаёққа кетяпмиз?—деди.

Азиза индамади. Қодир бошлаган томонга юриб, четроқдаги скамейкага ўтиришди. Бу ерда одам кам, ўткінчилар сийрак. Даражат орасидаги чироқлар ҳўл ўтининг оловидек нурсиз.

Азизани Қодирнинг жавоблари қаноатлантирумада, бу воқеанинг остида бошқа бир сир борга ўхшаб туюларди. Акс ҳолда наҳотки, шунча воқеа бўлсаю, бир марта дардлашгани бормаса! Тўғри, Азиза ётоққа келгандан бери улар кам ваъдалашиб учрашар, Қодир ўзи истаган пайтида кириб келаверар эди. Азиза ой сари оғирлашаётган дарси билан бўлиб, Қодирнинг сўнгги ҳафта ичидаганини ҳам унутган экан. Ё шундан хафа бўлиб, ўзинг хабар олмадинг демоқчими? Ҳар ҳолда унинг юрагида нимадир бор. Буни Азиза билиши керак. У гапни асосий масаладан бошлади:

— Энди нима қилмоқчисиз?

— Нима қилардим: ишлайман, ойимни боқаман. Иш ҳам топиб қўйдим.

— Дарров-а? Қаердан?

— Нима, азасини тутишим керакмиди? Қўшни райондаги МТСдан. Электро-механик вазифаси бор экан. Кимман, қанақаман — ҳамасини директорига айтдим. «Бизга яхши ишласангиз бўлди», — деди. Оғир-енгилни кўрган одамга ўхшайди.

— Энди ўқишдан умидингизни уздингизми?

— Мен-ку, узганим йўқ... Ким билади тағин... Бу тўзонли шамол ўтсин-чи!

— Ҳеч кимга учрашмадингизми!

— Кимга учрашаман? Аввал акамнинг иши бир ёқлик бўлсин.

— Кесворган дейишади-ку!

— Кесишга кесган. Сигир қора сут беради деса, ишонаман, лекин акамнинг сиёсий жинояти борига ишонмайман. Мутлақо ишонмайман! Жиноятчи эмас, покиза киши томонида эканимдан, виждан азоби тортаётганим йўқ. Фақат ноҳақликнинг оқсоқ оёри бунчалик тез юришидан ҳайратдаман. Лекин буни ҳам бирорга айтиб бўлмайди. Мана шуниси оғир!

Улар узоқ ўтириб қолишидп. Тун қоронғилиги чироқлар рангини равшанлаштируди. Ўткинчилар сийраклашди. Қўршапалак чарх уриб, дараҳтлар орасида изғийди, куттимаган чаққонлик билан шохлар орасидан шўнғиб чиқиб қолди. «Қалдирғочдай чаққон-ку, нега кишилар уни ёқтиришмас экан, а? Кечаси учгани учунми?» Азиза қўршапалакни кўзидан қочирмай, изидан кузатиб турди. Йўқ, имкони бўлмади, иккинчиси унинг кўзини чалғитиб кетди.

— Азиза,— деди Қодир кафтларини бир-бирига ёпишириб, икки тиззаси орасига қисар экан, ерга қараб,— бу нарсалар ҳаммаси ўтиб кетади, ҳақ жойини қачондир толади. Лекин...

Азиза ялт этиб унга қаради.

— Азиза, очигини айтайми? Сиздан хавотирим бор. Сиздан ажралиб қолиш олдида бу ташвишлар барни...

— Нима деяпсиз, Қодиржон ака?

— Йўқ, Азиза, мендан яширманг. Энди мени сизга тенг эмасман. Сиз уч йилдан кейин врач бўласиз? Менчи, мен... Йўқ, мени қўйинг! Ҳозир бўлмаса ҳам, бари бир бир куни ўкинасиз, яхшиси ҳозир орани очиб... Кейин менга жуда оғир бўлади, ҳозир чидайман, шунча қийинчилликлар орасида ўтиб кетади.

— Менга қаранг, нима деяпсиз?

— Азиза, шунда тўғри бўлади. Барни бир кейин армон қиласиз.

— Ҳой, сизга бир нарса бўлдими? Бирсдан бирор гап эшитдингизми?

— Йўқ, эшитганим йўқ! Ахир бу кўриниб турган нарса-ку, Азиза.

— Хали шунинг учун сендан четда юрибман, денг!

— Рост, яширмайман. Буйруқ институтдан ҳайдалишим учун эмас, сиздан ажралиш учун чиққаига ўхшайди, шу буйруқ билан ҳамма нарса тамом бўлди, Азиза...

Қиз унга ўгирилиб, бирдан елкасига қўлинни ташлади.

— Қодиржон ака,— деди у,— мен сизни инженер бўлишингизни эмас, ўзингизни яхши кўрганман. Сизни деганман, сизни дейман ўла-ўлгунимча.

— Ростми? Ростданми, Азиза?

— Рост, Қодиржон ака! Сизни деганим деган!!

Қодир кўзида ёш билан Азизани бағрига босди.

Азиза бу гал унинг бағридан чиқиб қочмоқчи эмас эди.

Қодир билан Азизанинг муҳаббати чийланган ипга ўхшарди, узаман деганинг қўлинни қийса қиярдики, узилмас эди!

Кўршапалак ҳамон дараҳтлар орасида чарх уради. Тун ойдин, ёруғ...

Бир ҳафтадан кейин Азиза касал бўлиб қолди. Унинг касалхонада ётганини эшитган Қодир нафаси оғзига тиқилиб етиб борганда, кўричакни операция қилиб бўлишган экан. Ранги ўчиб кириб борган Қодирни Азиза табассум билан қарши олди:

— Яхшиман, қутулдим,— деди ва севган кишисининг бунчалик куйиб кириб келганидан боши осмонга етди. Чиндан ҳам Қодир жуда қўрқиб кетган эди. Шунинг учун ҳадеганда тилига сўз келмади. Азизанинг қон қочган юзлари ҳамон ташвишда.

— Ўзингизни анча олдириб қўйибсиз,— деди.

— Енгил бўлса ҳам операция-да!— яна кулди Азиза,— уч-тўрт кунда оёққа туриб қоламан.

— Мен эртага яна келаман.

— Овора бўлманг, Қодир ака, бир-икки кун ўткизиб келсангиз ҳам бўлади. Яхшиман, руҳим енгил, ойимлар келиб-кетдилар. Хабар олиб турадилар.

— Дадангиз-чи, келдиларми?

— Йўқ. Қўли тегармиди у кишининг, амалларига птур етади!— «орамизни биласиз-ку», дегандек Қодирнинг кафтидаги қўлини сиқиб қўйди.

Қодирнинг узоқ ўтиргиси келса ҳам, ҳамшира «бўлди, касални уринтируманг», деб қаршилик билдириди. Ночор қолган Қодир муҳаббатдан маст, хомуш кўзларини Азизадан узолмай, зўрға ташқарига чиққанда бирдан Мирсалимга рўбарў келиб қолди. Қодирнинг кимнинг олдидан чиқиб келаётганини яхши билган Мирсалимнинг тепа сочи тикка бўлди. У кейинги вақтларда пайдо бўлган димоғ билан, Қодирни менсимаган бир оҳангда:

— Сиз бу ерда нима қилиб юрибсиз?— деди. Қодирга гапининг ана шу оҳангни жуда малол келди. «Минг қилса ҳам Азизанинг отаси» деб турган эди, кейин бирдан андишани шартта йиғишириб, унинг ўз оҳангига жавоб қайтарди:

— Мен сиздан сўрамоқчи эдим, сиз нима қилиб юрибсиз?

— Мен қизимни кўргани...

— Мен ҳам севган кишимдан хабар олгани келдим!

— Биласизми, йигитча, бу тентакликни қўйсангиз, Азиза сизнинг тенғингиз эмас.

— Қачондан бери? Акам қамалмасдан илгари ҳам шунақамиди?

Мирсалимга бу таъна тикан бўлиб ботди, зардаси қайнади:

— Акам... акам! Аканг нима? Акангнинг кимлигини билдик! Гап шу: оёғингни тий!

— Азиза келма, демас экан, оёғимни тиймайман!

— Йўқ, унинг ихтиёри менда: отасиман!

— Амалим деб уни ўйдан ҳайдаган отасисиз-да!
Мен сизни яхши танийман.

Қодир нозик жойидан олган эди. Мирсалим шошиб қолди:

— Мен уни қувганим йўқ, ўқишга қулай деб ўзи ётоққа кетган.

— Шунақами! Жуда яхши жавоб топиб қўйибсиз-ку! Уялинг оқни қора дегани! Бўлмаса сиз ҳам билиб қўйинг: Азиза сизнинг қизингиз бўлгани билан ихтиёри ўзида. Мен уни, у мени севади — қўлингиздан нима келса шунни қилишингиз мумкин, осмон қўлингизда бўлса ташлаб юборниг.

Қодир шу гапни айтди-ю, шарт бурнилиб чиқиб кетди. Қўлида пакетини қучоқлаганча Мирсалим қолаверди.

У учрашишнинг бунчаликка бориб етишини кутмаган эди: у хивич ҳисоблаб юрган Қодирнинг эгиб бўлмас йўғон чинор эканидан ҳайратда қолди. Қодирнинг сўзлари унга шунақа алам қилдики, Азизанинг олдига киришдан ҳам воз кечиб, қўлидаги совғасини ерга урдида, орқасига қайтди:

— Бундан бешбаттар бўл.

8. МАРАТНИНГ АЯСИ

Нима бўлди-ю, Жаннатнинг йўли шаҳарнинг бу томонига тушиб қолди.

Куз. Дарахтларнинг мўрт бўлиб қолган тилла ранг япроқлари сал шамол билан дув тўкилади. Юқори шохлари аллақачон яланфоч бўлиб бўлган, уларга низомнинг укфа иплари илинган.

Ҳаво яхши, илиқ. Эрталаблари сал салқин бўлмаса, кундузлари «чивинсиз ёз»— эрталаб кийган кийиминг тушга бориб оғирлик қилиб қолади. Ҳозир айни туш

чоғи бўлганидан Жаннат жакетини билагига солиб олган. Аввалгидан сал тўлишган юзлари бўғриқсан кўринади.

Ҳа, у ўзини тутиб олган. Гарчанд Содиққа «Ўзингизни қийнаманг, мен рози» деб, уйланишига розилик берган бўлса ҳам, бу ўртада Мушаррафнинг дарров тиқилиб қолиши, ҳадемай ҳомиладор бўлиб ҳамма ёққа овоза тарқатиб юбориши Жаннатга пишмаган патани ёришдек азоб берди. Шундан кейин бу уйда туролмади, энди орқа эшикдан кириб-чиқиб юриш ҳам унга малол келиб қолди. Бунинг устига, бир куни Мушаррафнинг Содиқ билан бўлган кўнгилсиз тўқнашувига, тўғриси, жанжалига беихтиёр гувоҳ бўлиб қолди. «Оҳ, бечора эрим, кўмир деб оловни чангллаган экансан»,— деб юраги ачиди. У Содиқни ҳамон астойдил севарди. Унинг озор чекишига асти чидамас эди. Адолат холанинг «жон болам, энди сиз қизимсиз, қаёққа борасиз, рухсат бермайман», дейишига қарамай, кўчиб кетди. Гарчанд «келиб тураман, ойи, сиздан бошқа кимим бор бу шаҳарда» деган бўлса ҳам, кейинчалик келолмади. Мушаррафдан ҳайиқди. «Ўзи жанжални пулга сотиб оладиган, лаби юпқагина экан, тағин кўнглига бошқа нарсалар келиб тинчлигимни бузаётган кундошим деб юрмасин», деган андиша билан келмади. Соғинчини, ала-мини ичига ютди. Бу орада Мушаррафнинг кўзи ёриди, Содиқнинг оғзи қулоғига етиб, қувониб юрди. Бунинг ҳаммасини орқаворатдан эшитиб, Содиқнинг орзуси ушалганидан ғойибона севинган бўлса ҳам, юрагининг аллақаерини совуқ шамол елпиб кетди, бадани зирқиради. Ўша зирқирашни инсоф кучи билан енгиб, «ҳа, майли, дунёда битта бахтсизнинг камайгани яхши», деди ичидা.

Лекин Содиқнинг бу кечиккан бахти узоққа чўзилмай, баҳорнинг мунавар кунларида бирдан бўралаб қор ёққанидай, унинг бошига кутилмаган қора кун тушди. Етти ухлаб тушига қирмаган бу воқеа Жаннатни шошириб қўйди, сабабини билмай гангради. Ахир уни Жаннатдан ортиқ ким яхши билади! Содиқ баъзи эр-каклар сингари ишларини «бу аёллар иши эмас, улар билмаса ҳам бўлади», деб ундан сир тутмас, балки ошкора ўртоқлашар, маслаҳатлашар эди. Ёки Жаннатдан кейин бирор ғалати ишга қўл урдимикин? Йўқ, Содиқ унақа дарров ўзгариб қоладиган иродаси мўрт ки-

шилардан эмас эди! Бирор иғвогар, ғаламиснинг касрига қолдимикан?..

Ана шунда Жаннат Содиқнинг ўз юрагига жуда чуқур ўрнашганини, уни ҳеч қаҷон бегона ҳисоблай олмаслигини, унинг елкасидан босган оғир юқдан ўз тиззаси титрашни қалби-қалби билан ҳис қилди. Унга раҳми келди. Шундай оғир куцида унга ҳеч қандай кўмак қўлини чўзолмаслигидан ўкинди. Воқеанинг зимдан кузатди: ҳеч ким ҳеч нарса демас, Содиқ гўё сувга отилган тош эди.

Жаннат муюлишда бурилиши билан кичиккина ариқчага дуч келди. Омбордан шариллаб оқиб чиққан сув кўча бўйлаб анча ергача бораради. Ариқчада бир бола қоғоз қайиқча оқизиб, кетидан югурап, товушининг борича қийқириб қувонар, энди девор остига кириб кетай деганида ушлаб олиб, оқимнинг юқорисига чопарди. Шундай чопиб бораётганида ўзини Жаннатга уриб олди. Уни йиқилишдан ушлаб қолган Жаннат:

— Секинроқ югар, ўғлим! — деди.

— Мен сизнинг ўғлингиз эмасман, дадамнинг ўғлиман, — деди у бийрон тили билан, баъзи ҳарфларни ямлаб. Кейин, омборга қараб елиб кетди. Боланинг чақнаб турган кўзи Жаннатга аллакимни эслатгандек бўлди. Ў боланинг орқасидан боқиб қолди. Кейин кетидан югуриб бориб, бағрига олди, яна ўша кимнидир эслатган кўзларига боқиб, ёнмдан иккита конфет олиб қўлига тутди. Бола яна ўша бийрон тили билан раҳмат айтиб, қайиғини сувга қўйди.

— Қайиғинг одам кўтарадими?

— Бўлмасам-чи!

— Қани бўлмаса мени тушир-чи.

— Йўқ! Аввал дадамларни олиб келаман.

— Даданг қаёқда?

— Узоқда. Жуда узоқда. Томдан ҳам кўринмайди.

Жаннатнинг юраги «жиғ» этиб кетди. Хаёлига жуда яқин кишининг исми келди. Наҳотки...

— Отинг нима?

— Марат Содиқович Кўчқоров, — деди пишиқ қилиб бола.

Жаннатнинг кўзидан ёш тирқиради, болани бағрига босиб, у юзидан, бу юзидан ўпди, ўзидан сал узоқ тутиб кўзларига боқди, яна ўпди, яна кўзига, бўйларига

боқди. Марат ҳайрон бўлиб турарди. Бирдан Жаннатнинг бағридан чиқиб чопди:

— Вой, қайигим кетиб қолди.

Жаннат бундоқ қараса, Марат қайигига етиб боролмайдиган, ўзи югуриб бориб, энди нариги омборга кириб кетай деганда ушлаб олиб берди. Бола раҳмат ўрнига:

— Яхши чопар экансиз-а?— деди қувониб, кейин қайигини бир четга қўйиб конфетни очди.

Жаннат бу оиланинг бошига тушган кулфатдан хабардор, Мушарраф фожиасини ҳам эшитган эди. Лекин бола бу томонда нима қилиб юрибди? Улар шаҳарнинг нариги томонида яшайди-ку! Бирор ерга меҳмонга келишганимикин? Боланинг ўзидан сўради, боядан бери бийрон-бийрон гапириб турган Марат бу саволга жавоб беролмади.

— Уйимиз шетда!— дейишдан нарига ўтмади.

Жаннат ҳайрон бўлиб, Маратдан бувиси билан Қодирни сўради. Турган ҳовлиларини кўриб олди. Лекин ҳозир киришга ботинмади. Бўлмаса у туққан онасидаи меҳрибон, ўз феълига яраша «жонболам хола» лақабини олган Адолат холани кўришга жуда-жуда муштоқ эди. Бошқа бир куни, албатта, келишини кўнглига тутиб, лунжини шишириб конфет шимаётган Маратни яна бағрига босди, бир-икки ўпиди, хайрлашди. Узоқларда туҳмат қурбони бўлиб юрган жабрдийда Содиқа, қариганда қаддини ғам буккан Адолат холага, не-не умидлар билан дунёга келганида ота меҳрига қонмай йўлига муштоқ Маратга ачиниб, юраги эзилиб кетди.

Салдан кейин неварасидан хабар олиб кўчага чиққан Адолат хола Маратнинг қўлидаги конфетни кўриб, ким берганини сўради.

— Ху, анави яхши холам берди,— деди Марат анча ерга бориб қолган Жаннатни орқасидан кўрсатиб, Адолат хола пешонасига кафтини қилиб қанча термилмасин «яхши хола»ни таниёлмади.

— Ким бўлса ҳам, худо хайрнин берсин, умридан барака топсин!— деб дуо қилди.

— Уша хола-чи, буви,— деди Марат,— мени қулоқлади, юзимдан ўпди, кейин мен индамасам ҳам ўзи йиғлади.

Ана шунда Адолат холанинг юраги «шув» этиб, «ким бўлди экан», деб кўнгли эзилди, ўйлаб ўйининг охирига

етолмади, «Содиқнинг бирорта ўртоғининг хотинидир», деб ўзига тасалли берди. Лекин хаёлига Жаннат, фарзандидай яқин бўлган Жаннат, нима учундир, келмас эди.

Адолат хола учун сир бўлиб қолган бу меҳрибонлик Октябрь байрами арафасида очилди. Кўчада ўйнаб юрган Марат пакет қучоқлаб югуриб кирди:

— Буви! Буви! Ҳув анави конфет берган холам келяптилар. Ана!

Бўсағада Жаннат кўринди, қўлтиғида бир қучоқ совра-салом. Мусичаларга айвонда нон уқалаб бериб турган Адолат хола «Вой, сизми?»— деб қаршисига пешвоз чиқиши билан, Жаннат қўлидаги нарсаларни бир четга қўйиб, бағрига ташланди. Иккиси ҳам товуш чиқармай мунгли йнглади, бир-бирларига узоқ суюниб туриб қолдилар.

Марат ҳеч нарса тушунмай ҳайрон эди.

Адолат хола Жаннатни қўярда-қўймай айвон тўрига ўтқазди. Жаннатнинг овора бўлманг, дейишига қарамай, самоварга олов ташлаб юборди. Кейин Жаннатнинг ҳол-аҳволини бадастир сўради.

— Шукур, ёмон эмас, ўша боқчамда ишлаб турибман. Бу ерга кўчиб келиб қолибсизлар?— деди Жаннат бўғотлари нураб қолган айвон томига қараб.— Бу ерда Мирсалим ака турарди шекилли?

Мирсалим номи тилга олинниши билан, унут бўлаёзган дардининг оғрифи тутиб қолгандек Адолат хола алланечук бўлиб кетди.

— Ҳеч нарсадан ҳеч нарса йўқ, бир куни Мирсалим ёнида бир югурдаги билан кириб келди. На салом бор, на алиқ. Қўлида икки энлик хат. Менга узатиб, ўқинг, деди. Менда завод борми! Кейин билсан, бу ҳовлимизнинг қора хати экан. Шу куни ёқ кўчимизни кўчага улоқтириб ташлади. «Ҳой, Мирсалим, сизга нима бўлди? Ўртоғингиз келганда қай юз билан қарайсиз?»— десам, нима дейди денг, умринг қисқа бўлгур, «Менинг унақа ўртоғим йўқ. У энди келмайди». «Вой жувонмарг бўлгин, тилларинг лаҳадда чирисин», дедим ичимда. Қарғадим-йиғладим... Шу-шу, мана бу ерга келиб қолдим. Тупроқдан ташқарида бир амаллаб юрибман.

Бу ноҳақликдан Жаннат изтиробга тушди.

— Қора босгур, биринчи кўришимдаёқ иқимга ўтирган эди-я! Ўғлингизга, «шу одамдан яхшилик чиқмай-

ди, юмшоқ супурги бўлмай ўлсин, кўп пашшахурда қилманг», деб неча марта айтгандим.

— Болам бечора содда, ҳалол-да, ҳаммани ўзига ўхшатади.

— Энди нима бўлди? Жабр жабр ўзларига бўлди. Шу ишларда Мирсалим мунофиқнинг ҳаром қўли йўқмикин? Бордир? Эл олдида шунча хунук ишлардан тап тортмаган, зимдан хиёнат қилишдан тоярмиди! Мана мени айтди дерсиз, бир куни ҳаммаси очилиб, шу хазон бўлгурнинг қўли бор бўлиб чиқади.

Бирорга туҳмат ва хиёнат қилишни ҳазар билган Адолат хола, қўли билан ушлаб, кўзи билан кўрмаганидан Мирсалимга тўнкашни ўзига эп кўрмади:

— Билмадим, қайси бир умринг қисқа бўлгур қўй оғзидан чўп олмаган боламга чоҳ қазиди. Ўзига ҳам аталгани бордир. У эмас, бу эмас, кўргилик, келин. Кўрмаганим шу ғам қолган экан!

Адолат хола уҳ тортиб ўрнидан қўзғалди. Самоварнинг қорнига чертиб, кейин ўтхонасига ўтин ташлади.

— Бекорга овора бўляпсиз, ойи, мен ҳалигина но-мушта қолган эдим.

— Сиз учун эмас, ўзим учун, келин. Худо ёрлақаб бир келиб қолибсиз, ҳасратлашиб ўтирамиз.

«Бир келиб қолибсиз» сўзи Жаннатнинг қулоғига «сиз ҳам мени унугиб юбордингиз» бўлиб эшилди. Ялт этиб холанинг юзига қаради. Унинг юзини кексаликдан кўра, шу кейинги йилларнинг кўргиликлари ғижимлаб ташлаган эди. «Темирни занг, одамни ғам ҷиритади», деди кўнглида Жаннат. Лекин холанинг кўзида ёниқ умид учқуни кўриб, ўзига тасалли берди: «Чинор худди кекса чинор. Шохлари қуриса ҳам илдизи бутун. Қирсиллайди-ю, синмайди».

Айвоннинг нариги бошида Марат жажжи бармоқларини ўйнаб ашула айтарди. Ҳаракатлари ашуласининг оҳангига жуда мос тушарди:

— Буви, буви! Дадам келди.

— Қани? Қани?

— Мана! Мана!

— Омонмисиз - эсонмисиз!

— Тилгинангдан бувинг айлансин,— деди Адолат хола самоварни олиб келгани ўтиб борар экан ва бағрига босиб манглайидан ўпди.

Келганда иши қисталанг, ҳали-замон кетгудек бўлиб турган Жаниат чойдан кейин ҳам қўзғалмади. Кечгача қолиб кетди. Самоварда қолган сувга холанинг жомашов олдига эрталаб олиб бориб қўйган кирини ювив берди. Холанинг: «Қўйинг, болам, кейин ўзим ювив оламан, йилда бир келганингизда ишлатиш им уят», дейишига қулоқ солмади. Маратни даҳлизга олиб кириб чўмилтириди, кийимни алмаштириди.

— Яхши бола байрамга тоза бўлиб чиқади,— деди унинг тугмаларини қадар экан Жаниат.— Юз-қўлларингни ифлос қилмасдан юргин, ҳўпми? Қийимларингни ҳам тоза тут.

— Ундан кейин нима қиласди?— деди Марат гўё тоза юришнинг оқибатида яна бир нарса бўладигандек қизиқиб.

— Ҳамма, яхши бола экан, дейди.

— Байрамга дадам келадиларми?

— Эҳтимол. Бу байрамда келолмаса, янагисига келади. Бундан кейин ҳам тарин байрам бўлади.

— Нега бу байрамда келмайдила?

— Дадангнинг иши кўп.

— Ҳамманинг дадаси ишдан кейин ҳар куни уйига келади-ку.

Бу саволга жавоб беришдан қийналиб қолган Жаниат гап чалғитди:

— Визвизак қилиб берайми?

— Қанақа визвизак?

— Мана ҳозир кўрасан.

Жаниат Маратни чалғитиш ва сўзининг устидан чиқиши учун Адолат холанинг ишпекидан ип олиб, картон қирқиб визвизак ясади. Уни қанақа қилиб ўйнашни ўргатди. Қалб эзадиган саволлар бирпасда Маратнинг эсидан чиқиб, визвизак билан овора бўлиб кетди. Жаниат эса, айвондаги шохларни олиб ўчоқбоп қилиб кертиди, самовар тараша қилди, бир чеккага тез қурийдиган қидиб тахлади.

— Ойн, ўтинингиз ҳўл экан, қиши билан эсингиз кетади-да.

— Қодиржоннинг ёзи билан қўли теккани кечаги ҳафта бўлди. Шуни ҳам бирордан тушириб юборибди. Қеласи ҳафта бориб ўзим майдалаб бераман деган экан, нима учундир, келмай турибди.

— Ишлари яхшими?— қизиқди Жаниат.

— Шукур, ёмонмас. Бирордан олдин, бирордан ке-йин яшаб турибди. Бир кунимиз ўтятти. Қуюғига бўл-маса ҳам, суюғига қорнимиз тўқ. Яхши ҳам шу бола бор экан, бўлмаса ҳолим нима кечарди? Лекин бояқиши ўқишдан қолиб кетдим, деб баъзида ўқиниб қўяди. Ёмон ҳамма ерда бор. Мактабида «аканг фалон экан» деб чиқиширишмади. Бўлмаса боламнинг ўқишга ихло-си баланд эди.

— Ҳали ёш, ўқиса бўлади,— холанинг кўнглини кў-тарди Жаннат.

— Ўзи ҳам, акам келди дегунча ўқишга кириб кета-ман, деб яниб юрибди.

— МТСда нима иш қилади?

— Электрларга қарап экан. Обрўйи яхшимиш. Май байрамида мукофот беришди. Болам ўтли-шудли, уш-лаган ерини омбирдек тишлайдигангина.

— Ишқилиб яхши бўлсин,— деди Жаннат ҳам қуво-ниб.

— Ҳар бандайи мўминнинг боласи яхши бўлсин,— уни қувватлади хола.

Унинг кўнгли Жаннатни кўриб, ҳасратлашиб анча ёзилди. Қайгуларини унут қилгандек, руҳи енгил тортди. «Бунинг ҳам эшикдан кириб борганда «кел» деб кутиб оладиган меҳрибони йўқ, иссиқ татиб кетсин», деб кечки овқатга вақтлироқ қозон осди. Шу маҳал чўнтагини «яхши хола» олиб келган туршакка тўлдириб чиқиб кетган Марат бир кафт данак билан кириб келди, бувисига илтимос қилди:

— Буви, ўрикнинг суягини чақиб беринг.

— Суяк эмас, данак, болам,— неварасининг гапини тузатди бувиси ва ёнида турган ҳавонча тоши билан ча-қишини ўргатди. Жаннатга Маратнинг тили чиқиши тари-хидан гапира кетди.

— Болам тушкурнинг тили жуда бот чиқди. Тили бот чиқсан боланинг юриши кечроқ бўлади. Юриб кет-ганларга ҳаваси келдими ёки ботинкамни кийсам юриб кетаман деб ўйладими, бир куни ботинкасини қўлига ушлаб олибди. «Кийгизиб қўйинг» дейишни билмай, пуз-қул «Ботинкамга оёғимни солиб қўйинг» дейди. Тунов куни салқин тушганда «Шапкамнинг думини боғлаб қў-йинг»,— деб кўчадан чопиб келди. «Эшикни қанақа қи-либ очдинг?»— десам, «Қўлидан ушлаб тортдим»,— дей-ди. Кўйлагини ювсам гули кетинқиради, уни кўриб:

«Кўйлагимнинг гули сўлиб қолди», деб, хафа бўлиб юрибди. Кечак ючадан келиб, «Фаттоҳ китобининг пальтосини йиртиб қўйди», — деб бирам куйиб-пишади, асти қўйинг. Суриштирсан, китобнинг қалин муқоваси йиртилган экан. Сиз келмасингиздан сал илгари водопровод жилдираб оқса, «Сув чарчаб қолибди!» — деб юрибди. Омон бўлгур боламнинг тили жуда ширин, ҳали сиздан уялиб турибди. Қани шу тилларини дадаси эшилтса! Севинганидан юраги ёриларди!

Боядан бери хушнуд ўтирган Адолат хола кўзига ёш олди. Жаннат бошини қуи солди.

Кечга яқин Жаннат қайтар экан, Адолат хола: «Қолинг, гаплашиб ётамиз», — деб қистади, Марат барига ёпишди. Унинг тилини қилиб, хола деди:

— Кетманг аяжон, дегин!

Марат ҳам:

— Кетманг, ая, — деди.

Умри бўйи эшилмаган «ая» сўзидан Жаннатнинг вужуди титраб кетди. Ана шу лаҳзада Адолат хола билан кўзи учрашди. Адолат холанинг хира тортган кўзларида: «Кўрдингизми, болам, сизни нима деб атаяпти? У сизни яхши кўриб қолди, барингизни қўйиб юбормоқчи эмас. Раҳмингиз келсин, шу тирик етимнинг бошини силанг», деган маъно бўлса, Жаннатнинг кўзи «Дунёда мени ҳам «ая», дейдиган бор экан-ку! Бу сўз менга жуда ёқади, мен шунинг гадосиман!» — деб ёнарди.

Жаннат Маратни қўлига олди, жавдираб турган кўзларига боқиб, юзларидан ўпди:

— Энди тез-тез келиб тураман, ўғлим. Сени соғинтириб қўймайман. Ўйимга олиб кетаман.

— Уйингизда ўғлингиз борми? — бирдан сўраб қолди Жаннатнинг бўйнидан қучоқлаб турган Марат. Хола Жаннатни мушкул аҳволдан чиқарди:

— Сен-да ўғиллари. Аянгнинг сендан бошқа ўғли ўй.

Жаннат маъқуллаб бош ирғади.

Жаннат узоқ хайрлашиб кўчага чиққанда, уфқ эзилган анордек қип-қизил, кўча гавжум эди. Кеч салқини билан бошланган изғирин дараҳтларнинг сўнгги япроқларини ширт-ширт узиб ерга отарди.

Жаннат сал юргандан кейин шаҳарни иккига бўлиб ўтадиган анҳорнинг ёқасига чиқди. Анҳор тўлиб оқар, туви кўринмаса ҳам, суви қаймоги олинган сутга ўх-

шайди.. Сокин. У изфиринда жимиirlайди, балиқнинг сиртини эслатади. Юзида қалқиб бораётган барглар банорас түнчиниг малла ямоғига ўхшаб кўринади.

Жаннат анҳорнинг жимиirlа жимиiriга маҳлиё бўлиб энди кўприкдан ўтган ҳам эди, қаёқдандир пайдо бўлган сўхтаси совуқ Мирсалимга қамти келиб қолди. Бу кутилмаган учрашув иккисини ҳам тўхтатди. Кундузи холаникида бўлган сұҳбат Жаннатнинг эсига тушиб, энсаси қотди, ўтиб кетмоқчи бўлди. Лекин Мирсалим нимадир демоқчи бўлиб, уни бир четга олди. Ана шунда Жаннат унга назар солди. Мирсалим аввалгидан анча ўзини қўйган, чала ошган хамирдаккина қорин ҳам пайдо қилибди. Пиджаги остидаги учи попукли оқ ишак тизимча камарининг фасон тугуни унинг савлатини яққол намойиш қилиб турибди. Кўйлаги пиджагидан икки энлик узун, ёқаси қийшиқ очилган. Бошида фуражка, оёғида этик. Бурнининг остида нос туфуриб қўйгандек-кина мўйлов.

Мирсалим яқинда мартабага минган кишиларга хос ғурурда Жаннат билан сўрашди; унинг юзидан кишининг ғашини келтирадиган табассум аримас эди. Ўзининг одамшавандалиги, меҳрибонлиги билан Жаннатни миннатдор қилиб қўймоқчи, кўнглини овламоқчи.

— Мен сизнинг зийраклигинизга қойилман, жуда қойилман. Ҳаммамиздан ҳам ҳушёр экансиз. Содиқнинг жавобини вақтида берганингизни қаранг. Айни вақтида-я! Хотинлардан пайғамбар чиқмаган дейишади. Но-тўғри! Чиққану, эркаклар тан олмайди. Бир пайғамбарнинг башорати сизникоча бўлар-да! Ортиқ бўлmas! Мен сизга қойилман, ҳамма қойил. Буни қаранг, одамнинг оласи ичиди бўлади, деб шуни айтади-да, бўлmasa, Содиқни шунаقا одам деб ким ўйлабди. Сиз ўйлабсизми — йўқ, мен ўйлабманми — албатта, йўқ.

— Нима иш қилган экан? — деди Жаннат, энсаси қотиб турса ҳам жўрттага.

— Эй, қўйинг, сиз сўраманг, мен айтмай.

— Хўш? Хўш?

— Ҳукуматимизга қарши шунаقا ишлар қилган эканки, тунов куни биттасидан эшишиб тепа сочим тикка бўлди, тилимгача музлаб кетди. Аввал турган шаҳрида қилгани етмагандек, бу ерга келиб ҳам авж олдирган экан. Тавба, нега шунаقا қилади бу одамлар! Бизнинг ҳукуматдан яхши ҳукумат борми дунёда! Қонунимиз

нинг биттадан ортиқ хотин олишга рухсат бермагани уига ёқмагаими? Нафси ғолиб эркак-да, хўрозга ўхшаб тўртта-бештасини бошлаб юргиси келади. Эй, аттанг! Ўзига жабр қилди. Битта Содиқ бўлмагани билан давлатимизнинг мурвати бўшаб қоладими? Албатта, йўқ!.. Мен сизга қойилман, хотин киши бўлсангиз ҳам ўнта эркадан ҳушёр экансиз. Мен нодон ҳеч нарсанни фаҳмламасдан улфатчилик қилиб, қанча гап-сўзга қолдим.

— Гап-сўзга қолдим? — ажабланди Жаннат.

— Да, бўлмасам-чи! ·Эшитмадингизми? Гўр оғзидан қайтдим. Сиз вақтида талоғингизни олганингиздан, тинч қолдингиз-да, бўлмасам...

— Бўлмаса, Адолат холага ўхшаб ҳовли-жойдан ажралиб қолармидим!

Мирсалим буни кутмаган, Жанинатни Содиқнинг қамалиб кетишидан хурсанд, «ўл, ажаб бўлибди» деб юрган ўйлаб, олдига похол солаётган эди. Аталадан суяқ чиқиб, эсанкираб қолди. Шунда ҳам бўш келмади, ётифи билан:

— Бу даъвонгиз ғалат,— деди.— Мен тортиб олганим йўқ. Катталар, кўчиб кир, деб қўйишмади. Менда нима айб? Айтганларини қилдим. Бари бир бошқа бирор олиб қўярди.

— Уша бошқанинг кўчиб киргани яхши эди.

Мирсалим жавоб тўқигунча Жанинат хайрлашмай жўнаб қолди. Унинг ичи нафратдан лов-лов ёнар эди.

Мирсалим безрайиб қолди. Кутимаган зарба уни гангитиб қўйди. Ўзига келиб, аламдан: «Бу қисирнинг ҳам тили тагида тил бор экан-ку!» дея олди ва пешонасининг терини бармоғи билан сидирди...

* * *

Уч кун ўтмаи, Маратнинг соғиниб «ая» дегани Жанинатнинг қулоғида жаранглай бошлади. Боғчасидаги ҳар бола Марат бўлиб кўринар, «ая» деб чақириётганга ўхшарди. Кечаси туш кўрди. Маратни эмизаётган эмиш. Марат ҳеч кўкракка тўймасмиш. Бу тушни ўзича таъбирлади, бирорга айтгани ботинмади. Эртасига ишдан чиқиб Адолат холанинг өлдига ўтди. Тушини унга айтган эди, хола:

— Маратнинг меҳри сизга умрли бўлиб тушибди, жон болам. Яхшиликка кўринсин! — деб таъкидлади.

Буни тасдиқлагандек, кетгунича Марат ундан ажралмади, «ая-чи, ая» деб ялаб-юлқади. Йиғиб қўйган гаплари сира адо бўлмас эди. Кейин уни анча ергача қўлидан ушлаб бориб қўйиб қайтди. «Эртаси ҳам келинг», — деб ялиниб қолди. Унинг юзидан ўтолмаган Жаннат байрам куни кечқурун яна келиб, Адолат холанинг ёнида ётди, эрталаб туриб Маратни намойишга олиб чиқди. Пуфак, «эскимо» олиб берди.

— Ичига ях қамаб қўйган экан, тилим совуқ еди. Иссифи йўқми, ая — деди Марат. Унинг болача мантиқи Жаннатни кулдирди, меҳрини товлади.

— Совуқ бўлса емай қўя қол.

— Йўқ, иситиб ейман.

Жаннат яна кулди. Эскимонинг устки қофозини пастроқ сурингерди:

— Кийимнингга оқизмасдан егин, хўпми?

— Хўп!

Қизил майдондан ўтгандан кейин Марат аясини яна саволга тутди.

— Анави киши ким? — деди Ленин ҳайкалини кўрсатиб.

— Ленин бобо.

— Доим ўша ерда турадиларми?

— Ҳа.

— Қишида совуқ емайдиларми?

Жаннатнинг юзига яна кулги тошди. Маратнинг саволи тамом бўлмас эди...

Уларнинг эшикдан бошлишиб кириб келишини кўрган хола, ич-ичидан қувониб:

— Кўз тегмасин, бир-бирларингга жуда ярашиб-сизлар! — деди. Кейин яна қўшди: — Сиз келадиган бўлгандан бери болам яйраб қолди, келин. Кўчада сизни қийнамадими? Болам тушкур, жуда сергап, ҳар нарсанни суринтираверади.

— Йўқ, яхши юрдик. Болалар бу ёшда шунаقا бўлади, — мураббияларга хос мантиқ билан жавоб қайтарди Жаннат.

Жаннат яна бир-икки марта келиб кетгандан кейин:

— Сиз йўғингизда Марат ўғлингиз ичикиб қоляпти, аяси, — дея бир нимага ишора қилди хола. Буни Жаннат дарров пайқади, тушунганича жавоб қилди:

— Олиб кетиб турардим-ку, ойижон, шеригимга ёқадими, йўқми, деб истиҳола қиляпман. Юраги торроқ жувон.

Адолат хола отган ўқининг нишонга текканини пайқади. Чунки Жаннатнинг келиб-кетиб юрганидан бери кўнглида ўзгариш бошланганини кексаларга хос зийраклик билан сезиб юрган эди. Лекин Жаннат ўз ниятини очиқ айтишга ботинолмаслигини ҳам яхши биллар эди. Мана иккиси айни муддао эшигидан келиб чиқишиди. Бундан хурсанд бўлган хола очиини айтиб қўя қолди.

— Узингиз шу ерга келиб қўя қолсангиз нима қилади. Мен ҳам ёлғизман... Қодиржоннинг аҳволи бу — ойда бир келса келади, келмаса йўқ. Бир-бири мизга ҳамроҳ бўлардик.

Жаннат ўйлаб қолди, минг хаёлга борди. Унинг бу ҳовлига келиб-кетадиган бўлганидан бери ўз режаси бор эди: агар Қодир МТСда квартира олса (у ҳозир тракторчилар тайёрлаш курсининг ётоҳонасида турарди), холани, албатта, кўчириб олиб кетади, шунда у Маратни илтимос қилиб олиб қолмоқчи. Содиқ келгунча ўзи тарбия қилмоқчи, кейин яна бир гап бўлар, деб ўйлаб юрарди. Лекин холанинг ҳозирги таклифи униқидан ҳам нақд чиқди. Буни ўйламаган экан у. Энди бундоқ фикр қилиб қараса, холанинг таклифидаги жон бор. Бағрига қулоқ солса, Маратгагина меҳри тушиб қолмай, Содиққа бўлгац меҳри муҳаббати ҳам аввалигича. Гарчанд Содиқнинг кўнглини билмаса ҳам, севгиси ҳаққи-хурмати унинг шундай қора кунида тиргаги бўлишни ўз бурчи ҳисоблади. Қолаверса, бу дунёда Адолат холадан меҳрибон кими бор? Соясига кўрпача солади. Унинг устига, бечора, қариб қолди, боши ёстиқ-қа теккудай бўлса, иссиқ-совуғидан ким хабар олади?

Жаннат шуларни ўйлаб, ўзича аниқ бир фикрга келган бўлса ҳам, дарров рози бўлиб қолишдан ийманди, истиҳола қилди, бўшашибгина деди:

— Эшигтан қулоққа хунук. Чиқиб кетган жойим...

— Аввало сиз бу уйдан чиқиб кетмагансиз,— дёди хола Жаннатнинг ён босганини сезиб, ҳазил қилиб.— У уй бошқа, бу уй бошқа. Орқадаги узунқулоқ гангага қулоқ солмаган ютади. Оғзига кучи стмаганлар нималар демайди!

Жаннат индамади: хола ҳақ. Ундан кейин кўнгли

чопиб турган ишга ортиқча «гож»ликнинг нима кераги бор? Синамаган жойими!

Шу фикрга борган Жаниат, уч кун ўтгач, квартирасини шеригига қолдириб, Жаниат холанинг ёнига, Марат ўғелининг бағрига кўчиб келди. Марат эса, эртасидан бошлаб аяси билан унинг боғчасига қатнайдиган бўлди.

9. ҚУТИЛМАГАН УЧРАШУВ

Содиқ ўн йил муддат олиб лагерга жўнатилганда айни баҳор эди.

Унинг сўнгги марта олган передачасига Адолат хола тўрттагина исмалоқ сомса билан ошига беш-олтита до-вучча солган эди. Содиқ ана шундан, ташқарида қай фасл эканини тасаввур этган бўлса, юкини орқалаб этапга чиқаётганда эса, вокзалдаги тужук дараҳтларнинг кўм-кўк шода баргларига кўзи тушди. Лекин уни икки ҳафтадан кейин поезддан туширган ерларида эса бир метр мўл қор бор эди. Совуқ қирқ градус атрофидаги, дараҳт зоти қилт этмас, бутун борлиқ сукунат ичидагунг қотиб ухлаётгандек. Этапда Содиқ билан келгандардан бири:

— Бу ер ҳам ўз юртимиз! — деб қўйди. Лекин Содиқ унинг нима демоқчилигини тушунмади.

Бир ой карантинда тутганларидан кейин, қулоқчин, пахтали шим, телогрейка, бушлат ва пийма бериб, лагерга чиқардилар. Гарчанд бу кийимлар янги бўлмаса ҳам, ҳали иссиги кетмаган, бу ернинг совуғига дош бериши мумкин эди. Ҳаммадан ҳам Содиқقا пийма эриш кўринди. Умрида киймаганидан унда юролмас, қўнжи тақимига тегиб ғашини келтиради.

Гоҳ-гоҳ кўзга ташланиб қоладиган кишини ҳисобга олмаса, лагерда ҳеч ким йўқ. Аллақайси баракдан чиқсан тутун оғир тарапади. Кун совуқ, игнали. Содиқни пакана бараклардан бирига бошлаб кирган соқчи навбатчи маҳбусни чақириб:

— Меҳмонни қабул қил, — деди.

Баракка кираверишда тумбочка олдида ўтирган қотма навбатчи индамади. Фақат, Содиқ кўтариб кирган кўрпа-ёстигини ерга қўймоқчи бўлганида қаршилик билдириди:

— Юринг, биратўласи жойингизга қўя қолинг.

У бошлаб кетди. Барак катта бир саройга ўхшайди. Уртасида йўл, икки томонида икки қаваали ёғоч кара-вотлар, уларнинг орасида тумбочка. Ўринлар бир хилда бўлмаса ҳам анча тартиб билан тузатилган. Барак қоронғилигидан одеялларнинг рангини ажратиб бўлмайди. Лекин навбатчининг яқинда баракни супуриб-сидириб чиққани, нарсаларни саранжом қилгани сезилиб турибди.

— Сизнинг бригадангиз шу ерда туради.

Содик бир бўш жойга ўрин-бошини иргитди. Наридан-бери ўрнини тузатиб, устига ўтирди. Ана шунда баракдан эркак тери ҳидига қоришган захликни пайқа-ди. Бу ерда кимлар туради-ю, нима иш қилишади? На-ҳот шу ерда ўн йил ҳаёт кечирса? Ичидан келган бир нидо уни овутди: одам кўп. Одам одамнинг ҳоврини олади, очиқ ҳаво, совуқ бўлса ҳам тоза. Ундан кейин, бу ердан туриб истаган ерига арз қилиши, ҳуқуқини талаб қилиши мумкин. Бир кунда ўнта ариза ёёса би-ров ўйқ дейдими? Бири бўлмаса бири нишонга тегиб, ижобат топиши мумкин.

У, кечиктирмасдан, шу бугундан бошламоқчи бўлди. Бир четда ўтириб, СССР прокурорининг ўзига шикоятнома ёэди. Қамалишидан тортиб бўлган ҳамма воқеани маржон қилиб тизди, туғилишидан тортиб, қилган ҳамма ишларини бир-бир баён қилди. Гражданлар урушида олган, номи ёзилган қиличини писандада қилгандек, бир ерига тиркаб қўйди... «Афсус, ўртоқ Фрунзе ўлиб кетган, бўлмаса ўзи гувоҳлик бериши мумкин эди», деди бир ерида.

Шикоятнома анча узун бўлди. Уни оққа кўчирап экан, навбатчи маҳбус келиб қолди:

— Ўйга хат ёзяпсизми! Узун бўлиб кетибди-ку! Нималарни ёздингиз? Унча-бунча гап цензурининг меъда-сига ботмайди. Бу ерда хатининг қисқаси яхши — тез боради.

Шунча меҳрибонлик қилиб турган навбатчи маҳбус ёзилган нарсанинг нималигини билгач, мийнгина кулиб қўйди, «Эй ғофил банда, нимадан умид кутяпсан?» дегандек, салмоқлаб қадам босиб жойига кетди.

Бир маҳал ташқаридан одамларнинг олаговури эши-тилиб, кейин барак эшиги тарақлаб очилди. Дувиллаб, бир нарсага шошгандек одамлар кирди. Улар билан совуқ ҳаво кирди. Одамларнинг усти боши бугун Содик-қа берганларига ўхшаган қалин ва қўпол. Қулоқчинлар

энгаҳдан боғлоғлиқ. Баъзи бирори баракка кирди де-
гунча устидан қалин қўсқинини ечиб, ўрнига ётар, сочи-
ғини олиб қўшни хонага отилар эди. Баъзи бирорнинг
ҳеч нарса билан иши йўқ, кира солиб ўрнига ўзини оғир
ташлайди.

Бу ишдан қайтиш ғувури сал ўтмай босилди. Барак-
да янги одам пайдо бўлганини шундагина пайқаб, Со-
диқни ўраб олишди. Лагерь одатича саволга кўмиб
ташлашди. Ўзи ким? Қаердан? Нимага? Неча йил?

Худди шу пайтда кимнингдир жуда таниш товуши
Содиқнинг қулоғига чалинди:

— Бизнинг томондан? Ким экан баҳти қора?

Товуш эгаси одамлар орасини ёриб, олдинга ўтди.
Ҳаммадан олдин унинг бароқ қоши кўринди, кейин
ҳайрон бўлиб оғзини очганда сўйлоқ тиши кўриниб кет-
ди. У Содиқни кўриши билан бир лаҳзагина ҳайратомуз
боқиб турди-ю, кейин эски қадрдонини ногаҳон учратиб
қолган кишидек: «Содиқжон, иё, сизми?»— деганича қу-
ложини очди: Содиқ таниб, индамай тураверди.

— Ана холос, ана шундай жойларда кўришармиз,
деб ҳеч-ҳеч ўйламаган эдим!

Бу Диловархўжа эди. Содиқ ҳайратда эди. Наҳот
қаршисида турган ўша Диловархўжа! Содиқ, унинг
фарёд уриб йиғлаганича бор, жинояти оғир экан, отиш-
ди шекилли, деб ўйлаб юради. Уни бу ерда кўриши,
ўлган одамнинг тирилишидек, жуда ғалати туюлди.
Диловархўжа ҳам Содиқнинг қамалиши бир хатолик
оқибати, бир оздан кейин чиқиб кетади, деб ўйлаган,
унинг бу томонларга келишини ҳеч хаёлига келтирма-
ган эди. Шунинг учун иккаласи ҳам ҳайрон тикилиб қо-
лишди.

Кийим-бошининг бошқалигини ҳисобга олмаса, Ди-
ловархўжа ўша-ўша: бароқ қош, сўйлоқ тиш, рўпарадан
сочма ўқ егандек чўтири юз. Лекин у энди анча оқарган,
кўзи уҳфасини ҳалигина олдирган уккинидек чақнаб
турибди.

— Сиз ҳам шу ердамисиз?— деди Содиқ ниҳоят. У
ҳамон ўз кўзларига ишонмаётгандек эди.

— Ҳа, шу ерда... Совуқ ялаб ётибмиз. Отилиб кетган
деб ўйловдингизми? Йўқ, отмадилар. Худо кўнгиллари-
га раҳм солди. Ундан кейин, очиғини айтганда, ўзи ҳам
ўн беш йил аввалги иш-да. Эскилигини ҳам нафи тегди.
Қонунда ҳам «шу ерига бир оз эгилиб қара, судья»

деган жойи бор шекилли-да! Хуллас, насибамиз шу ёқларга сочилган экан, териб еб юрибмиз.

Диловархўжа Содиқни қўярда-қўймай ўз каравоти томонга бошлаб кетди. Аллақаердан қайнаган сув топиб келиб, котелокда чой дамлади, дастурхон ёзди. Бисотида бор нарсани тўкиб солди.

— Олинг, йўлдан толиқиб келгансиз.

Диловархўжа жуда меҳрибон эди. Шу ўтиришлари ни кўрган киши уларнинг бир-бирига ашаддий душман эканига, бир вақтлар бир-бирининг пайига тушиб, ўқ отишганига сира ишонмас эди.

— Содиқжон! Мен сизни бу гадой топмас томонларга сира ҳам келмассиз деб ўйлаган эдим. Ахийри қўйишмабди-да. Нима жиноят қила қолган эдингиз, хизматларингизни ҳам ҳисобга олишмабди.

— Туҳмат. Туҳматнинг зарби ёмон бўларкан.

Диловархўжа ишонмади. У органнинг кучини яхши биларди: ахир унинг ўн беш йил аввал қилган ишларининг ипидан игнасигача очиб ташлади-да. Шундай фактларни топдики, ҳатто ўзининг ҳам эсидан чиқиб кетган экан. Наҳот шундай орган туҳматни бир ёқлик қилолмаса, жез билан тиллани ажратолмаса? Йўқ мумкин эмас. Содиқнинг сирли жинояти бору, айтишга ботинмаяпти.

Диловархўжа ҳазилга олди:

— Сизнинг бир балойингиз бор, мендан яширяпсиз, майли. Энди фойдаси йўқ, айтаверсангиз ҳам бўларди.

— Тўрга тушган балиқ қармоқдан чўчимайди, нимасини яшираман. Туҳмат!

— Тўғри, чивин бирлашса, филни ҳолдан толдирап-кан. Туҳматчининг кимлигини билолдингизми?

— Билганим ҳам бор, билмаганим ҳам — ёнган оловнинг тутунини яшириб бўладими?

— Қани энди ўшалар қўлимга тушса-ю, гирибонидан тутиб бурда-бурда қилиб ташласам, деб юргандирсиз.

— Туҳматнинг оёғи қисқа, узоққа бормайди. Ҳақиқат тўқ данак, кўмса ҳам кўкариб чиқади.

— Шулар бирорвга туҳмат қилмаса яшолмайдими?

— Яшолмайди, кўнгилдагидек яшолмайди! Бирорвнинг баҳти фашини келтиради. Ақли, меҳнати билан истаган баҳтига эришолмагандан кейин туҳмат билан, хушомад билан орқа эшикдан тўрга чиқиб олмоқчи бўлади.

— Чиқиб ҳам олади денг.

— Ҳа, чиқиб олгани бўлади. Лекин узоқ яшамайди; баҳорда пахса девор устида унган ўтнинг худди ўзи, ёмғир нами кетгунча кўкариб туради, холос!

— Куруқ туҳматдан ўзинг асра, деб машойихлар бекор айтмаган.

Диловархўжанинг гали охир бўлмагунча кимдир Содиқнинг бригадасини айтиб кечки овқатга таклиф қилиб қолди. Диловархўжа ҳам унуган нарсаси эсига тушган-дек иргиб турди:

— Эй, гап билан бўлиб, обиравонни бой бериб қўяй дебмиз-ку. Туринг, овқатга боринг. Яна кўришамиз.

Содиқ уни кўргиси келмаса ҳам то янги таниш-билиш ортиргунча, учрашгандা уч-тўрт оғиз гаплашиб турди.

Диловархўжа лагерни ўзиники қилиб олган, туйнугидан кириб, эшигидан чиқар, қозонида сузиб, чўмичида ўйнар эди. Унинг ўзини олдирмаганилгини сабабини Содиқ энди тушуниди. У баъзи бирорларга ўхшаб, ҳаётдан нолий бермас ҳам эди. Балки бу отилмай тирик қолганиндандир, ахир у ҳаётдан умидини узиб қўйган эди-да. Текинга қолган ҳаёти эса, бу ерда ёмон кечмас эди. Лагерга тушиши билан очофат мушуклардай сезгирилик билан атрофни ҳидлади, ўзига ўхшаган олғирлар бу ерда ҳам топилиб қолди. Улар бош бириктирди. Бундайлар ҳаромдан ҳазар қилмас, хиёнатдан қайтмас, «дунёни ўт олса, майли, лекин менинг кабобим пишса бўлди», деган ақида билан яшар эдилар. Чунки бу тўдадаги маҳбусларнинг озодликдан умиди кам, улар ўз жиноятларига иқрор, уларнинг виждони ҳеч нарсадан қийналмайди, ҳаёти ўтса бас.

Лекин Содиққа қийин. У умрида бирорга ботиниб қаттиқ гапирмаган, луқмаи ҳалолини фақат меҳнат билан топиб еб юрган бўлганидан диловархўжалар тўдасига қўшилмас, улардан жирканар, улардан кўра оғирроқ ҳаёт кечирап эди. У фақат қорни учунгина қайғурмай, туҳматга қолган қадри учун ҳам йигларди, бу ерда ўзини тутиши, виждони қийналадиган бирор ишга қўл урмаслиги керак. Ишга чиқиши билан энг ҳалол заҳматкашлардан бири бўлди. Унинг бригадаси қурилишда ҳар хил ишлар қилар эди. Унда яхши ғишт терувчи, арматурачи, сувоқчилар билан бир қаторда, дастёrlар ҳам бор эди. Улар ана шу усталарга ғишт, қоришма олиб бериб туради, сув келтиради. Содиқнинг бу ерга

мос келадиган бирорта ҳунари бўлмаганидан, бригадир уни ҳар куни ҳар хил ишга қўяди. У гоҳ гишт терувчига ёрдамчи, гоҳ араматура судраб қолар, гоҳ ер ковлаб қувурларга жой тайёрлар, гоҳ вагондан цемент туширас эди. У ҳеч биридан ҳазар қилмади, қилиниши лозим бўлган зарур иш деб қаради.

Бир куни очиқ вагондан гишт туширас эди. Содиқ бундоқ қараса, ёнидаги шериги гиштни дуч келган томонга иргитяпти, кўпи синиб кетяпти. Ваҳоланки, бригадир вагон зийига тахта қўйиб, шундан сирғантириб туширишни тайиилаб кетган. Гиштга жони ачиган Содиқ шеригига: «Кўпи нобуд бўлиб кетяпти-ку!»— деди. Шериги унга шундай хўмрайиб қарадики, Содиқнинг юраги орқасига тортиб кетди:

— Жонинг ачијаптими? Тушиб тур, мен иргитамац, илиб олиб, бошини силаб ерга қўяссан! Патриот!

Ана шунда Содиқ билдики, бу ерда эҳтиёт бўлиш керак. Куйди-пишдилик кетмайди. Лекин бари бир, у виждонини қиёнаб, хўжакўрсинга ишламади. Биладики, бу кўргиллик унинг учун вақтинчалик, эртами-индин ҳаммаси бартараф бўлади. Шунинг учун ўзини руҳан тетик тутишга уринар, баъзи бировларга ўхшаб фарёд урмас эди. Модомики, синфий кураш борар экан, турма ва лагерь бўлиши керак, унда душман ўтириши керак. Душман билан бўладиган муомала аниқ: уни маълум режим билан ишлатиш, тўғри ҳаёт йўлига солиш керак. Содиқ эса, бу даргоҳда вақтинча, у эртаги кун — адодатнинг тантанасидан умидвор, уни кечаю кундуз сабрсизлик билан кутганлардан бири. Агар унинг қалбида шу умид машъали пориллаб ёниб турмаганида, унинг эртасини ёрқин кўрсатиб турмаганида, балки Содиқ бу куттилмаган ва кўнишиб оғир бўлган ҳаётга бунчалик бардош бериб яшолмас эди. Эртаги кун умиди ишончига айланган, ишонч эса унга бардамлик бағишлиарди. Эртанинг тонги қанчалик суст отмасин, бугуннинг шомидан нурли ва умидбахш эди.

У ташқаридан келган ҳар бир хабарни чанқоқ кишининг сув симиришидек бесабрлик билан кузатар, у кучли шамолдек умид чўгини алангалатиб юборар эди. Бу хабарлар турли режа ва тахмин туғдирав, оқибати яна ўша муқаддас эркинликка бориб тақалар эди. Эркинлик эса, баъзида, узоқдаги саробдек бетиним ёнарди-ю, унга етиб бориши умиди амри маҳолдек, жуда

мушкулдек кўриниб кетар эди. Ўртада қалин ва баланд девор, қатор-қатор тиканли симлар бор. Лекин, бари бир, унинг юраги шу тўсиқлар орқасида, ўз оқими билан тинмай камол топиб бораётган, гўзаллик кашф этәётгани катта ҳаёт қўйнида, унинг бир зарраси бўлганлиги учунгина яшарди, ундан бир лаҳза бўлсин узуқлик сезмас эди. Меҳнатининг самараси улкан ҳаёт дарёсига қўшилган жонли ирмоқ эканини сезиб, шу оғир кунида ҳам инсон ва юрт учун нафи тегаётганидан ичидаги мамнун эди. Фақат меҳнатни қадрлаб ташқаридагидек «балли, офарин!» деб елкасига қоқувчи йўқ, икки оғиз ширин сўз билан кўнглини кўтариб қўювчи йўқ. Мана шуниси жуда оғир, ўтмас пичоқдек оғир ботар эди.

Содиқ фақат бадном бўлиб ўлиб кетишдан қўрқади. Бўлмаса, ўлим ҳаёт қонуни, туғилган киши бир куни албатта ўлади. Лекин туҳмат сиртмоғида ўлиш жуда даҳшатли. Агар гражданлар уруши йилларида ҳалок бўлганда «умрини шараф билан тугатди, гражданлик бурчини ўтаб кетди» дейишарди. Ундан кейинроқ вифот этганида ҳам ёмон бўлмас эди, «бир одамча яшаб ўтди», деб эслашарди. Энди-чи? Пок оиласа иснод келтириб, қора ном билан умрини тугатиш нақадар даҳшат! Йўқ! Бу чидаб бўлмас катта доғ. Нима бўлса ҳам қутулиши керак.

Содиқ ҳалол ишлар, турли-туман гапларга қулоқ солмас, тўғри келган ерда ғаламисларни силтаб ташларди, оғзига уради. У ўз эркини фақат ҳақиқатнинг тантанасидан кутарди. Лекин кўникмаган иқлим ва меҳнат уни кундан-кун енгандек бўлиб, тез чарчайдиган бўлиб қолди. Энди кечқурун толиқиб ётиб, эрталаб енгил тортиб турмас, кечаги куннинг ҳордиғи ҳамон танасидан аримагандек, караҳтлик сезарди бутун баданида. Бугун ҳам худди шундай бўлиб ишга чиқди. Кечқурун қайтганида Диловархўжага йўлиқиб қолди. У билан кўришмаганига бирор ҳафта бўлган, иккиси икки ерга ишга қатнарди. Анча ўзини олдириб қўйган Содиқни кўриб, у меҳрибонлик қилди.

- Ие, ўзингизни олдириб қўйибсиз-ку?
- Сал тобим қочиб турибди.
- Тобингиз қочган бўлса бу ерда нима қилиб турибсиз? Юринг докторга.

Содиқ унга ноилож эргашди.

Тиббий бўлим бараклардан анча четда, уч хонали

алоҳида бинода. Улар кириб борганда анчагина одам бор эди. Бу ернинг поли баракникига ўхшамас, деворлари оппоқ. Деворида тиббиётга хос плакатлар бор.

Содиқ бу ерга биринчи кириши бўлгани учун тартибни билмас эди. Диловархўжа эса, бу ернинг ҳавосини олган, кирни билан одамларнинг орасини ёриб олдинга ўтди. Навбати келиб қолган биттасининг олдига имо-ишора билан суқилиб, Содиқни ёнига олди. Навбат келиб, Содиққа шиша банкадан термометр олиб бердилар. Унинг иссиғи деярли жойида эди. Доктор унинг башарасига қараб:

— Янгимисиз? Толиқибсиз,— деди, лекин уни эртаги ишдан озод қилмади, дори-дармон бериш билан кифояланиб қўя қолди. Гап-сўзлари ўқдек, тетик Диловархўжанинг иссиғи 38,5 чиқди. Доктор у билан анча гаплашди. Диловархўжа ўз касали ўзига аёнга ўхшаб, докторга изоҳлар берарди. У эртаги ишдан озод бўлди. Содиқ ҳайрон қолди: соппа-соғ одам-ку!

— Иссиғингиз борми?— ажабланиб сўради.

— Бўлганда қандай! Кўрдингиз-ку.

Содиқ ишонмади. Унинг жавоби ҳам касал одамни кига ўхшамас эди. Диловархўжанинг илтимоси билан унинг пешонасига қўлининг орқасини қўйди:

— Сезмадим.

— Сиз доктор эмассиз-да,— хихилаб кулди у. Сал юргандан кейин у чўнтағидан бир нарса олиб отди. У нарса қорга қизиқ темирдек бигиллаб тушиб, эритиб кириб кетди.

— Нима у?— сўради Содиқ.

— Иссиғим!— хандон солди Диловархўжа. Кейин бирорвга айтмаслик шарти билан қулоғига аста пичирлади:

— Кўмир шлаги. Дастрўмолга ўраб қўлтиғимга қисган эдим.

Эртага ишга чиқмаслигидан мамнун бўлган Диловархўжанинг тили бийрон, дили хуш эди.

— Шунаقا ишлар, Содиқжон, бу ерда фидокорлик эмас, устомонлик керак. Жонни сақлаш керак. Щуролар жоннингизни жабборга берганингиз билан миннатдор бўлмайди. Буни бошингиздан кечириб, билиб турибсиз-ку, шунда ҳам кўзингиз очилмас экан-да. Сизга қийин, жуда қийин! Жилла бўлмаса, шу ерда ўзингизни тийинг, бунчалик жон койитиб ишлашнинг ҳожати йўқ.

— Нега? Иш эл-юртники. Ўша эл-юртда онам, укам, ўглим яшайди. («Хотиним» деб юбормоқчи эди, Мушарраф эсига тушиб, тилини тийди.) Нафи менга бўлмаса, ўшаларга тегади. Ҳар ким ўзи эккан дарахт соясида ўтиравермайди.

Диловархўжа Содиқнинг бу галидан кулди. Кружкадаги сувни олиб узатди:

— Мана буни ичворинг, бўлмаса тиқилиб қолади! Наф! Наф!! Шунча нафингиз тегиб нима барака топдингиз. Шу ергача етиб келдингизми? Эртага ўлсангиз, уйингизга икки энлик хат билан хабар қилмайди! Тентак бўлманг. Шунча йил тентаклик қилганингиз бас! Қайси гуноҳларимизга шунча азоб чекамиз. Ахир худонинг бизга атаган ёруғ куни ҳам бордир, шундай қўймас.

Диловархўжа нимадан ёки кимдан умидвор эканини очиқ айтмади, тўғриси, айтишга ботинмади. Лекин Содиқ унинг ёлғиз худодангина мадад кутишига ишонмас, унинг мажруҳ кўнглига далда бериб, саробдек кўринаётган нимадир бор эди. Бу ҳақда синашта бўлган, маслакдош маҳбуслар хилват топиб очиқ гаплашишади. Буни Содиқ ҳам баъзан эшитиб қолади. Диловархўжа Содиқни яхши синаб бўлмаганидан фақат қармоқ ташлаб кўради.

Содиқ уларни бу умиди нимадан эканини тахминларди. Уларнинг умиди Европада оч бўридек изгиб юрган урушдан эди!

10. ОЛИЖАНОБЛИК

Иродаси метин кишини молу мулкидан, бола-чақасидан маҳрум қилиш мумкин, бироқ эсанкиратиш, йўлидан тойдириш қийин.

Содиқ лагерга янги келган кезлари энди ўтқазилган кўчатдек сал елга эгилиб юрган бўлса ҳам, кейин ўзини тутиб олди. Бу ерда ҳам инсон ҳаёти бор. Бу ерда ҳам инсоний хислат билан яшаш керак. Унинг назаридаги бу ерга яна бир катта имтиҳондан — иродаси, бардоши, асаби, ишончи ҳозирлигини имтиҳондан ўтказиш учун юбориб қўйганга ўхшайдилар.

Энди у келган кунидагидек нима ишга буюрсалар шуни қилиб юрган ҳунарсиз ишчи эмас. Олдини сувоқчиликка ўрганди, кейин катта мис тозалаш фабрикаси қурилиши бошланиши билан ғишт терувчиликни ўрган-

ди. Табиатан серзавқ ва ҳар нарсага қизиқувчи бўлган Содиқ учун ҳар ҳунар бир завқ баҳш этар, кўнглини кўтарар, соғлиғини сақларди... Нега ўтган ой ёзган аризасига ҳалигача жавоб йўқ. Йўлда йўқолиб кетдимикан? Адреси тўғри эди, шекилли.

Шу хаёл билан ўрнига кирган Содиқ, кечаси алланима бало тушлар кўриб, эрталабки юрак эзар қўпол сигнал билан уйғонди. Уйғонди-ю, тушларига парво қилмай, ўзининг иккинчи қаватдаги ўриндан сакраб пастга тушди.

— Хўш, дўстим,— деди қўшниси Богун,— бирор фалсафий фикр топдингми?

Содиқ гап нима ҳақида бораётганини дарров пайқади. Бугун мис тозалаш фабрикасининг бир қанотидаги майдонга тушаётган иморатнинг девори кўтарилади. Кеча пойдевор қўйилиб бўлди, Богун билан туркман йигити Журменек ўзларининг тақдирлари ҳақида хат ёзиб, шу иморат остига бостириб юбориш тўғрисида маслаҳатлашишган эди.

— Бу ерда фалсафанинг кераги йўқ. Рост гапни пухта қилиб қофозга туширсан бўлди,— деди Содиқ.

Ноңушта пайтида ошхонада учрашган Журменек ҳам «Ёдларингдан чиқмадими?»— деб эслатиб қўйди.

Улар ишлайдиган жой икки-уч километрлик масофада эди. Содиқ Богун билан ёнма-ён борар, уларнинг тақдираидар қандайдир ўхшашиблик бор эди. У ҳам аввал ўқитувчи бўлиб, кейин МТС сиёсий бўлимига сафарбар қилинган экан. «Менга-ку бало ҳам урмайди, эрта-индин чиқиб кетаман, лекин жўжабирдай жон билан хотинимга жабр бўлди: беш бола-я! Бир-биридан сал катта— бўйсира қилиб қўйгандек», деб эртаю кеч уйнагиларни ўйлагани-ўйлаган. Ҳозир ҳам уйидан кеча олган хатининг мазмунини Содиққа ҳикоя қилиб борарди.

— Уртанча ўғлим, дадам овга кетган, айиқполвон отиб келади, дермиш.

— Билмагани яхши. Билса кўнгли ўксийди,— дея тасалли берди Содиқ.— Бу кунлар ҳам ўтиб кетади.

— Утармикан?

— Утади! Утиши шарт. Утмаслиги мумкин эмас. Мен партияга ишонаман: бу аҳволнинг узоқ давом этиши ҳеч мумкин эмас. Бунда сен билан мен тушунмайдиган мураккаб бир сир бор. Бир куни тагига стилади. Мен бунга аминман.

— Қайси аҳволга тушиб қолмайлик, партияга ишон-маслик— кўрнамаклик бўлади. Бу ҳақда гап бўлиши мумкин эмас. Шахсан менинг ишончим комил. Лекин аҳволни ўйлаб, баъзан ёқамни ушлайман: ўзи нима гап?

Улар ҳаётлари, кўргиликлари ҳақида сұхбатлашиб, қизишиб, совуқнинг аччиқ заҳрини ҳам сезишмас, ҳатто қаердаликларини ҳам унута ёзгандилар.

Богун ҳам кела солиб овчиларга хос чаққонлик билан гулхан қалаб, ўт туташтиради. Унга бағрини очар экан, «Тошкент иссиғини эсга солади-я!»— деб кулиб қўйди. Шу билан Содиқнинг диққатини ўзига тортди.

— Тўғрими, дўстим?— Богун унинг елкасига қўлини қўйди,— ҳозир сизда неча даражада совуғикин?

— Совуқ нима қилади, ҳали палакда қовун бор.

— Йўғ-е!

Содиқ бир оз ошириб юборганини сезиб сал паст тушди:

— Ҳозир боғбонникига кирсанг, ишкомдан узмаса ҳам, олдингга олтиндек сап-сариқ ҳусайнини қўяди.

Бу гапдан ўзининг ҳам оғзининг суви келди.

— Ажойиб юртларинг бор. Лекин бизнинг Украина ҳам чакки эмас.

— Она юртнинг ёмони бўлмайди, дўстим. Она юртни ёмонлаган хор бўлади, одамнинг пачоги юртига тил тегизади.

— Лекин шунаقا одам ҳам бўлар экан!— деди Богун, кейин бир тарихни ҳикоя қилиб берди.

— Унақалар «Юртимга нима нафим тегди» дейиш ўрнига «Юртим менга нима қилиб берди» деб қарашади. Улар учун дунёда ҳеч нарса муқаддас эмас, қорин ташвишидан бошқа илинжлари йўқ.

— Ҳайвон дегин.

— Фарқи— гапиришида,— қатъий деди Содиқ.

Гулхан чирс-чирс учқун сачратиб ёнар, ёлқин тили совуқ ҳавода жилпанглар, гоҳ изғирин билан бир томонга салом бериб оларди. Қаршидагилар: «Қоч ўт кетди»,— деб тегишарди, яна ўтин қалашарди. Қишининг гули — олов, ҳам ўзингни ҳам кўзингни яшнатади.

Йўлда увшган баданини гулханда бир оз яйратгач, Содиқ Богунни бир четга имлади:

— Ҳалигини қилайлик, ҳозир иш бошланиб қолади.
Ана, Журменек ҳам келяпти.

Үч ўртоқ бир хилватга ўтиб, бино остига бостириб юборадиган «келажакка хатлар»ини маслаҳатлашиб ёзишди. Ҳаммага манзур бир текст тайёр бўлгандан кейин, уни тушь билан оқقا кўчиришни ҳусниҳат Содикқа топширишди. Содик маҳбус инженерлар ишлайдиган чертёжхонага кирди. Ўша ерда ҳаммасини тўғрилаб чиқди. Инженерлардан ҳам бир нечтаси имзо чекишига хоҳиш билдириди. Хат имзоланиб бўлгандан кейин, нам ўтмас мумли қофозга ўраб темир банкага солишиди. Кечакетида бетонлаштириш пайтида атайин қолдирилган ковакка жойлаб, устидан ғишт териб юборишиди.

Ўз ишларидан мамнун ўртоқлар бир-бирига маъноли кулишиб, куидалик хизматларига тарқалиб кетишиди, Содик эса, ана шу хат кўмилган деворга ғишт қўярди. Навбатдаги қатор устига ётқизилган, қоришимаси музлаб қолиб ғишт тишламаётганидан, дам ўтмай ёрдамчисини шоширар, «Ҳа, бўл, қани!» деб турарди. Ёндан қиялаб қараб, ўз санъатига маҳлиё бўларди. Режакетида яна юқорига сурар экан, нариги бошдан ғишт териб келаётган Богунга гап қотди:

- Қойилми?
- Қойил! — кулди Богун.
- Ишлагандан кейин, астойдил ишлаш керак.
- Бўлмасам-чи!

Бир хил одамнинг гуручдан курмак тергандек имиллаб ишлашини кўрсам пақ ёрилиб кетай дейман. Атайин шунаقا ишлармикин ўшалар, ё бўлгани шумикин? — Содикнинг ўзи жавоб қилди: — Атайин қилишади. Менимча, қалби билан ёниб меҳнат қилмаган киши, севинганида ҳам хандон уриб кулолмаса керак. Меҳнат самараси севинч, севинч ахир самимий табасум ва хандон кулги туғдиради.

— Қалби пок кишигина самарали меҳнат қила олади, — деди гапни якунлагандек Богун.

Иккаласи ҳам фикрларини меҳнатда исбот қилмоқчи бўлгандай, ишга астойдил киришиб кетдилар. Содик ғишт устига қоришима тўкиб, андава билан текисларкан, ёрдамчисига тайинлади:

— Нуқул бутунини узата берсанг, синиқларини нима қиласиз, биродар? Араплаштириб узат, ишлатилиб кетсин. Қани, бўл, тез қимирла!

Содиқнинг қора терга тушиб, жон куйдириб ишлатганини кўрган қоришма ташувчи маҳбус димоғида пинғиллаб қўйди:

— Ишла-я ишла, начальник миннатдор бўлади! Кучинг узилганда бир коса обиравонни ортиқча берармикин!

Бу гап Содиқнинг қулоғига пашшанинг ғинғиллашидек бўлиб кирди. У индамади. «Кўрамиз, ким олдин оёғини узатади: меҳнатдан қочган сенми ё менми?» дегандек кўзининг қирини ташлаб қўйди. Бунақалар лагердагина эмас, «ташқарида» ҳам топилиб туради.

Содиқ тушлик овқатга занг урилгандагина манглайтерини артиб, девордан тушди. Кўп қатори идишини кўтариб тушлик берадиган дарчага навбат турди. Салдан кейин совуқда қалин буғ чиқараётган сўк бўтқани олиб гулхан ёнига келди. Тўрвадаги иони билан еди. Устидан бир кружка қайнаган сув ичди. У энди танаффус охиригача бирор ерда сал мизғиб олмоқчи эди. Ўз қадрини билганлар шунақа қиласди. Уйқудан кўра яхши дам берадиган нарса борми кишига!

У тахлаб қўйилган эшиклардан биттасини ерга ётқизиб, энди устига чўзилган эди, бирорнинг чақиргани эшитилди. Ғужанак қилган оёғини ёзиб, бушлатининг ёқасини туширди, товуш келган томонга қаради. У Журменек эди.

— Ҳалигини бопладик-а? Деворини анча кўтариб қўйибсан-ку!

Ҳавонинг очиқлигини ҳам билиб бўлмас эди. Боя уфқининг анави этагидан қалин хом сурп орқасидаги чироқдек бир нарса чиқиб, ўша атрофни бирпасгина сарғайтириб турди-да, кейин берироққа ботиб кетди. Бу ернинг қуёши шу.

Сал ўтмай хуррак эшитилди. Иккаласи бир-бирини қучоқлаб, ғужанак бўлиб ётарди. Совуқ эса, «қаердан ичингга кириб, сал ором олсам экан?» дегандек, атрофда изғирди. Салдан кейин уйқунинг айни ширин пайтида қоқилган занг уларни ирғиб туришга мажбур этди.

Яна иш... То навбатдаги занг қоқилгунча...

Содиқ ишдан қайтиб, дарвозадан кириши билан соқолининг ўсгани эсига тушди. «Бугун олдириш керак, жуда уят бўлиб кетди»,— деб тезроқ ювиниб, сартарошхонага чиқиш ниятида елиб кетди. Эгнидаги бушлатини ечмасданоқ тумбочка устидаги хатга кўзи тушди.

Дастхатни таниди-ю, юраги ҳаприқиб, кўзи тиниб кетди: наҳотки ундан?

Бу фикр ўзига эриш кўриниб хат ушлаган қўлининг аста титраётганини сезди. Хатни қандай қилиб очганини билмади. Бирор қўлидан тортиб олиб қўяётгандек шошиб хатга кўз юритди. Юритди-ю, бутун аъзойн баданини муздай тер босди. Пичирлаб ўқиётган лаблари асабдан титради, кўнгли бузилиб, кўзига ёш келди.

Кутмаган одамингиздан хат олиш нималигини биларсиз, албатта. Лекин ўша одамингиз бир маҳаллар тақдирнинг зайди билан узоқ вақт азоб чекиб юрган бўлса, бунинг устига сиз ўткинчи ҳис-туйғулар тизгининга эркингизни бериб, унга яна озор етказсангиз, уйингиздан кўзида ёш билан чиқиб кетишга мажбур этсангизу, у ҳаммасини унугиб, кечириб, сизнинг бошингизга мушкул, қора кун тушганда, баланд ҳиммат билан шафқат қўлини чўзса, бунинг устига, ўша чеккан азоблари ҳақида лом-мим демай, сизнинг соғлиғингизни сўраб, кўнглини тасаввур қила оласизми?

Содиқ ана шундай ҳолатда эди!

Хат Жаннатдан эди. Содиқ унинг бунчалик олижаноблик қилиб онасининг бағрига келишини, Маратнинг бошини силашини ҳеч хаёлига келтирмаган экан, хатнинг охирига етгунча энтикиб кетди. Қулоқларига Жаннатнинг ўша сўнгги кечада кўзида ёш билан титраб «ўзингизни қийнаманг, мен розиман, уйланинг» дегани эшитилиб турди. Қандай муқаддас маъсумлик!

Жаннатнинг хати таъсирида ганграб, қилар ишини билмай қолган Содиқ гоҳ атрофга жавдирап, Жаннатнинг ўзи кириб келаётгандек барак эшигига қарап, гоҳ ҳеч нарсани кўрмай бир нуқтага тикилиб қоларди. Анчадан кейингина ўзига келди. Ўзига келди-ю, нега жавоб ёзмай турганидан ажабланди, ахир бундай мактубга тезда жавоб қайтариш керак-ку! Кечиктиришнинг ўзи жуда бўлмаганда ноинсофликка киради!

Содиқ Жаннатга узр сўраб, бутун бўлиб ўтган ишлардан ўзи ҳам пушаймон эканини, пушаймонини кимга айтишни билмай юрганини баён қилиб, унинг олижаноблиги учун қалбидан миннатдорлик билдириб жавоб ёзмоқчи бўлди. Кейин бу ниятидан қайтди. Бирор: «Холинг шу экан-ку, хотин қўйиб нима қиласдинг, бечора», деб таъна қилаётгандек, Жаннатнинг ўзига ҳам бу маз-

мундаги хат малол келадигандек туюлди. «Битган ярани тирнашдан нима фойда. Ўтган гап — бўз кўйлак, эт қичитади. Меҳрибоним кетса ҳам, меҳри дилимдан кетмади, деб турган одамга писанданинг нима кераги бор. Кейин сал бачканалик ҳам бўлади, бироннинг қўлига тушса, қулоғига чучмал эшитилади» деган мулоҳазага борган Содиқ, ўйлаб-ўйлаб оддийгина бир мактубча юбормоқчи бўлди. Мабодо у қалбидағи сўзини; андишага бормай, рўйирост айтишини лозим топганида шундай деб ёзган бўлар эди:

«Азизам! Ўксук кўнглимга умид чироғини ёқиб, қанчалик миннатдор ва баҳтиёр қилганингизни билсангиз эди! Наҳот, наҳот мени кечирдингиз! Сизнинг олдингиздаги гуноҳим кечирилмас, кечириб бўлмас гуноҳ. Мен енгилтак ҳислар кетидан эргашиб, сиздек одамнинг юзига оёқ тирадим, изтироғба солдим. Сиз бўлсангиз ҳаммасини унугиб, орамизда ҳеч нарса бўлмагандек хат ёзибсиз, таъна ҳам қилмабсиз. Юрагингиз бунча кенг! Сизнинг бу олижаноблигингиз қаршисида бошимни эгаман».

Жаннатнинг хати Содиқнинг оила ҳақидаги мудроқ фикрларини уйғотиб юборди. У бир неча кун Жаннатнинг хаёли билан юрди. Юборган хатининг жавобини сабрсизлик билан кутди. У хатнинг мазмунини ўзича таҳмин қилди. Лекин хат ҳадеганда келевермади. Шундай бўлса ҳам, Содиқ умидини узмади, унинг хаёли билан яшаб, руҳини тутиб юрди. Кейинги кунлар енгил ўтаётганга ўхшарди.

Ахийри хат келди. Бу хат биринчи хатдан ҳам кўра самимий, ҳаётбахш эди. Жаннат ўзининг иши, оналарининг соғлиғи, Қодиржоннинг обрў билан МТСда ишлашини айтиб, Маратнинг бийрон-бийрон гапларини келтирган эди.

Содиқ бу хатни тузлаб қотирилган гўштдек чайнаб, чайнаган сари яна таъми чиқиб, оғзи маза қилган кишидек қайта-қайта ўқиб юрар экан, бирдан посылка ҳам келиб қолди. Уни ҳам Жаннат юборгани аниқ эди.

Посылка берадиган жой дарвозанинг ёнидаги хонада бўлиб, бу хона икки бўлакдан иборат эди. Бири кийим-бошларни ремонтга оладиган жой. Иккинчи хона ундан кўра кичикроқ. Бу ерда посылка соқчи-аскарнинг кузатувида очилар, сўнг эгасига берилар эди. Бундан ташқари, бу хона олинган посылкаларни сақлаш учун

ҳам қулай ва хавфсиз эди. Посилкани тумбочкада асраб бўлмас, «туя қилиб қўювчи»лар доим топилиб турарди.

— Сизга ҳам посылка келганми?— деди соқчи-аскар. У Содиқнинг кўзига иссиқ кўриниб кетди. Худди танишга ўхшайди. Ким бу? Бирор ерда кўрганми? Аскар ҳам унга бошдан-оёқ қараб қўйди, ниманидир эслагандек қошини чимириди.

Содиқ посылкани очгандага ҳам кузатиб турди. Қутидан кишиши, баргак, туршак, бир идишчада сариёғ, беш-ён бош саримсоқ пиёз, унинг остидан бир талай ғалвир ёнғоқ чиқди. Унинг бир чеккасида бир-бирининг устига қўйилган беш қути папирос. Иккита қази.

Қутичадан газетага авайлаб ўралган фотосурат ҳам чиқди. Унда Адолат хола, Жаннат, Марат. Марат Жаннатнинг тиззасида ўтиради.

Аскар Жаннатни кўрсатиб:

— Хотинингизми?— деди. Ўз сири ўзига аён Содиқ нима дейишини билмай қолди.

— Ҳа, хотиним,— деди кейин ўзини тутиб. Лекин бу эҳтиёткорлик билан секин қайтарган жавобини Жаннат эшишиб, «Нега тил учидагина айтяпсиз? Малол келса, тўғрисини айта беринг!» деяётгандек бўлиб кетди, шундан сўнг қатъий қилиб такрорлади:

— Ҳа, хотиним! Буниси ўғлимиз. Мана бу онамиз... Жуда қарив қолибдилар.

— Фам буқкан!— деди ёнида турган бир маҳбус.

Содиқ нарсаларидан сахийлик билан аскарга тутди. Агар ўша Содиқ ўйлаган киши бўлса, унинг тажминича жилла бўлмагандага, одамгарчилик юзасидан, бир-иккитасини оғзига солиб, раҳмат айтиши керак эди. У олмади. Демак, у йигит эмас, бошқа, Содиқ адашибди.

Содиқ баракда чой дамлаб, олиб келган мева-чевасини шу ерда орттирган дўст-ёрлари олдига қўйди, чекишини ташлаб юборганидан папиросни тақсимлаб берди.

— Эй Содиқжон!— деди меҳмонлардан бири,— овора бўлиб нима қиласдингиз? Асраб қўйиб ўзингиз еявермайсизми?

— Тансиқ. Юртдан келган нозу неъмат!— деди Содиқ.

Ўтган ҳафта посылка олиб, исини ҳам чиқармаган Диловархўжанинг энсаси қотди, бир четга қаради. Бу ерда ўтирганларнинг кўпчилиги такаббурлиги, ҳар нар-

сага چовлисини солиб ақл ўргата берганидан Диловархўжанинни ёқтириш, «Кишига эл бўлмайди, тўймаса имонинни сотиб ейди»,— деб юришарди.

Эртасига Диловархўжа посылкасидан бир кафт баргак, битта қаттиқ патир кулчани қўлтиғига тиқиб яна келиб қолди.

— Бизникидан ҳам тотиб кўринг, Содиқжон. Бизнинг меваларнинг таъми бошқа, обаки ўрнида шимиса бўлади.

Диловархўжа оғзига солган баргак устидан сув ҳўплади, маза қилаётгандек тамшаниб қўйди. Фақат кетиш олдидангина асл мақсадига кўчди:

— Содиқжон,— деди ҳазиломуз кулиб,— қазини ҳам кечаги сингари хомталаш қилиб, ўртага ташлай берманг, увол кетади. Ўзимиз дам олиш куни резалаб эрмак қиласиз, мен жиндай спирт топаман,— фельдшер билан имо-ишора қилишиб қўйдим. Ундан кейин анави баракда ўзимизга ўхшаган икки-учта азамат ҳам бер. Биттаси оқ генераллардан.

Содиқнинг энсаси қотди, ғазаби қўзғади. Бу сўз Диловархўжанинг маза-бемаза гапларини эшишиб, бемаъни қилиқларини кўриб, тўлиб юрган Содиқнинг сабр косасини тоширган сўнгги томчи бўлди. «Ҳамма айб ўзимда, вақтида қайириб ташламадим» деб ўзидан ўпкалади Содиқ. Лагерга янги келган кезлари хомлик қилиб, оғзига урмади, мана бугун уни ўзи билан бир қаторга қўйиб, қандайдир оқ генералга улфат қилмоқчи, иложини топса, йўл чизиб, шундан юргизмоқчи. Унинг назарида Содиқ ҳам аламзада, нима деса шунга кўнади. Мана шунисига Содиқ чидолмай қолди.

— Менга қаранг, қўрбоши, мени қаёққа бошламоқчисиз? Сиз билан менинг йўлим бошқа-бошқалигини биласизми ўзи?

Диловархўжа бу гапни ҳазил тушунди, кулди:

— Ҳалиям-а? Ўн йилни бўйнингизга бўйинтуруқ қилиб осиб олсангиз ҳам-а?

— Xa!!! Нима, сиз билан бир лагерга тушган бўлсан орамиздаги тафовут йўқолибдими! Йўқолмайди! Имонингиз комил бўлсинки, менинг қонимни қайнатгандан ҳам сизниги, сизга ўхшаганларниги қўшилмайди. Минг қилинг сиз юрган кўчадан мен юрмайман ва юролмайман. Менинг йўлим бошқа. Бу йўлдан мени сиз тугул, сиздан зўрроғи ҳам қайтаролмайди.

— Ўлсам ҳам, яша Шўро, деб ўламан денг?— Диловархўжа яна ҳазилга олмоқчи бўлди. Лекин Содиқ жиддий жавоб қайтарди:

— Ҳа, худди шундай деб ўламан! Шўронинг меҳри қоним билан кирган, жоним билан чиқади. Шуни ўнг қулоғингиз билан ҳам, чап қулоғингиз билан ҳам эши-тиб олинг!

— Хўп-хўп!— ўсал бўлган Диловархўжа кўксига қўйини қўйиб, орқаси билан чиқиб кетди.

Содиқ шу маҳал қамалганидан эмас, Диловархўжа билан бирга бўлиб қолганидан афсус қилди. Ана шунаقا «тузлиқ булғарлар» билан бир қозондан овқат еб, бир эшиқдан кириб-чиққанига асти чидолмас эди.

Лекин, бари бир, Диловархўжа оёгини тийиб кетмади. Уч кун ўтгач, «Ўша куни роса хафа бўлиб турган экансиз-а?»— деб ишшайиб яна кириб келди.

Посилка олишда кузатиб турган аскар эртасига келиб ўзини танитмагандан, Содиқ уни тоғасининг ўлимига борганда танишган йигит Қобилжон эканини билмас эди.

Эртасига одатдагича Содиқ овқатга занг урилиши билан ҳавозадан сакраб тушди, идишни олиб ошхонага югурди. Ошхонада одам тиқилиб кетган, тик тургани жой йўқ. Ташқарида холироқ жойни кўзи билан мўлжаллаб турар экан, бирор:

— Яхшимисиз, Содиқ ака,— деб қолди. Бундай ўгирилиб қараса, ўша аскар йигит. Кулиб турибди. «Ҳали овқатингизни еб бўлганингиз йўқми?»— деди-ю, бир четга бошлаб ўтди. Содиқ унинг Қобилжон эканига энди шубҳа қилмади. Лекин унинг кечаги тундлиги ҳамон кўнглини хижил қилиб турарди. Худди шуни Қобилжоннинг ўзи ҳам билгандек юпатди:

— Кечаги учрашувимиздан, гап-сўзларимдан тоза ҳайрон бўлгандирсиз?

Содиқ ростига кўчди:

— Аввалам яхши танимадим, кейин...

— Шароит шунаقا, Содиқжон ака,— унинг гапини илиб кетди Қобилжон.— Шунаقا қилмаса бўлмайди. Бизнинг ҳам мурватимизни қаттиқ бураб қўйган.

Содиқ Қобилжоннинг гапига дарров тушунди: демак, бу соқчи йигитларга ҳам қийин. Улар аслида маҳбуслар ўйлагандек, тунд кишилар эмас. Шу ерга келиб

шунақа бўлиб қолишади, тўғриси, шунақа қолипга со- лишади.

— Сиз нима қилиб бу қармоққа илиниб қолдин- гиз?— ажабланиб сўради Қобилжон.

— Илинмадим, илнтиридилар!— деди Содиқ ва қис- қача қилиб айтиб берди.

— Шунақа сизга ўхшаб, чирқиллаб қолганлар кўп- ми бу ерда?

— Анчагина бор.

— Шикоят ёздингизми?

— Жуда кўп ёзаман, жавоб йўқ.

— Мен сизга бир сирни айтайми, Содиқ ака? Ариза- ларингизнинг ҳаммаси шу ерда қолади!

— Шу ерда қолади?

— Ҳа! Эски қадрдан бўлганимиз учун сизга айтяп- ман, бўлмаса мумкин эмас. Шу ерда қолади. Очиб кўр- ганларида олиб қоладилар.

— Бекорга жавоб кутиб юрибсан денг? Эҳ, аттанг!— Содиқ қўлидаги идишни овқати билан улоқтириб от- ди,— бу қайси қонунда бор!!

— Ўзингизни босинг, фойдаси йўқ,— ердан идиш- ни олди Қобилжон.— Қонунни бузиб, ўзингизни шу ер- га келтириб қўйғанларидан кейин шикоятингизни ўтказмаслик нима бўпти? Уша катта занжирнинг битта ҳалқаси, холос. Үндан кўра, келинг, мен сизга бир яхшилик қиласи. Уша шикоятларингизнинг нусхаси борми?

Хўш?— жонланди Содиқ.

— Шундан битта мукаммалини менга яхшилаб кў- чириб беринг. Мен уйимга юбораман. Уйимдагилар то- рангизниги чиқариб беради. Улар тайинланган жойин- гизга ё етказади, ё юборади. Бизнинг хатни бу ерда очишмайди.

Содиқ яшнаб кетди.

— Раҳмат, ука! Бормисиз! Бизга ҳам шафқат қўли- ни чўзадиган инсон топилар экан-ку!

— Лекин ҳеч ким билмасин.

— Албатта!

Қобилжон Содиқ билан хайрлашар экан:

— Ҳамма гапларимиз ўз орамизда қолсин-а, Содиқ ака!— дейишни унутмади.

Содиқ эртасигаёқ ўз шикоятномасини Қобилжон- нинг қўлига тутди,

11. СОФИНИБ

Жаннат Адолат холаникига кўчиб келгандан бери, Содиқни ўйлайди. Унинг назарида Содиқ ҳаётида рўй берган баҳтсизлик бир туш, узоққа чўзилмайдиган мудҳиш туш. Ҳали-замон тонг отиб уйғонади-ю, ҳаммаси тугайди. Назарида Содиқ одатдагидек ишидан ҳориб қайтади, дадасини кўриши билан бўйнига осилган Маратни кўтариб олади. Шунда Жаннат: «Туш ўғлим, да-данг чарчаб келдилар»,— дейди, унинг қўлидан Маратни ўзи олади. Ҳа, Мушарраф «тарихи» ҳам бир туш. У ҳам ўтиб кетиб бўлган. Осмондан тушгандек оиласа бир ўғил пайдо бўлиб қолган.Faқат шу мудҳиш туш тезроқ тугаса-ю, Содиқ келса бас!

Лекин, афсус, бу «туш» ҳамон тугамас, тонг отмас, Жаннатнинг дили мунаввар бўлmas эди.

У Содиққа мунтазам хат ёзиб турар, кўнглини кўтарар, соғлини сўрарди. Унинг маслаҳати билан бир-икки идорага бош суқди, ёрдам сўради. Лекин бундан ҳеч нарса чиқмади. Бу ишга ҳеч кимнинг аралашгиси келмас ёки аралашнишга журъат этмас эди. Шунга қарамасдан, Жаннат, ҳатто Москвага боришни ҳам ният қилиб қўйди. Бу ниятини бошлаб Қодирга билдириди.

— Нафи бўлармикин?— деди Қодир. У ўз вақтида тоза ҳаракат қилган; не-не кишиларга мурожаат этган, фойда чиқмаган эди. Тўғри, улардан биронтаси «уринма, бола, бефойда» демади, кўкрагидан итартмади, эшикни орқасидан тарсиллатиб ёпмади. Арзига бошини қия эгиг ёки қалам кетини столдаги ойнага аста уриб ўтириб ёки кабинетда у ёқдан-бу ёққа юриб қулоқ солишиди. Лекин жавоблари бирор хулоса чиқариб олиш қийин бўлган даражада сочиқ, паришон эди. Қодир бориб-бориб шу хулосага келдики, бу одамлар нимадандир, кимдандир ҳадиксирайди, дилидаги маслаҳатини беришга ҳам журъат қилмайди. Бўлмаса, уларнинг Содиқ тақдирига ачинаётганликларини кўзларидан, баъзан сўзларидан пайқаб олиш қийин эмас эди. Қодир бу ҳаракатини чарчаганидан ёки акасининг жиноятчи эканига икрор бўлганидан эмас, балки ишининг кўпайиб кетгани, шаҳардан четда турганидан ва қолаверса, натижа чиқавермаганидан сал камайтирган эди. Келингойисининг бугунги маслаҳати уни яна жонлантириди.

— Бутун бошли бир одам сувга отилган тошдай жим кетаверадими? Бечорага жуда жабр бўлиб кетди, жуда увол бўлди,— деди Жаннат.— Сизнинг ишдан қўлингиз тегмаса, мен индамасам... Йўқ, бу инсофдан эмас. Шу отпушкамда Москвага бораман. Оқни оқ, қорани қора қиласман.

— Харажатингизга мен ҳам қарашардим... — деди Қодир дилида умид учқунланиб.

— Харажати бўлса бир гап бўлади: Кўрна-ёстиғимизни сотсак ҳам боришим керак. Сиз борманг. Сизга бир гап теккани етади. Ўзим бораман. Мен хотиниман, бир ёнфоқнинг ярим палласиман, мени ҳеч жин урмайди!

Жаннатнинг сўзлари Қодирнинг нафсониятига теккандек бўлди: гўё уни қўрқоқликда айбларди. У изоҳ беришга мажбур бўлди:

— Акам туфайли гап тегишидан чўчисам аллақачон ундан тониб, ўқишимни давом эттирган бўлардим. Отасидан тонган, эридан чиққанлар камми? Биттаси Мушаррафмиди?— «келинойи» дейишга тили бормади,— Йўқ! Акамнинг ёмон одам эканига мени ишонтирмагунилича мен ҳам тинчимайман. Афсус, бу йилги отпускам ўтиб бўлган. Бўлмаса ўзим борардим. Энди ишдан жавоб беришлари қийин. Бутун қишлоқни шу ёз электрлаштириб, ҳар уйга радио туширишимиз керак. Иш кўп. Қўл тегмайди. Ҳали ойдинда ҳам ишламасак деб турибман.

— Хафа бўлманг, Қодиржон, сизни айблаётганим йўқ. Қани ҳамманинг ҳам укаси сизга ўхшаган бўлса! Акангизга жабр бўлганидан куйиб айтдим.— Жаннат узр сўрагандек мулојим гапирди.

— Майли, келинойи, сиз боринг. Мен бир яхши адвокат топиб маслаҳатлашай, лозим топса бир ариза ҳам ёздириб олай, зора акамнинг иши ўнгидан келса.

— Зора! Олма пиш, оғзимга туш, деб ўтиришимиздан фойда йўқ, вақт ўтади.

Жаннат бу фикрни Қобилжон орқали Содиққа ёзди. Содиқ Москвага арз қилиб борувчининг ўз қўлига берадиган «маслаҳат калити» борлигини уйга маълум қилди. Демак, Жаннат аввал унинг олдига бориб шу калитни олиши керак. Жаннатнинг Содиқ олдига боришини эшишган Адолат хола: «Жон болам, мени ҳам

олиб кетинг, беш куним борми, йўқми, Содиқжонни қўриб келаман»,— деб туриб олди.

— Харажат икки бўлади-да, ойи.

— Йўқ, жон болам, ундан деманг. Улимлигимни сотсам ҳам бораман, қарз ҳавола қилсан ҳам бораман, боламни жуда соғиндим. Кўрмай кўзимни юмсан, гўримда тик тураман. Зомин бўлманглар!

«Жонболам хола» масалани шундай кўндаланг қўйгац әдики, уни на Қодир, на Жаннат рад эта олди. Рози бўлишиди.

— Унда Маратни ҳам ола кетамиз, дадасини кўриб келади,— деди Жаннат, кейин Маратга тегишиди:— Да-дангни танийсанми?

Марат «ҳа» деб юрганича уйга кириб кетди, салдан кейин дадасининг суратини олиб чиқди:

— Мана дадам! Мен худди дадамнинг ўзиман. Катта бўлганимда мен ҳам дадамга ўхшаб кўп соч қўяман, шунаقا галстук тақаман.

Марат кўзи уйқуга кетгунча дадасини қанақа қилиб қучоқлаши, нималар дейишини гапиравериб, ҳамманинг миясини қоқиб қўлига берди. Ухлади-ю, оғзи тинди.

— Бугун Содиқжоннинг қулоғи тоза қизиди,— деди Адолат хола,— бола бечора, сен ҳам бизларни тоза соғингандирсан. Маратнинг бийрон тилини эшитиб, севинчдан юраги ёрилиб кетади боламнинг. Худди дадасининг ўзи Марат! Дадаси ҳам тез гилга кирган эди. «Юмшоқ»га тили келмасдан «ҳушмоқ», «ҳушмоқ нон беринг» деб юрарди. Юмшоқ нон танқис экан-да ўша вақтда. Ҳа, болам, мана энди қаёқларда юрибсан: тилингдан қоқилдингми, оёғингдан қоқилдингми — билмасам! Сенга қасд қилганинг ўзи паст бўлсину, сен тойчадай кишинаб эшикдан кириб кел, илоҳим!

Содиқ олдига боришлирини эшитган Икром ота дам олиш куни Маратга тенг кенжа набираси билан келиб, узоқ ўтириди. «Йўл харажатига» деб бир оз пул ташлаб кетди. Адолат хола ёки Жаннатнинг қаршилик қилишини билиб, олдини олди:

— Бу ўзимнинг омонат кассадаги пулимдан. У ерда ҳам туради, сизларда ҳам. Еб кетарга эмас. Содиқжон келганда қанақа қилиб олишни ўзим биламан: проценти билан! Қўлимни қайтарманг!

— Илоҳим айтганингиз кёлсии, Содиқжон келиб, ўз

қўли билан қайтарсин. Болам албатта қайтаради. Бироннинг ҳақидан ҳайиқадиган йигит.

— Қайтармаям кўрсин-чи, нақ... — яна кулгига олди ота.

— Урасизми? — бирдан гапга аралаши Марат.

— Ҳа, бўлмасам-чи, қулоғини кесиб оламан.

Икром ота хайрлашиб, эшикдан чиқар экан, қўлидағи неварасига деди.

— Оёғингиз билан юрмайсизми, ўғлим?

— Ҳо, ботинкам жий бўсинми.

Қулишиб хайрлашдилар. Икром ота то муюшдан бурилиб кетгунча Адолат хола, Жаннат ва Марат учаласи орқасидан қараб туришли.

— Барака топкур, туққандан афзал,— деди хола кўча эшикни юзига ёпаётуб.

Эртасига Содиқдан хат келди. У соғлиғи яхшилигини баён қилгандан кейин, турган ерининг ёзи беш кунликкина эканини, ҳадемай совуқ бошланиб, изғирини ғашга тегадиган бўлиб қолишини ёзарди. Жаннат буни, йўлга чиқсанглар тезроқ отланинглар, бўлмаса совуқда қийналиб қоласизлар, деб тушунди, йўл ҳозирлигини тезлатаб юборди.

Вокзалда Адолат хола ўғлига: «Қодиржон, бор-йўғингни бизга шилиб бериб қўйдинг, иссиқ-совуқдан қийналиб қоласанми, болам!» — деб бағрига босиб ўпди, ҳали эсини танимаган боладай алланималарни тайинлади. Поездга кузатиб чиққан Икром ота билан Қодир узоқ қўл силтаб туришли. Поезд жилиши билан, Адолат холанинг бағрида нимадир узилгандай бўлди, сабабсиз йиғлади. Эртасига ўзини тутиб олиб, неварасини дадаси билан кўришишга тайёрлаб, турли сўзлар уқтириб, кун ўтказди. Ҳамма нарсага қизиқаверадиган Марат поезд ойнасидан кўрган, одамлардан эшитган нарсаларини сўрай бериб, бувиси билан аясининг энка-тингасини чиқарди. Унинг саволи ҳеч тамом бўлмас эди.

— Сен ҳам чарчайсанми ўзи? — деди кулиб Жаннат.

— Чарчаш нима, ая?

— Чарчаганда киши жим ўтиради, ёнбошлаб дам олади.

— Ана, бўлмаса бувим чарчабдилар,— у ётган бувини кўрсатди.— Буви, нега чарчадингиз?

Марат бўлмаганда шунча кунлик йўлда қайнайа-келин диққинафас бўлиб кетишарди. Марат эрмак бў-

либ, кунлар ўтганини билмай қолиши. Марат ухлаганда купе болалари тарқаган синфга ўхшаб қоларди.

Кунлар ўтган сари поездда одам сийраклаши. Марат билан ўйнашиб келган ҳамкупелар ҳам тушиб қолди. Бири эсдалик қилиб ўқиб келаётган «Крокодил»ини ташлаб кетди. Қувониб олиб қолган Марат, ўша заҳоти:

— Вой, бундаги одамларнинг ҳаммаси қийшиқ-ку, бунақа китоб менга керакмас,— деб эгасига қайтариб берди. Жаннат таржимасидан унинг гапини тушунган қўшни қаҳқаҳ солиб кулди, «Молодец, мальчик! Тўғри айтасан, бундаги одамлар ярамайди»,— деб, ўрнига ён чўнтағидан «Огонёк»ни чиқариб берди:

— Бу-чи, яхшими?

Марат тезда икки-уч бетини очиб, боши билан маъқуллади.

Поезд еттинчи куни эрталаб сердараҳт ўрмонни иккига ёриб кириб кетди. Манзилга етганда улар билан тушган тўрт-беш кишидан учтаси ҳарбий формадаги эди. Жаннат улардан бирига мурожаат этиб, қўлидаги адресни кўрсатди.

— Ҳозир машина бўлади, бирга олиб кетаман,— деди бир ҳарбий. Қейин кулиб Маратга гап қотди:

— Хўш, йигитча, бу ёқларда нима қилиб юрибсан? Оқ айнқуни кўргинг келдими?

Марат ётсираб бувисининг этагига ёпишди. Хижолат тортган Жаннат:

— Нега қочасан,— деди қўлидан ушлаб,— дадангнинг командири-ку бу киши!

Жаннат гарчанд ўйламасдан айтиб юборган бўлса ҳам аслида башорат қилган эди. У ҳарбий чиндан ҳам ўша лагерда ишларди. Шунинг учун уларни ўзига келган усти ёпиқ юқ машинасида лагерь дарвозасигача олиб келиб туширди. Мехрибонлик қилиб, келувчилар учун ажратилган махсус хонага жойлаштириди. Қейин ичкарига кириб кетиб, анчадан кейин бир аскар билан чиқиб келди:

— Энди сизлар дам олинглар, йўлда чарчагансизлар. Мана бу йигитчани иссиқроқ кийдириб қўйинглар, шамоллаб қолади,— деди у Маратни кўрсатиб.— Мен ҳам бориб нафасимни ростлай. Қўчқоров ишда экан, кечқурун қайтади. Нима ишинглар бўлса мана шу навбатчига айтинглар. Хайр!— ҳарбий орқасига бурилар

экан, навбатчи аскарга алоҳида тайинлади:— Сиз булардан хабар олиб туринг. Мен у ёнини гаплашиб қўйдим.

— Хушфеъл одам экан!— деди унинг орқасидан Адёлат хола ишларининг енгил кўчганини кўриб. Ахир кела-келгунча «Ҳали қандай топамиз? Қаерда сарсон бўламиз? Кимнида турамиз?» деб, озмунча ташвиш тортганмиди!

— Боламнинг обрўйи бу ерда ҳам яхшига ўхшайди, Жаннатхон. Елиб-югуришларини кўринг.

Ахийри Содиқ ҳам келди. Колонна олдида келаётган Богун меҳмонларга кўзи тушди-ю, қандайдир ички бир ҳис билан, уларнинг кимлигини фаҳмлади, орқада келаётган Содиққа хабар қилди:

— Келишибди!

Содиқнинг юраги бирдан гурсиллаб уриб, одамлар орасидан олдинга ўтди.

— Ана дадаси!— деди бошлаб пайқаган Жаннат.

— Қани? Қани?— деб шошиб қолган «Жонболам хола» ўғлини айриб ололмас, олазарак бўлиб қидиради.

Содиқ Адолат холалар назарида йил бўлиб кўринган ярим соат ичиде кийим-бошларини алмаштириб, кулганича чиқиб келди. Қувончини ҳам, йиғлашини ҳам билмай титраб турган онасининг бағрига ўзини отди. Она «Болагинам!» дейишдан бўлак сўз айттолмасди. Үғли билан узоқ кўришди, елкаларига қоқиб, пешонасидан қайта-қайта ўпди. Навбат Жаннатга келганда бир зумгина сокинлик рўй берди. Содиқ шошиб қолган, қандай кўришувини билмас, қучоқлашай деса, ойисидан ниманади, қўлини бериб қўя қолай деса, Жаннат гўё, «Ҳали оқибат шуми? Балли!» деб ўқсиётганга ўхшайди. Йўқ, бу мушкулотдан Жаннатнинг ўзи қутқарди. Онаси қучоғидан бўшаган Содиқнинг иккиланмай елкасига қўлини қўйди, кўзи ёшли бўлса ҳам тетик сўрашди.

Марат бир четда тортиниб туради. У ҳайрон, нима бўлаётганини тушунмас эди. Бувиси «Болагинам!» деб ўйғлаб кўришайтган киши унинг шу кунгача хаёлида суратини чизиб келган одамга ўхшамас эди. Уйда дадасининг расмини кунда кўрарди. Унда дадасининг соchlарни текис қилиб таралган, бўйнида чиройли галс-

тук, эгнида янги кўйлак, костюм. Бувиси, аяси билан кўришашётган киши эса бутунлай бошқача.

Жаннат Содиқ елкасидан қўлини олиш билан Адолат хола ҳамон бўзрайиб, этагига ёпишиб турган Маратга:

— Ана даданг! Кўришмайсанми? Ачом қўлмайсанми? — деди ва Маратни ўзидан айирган эди, у Содиқнинг бағрига отилиш ўрнига, «Ая!» деб Жаннатга ёпишди, юзини бекитди, зум ўтмай ҳурковчи кийикдай қиялаб қаради.

— Ҳе, уяти йўқ! Кини дадасидан шунаقا қочадими?

Содиқ арзанда ўғлини ортиқча хижолатда қолдирмаслик учун бир қадам олдинга юриб, уни бағрига олди, юзларидан ёшли шўр лаблари билан ўпди, тик турғизиб арчадек бўйларига боқди, яна бағрига босди. Энди Марат ўзини четга олиб қочмас, дадасининг соғинчи — меҳрини болалик идроки билан ҳис этиб, ўз ихтиёрини унга бериб қўйган эди. Дадаси эса, тилаб олган ўғлининг дийдорига тўймас, териси қалин тортган қўллари билан бошини силар, бу сийпаш ҳорғин қалбига ором бахш этарди. Буларнинг барчаси унинг учун камдек, ингичка, ёқимли товушини эшитгиси келиб қолди:

— Қани ўғлим, «дада» дегин.

Марат дадасиникига ўхшаган кўзларини жавдирашиб гоҳ бувисига, гоҳ аясига қаради. Жаннат аяси унга ёрдамга келди:

— Айт, ўғлим, қани бир дадажон дегин.

— Айт, болам, айта қол, ўзингнинг даданг-ку! Кунда суратга қараб тавоб қилган дадажонинг-ку.

Содиққа ўғлининг ётсираши оғир ботмади. Чунки унинг қархисида бўйи чўзилган, кийим ярашган, ҳатто уялишни ҳам биладиган ўғли турар: у бир вақтда ҳам ғурур, ҳам ўқинч бахш этарди. Охирги марта эшик олдида хайрлашгани кўз олдига келди: бундан кейин узоқ вақт кўришолмасликларини сезгандек, шу ўғли митти қўлларини қанот қилиб ёзиб, унга талпинган эди.

Содиқ Маратнинг бошини силаб туриб, кўзи Жаннат билан учрашди.

Жаннатнинг ҳам чеҳрасида Содиқ ҳеч қачон кўрмаган шундай жозиба бор эдикни, бундай жозиба одатда одам бахтини топганда пайдо бўлади. Жаннат ҳозир буни яширишга қанчалик уринмасин, бари бир, шамол

еллиган шамдек лопиллаб, ёрқинроқ кўринарди. Бу ҳусн таънадек туюлиб, Содиқ мана шу маъсум аёл билан бир қанча йил ҳаёт кечирганини, кейинчалик қандайдир ўткинчи ҳисга берилиб йўлдан адашганини, оқибатда шу покиза хотин азият чекканини хаёлида бир-бир тиклади. Қаршисида бошини сал қуий солиб ўтирган маъсума хотиннинг кўз ёшлари, аччиқ аламлари, изтироб алангалари эвазига, ўзининг поймол бўлган файзи-ҳаловати, асабий титроқлари эвазига орттиргани Маратни ҳисобга олмаганда, иложини топса, ўша адашган дамларини умри ҳисобидан жон деб ўчириб ташларди. Эсласа юраги орқага тортиб кетадиган ўша кунларнинг ширин ёдгори шу азамат Марат. Бадбахт онадан туғилган бу бегуноҳ фарзанд, ана шу бир парча эт, бир дона тирноқ учун неча йиллаб заҳмат чеккан, қайтурган, қон ютган бир меҳрибоннинг, бегараз, чин бир меҳрибоннинг тиззасида осуда ўтирибди. «Ким мени орзу қилиб зардоб ютган эди-ю, кимдан дунёга келдим, ҳозир мени эркалаётган, меҳрини дарё қилиб оқизаётган бу хотин ким!» дейиш унинг эсига ҳам келмайди. Табиатнинг мӯъжизасини қарангки, бола Жаннатга тортиб, унга ўхшаб кетибди. Бу унинг меҳри туфайли эмасмиик?

Содиқ шу хаёллар оғушида экан, маҳалласида бўлган бир гайри табиий воқеа эсига тушди.

Унинг дунган қўшниси бор эди. Ўзи мўмин-қобил, бефарзанд эди. Кўчанинг нариги бошида ёшгина бир келиннинг кўзи ёриди, сал ўтмай ўзи нобуд бўлди. Омон қолган мурғакни эр-хотин дунган икки ойлигига олиб асрари. Бола йиғлоқи эди, раҳми келган қўшни кампир «сўргичингиз ўлсин, минг қилса ҳам резинка, ундан кўра кўкрак солинг, ҳар нарса бўлса ҳам она тўши» деб маслаҳат берди. У шундай қилди. Бир куни қараса, қизи чўлпиллатиб эмяпти, кўкрагига сут келибди! Қизчадан хабар олиб турган врач табиатнинг бу мӯъжизасидан ҳайрон қолди. Шунда ўша маслаҳат берган кампирнинг ўзи: «Бу меҳрдан, айланай, яхшилар, астойдил меҳр қўйганидан»,— деган эди. Қизча юриб кетгандан кейин бундоқ қарашса, худди унинг ўзгинаси, дунган қиз бўлибди-қўйибди.

Содиқ бир лаҳзада шуларнинг барчасини хаёлидан нур тезлигига ўтказиб, Маратнинг Жаннатга ўхшаб кетганининг боисини ҳам худди ўша доно кампир айтган

ҳикматда кўрди. Киши қаҳри тошни ёргандай, меҳри темирни эритади!

Жаннатнинг меҳрибонлигидан шу лаҳзада қувониб кетган Содиқ ҳазиллашди:

— Ойи, неварангиз Жаннатга ўхшаса ҳам, лекин қулоғи ўзимники, супрадаккина. Уни қаранг, орқасида-ги чироқ кўриняпти.

— Боланинг қулоғи бевақт кўчириб қўйилса, шуна-қа шалпангроқ бўлади. Сал эт қўйса билинмай кетади. Бу йил бўйига ўёди, шунинг учун ориққа ўхшаб туриби-ди,— деди Адолат хола Маратнинг қулоқларига қа-раб.— Икром ота пешонасининг кенглигини сенга жўя-ди. Ҳа, ростдан ҳам Икром отадан оласинг бор экан, келтириб берди. Ўша қамалган кезларингдаёқ берган эди.

— Ҳеч қанақа қарзи йўқ эди!— деди Содиқ ҳайрон бўлиб, кейин тагига тушунди: демак шундай йўсун билан кўмак берган! Содиқ маъноли қилиб бошини чай-қади. Буни она ҳам, Жаннат ҳам пайқади.

— Қарзи бўлмаса, яхши кунларида қайтарарсан, болам. Шу келишимизда ҳам «йўл харажатларингга» деб, бир оз пул берди. Қачон бўлса «элнинг юкини ен-гил қилиб юрган азамат эди!» деб сени тилга олади. Кўп меҳрибон одам.

— Дада-чи, дада, ўша киши сизнинг қулоғингизни кесиб олармиш!— бирдан гапга аралашди Марат.

— Нега?— кулди Содиқ.

Хола бўлган воқеани ўғлига айтиб берди. Маратнинг ширин тилидан ийиб кетган дадаси уни яна бафрига олиб эркалади:

— Қулоғимни кестирмайман, ўғлим, қарзини албат-та бераман. Бироннинг пулини еб кетган, ёмонлик қил-ган кишининг қулоғини кесадилар. Сен билан биз ёмон-лик қилмаймиз, тўғри яшаймиз.

— Нега сочингизни олдириб ташладингиз, дада?— Бу савонни Содиқ эшифтади. Унинг хаёли ёмон кунида яхшилик қўлинини чўзган Икром отада эди. Уни жуда ях-ши эслайди: соддагина кийиниб юрадинган, камгап, сер-фирқ одам эди. Қоматли чўққи соқоли ўзига шунақа ярашар эдики, ношуд сартарош сал кемтик тараашласа, ҳусни бузилаётгандек бўларди. Ўзи ҳам хушфеъл, вазмини чол. Қўш-қўш азамат ўғиллари, қизлари бор. Фарзанд-лари: «Бўлди, дада, энди ишламанг, оёғингизни узатиб

«Тинг»,— деганда, «Тинч турган сув бузилади, оқиб турғани яхши!»— деб кўнмаган, ҳавасга дарс берарди. Мактабга ҳам пиёда келиб, пиёда кетарди. Бир куни Содик:

— Трамвайга тушсангиз бўлмайдими? — деб тегишка.

— Буни нимага бериб қўйибди? — деди кулиб ва иккала оёфини кўрсатди,— буни ҳозир минмасам, қачон минаман.

— Улгудай хасиссан-да! — тегиши тенгдош ўртоғи.

— Ҳа, мен пулга, сен соғлиғингга хасиссан. Туппатузук юриб турган йўргани қантара бериб, оёғингга ел тўйчириб олдинг,— деди Икром ота ўртоғининг хассага сўянганига ишора қилиб,— юришда гап кўп, дўстим.

— Азроил эшигинг турмини қоқиб турганда-я?

— Азроил... Мен подачиман, ҳаммадан кейин бораман,— деди яна кулиб Икром ота.— Азроил сенга ўхшаб ўтирганинг ушлайди, менга етиб бўлти! —

— Икром ота шунаقا чол эди.

Содик шуларни эслаб туриб сўради:

— Икром ота анча қариб қолгандирлар.

— Йўқ, ҳали тетиклар,— деди Жаннат.

— Ишлаб турибдиларми?

Буни Жаннат билмас эди, она жавоб қилди:

— Бе, қаёқда, болам! Сендан кейин Мирсалим ўлттур мактабга сиғдирмади, бўшаб кетганлар.

— Ишляптилар шекилли? — гапга аралашди Жаннат.

— Бошқа мактабда.

Мирсалим исмининг гапга аралашуви холанинг тилини қичитди:

— Лайча деб қопоғон кўппакнинг бошини силаб юрган экансан, болам!!

Шу билан Мирсалим тўғрисидаги гап тугади, ҳеч кимнинг у ҳақда гапиргиси келмас эди. Содик мавзууни яна Икром отага бурди:

— Яна кейин эсимдан чиқиб қолмасин, мендан Икром отага кўпдан-кўп салом айтинглар.

— Айтаман, жон болам, албатта айтаман. Тез-тез келиб турадилар. Кўчада кўрсалар ҳам тўхтаб ҳаммани сўраб чиқадилар. Бошлаб сени сўрайдилар. Йинай-кейин, кечаси қоронгилатиб келиб-кетадиган битта-иккита ўртоқларинг ҳам бор, исмларини билмайман.

- Ҳаммасини борганимда кўрсатасиз.
- Албатта кўрсатаман, болам.
- ӽашанда исмларини сўраб бераман, билиб оласиз,— ҳазил қилди Содиқ.

— Исмларини билмасам ҳам, барака топишин. «Хафа бўлмай ўтиринг, кампир», деб кўнглимни кўтаришади. Ўтган куз-ку, биттаси бир машина саксовул юборибди. Маза қилиб қиши билан ёқиб чиқдим, бечорани шундоқ дуо қилдимки... Ишқилиб, болам, бир куннимиз ўтиб турибди, нолисам ноинсофлик бўлади. Факат сен йўқ. Ҳар куни дастурхон устида бир йиғлаб оламан.

Шундай азamat ўғли турганда ҳеч кими йўқдек бирровларнинг кўмагидан миннатдор бўлганидан ўпкаси тўлдими, холанинг кўзларидан икки қатра ёш силқиб чиқиб, юзини чизиб тушганича лабининг тепасидаги чуқур ажинда туриб қолди.

— Кўйинг, йиғламанг!— ўзини зўрлаб кулди Содиқ. — Мана олдингизда ўтирибман-ку. Яқинда бўшаб қоламан. Жаннат Москвага ўтаман деяпти ишқилиб...

Жаннат пастки лабини қаттиқ тищлаб ўтиради. Унинг бу одати Содиқга таниш, буни у юраги жуда сикилиб кетганда қиласди.

Хола ўпкасини босиб яна гап бошлади:

— Иннайкейин,— Жаннатни кўрсатди,— мана бу умрингдан барака топкур, кечаю кундуз биз билан. Қизимдан аъло. Бу бўлмаганда ғам мени еб, адойи тамом қиласди.

Хижолат тортган Жаннат бошини қўйи солди. Содиқ тишини тишига босди. Онаси гапирган бу гапларни у хатда ўқиган бўлса ҳам, шу маҳал Жаннатнинг қаршиисида алланечук бўлиб кетди. Ахир бир маҳал қаттиқ гапириб, дилига озор бермаган бўлса ҳам, уни қўйиб, ёш хотин олган, ўз орзусини ўйлаб, уни қаттиқ ўкситган эди-да! Мана ўша хотин онасига меҳрибонлик қилиб, тирик етим ўғлининг бошини силаган. Мана бугун бўлса уларни бошлаб келиб ўтирибди.

Содиқ гапни чалғитмоқчи бўлиб, онасининг мусичаларидан гап очган эди, суҳбат яна Мирсалимга бориб тақалди.

— Мирсалим жувонмарг бўлгур ҳовлимизни тортиб олгандан бери у томонларга ким ўтибди дейсан. Шу кун-

ларда яна иккитаси айвонга қўниб, уйга кириб юрибди. Ушаларми — билмадим.

— Худди ўшанинг ўзи, ойи,— тасдиқлади Жаннат.

— Бўлса бордир. Мирсалим тулкинико мусича турдими!

Яна суҳбат қовушмади, Мирсалим номи аралашган сари охири дилхитликка бориб тақаларди.

Лекин салдан кейин гап қовушиб кетди. Қодирнинг иши, Мушарраф фожиаси, турган шаҳарларининг обод бўлиши, об-ҳаво, пархи наво — ҳаммаси ҳақида гаплашдилар.

Ана шунда соғинчнинг ҳоври бир оз кўтарилигандек бўлди. Марат ҳам энди Содиқдан ётсирамас, дадажонининг тиззасида оёқларини ликиллатиб ўтиради.

* * *

Жаннат гапни ўз шахсий ишларидан четга олиб қочмоқчи бўлса ҳам, бари бир, Содиқнинг кўнгли ҳамон хижил, ҳамон ўрнига тушмас эди. Агар кўнглидагани очиқ-оидин айтиб, юрагини бўшатиб олмаса, армон бўлиб қолиб, янаги кўришгунларича ич-этини еб юришини биларди. Уни қўрқув аралаш шодлик босарди. Қўрқув шундан эдики, Жаннатнинг маъзурини эшитгани йўқ, балки маъзур тутмас. Бу қора кунлар ўтгандан кейин, «мен ўз инсоний бурчимни ўтаб, ҳақ жойини топишда сизга ёрдам бердим, лекин ўша гуноҳингизни кечиролмайман» дейиши мумкин. Жаннатга ўхшаган хотинлар қўлидан бу иш келади. Бу эса, Содиққа ўлимдан оғир, то сўнгги дамигача кўнглини хижил қилган, қалбини эзган армон бўлар эди.

Бу фикр Содиқнинг хаёлидан кетмади, соатлар ўтган сари парма бўлиб чуқуроқ кириб борди. Ана шундан кейин Жаннат билан албатта гаплашишга қарор қилди. Ўғлининг худди шу фикрини кўзидан уқсан Адолат хола неварасини етаклаб, «шамоллагани» чиқиб кетди. Жаннат қайнанаси олдидагина ўзини дадил туваётган эканми ёки шу гапнинг очилиб қолишидан эҳтиёт чораси қўраётган эканми, у чиқиб кетиши билан хомуш тортиб, бошини қўйи солди. Содиқ учун бундан қуляй вақт йўқ эди, бутун кучини қалбига йиғиб, унинг ёнига сурилди, лекин бетига қаролмади.

— Жаннат, сен мени кечирасанми, йўқми — билмай-

ман. Лекин сенинг бу яхшиликларингни қайтаришга умрим етмаслигини биламан. Мен сендан ўла-ўлгунча миннатдорман. Бу олижаноблигинг ҳаққи-хурмати, ўғлим Марат сеники. Омон қайтиб борсам, қабул қилсанг ўзим ҳам...

Жаннат бундоқ қараса, Содиқнинг ўпкаси тўлиб боряпти, ҳали-замон йиглаб юбориши мумкин. У умріда эркак йиғисидан қўрқади—эркак бағри сув бўлиб әзилиб оққанда йиғлайди. Буни эса, Жаннат сира ҳам истамас эди, айниқса Содиқдек кишининг кўз ёшини кўриш унга ўлимдан қаттиқ. Шунинг учун ўзини тутиб, ҳазилга олди:

— Ўзингизни қабул қилмасам, ўғлингизни олиб қўясизми?

Содиқ буни жиддий тушунди, шу пайтда ҳазил бўлишига у ишонмасди:

— Йўқ! Йўқ, бундай деб тушунма! Марат сеники, умрбод сеники! Ота бўлиб унга нима қилдим. Уни тарбия қилаётган сен. Мен сенинг олдингда айборман. Бирор нарса дейишга ҳақим йўқ. Ҳатто кечирим сўрашга тилим бормайди.

— Йўқ,—деди Жаннат, гўё ўтган ҳамма гапларга якун ясагандек жиддият билан,—мен бу ерга сизнинг гуноҳингизни кечирсаммикин-кечирмасаммикин деб келганим йўқ. Ўтган-кетган гапни қўйинг. Ўзингизни ўйланг, тезроқ қутулишни ўйланг. Менинг нима ёрдамим керак бўлса, айтинг, тортинманг, керак эшикни қоқай, турми бузилгунча қоқай!..

Қолган вақт ичида улар шу ҳақда кешишдилар.

Орадан уч кун ўтгач, Адолат хола ўғли билан хайрлашар экан:

— Болам, энди кўришамизми, йўқми, ким билади. Кўришмасак, берган оқ сутимга мингдан-минг розиман,— деб кўзига ёш олди.

— Нима деяпсиз, ойи, албатта, кўришамиз. Мана, келинингиз Москвага тушади. Москвага бориш деган сўз, ҳақ жойини топади деган сўз!

— Илоҳим шундай бўлсин...— ўзини тутиб олиб деди хола. Кейин Содиқни бир четга тортди.— Энди нима қилганда ҳам мен қариб қолдим, болам, кузакдаги сариқ япроқман, сал шамол турса чирт этиб узилиб кетишим ҳеч гапмас. Шунинг учун сенга битта илтимосим бор.

— Хўш, хўш! — жон қулогини тутди Содиқ ҳам шивирлаб.

— Жаннатни энди хафа қилма. Унга тез-тез хат ғизиб тур.

— Хўп, ойижон, хўп!

— Умридан барака топкур, топилмас жувон. Ўғлингни ҳам унинг ихтиёрига бериб қўйганман.

— Майли! Майли!

— Онасидан аъло. Ширин сўзингни ундан аяма.

— Хўп, ойижон, хўп.

Икки кундан кейин Жаннат Адолат хола билан Маратни проводникка тайинлаб, ўзи Москва поездига ўтиб ўтириди.

12. ҚОЧОҚЛАР

Икки ҳафтадан кейин Содиқни этап рўйхатига тиркадилар.

Лагердан лагерга кўчириб туриш аслида одат, лекин у кўчадиган одам учун ташвиш: ҳеч ким «иссиқ жойини» совутгиси келмайди!

— Қаерга экан, эшитмадингми? — папирос тутатаётуб сўради Богун. Унинг ҳам миясида Содиқники сингари ўйлар кезиб юргани кўзидан аён эди. Содиқ елкасини қисди. Шу маҳал яна кўч кўтарган кишилар кўринди. Улар бошқа бригада, бошқа бараклардан эди. Улар орасида Диловархўжа ҳам бор экан, Содиқни кўрди-ю, қоқилсам, тутиб қоладиган бор экан, дегандек, яшнаб кетди. Этап бўлишини эшитгандан бери юрагини босган ваҳимани унуди.

— И-е, Содиқжон. Сиз ҳам шу ердамисиз? Майли, майли, яхши бўлибди, бир-биримизга ҳамроҳ бўламиш.

Содиқ жавоб бергунича йўқ эди:

— Юкларингни қўлларингга олинглар! — деган буйруқ бўлди.

Бир соатдан кейин этапга чиққанлар икки вагон бўлиб, поезд жўнашини кутарди. Содиқ, Богун, Диловархўжа бир купега тушди. Диловархўжа мамнун эди.

— Омадни қаранг, Содиқжон, ниятимиз бир-да, яна биргамиз. Қаёққа олиб боришар экан, билмадингизми? Узоқ эмасмикин?

— Билмадим. Юртимиздан чиқиб кетмайсиз.

— Чиқаради дейсизми!

— Рози бўлса чиқиб кетармидингиз? — ўсмоқчилади Содиқ. Диловархўжа сир бой бермади:

— Сиз-чи?

— Ўзини билган одам учун муҳожирлик ҳам лагердай гап. Бегона қўрага қириб қолган итдек доим думинг қисиқ.

Диловархўжа тили билан ҳеч нарса демаган бўлса ҳам, Содиқнинг бу жавобига дилида қўшилмади. У чет эл деганда Афғонистон билан Туркияни тушунарди, холос. Ўзи кўрмаган бўлса ҳам, эшитган, ўша ўқ отиб юрган йиллари эшитган.

— Сиз шунаقا дейсиз-ку, четда жилла бўлмаганда, мана булари бўлмайди,— Диловархўжа соқчиларни кўрсатди.

Содиқ хандон солиб кулди:

— У ердагисини кўзингиз кўрмайди, холос, бўлмаса ҳар қадамингизни шунаقا санаб юрадики, асти қўявенинг!

— Бе! — ҳайрон қолди Диловархўжа.

— Ундан кейин, бегона юртга кўниши учун мушукдан баттар бўлиш керак киши. Ахир мушукни ҳам бегона уйга элтиб қўйсангиз қочиб келади-да!

— Қочади! Қайтиб келади! — гапнинг тагига тузук тушунмай унга қўшилди Диловархўжа.— Болалигимда бир мушугим бор эди, адаштиrolмай ўлганмаи, охири ўрага ташлаб қутулганман.

«Тошибағирлик қўндоқда теккан касал экан сенга», дегандек Диловархўжанинг мўйловга ўхшаган бароқ қошига қараб қўйди Содиқ.

Поезд шу кетганича манзилга етиб бора қолмади, икки ерда узоқ тўхтаб қолди. Борадиган ерлари номаълум ва қисталанг бўлмаса ҳам, маҳбусларнинг хитини чиқариб юборди.

— Этапнинг мана шуниси ёмон, қонингга ташна қиласди! — деди Богун ирғиб ўрнидан туриб. «Ўзи бу ер қаер?» дегандай, ташқарига қаради, ҳеч нарсани кўрмади, жойига ўтирди.

— Юрагингни кенг тут, дўстим. Етиб борармиз ҳам, у ер ҳам жонга тегар. Оёғингни узатиб дамингни ол! — деди Содиқ.

Богун Содиқ табақасидан: айбсиз айбдор. Юраги тору, ўзи ҳақгўй. Содиқ билан иқи чиқишиб қолган. Ҳаммадан унинг сўзини маъқул кўради. Жаҳли чиқишиб

турганда ҳам мовий қўзларини пириллатиб унинг хоҳишига кўна қолади. Ҳозир ҳам шундай бўлди. Аламини маҳоркадан олди.

— Ҳей, дўстим, бу чекишингда мени элтиб қўясанку, сал эви билан чек-да!

— Мазасини билмайсан, бир тортгин, бутун дардингни ичингдан суғуриб олади.

— Раҳмат! Ўзингга буюрсин.

— Ана шу-да, ишонмайсан. Мана, бир торт! Лаънатини ақлли одам топган.

— Қелинг, қўлингиз қайтмасин!— деди Диловархўжа ва Богуннинг қўлидан ўрта бармоқдек қилиб ўралган маҳоркани чилимга ўхшатиб узоқ тортди. Тутунини бурнидан бурқатиб чиқарди:— Бай-бай-бай! Ўзимизнинг жайдари тамакига ўхшайди. Қаёқдан топдингиз бунақа бир тортганда қулатарини?

— Хотиним юборган. Узи экибди.

— Эрим кўп тажанг бўлавермасин, хуморини ёзиб турсин деган-да,— деди Содиқ тутунни ҳайдаб.

— Хатида ҳам, сенинг учун экдим, дебди.

— Қани шунга жиндай наяқидан ҳам қўшсанг— оромижон-да!— Диловархўжа ўтган кунларини — мис қоплаган чилимига наша солиб чеккан кунларини эслаб, қўзини сузиб қўйди.

— Ўлдиради-ку кишини!

— Аксинча, ўпкадаги қуртларни ўлдиради.

— Ие, дорининг бунақа хили ҳам бор денг!— мазах қилди Содиқ.

— Мен-чи,— деди Богун,— хотинимнинг шу олижаноблиги учун қайтиб борсам беш йил қўлини совуқ сувга урдирмас эдим!

Содиқ Богуннинг эриб кетганидан ҳазилга олди:

— Овқатни ҳам ўзинг пиширалидинг?

— Ўзим пиширардим!

— Болаларингни ҳам ўзинг ювиб-тарарлидинг?

— Ювиб-тарардим!

— Кир ҳам юварлидинг?

— Ювардим!

— Ана шу ерда сал ошиб кетдинг.

— Нега?

— Эркак ювган кир очилмайди.

— Очилгунча ювардим.

— Қўшниларинг таънасиға қолиб ўлар экансан.

— Нега энди! Хотиним менинг ўрнимда ер чопиб, ариқ олганда индамаган қўшним, мен унинг ўрнида ишласам куладими! Кулсин, нақ тишларини қоқиб оларман!

— У хотин, сиз эркак,— чертди Диловархўжа.

— Ана шунинг учун жўрттага кирини ҳам юваман.

— Бари бир хотининг йўл қўймайди,— деди Содиқ.

— Мана бу бошқа гап! Бунингга ишонаман! Лекин, очигини айтсам, хотинимга жабр бўлиб кетди. Бирор дурустроқ ҳунарга ўқитмаганинг ачинаман. Мен топиб келибман, у ширин қилиб пиширибди, шунга маст бўлиб юраверган эканмиз. Дунёда мана бунақа чигал ҳангомалар бўлар экан-ку! Ҳа, айтгандай, кейинги аризангга ҳам жавоб бўлмадими?

— Йўқ, хотиним Москвага тушиб ўтадиган бўлди.

— Агар сеники шу йўл билан ўнгидан келса, мен ҳам хотинимни сеникининг изидан юбораман. Лекин, Содиқ, билиб қўй, қора кунда топишган дўстлар ажралмас бўлади. Тағин ўзинг биласан-ку.

— Гап битта, Микола, агар мен олдин чиқсан, ишинг билан ўзим шуғулланаман. То қиёмат бир-бири ни унутган номард!

Икки дўст қўл олишди, бунга қаноат қилмаган Богун Содиқнинг бўйнига қўл солиб лабидан ўпди:

— Мен олдин чиқсан ҳам худди шундай қиласман!

Гап маромига бориб тақалган эди. Икки дўст жим қолди, фақат йўлга чиқсан поезднинг «Ҳақ гап! Ҳақ гап!» дегандек фидирлак товуши эштиларди. Ёмонга кун ҳам қорсиги, тун ҳам, дегандек, икки ўртоқнинг са-мимий қасами Диловархўжанинг ғашини келтирди. «Минг қилса ҳам Содиқ ўриспарастлигига боради!» деб қўйди ичиди. Кўзига Богун хунук кўриниб кетди.

Поезд шу йўлга чиққанича фақат катта станциялар-дагина тўхтаб, маҳбуслар вагони ҳеч қаерда узиб олиб қолинмади. Бундан хотиржам бўлган Содиқлар, энди манзилга етиб оладиган бўлдиқ, деб қоронғи тушиши билан уйқуга кетишди. Содиқ бир уйғониб, иккинчи ён-бошига ағдарилганда ҳам ҳали тим қоронғи, кимдир пихиллаб, кимдир чийиллаб хуррак отиб, ҳамма миқ этмай ухлаб ётарди. Лекин Содиқ тонг яқинлигини уйқуси пишиб қолганидан билди. Шундай бўлса ҳам кўзини юмди. Энди кўзини уйқу элтиши билан самолётларнинг жуда паст учганини эшитди. Шу товуш билан

үйғонган бўлса ҳам, ҳеч нарсадан хавотир олмай, «қаерда тўхтаб турибмиз?» деган фикрни хаёлидан ўтказди. Худди шу пайт самолётларнинг шўнғигани, кетидан устма-уст портлаш эштилди. Бу портлаш шундай яқинда эдик, уларнинг вагонини ларзага солди, ойналари чилпарчин бўлиб кетди. Ҳамма бирдан үйғониб, нима гап эканини фаҳмлагуничә бўлмай, яна портлаш, қарс-қурс ҳамма ёқни тутиб кетди. Сал ўтмай яна қайталанди. Шу қайталанишида бир бомба улар вагонининг шундоққина ёнига тушиб, уни издан ағдариб, парчалаб юборди. Содиқ ана шундагина станцияда бетартиб қий-чув бошланганини, аллақаер ёниб, алланималар ағдарилиб тушаётганини кўрди. Тутундан кўз очиб бўлмас эди. Содиқ аввалига нима қилишини билмай кўзи тушган томонга қочди. Жонни сақлаш керак эди. Станциядан чопиб чиққач, кўзи тушган чуқурга ўзини отди. Бу ер назарида уни ҳавфдан сақлай оларди. Шундай бўлса ҳам ўлим қувиб келаётгандек орқасига қараб қўйди. Қоронғи тун эди. Фақат вагонлар ва шу атрофдаги баъзи биноларнинг бурқсаб ёниши теваракни ёритиб туради. Ҳамон станция устида самолётлар доира ясар, пайти-пайти билан шўнғиб, бомба ташлаб турарди. Ҳар сафар портлаш атрофни ларзага келтириб, темир йўл изларини ер бағридан ичакдек суғуриб олиб улоқтирас, вагонларини парча-парча қилиб ташлар, ёндирапар, янги бир қий-чувни авжга чиқарар эди.

Содиқ ўйлар гирдобида экан, кимнингдир ўзига томон йиқила-қўпа чопиб келаётганини кўрди. «Часовой мени қидириб юрибди, шекилли!» деган ўй миясига келиб, маҳбуслигини, вагон қулаши билан бу ёқقا қочганини эслади. Астойдил қочиш нияти йўқлиги, фақат жонини сақлаб бу ерга келгани учун, хавотир олмай жойида тура берди. Лекин елиб келаётган у одам часовой бўлиб чиқмади.

— Ким у? — нидо берди Содиқ.

— Содиқжон, сизми! — дея орқасига қайtdи Диловархўжа. У етиб келиб, Содиқнинг оёғига ўзини ташлади. — Бу ерда нима қилиб турибсиз? Қочмайсизми?

— Ҳа, айтгандек, Богун қаёқда?

— Бирга эдик. Ҳу анави ерга келганимизда бомба гумбурлаб қолди-ю, бир-биримизни йўқотдик.

— Сатқайи одам кетинг! — койиди Содиқ. — Киши шунаقا вақтда ҳам шеригини ташлаб қочадими!

— Тўс-тўполонни кўрмайсизми, сичқоннинг ини минг танга бўлиб кетди.

— Хўп, майли, сиз шу ерда туриңг, мен дарров ҳабар олиб келаман.

— Эй, ушланиб қоласиз.

Содиқ уни эшифтади. Елиб кетди. Олдида бирдан бомба портлади. Үзини ерга отди, яна туриб, Диловархўжа кўрсатган томонга энгашганича югурди.

Содиқнинг бу куйди-пишдилиги Диловархўжага ҳеч ҳам ёқмади: уни қидириб нима қиласди? Ҳозир бирорни излайдиган вақтми? Мендан кўра, ўша сенга азиз экан, у билан қолавер. Мен кетдим. Ҳар кимнинг гўри бошқа, тўри бошқа. Дарё бўлсанг оғимни ювмадим!

Шу хаёллар билан Диловархўжа тўш бериб ётган еридан ирғиб турди. Барини қоқиб, чуқурликдан чиқди. Бир оз елиб кетди. Лекин бирдан тўхтади, қаёққа боришини билмай қолди. «Хўп, ҳозир-ку, қочаман, бир ковакдан бошпана топарман. Қейин-чи! Қейин нима бўлади. Бу томонларни билмасам. Үзи қаердаман ҳозир? Кўрган киши ўша заҳотиёқ ҳиқилдоғимдан хиппа бўғиб, дуч келган милицияга бериб кетади. Қейин нима?

Диловархўжа шахтидан тушиб орқасига қайтди. Богунни минг балога гирифтор қилиб қарғади. Содиқнинг унга меҳри тушиб қолганидан хафа бўлди. Шу вақт ошина қидирадиган пайтми! Үзингни бил, ўзга билан нима ишинг бор? Сенинг бошингга қор ёғса, Богун курагмикин! Тили бошқа, дини бошқа бўлса...

Узоқда икки шарпа кўринди. Булар Содиқ билан Богун эди. Богуннинг кийим-бошлари йиртилган, бош кийими қаердадир тушиб қолган. Диловархўжани кўриши билан ачитди:

— Қойилман! Қуёндан ҳам оғингиз енгил экан. Устимга тушган тахталарни олиб ташланг, деб шунча бақираман...

Диловархўжа Богуннинг чақирганини эшифтган бўлса ҳам, ўз жони кўзига ширин кўриниб, жуфтакни уриб қолган эди. Лекин у қасам ичди:

— Тил тортмай ўлай, эшифтган бўлсан!

Барча соғкўнгил кишилардек, Богун билан Содиқ ҳам бунга ишонишди.

Диловархўжа, хайрнат, ишонтиrolдим, деб енгил нафас олди.

Богун қўлининг шилингандан ерини дастрўмоли билан боғлади. Шунга ҳам шукур қилгандек:

— Анча одам нобуд бўлди,— деб қўйди.

— Нимасини айтасиз, менинг ёнимда иккитаси «мама» деганича ер тишлилаб қолди. Жон ҳолатда устидан ҳатлаб бу ёққа ўтсам, яна биттаси қоп-қора қонига беланиб ётибди. Одам нархи арzon бўлиб кетди. Ўзинима гап?

Богун ҳам, Содиқ ҳам Диловархўжанинг бу саволи-га жавоб беришдан ожиз эди. Вагон қулаб, эсини ўнглаб олган лаҳзадан бери уларнинг ҳам ўзига берган саволи шу эди.

Улар тун қоронғилигида жадаллаб станция атрофидан анча четлаб олишди. Уларнинг баҳтига, станция шаҳарнинг четроғида бўлиб, тонг ёришгунча тошлоқ дала йўлига чиқишга улгурниши.

Тонг ёриши билан уларнинг кўнглидаги саволнинг жавоби ҳам равшан бўлди: Гитлер шартномани бузиб, Совет Иттифоқига уруш очган!

Жумбоқнинг ечилиши уч қочоқнинг энди нима қилишини ҳам белгилаб берди. Қизиқ устида қочишга қочиб қўйиб, «бу ёғи энди нима бўлади?» деб минг бир хаёлда бораётган Содиқнинг фикрини тизгинлади, қатъий қарорга келтирди:

— Модомики уруш бошланган экан, биз учун йўл битта: фронт! Эртага ялпи сафарбарлик бошланиб, ҳар одамнинг жойи фронт бўлиб турганда орқага қайтиб лагерь панжарасидан томоша қилиш ҳам, қочоқ бўлиб бир ковакда моғор босиб ётиш ҳам мен учун малол келади. Арғамчига қил қувват, мен фронтни танладим.

Бу фикр, юртимиз кенг бўлгани билан бу қочоқликда ҳеч қаерга сигмаслик керак, деб келаётган Богунга ҳам маъқул тушди, у иккиланмай:

— Сен нима бўлсанг, мен ҳам шу!— деди.

Фақат Диловархўжа икки ўт ўртасида эди. Мабодо йўқ деса, қаерга боради? Энди нима қилди? Тикали симдан қочиб, ўтга киришга ҳеч тоқати йўқ эди. «Хозирча рози бўлаверай-чи, кейин йўлимни топиб кетарман», деди-ю, илжайди:

— Э, Содиқжон, мендан сўраб нима қиласиз, мен қўлингизда бир парча лойман, истасангиз золдир қилиб думалатасиз, истасангиз сопқонга солиб отасиз. Сиз нима десангиз, шу-да!

Лекин ҳалимдай бўлиб тилёгламалик қилган бу «бир парча лой» ҳарсанг бўлиб Богуннинг бошини еди.

Йўлда бир тепаликдан ошибб, жарликка тушишди. Богун думалаб кетиб оёғини майиб қилди. Олдинига арзимаган бўлиб кўринган бу оғриқ кечга бориб аламга кирди, шунаقا аламга кирдики, туни билан ажриққа ағанаб чиқди. Эрталаб бундоқ қараса дўмбира бўлиб кетган. Кейин маълум бўлдики, ўнг оёғининг тўпиги чиқиб ундан сал юқориси синган экан. Олдинига Содиқ, кетидан Диловархўжа «табиблиқ қилди». Ҳеч нарса чиқмади. Эрталаб чўғдек ёниб турган оёқ тушга бориб мўмatalоққа айланди. Шу шишиб боришида кечга қолмай пақиллаб ёриладиган кўринарди. Богуннинг бардоши тугаб, ўлимига рози бўлди: бир томондан оғриига чидамаса, иккинчидан, у туфайли ҳамроҳлари йўлдан қоляпти. Унинг бу ётиши айниқса Диловархўжага малол келаётгани кўриниб турибди. Содиқ сокин. Унинг дарди ичиди.

Богун шерикларини ёнига чақирди:

— Менинг ишим тамом. Оёққа турганим билан ҳам бари бир фронтга ярамайман. Сизлар кетаверинглар. Мен бир амаллаб бирор қишлоққа етиб оламану, у ёғини баҳтимдан кўраман.

Содиқ сакраб тушди:

— Сени ташлаб-а!

— Бошқа қандай илож бор? Мени деб сизлар ҳам нобуд бўлманглар, дейман-да! Гожлик билан тошни тессанг, оёқ оғрийди, холос.

Содиқ кўнмади.

— Йўқ,— деди у,— кучимиз етганча олиб борамиз. Жуда бўлмаганда бирор тайинлик ерга қолдирмагунча мен ҳеч қаёққа кетмайман. Гап шу!

Содиқнинг феълини билган Диловархўжа қанчалик ғазабланмасин, бир нарса дейишга ожиз, деган чоғида ҳам гапи ерда қолишига ишонарди. Чўнтағида қўлини мушт қилганича бақрайиб тураверди.

— Ўзингиз биласиз, серкамиз сиз,— деди у пичингнамо.

— Унинг ўринда сиз бўлсангиз, ташлаб кетсак хурсанд бўлармидингиз?

Диловархўжа ялатма жавоб қилди:

— Мен сизга ташлаб кетинг деяпманми! Мен майиб қилгандай гапирасиз-а!

Аслида Содиқнинг бу гапи Диловархўжанинг у ёқ-
бу ёғидан ўтиб кетган, қани энди аввалги вақт бўл-
са-ю, бир имо билан иккаласини тавбасига таянтирас!
Тишини тишига ўосди, қўлинни чўнтағида қаттиқроқ
мушт қилди. Инқиллаб ётган Богунга қараб ғазаб билан бароқ қошини чимириб қўйди.

Содиқ ўйлаб ўйининг сўнгига етолмас эди. Албатта Богунни бу ерга ташлаб кетолмайди, ташлаб кетиши инсофдан эмас, ҳатто пастлик. Бу унинг қўлидан келмайди. Минг хил режа билан бу кун ҳам ўтди. Эрталаб Содиқ барвақт уйғониб, чаққонлик билан жардан чиқди.

— Хўш, йўл бўлсин?— деди кўзи очиқ ётган Диловархўжа. У Содиқни ўз гапи билан ёлғиз қочиб кетяпти, деб ўйлаган эди.

— Атрофни бир айланиб келай, зора Богунга бирор жой топсам. Бечора кечаси билан иситмасидан алаҳлаб, бола-чақаси билан гапташиб чиқди.

— Билдим,— деди Диловархўжа ачингандек,— ёмон бўлди.

Содиқ кетиши билан Диловархўжанинг мудҳиш ғазаби яна тўлқни урди. «Агар шу лаънатининг оёғи лат емаганда, анча ерга бориб қолардик. Худо кўрсатмасин, қидириб қолсалар борми, иш расво! Шундоқ қўлтиғининг тагида ётибмиз-а! Икки туғишиб, бири қолгандек жони ачийди Содиқнинг. Тавба, манглайидан ой кўрдингми! Мана ҳозир яна шуни деб, жонини тикиб аллақаётка кетди. Ҳали кетидан бирорта шумоёқ айғоқчини эргаштириб келиб ишнинг расвосини чиқармаса эди! Йўлдан тутилиб қолишимизга ҳам, хавф остида кечадан бери ўтиришимизга ҳам мана шу инқиллаб ётган Богун сабаб. Шу ўлади-ю, биз қутуламиз. Ўлармикин? Узи кичкинагина бўлса ҳам, жони итникидан қаттиқقا ўхшайди. Бизнинг бошимизни еб, ўзи омон қолмаса эди! У тирик экан, Содиқ ундан ажралмайди».

Диловархўжа бирдан кўзларини чақчайтириб, мўйловга ўхшаган қошини керди. Рўпарадан ўқ егандай бужур юзи йилтиллаб кетди. «Жонига Азроил чанг солишини кутиб ўтирмасдан... ўзини унинг бағрига итариб қўя қолиши керак...»

Диловархўжа қатъни бир қарорга келган кишидек Содиқнинг орқасидан чиқиб, асабий аланглаб унинг узоқлашувини кутиб турди. Пастга шошилинқираб туш-

ди. Богуннинг бошига келди. Башарасидан бир нарсаннинг изини қидираётгандек, бир лаҳза қараб турди. Богун кечаси билан қийналиб, тонгга яқин уйқуга кетганича ҳали қимир этмай ётарди. Оғриқнинг зўридан сарғайиб кетган ориқ юзлари, майин киприклари қилт этмас, майиб оёғининг тиззасини мурғакдек қучоқлаб олган, дунё ташвишларидан холи кишидек сокин ётарди.

Унинг заъфарон юзи, озиб-тўзиб кетган чакаклари раҳмини келтирмади. У раҳм қиладиган алпозда эмас эди. Унда ўша босмачилик йилларнинг ёвуз ҳирси уйғонган, кўзига қон тўлиб кетган эди, у шундай ёвузлик, тажрибали қотилга хос совуққонлик билан иш тутарди, ҳатто қўли титрамас эди. Шундай бўлса ҳам яна жардан чиқиб, атрофга аланглади. Содиқнинг узоқлашиб кетганига қаноат ҳосил қилгач, барини орқасига силтаб ташлаб пастга ўзини урди. Тўғри келиб, оч қашқирдек Богуннинг томогига чанг солиб, устига ўзини ташлади... Жон талвасасида типирчилашлари тинган, ҳатто майиб оёғи узатилиб қолган бўлса ҳам, Диловархўжа унинг ўлганига гумон қилиб, анча вақтгacha қўлини бўғизидан олмади. Лекин ўрнидан турганида қора терга ботган, тиззаси титрар эди. Бушлатининг барига юзларининг терини артди.

Богуннинг кўзлари очиқ қолган эди. Бу, қотил Диловархўжанини титратиб юборди. У кўзларни ёпишга журъат этмай, Богуннинг қалпоғини юзига тортиб қўйди. Бир оз ўзини тутиб олгандан кейин, Содиқ билан бўладиган савол-жавобини бир карра кўнглидан ўтказиб қўйди. Агар Содиқ Богуннинг ўзи ўлганига ишонмай, гумонсирайдиган бўлса, у билан ҳам ҳисоб-китоб қилишин мўлжаллаб, ҳужумга ҳозирлик кўрди.

Содиқ эса, қайтмас эди. Шу пайт Диловархўжанинг юраги сиқилиб, аччиқ чилим чеккиси, ўша «довруқли йиллари» қўлидан тушмаган мис қоплама чилимининг оловини бир қарич гуриллатиб чеккиси келди. Қани у чилим? Сарханаси учиб, қаерларда пачоқланиб қолиб кетган! Шунда Богуннинг вагонда бир тортиб берган аччиқ тамакисини эслади.

У аста босиб жарга, мурданинг олдига борди. Богун бир қўли билан тупроқ чангллаганича ётарди. Қотил унинг чўнтағига қўл солиб, бўғма тўрвадаги тамакисини олди. Ураб чекди. Тўрвачани эса, оғзини яхшилаб боғлаб ўз ёнинг солиб қўйди.

Содиқ анчадан кейин қайтди. Унинг қайтишини жар ёқасида мўралаб кутиб ўтирган Диловархўжа эгасини таниган итдек қаршисига югурди. Нафаси оғзига тиқилиб, гапира кетди:

— Богун ўлиб қолди. Уйфонди-ю, томоғини бўғиб, типирчилади, сув сўради. Сув тамом бўлган экан, чопиб кетдим. Олиб келгунимча оламдан ўтиби. Энди нима қилдик, яхши йигит эди раҳматли! Олдига тушгани юрагим бетламай, боядан бери сизни пойлаб шу ерда ўтирибман.

Содиқ «ўлиб қолди»дан бошқасини эшитгани йўқ, чопиб кетди, гёё Богун ҳали ўлиб қолмагану, тезроқ борса олиб қоладигандек, елиб кетди. Диловархўжа ундан узилмай, олдинма-кейин чопиб, ўлим тафсилотини айтиб келарди. Содиқ жарга ўмбалоқ ошиб кетгудек елиб тушди, бир-икки тошга қоқилиб, думалатиб юборди. Унинг биттаси худди Богуннинг ёнига бориб тўхтади. Богунга тегиб, озор етказадигандек Содиқнинг юраги шифиллаб кетди.

Содиқ энтикканича келиб, дўстининг юзига ёпиб қўйилган қалпогини олди, гёё шу қалпоқ Богуннинг нафасини қайтараётгандек туюлди Содиққа. Богуннинг очиқ қолган бир кўзи «қаёққа кета қолган эдинг? Сенга сўнгги марта боқиш ва мудҳиш воқеадан сенга гувоҳлик бериш учун юмилмай турибман. Мана сени кўрдим, энди ўзинг мени ёпиб қўй!» дегандек тош қотиб турарди. Кутимаган бу фожиадан гангид қолган Содиқ, дўстти қошида гир айланар, томирини ушлаб кўрар, кўзига боқарди. Унинг бадани совий бошлаганини сезса ҳам, ўлганига ишонгиси келмас эди. Диловархўжа эса мурдадан қўрқадиган кишидек бир четда турар, бошини қўйи солиб Содиқни «ачиниш» билан кузатарди.

— Жуда қўрқиб кетдим, Содиқжон, юзига қарашга юрагим йўқ. Кўзини ёпиб қўйсангиз-чи!

Содиқ индамай, унинг айтганини қилди. Шундан кейингина Диловархўжа Богунга яқинроқ келди:

— Икки марта сизни сўради. Хайрлашмоқчи бўлган экан-да, бечора. Аксига олиб, сўнгги дамида бошида бўлмадингиз. Қадрдонингиз эди, оғзига ўзингиз сув томизар эдингиз. Мендан буюрди.

— Қаёқдан биламан бунақа бўлишини!— деди содда Содиқ унинг гапига ишониб. У ўзини Богун ўлимнида гу-

ноҳкордек ҳис қилди. Буни пайқаган айёр Диловархўжа ёнлатиб ҳужумга ўтди:

— Ахир кечаси алаҳлаб чиққанини ўзингиз гапириб турган эдингиз, яна кетиб қолдингиз.

— Қизиқмисиз, алаҳлаган ўлаверадими! Дарди бор ҳар қанақа касал ҳам кечаси безовта бўлади-да!

Диловархўжа Содиқнинг қаршилик билдирганини кўриб, дарров ён босди:

— Ҳа, рост. Бундоқ бўлишини туш кўрибсизми! Бизнинг қишлоқда биттаси қирқ кеча алаҳлаган экан. Шундан кейин тузалиб, эвара-чевара кўрган. У эмас, бу эмас, кўргилик, етган ажал. Иссиқ жоннинг иши шунаقا. Ютган нафасинг қайтиб чиқиш-чиқмаслиги худоий таолонинг ўзидан бошқа ҳаммага сир. Банданинг иши шу, Содиқжон, лип этиб чироқдек ўчади-қолади.

Содиқ ҳеч нарса демас эди. Кутимаган бу мусибат унинг идрокини шол, фикрини ўтмас қилиб қўйган эди. У фақат мурданинг атрофида айланарди...

Диловархўжа кўрдики, Содиқ шошиб қолди. Уни йўлга солмаса, ўлик атрофида гирдикапалак бўлиб вақтини ўтказди.

— Содиқжон! Тепасида ёш тўкиб туришингизнинг энди фойдаси йўқ,— у ўпкаси тўлиб, кўзига ёш қўйилиб келган кишидек энтикиб, дастрўмолини кўзига тутди, димогини устма-уст чуқур тортди.— Начора, қисмати шу экан! Вақти соатида жойига қўяйлик, бир кафт тупроғи шу ердан олинган экан. Начора!

Қуёш жар ичига қиялаб боқиб, унинг ингичка ирмогини пичноқ дамидек йилтиллатганда Богунни ерга қўйишиди. Содиқ қизариб кетган кўзларидан ёшини артиб, дўсти устига шағал аралаш ҳўл тупроқ тортарди...

1. ЭЛ БОШИГА ИШ ТУШГАНДА

Хотини уруш бошланганини айтгани кирганда Мирсалим донг қотиб ухлаб ётарди. Хотинининг йиғлаб:

— Faflat босмай ўлсин, туринг, дунёга ўт кетди!—
деганини ҳам эшифтади. Хотин жон ҳолатда елкасидан
силкиган эди, аранг кўзини очиб:

— Юз грамм борми?— деди.

— Юз грамм ҳам ўлсин! Уруш бошланибди!

— А!

Мирсалимга ана шундагина етиб борди. Ирғиб туриб, ўрнига ўтирди. Қовоғи шишиб, мижжаларининг чети ёпишиб қолган кўзларини ишқалади. «Нима деяпсан?»— дегандек хотинига боқди. Хотинига ҳам фақат эрини уйғотиш, унга урушнинг бошланганини билдиришгина керак экан шекилли, индамасдан чиқиб кетди. Эшикни ёпа туриб:

— Қап-катта одам...— деб қўйди.

Хотин бу билан ярим кечада ичиб келиб, шу вақтга-
ча учнб ётган эрига «ачиб суйилмаган, қарнб қуйилма-
ган» деб таъна қилдими, ёки уйнинг бир четига қайт
қилиб қўйган «қап-катта одамдан» нафратландими, би-
либ бўлмас эди.

«Уруш» сўзи Мирсалимнинг кўзини очирган бўлса
ҳам, ҳушига келтирмади, паҳтавон ўқдек панг этди-ю,
жароҳати кўринмади. Эринибгина ўрнидан турниб, икки
қадам қўйди. Боши караҳт, оғзи елим эди. Хотини кечаси
бошига қўйгац чойнакдан муздай сувни симириш ол-
дидан бир кавшаниб, кейин туфурди: милклари қонаб
кетибди!

Муздай сув бир неча лаҳза кўзини мошдек очди. Ана шунда ўйлаб кетди: кеча «таги кўрган» бир ўртоғини-кида меҳмонда эди. Аnor сувини закуска қилиб анча ичди. Қазини парраклагани эсида. Думба-жигардан олиб турди. Ёнида ўтирган, гап-сўзидан жуда тайёрга ўхшаб турган бир сўрқилдоққина бева ўқитувчининг сонига қўл юборган эди, қўлинни омбирдай чимчилаб олди, бунга ҳам иззат-нафси қонмадими, «турқинг қурсин, бит кўз» дегандай шунақа бир хўмрайдники, Мирсалим жойини ўзгартиришга мажбур бўлиб қолди: ҳовлига чиқиб келиб, ўша хотин кўзи тушмайдиган томонга ўтириди. Шериги:

— Ҳа, у ердан мих чиқдими? — деган эди.

— Стул нобопроқ экан, яна синдириб товонига қолмай, — деган баҳонани қилди. Яна икки рюмкадан кейин хотиндан еган даккиси эсидан чиқди. «Сен, тўнка, мендан ҳазар қилиб ўтирибсан, ҳали менинг шунақа ҳунарим борки, кокил ёйиб ўзинг келасан олдимга», дегандай танбурни олиб машқ қилди, бирининг кетига бошқасини улади. Куйнинг охирини олифтагарчилик билан чертиб, танбурни ёнига олиб қўяркан, ҳаммадан раҳмат ёғилди. Ҳалиги чимчилаган хотин ҳам кўп қатори қисқагина қилиб ташаккур айтди. Буни пайқаган Мирсалим: «Ўл-а! Ённингдан кетганимга энди ачинаётгандирсан!» — деб қўйди ичиди. У хотиннинг кўнгли сув ичиб қолганига энди ҳеч шубҳа қилмас эди.

Шўрва тортилиб, ичкилик қизигандан кейин хотинлар бошқа уйга чиқиб кетишиди. Хотиннинг «бас, бўлди!» деб тирсак туртишидан қутулган эркакларнинг «бити тўкилди». Норинни қанақа қилиб қорганини Мирсалим элас-элас эслайди, лекин норин тортилганини билмайди. Бир-икки ошамни оғзинга согланини сал-пал хотирлайди, лекин уни ютдими, қайтиб ташладими, ҳозир айттолмайди. Бир маҳал кўчага чиқса, ҳали тегишган хотини ҳам кишилар билан хайр-хўш қилиб кетяпти. Кетидан эргашди. Бир-икки гап ташлади. Хотин индамади. Мирсалимнинг назарида, хотин бояги қилган «маданиятсизлиги»дан хижолатда, Мирсалимнинг бошқа ерга ўтиб чалган танбуридан эриб кетган, қўрғошиндек қалқиб турибди, истаган қолипга солиб олса бўлади!

Хотин ушинг луқмаларига оғирлик билан жавоб қилиб борди. Мирсалим билиб билмасликка олиб биқининг тегиб кетган эди, бунга ҳам индамади. Мирсалим

яна бир поғона кўтарилиди. Хотиннинг бир жуфт қамчидек узунгина, бақувват сочини ушлаб тегишиди:

— Уламамасми?

— Йўқ, уламани сиз олиб берасиз-да.

— Жоним билан! Ўзи қаерда сотади?

— Олиб берадиган одам, сотадиган ерини билмайдими?— хотин жилпанглади.— Янгамга қаердан харид қилган эдингиз?

— Янгангизни қўйсангиз-чи, жонгинам, шарти кетиб, парти қолган. У кишига уламани ким қўйипти.

— Ҳамма эркаклар ҳам шунаقا: бегона хотинни кўрганда, уйдагини ёмонлайди.

— Йўқ, рост гапни айтяпман. Шу маҳал олдингиздан чиқиб қолса борми, нақ лабингизга учук тошиб кетади!

Хотин индамади. Мирсалим, эритдим, қўлга олдим, деб шилқимликка кўчди. Бу маҳал хотин уйига етиб қолган эди. Тўхтади. У пастки лабини тишлаб турар, кўзи нимадандир чақнаб ёнарди.

— Мен етдим,— деди у. Кейин сунъийроқ кулди. Қайфдан кўзи қисилиб бораётган Мирсалим буни пайқамади, у чангакдаги гўшт остида «сапчисам оламанми, йўқми?» деган мушукдай, лабини ялаб, суқланиб турарди.

— Уламани энди қачон олиб берадиган бўлдингиз?— сўради боягидай ясама кулиб хотин.

— Истасангиз эртага-да, жоним!— ялпанглади Мирсалим ва хотиннинг бағрига қўл юбормоқчи бўлди.

— Тўхтанг! Ҳали ташлаб ҳам қочарсиз,— деди хотин бир қадам орқага тисарилиб.— Ҳу анави кўриниб турган эшигим. Ўғилчам билан иккимиз турамиз. Эримдан ажраганимга бу йил беш йил тўлади.

Бу гапларни эшигтан Мирсалимнинг «нақдига йўлиқдим», деб кўзлари лўқ, хаёлида оппоқ тўшалган сим каравот эди.

— Йўлда ёлғиз келгани чўчирдим. Кузатиб келганингиз учун раҳмат. Мен сизни яхши биламан, Мирсалим ака, хотиннингизни ҳам танийман. Боринг уйингизга, ҳар кўринган жувонга эргашиб, тилингизни осилтириб юрманг. Уламанинг пулинин янгамга берниб қўйинг, эрталаб ўша кишидан оламан.

Хотин истеҳзоли кулиб, шарт орқасига бурилиб кетди. Мирсалим турган ерида шалвираб қолаверди. Унинг

қимирлашга мадори йўқ эди. Фақат милиционернинг ҳуштаги ва «ким у?» деган нидоси унга жон кирилди. У гандираклаб, икки бор ариққа йиқилиб, уйига етиб келганда қўшнисининг бобоқ хўрози тонг юлдузини қанот қоқиб қутламоқда эди....

Мирсалим бир пиёла муздай сувнинг далласида ана шуларни эслаб, юраги орқасига тортиб кетди. Урушдан ҳам тундаги аҳволи кўзига даҳшатли кўринди, чунки минг қилганда ҳам уруш узоқда, бу шармандалик эса, чақирса эшитилгудек жойда, ҳали-замон шармандасини чиқариши мумкин. «Лаънати нима қилиб ёнимга ўтира қолган экан,— ўзича пушаймон бўлди,— мен ҳам хотинимни олиб борганимда-ку, олам гулистон эди. Лекин хотин билан яйраб бўладими! Ўзи ким эди шу хотин? Қайси мактабда ишларди? Ортиқча шилқимлик қилганим йўқми? Шу вақтда «уламанинг пулини беринг» деб кириб келиб қолса-я! Ана шармандалигу, мана шармандалик!»

Шунинг ваҳимаси билан Мирсалим наридан-бери кийиниб кўчага чиқди. Кўча ҳар куни кўрган кўчасига ўхшамас эди. Одам қайнайди. Одамлар хомуш, лаблар қисиқ. Қадамлар зарворли, кўзлар ташвишли. Радио карнайлари бор овози билан гитлерчи Германиянинг жинояткорона уруш бошлагани ҳақида оламга жарсолади. Одамлар тўп-тўп бўлиб жон қулоги билан эшитишади. Ана, бир кампир йиғлаб, дока рўмолининг учини ҳимариб, кўзини артди. Бошқа бири Гитлерни «тўнғиз қўлдиради», асабдан соқолини ҳадеб тутамлаётган чол Гитлернинг сафанасига тош қалайди, ёш жувон әрини қўлтиқлаб туриш ғаниматдай, эрта-индин шунга ҳам зор бўлиб қоладигандай унинг қўлтиғига кириб кетгудек бўлиб, икки қўллаб ушлаб туриби, бошқа бири ташвишдан ёнида йиғлаб келаётган боласини эшиitmайди, ҳар куни кулгиси билан кўчани тўлдириб юрган ёшлар бугун сокин, кулги ўрнига алланимани куйиб-пишиб гаплашади, бир-бирига маъқуллайди. Хуллас, мамлакат бошига зўр ташвиш тушгани еттидан етмиш ёшгача ҳамманинг фикри зикрида. Фақат Мирсалимгина катта дарёning, тўлқинли дарёning бир четида оқимдан узилиб, бир жойда айланётган чўпдек бақрайиб турарди. Бу узоққа чўэйилмади, тўлқин уни ҳам қамраб кетди. Ана шундагина у кечаги хотиннинг «уламанинг пулини беринг!» деб одамлар орасидан чиқиб қолиши, уни

шарманда қилиши мумкин эмаслиги, юрт бошига тушган мушкулот олдида ўзининг ташвиши урвоққа ҳам арзимаслигини фаҳмлаб, анча енгил тортди, «шундай пайтда жанжал кўтаргани келадими» деб ўзини юпатди. Ўйига қайтиб, юз граммни хотинидан ўғринча ютиб, ўрнига ўзини ташлади. Хотинининг:

— Ҳа, яна ўйқуми? — деганига.

— Бошимни сал ремонт қилиб олай,— деди ва орқасини ўғириб олди.

— Камроқ ичинг, сизни бирор зўрламагандир. Ё зўрладими?

«Зўрлаш» сўзи Мирсалимнинг хаёлига ичкиликни эмас, тундаги хотинни келтирди. «Оббо лаънати, эрталаб келган экан-да!» деб юраги шувиллаб, кўз олди жимирлаб кетди. Хотини томонга бирдан ағдарилди.

— Кимни зўрлабман? — баланддан келди Мирсалим. Бу кутилмаган дағдағдан чўчиб кетган хотин паст тушди:

— Бирорни зўрлабсиз деяпманми! Ичкиликни...

— Ҳа, бундай демайсанми! Менинг қулоғимга..

Мирсалим яна орқасига ағдарилди. Хотини пичини қилди:

— Ҳа, энди бир камингиз бирорни зўрлаш қолувди. Ўтган йил Қаюм қўноқнинг тўйида ўйинчи қизга пул қистира туриб, томоғидан ушлаганингизни тўртта хотин йиғилишса ҳали-ҳали гапиришади.

— Буни ҳам йигитнинг юрагида ўти бор, қони ўйнаб тургани қилади! — чиранишнамо ҳазил қилди Мирсалим.

— Сизнинг қонингиз қайноқми? Мен сезмайман-ку! — рашк билан ачитди хотини. Бу гап чираничи Мирсалимнинг эрлик нафсониятига тегиб, сирини фош қилиб қўйгандек бўлди. Бошини кўтариб, хотинига елкаси оша сигир қараш қилди: унинг кўзлари қинидан чиқиб кетай дерди.

— Қайноғини кўчада совитиб келаман!!

Эрининг астойдил жаҳли чиққанини кўрган хотини индамади, фақат чиқиб кета туриб, чимчилаб олди:

— Эҳтимол...

Бу гап Мирсалимга боягидан ҳам алам қилди. Лекин тундаги хотин келган бўлса, яна «олтин тўрва»нинг оғзи очилиб кетмасин, деган хаёл билан аччиғини ичига ютди. Агар шу томондан хавфи бўлмагандага хотинига

«бирор бўйни йўғонни топган бўлсанг, кетаверишинг мумкин» деган бўларди.

Урушнинг бутун даҳшатини Мирсалим эртасига мактабга борганида сезди. Кечаги кунни уйда хотини билан ади-бади айтишиб, бачканалашиб ўтказганига ҳайрон бўлди.

Мирсалим ўзи шунаقا: бир нарсанинг таъмини ҳам, даҳшатини ҳам ўтиб бўлганидан кейин билади, билади-ю, вақтида пайқамаганидан ажабланади, ёмон нарсанинг ўтганидан хурсанд бўлса, ширинини сезмаганидан ачинади. Ҳозир ҳам шундай бўлди. Кечаги энг даҳшатли кун ваҳимасини шундай енгил-елпи ўтказганидан мамнун.

Бир ҳафтада мактаб ёшлардан бўшаб қолди, мактаб тугул шаҳар бўшаб қолди. Военкомат эшигидан одам тирбанд. Кунига вокзалдан колонна-колонна ҳарбий эшелон жўнайди. Бугун кўрган одамингдан бир ҳафтадан кейин аллақайси шаҳардан «Фронтга кетяпман» ёки «ҳарбий тайёрликдаман» деб хат келади. Бу ерда қолганларнинг ҳам бутун хаёли фронтда. Фронтдан эса кунига аҳоли яшайдиган қандайдир пункт, баъзан эса бутун бир шаҳарнинг «қаттиқ жанглардан кейин ташлаб чиқилгани» ҳақида кўнгилсиз хабарлар келади.

— Ўхў, қадам олиши тез-ку! — деди Мирсалим эрталаб радиога қулоқ солиб. Кейин тишнини кўрсатмай сал иштайиб қўйди.

Яна бир ҳафта ўтди.

Мирсалим юзини ювмаёқ радио ёнига келди. Эшигмай қоладигандек қўлини қулоги орқасига ҳовуч қилди. Яна ноxуш хабар.

— Зўр! Келиши ёмон,— деди, кейин тойчадай ўйноқилаб ювингани кетди. «Қичқир, хўроҳим» ашуласини хиргойн қилиб ювинди. Ичидан севинчи тўлқини уриб чиқарди. Хотинига ҳам умрида бир марта кулиб қаради:

— Ишларинг яхшими, хотин?

Хотин ҳайрон: «Бу нима дегани бўлди?» Эрига қараб, кайфи борми ўзи, деб ўйлади. Ундаи деса ҳозиргира ўрнидан турган. Кеча ҳеч қаёққа боргани йўқ.

Нонуштадан кейин сурма ранг дўппини фуражкага, қора беқасам тўнини гимнастёрка билан энли камарга алмаштирган Мирсалим эшикдан чиқиши билан юзига жиддий тус берди. Юрт бошига тушган ташвишни бир-

га тортишаётган кишидек бошини сал қўйи солиб кетди. Худди шундай алпозда кабинетига кириб борди. Бугун дарсга кечикиб келган ўқитувчини зуд билан чақиртириди:

— Ҳозир қандай вақт эканини биласизми? — деди зуғум қилиб.

Ўқитувчи важ кўрсатди:

— Қизимиз туни билан иситмалаб, эрталаб ухлаб қолибман.

— Важ қидирманг. Ҳозир важ қидирадиган пайт эмас. Мен бунга йўл қўёлмайман, совет болаларимизнинг тарбиясига путур етишига, айниқса шу масъулиятли кунларда йўл қўйёлмайман. Бу жиноят.

Содда ўқитувчи жиноят қилганини энди англаған кишидек гангіб қолди, шошиб ўзини оқлашга киришди.

— Ўзингизни оқламанг,— унинг сўзини бўлди Мирсалим,— бу ёмон одат. Яхшиси, айбингизга иқороп бўлинг, тузатишга урининг. Мен, албатта, буни педсоветга қўймайман.

Бу «олижаноблик»дан юки енгиллашган ўқитувчи унга раҳмат айтиб чиқиб кетди. Мирсалим ўзи тутган йўлидан мамнун эди. Бурнининг остидаги туфланган посдек кичкина мўйловини кўрсатгич бармоғи билан силаб қўйди. «Қичқир, хўрозим»ни беихтиёр хиргойи қилаётганини сезиб қолиб, бирдан тўхтади: бу уйда айтиладиган ашула! Бу ерда ўзини раҳбарона тутиши лозим. Кнопкани босиб, котиб қизни чақирди, йўл-йўриқлар берди. Сўнгра ҳар қачонгидан сал юмшаб, ўзи ҳақида, мактаби ҳақида колективда қандай гап-сўз юрганини суриштириди.

— Жимжит,— деди қиз қизаринқираб,— фақат Қурбоновни ёқтирганидан директорнинг ўзи телефон қилиб, фронтга юборди, дейишяпти.

— Масалан, сиз шуни кимдан эшитдингиз? — қаттиқ қизиқди Мирсалим, лекин мулоийм қилиб суриштириди.

— Ҳамма шунаقا дейди,— қиз дудуқланди. Аслида у кимдан эшитганини эслолмас эди.

— Менга ҳамманинг кераги йўқ. Биттасини айтинг. Ӯша биттаси керак.

Қиз «ӯша битта»ни айттолмади. Мирсалимнинг қанчалик жаҳли чиққан бўлмасин, ўзини босди: қизни хафа қилишдан фойда йўқ! Ҳали кўп керак бўлади. Лекин Қурбонов масаласидаги «сир»ни коллектив билиб қол-

ганидан ҳайратда эди. Ахир у жуда эҳтиёт билан ишлаган эди-ку! «Майли,— деб қўйди ичиди Мирсалим,— бундан буён шунга қараб иш тутаман. Шарт шу: мактабда менинг оёғимни босадиган ҳеч ким бўлмаслиги керак. Ўсиб чиққанини чеканка қилиб, кемтиб турман».

Мирсалим хижолатдан бармоқларини қирсиллатаётган котиб қизни аста кузатди.

— Қиши бунақа бепарво бўлмайди, қизим. Пишиқ бўлинг, чийратма бўлинг. Ҳали мен сизни директорлик-кача тарбия қиласман деб юрибман-ку...

Қиз бирдан қизариб кетди. Мирсалим унга яна биринки ширин сўз қилиб чиқариб юборди. Бу тадбиридан ҳам ўзи мамнун бўлиб қўйди.

Шу кунларда у яна бир одат чиқарган. Ишга сал барвақт келиб, ҳаммадан кейин кетади. Мақсад: мамлакат бошига шундай оғир кун тушган кезларда ўзини қаттиқ ишлаётган қилиб кўрсатиш. Бирор ерга кетса, албатта, котиб қизга тайинлаб, келадиган соатигача айтиб кетади. Вақтида қайтса-ку майли, лекин сал кеч қолгудек бўлса, эшикдан терини артиб, аллакимдан полиб, шу кунларда иш кўпайиб кетганини таъкидлаб кириб келади. Бу ерда у талай иши қолиб кетган кишидек дарров кабинетга ўзини уради. Бироқ... кабинетда бўлмағур хаёлларни суриб, ҳадди сиғадиган кишилари га телефон қилиб, ҳиринглашиб ўтиради, унча-бунча бозор-ўчар ишларини ҳам шу ерда битказиб олади. Лекин столнинг устида доим турли қофозлар бўлади.

Яна бир ой ўтди. Мирсалим яна одатдагидек радио ёнига келди, қўлини қулоги орқасига ҳовуч қилиб тинглади. Ҳамон фронтдан хушхабар йўқ, ҳамон душман босиб келарди. Миясига келган фикри шу бўлди:

— Шўро тамом! Нари борса яна бир ойга чидайди, кейин ичи пўқак дарахтдай ағдарилади.

Яна «Қичқир, хўрозим»ни айтиб, ўтган даврларни эслади. Ўтган кунлар кўнглига чироқ ёқди. Бу чироқ тафтида бир вақтлар гўштга тушган қуртдек ғимирланган, кейинчалик замона зайлар билан ухлатиб қўйилган бойвачча орзулари уйғона бошлади, ҳа, хаёлинин олиб қочди. Бу орзулар инқилобдан у ёққа олиб ўтар, ўн ёшидаёқ бошига шоҳи салла ўраган тотли йилларини эслатарди. У бобосининг қорабайирига мингашиб растага тушарди, бежирим дўконларда ўтирган, кўкрак

чўнтағидан соат занжири чиқиб турган жужун камзул, вухоба дўппилик бойваччалар ўринларидан ирғиб туриб бобосига салом беришар, отнинг жиловини ушлаб, хушомад билан гап қотишар, бир пиёла чойга таклиф этишарди. Бобоси виқор билан кулиб, барчасига ўзига яраша муомала қиласарди. Кейин карвонсаройга кириб, карвонидан хабар оларди, уйга қайтиб, меҳмонхонада анча маҳалгача чўт соларди. Овқатдан кейин Мирсалим чой олиб кирганда бобоси чўт қоқиб ўтирган бўларди. Мирсалимни кўриши билан меҳрибонларча кулиб, қўлидан чойнакни оларди ва меҳмонхона охиридаги хужрадан гоҳ бир кафт хандонписта, гоҳ пашмак олиб унга берарди.

Бу давлатнинг бир қисмини дадаси бобосидан кейин қўмормага бой берган бўлса ҳам, қолганини ички-ташқи ҳовли билан инқилоб олиб қўйди. Вақтни ғанимат билган дадаси бир кечадаёқ Пишпакдан шўнғиб, Мирсалим ҳозир турган шаҳардан чиқди. Бир оз вақт ўтгач, онланини чақиритириб олди, «туя кўрдингми? Йўқ!» деб, тўнини ўзгартирди, фуқаро бўлиб олди.

Мирсалим ҳозир ана шуларни ўйлаб туриб, дадаси ўлимни олдида чакириб, мана буни олиб, хуфия ерга қўй, бир куни керак бўлади, деган тўрвани аллақаердан тошиб чиқди. Ундан ўша Пишпакдаги уй-жой ва ер-сувларнинг сарғайнib кетган васиқасини олиб, завқ билан кўздан кечирди, ёмби топган одамдек қувониб, кўзларига суртди, чангини қоқиб яна жойига солиб қўйди. Ўйнинг у бошидан бу бошига ҳаяжонланиб юрди. Шу пайт унининг кўзига ҳамма нарса чиройли, ҳамма нарса кулиб қараётгандек кўринди. Шунда бирдан кўнглига бир гап келди: у немис тилини билмайди-ку! Жилла бўлмаганда салом беришни, «хуш келибсиз», «Бизниги ташриф буюрсалар ғоят курсанд бўлардим!», «Қандай таом кўнгилларига хуш келади?», «Шу арзимас совғани олиб қўясиз-да» дейишни билиши керак-ку. Азизанинг ўтара мактабда ўқиган немис тили китобини эслаб, уни аллақаердан топиб олиб, чангини қоқиб варақлади... Жонжаҳди билан ўрганишга киришди...

Эрининг ҳар куни ишдан келди дегунча уйга қамалиб олиб, аллақандай сўзларни ҳижжалashi, тилларни бураб талаффуз қилиши хотинининг ғашини келтирди, уига бачканга бўлиб кўринди. Бир-икки кун индамай юрди, бундоқ қараса, эри бу «қилигини» ҳали-бери тарк

қиласиган эмас. Битта-яримта одамнинг кўзи тушиб қолса, нима дейди!

Хотин дераза остидан бир оз қулоқ солиб турди. Мирсалим кичкина блокнот-дафтарнинг орасига бир бармоғини солиб, ушлаб олган, икки кўзи уйнинг бурчагида, у ёқдан-бу ёққа бориб келиб, ҳар хил сўзларни қироат қиласиди, эсидан чиқиб қолганини тўхтаб, ўша блокнотдан кўриб олади. «Тавба, ҳеч бунақа одати йўқ әди-ку,— деб ўйлади хотини,— бунча астойдил кириш маса. Эрталаб намоз ўрнига ҳам шуни қироат қиласиган бўлиб қолди».

Эрининг бу иши хотинига ёқмади.

— Бу нима бачканалик, кап-катта одамга!— деди эшикдан кириб бориб,— «Гутин таг», «гут, гут»дан бошқа ишингиз қолмадими?

Бу Мирсалим учун кутилмаган таңбех эди, жаҳли чиқди:

— Қирингга сув ташиб берайми!

— Қачон ташиб берувдингиз, энди ташиб берасиз.

Ёшингизга яраша иш тутинг, бирам ярашмаяптики...

— Нима десам ярашади, томоғингни тут, бир ўпай десамми?— Мирсалим суюқлик қилиб келиб, хотинининг энгагидан ушлади. Хотини унинг қўлини силтаб олиб ташлади. Мирсалим салмоқлади:

— Нодонсан, хотин, нодонсан!

— Ҳа, сиз доносиз!

Мирсалим унинг таънасига парво қилмади:

— Ҳали сен тўхтаб тур, яқинда менинг кимлигимни билиб қоласан.

— Қуруқ кекироқ! Пуч ёнғоқнинг нархи неча пулдан бўлди? Ҳали ёшроғини ҳам кўнглингиз тусаб қолар.

— Тусайди!

— Йўл қўйиб бўлибман!

— У вақт мен ҳам сендан сўраб бўлибман!!

— Нима подшоҳ янги бўлиб, тахтга хон ўтирасизми?

Хотинининг оғзидан беихтиёр чиққан бу сўз уни чўчишиб юборди, зотан, унга хуш ёққан бўлса ҳам, оғзига урди:

— Тесс! Деворнинг қулоғи бор-а!

Хотин хандон солиб, масхаралади:

— Ҳали шу юрак билан юрт сўрамоқчимисиз! Қочинг, том босиб қолади.

— Аҳмоқ! Бор, қозонингни юв, мушук ялаб кетади!

Мирсалимга бу сұхбат чалиб турган танбурнинг или узилгандек таъсир қилди. Бағрини эркалаб, руҳини аллаётган ажойиб күй чала қолди. Мана шундай оромбахш онларни фаҳмламаган хотинидан ранжиди. Бу нима дардда ёнепти-ку, хотини нима деб юрибди, минг құлса ҳам хотин хотинлигига борар экан-да! Лекин Мирсалим бургага аччиқ қилиб, күрпа күйдириб ўтирасдан, яна машқини давом эттиришга киришди. Ахир күн әмас, ҳатто соат ғанимат! Фақат деразадан хотинига қараб ичиде яниб қўйди: «Шу қилганинга ўша вақт устингга «боссам ер заха бўлади» деб нозу карашма қилиб турган бир дўндиқчасини олиб сени куйдирмасам, Мирсалим әмасман!»

2. ЭЛГА ҚЎШИЛГАН ЭР БЎЛАДИ...

Содиқ қора кунда орттирган дўсти Богунни кўмиб, жардан чиққанда куни алламаҳал бўлиб қолган эди. У йўл биладиган, борадиган ери аниқ кишидек бошлаб кетди. Қишлоқ четидаги бир қўрачанинг эшигини очиб, ичкарига кириб борди. Унга пешвоз чиққан, луччак шафтолидек бежирим кампир Содиқ орқасида хомуш келаётган Диловархўжани кўриб:

— Юриб кетибди-ку, шу кишимиди? — деди.

Содиқ боши билан қандайдир имо қилди шекилли, кампир бошқа сўраб-суриштирмай хонага йўл бошлади. Гаригина хонанинг тўридаги каравот шу яқин орада кўздан кечирилиб, аллакимга тайёrlаб қўйилгани ёстиғи тўғрилаб, одеялининг бир чети қайрилиб қўйилганидан маълум эди.

— Мана шу ерга жой қилдим, болам... Бу хона холи,— деди кампир хона тўрига ўтиб.

Содиқ жавоб бермай, хона ўртасидаги стол атрофига қўйилган табуреткалардан бирига оғир ўтири.

— Раҳмат, она,— деди у ахир.— Ҳимматингизга раҳмат! Энди унга ҳеч нарсанинг кераги йўқ.

Кампир сапчиб тушди:

— Вой, ўлмасам, нима қилди, вафот этдими?

Содиқ жавоб ўрнида бош қимирлатди. Кампир кўзидан ёш тўkkанича, мункайиб қолди, пиқ-пиқ йиғлади. Содиқ ҳам бошини қуи солди. Диловархўжа унга тақлид қилди.

Кампир ўзи бир умр кўрмаган Богунга жони ачиб, унинг вафоти тафсилотини куйиниб сўради, кетидан гапириб юриб дастурхон тузатди, ҳатто унинг шерикларига далда берди:

— Киши умри бир қултум сув, қулт этди — вассалом, адойи тамом. Қани, дастурхонга қаранглар. Олинглар.

У бирпасдан кейин буғи чиқиб турган боршч олиб кирди. Сал титраган қўли билан идишларга сузар экан, индамай ўтирган Диловархўжага гап қотди:

— Ҳа, сен нега жуда хомушсан? Тобинг қочдими? Қўрқиб кетдингми?

Шошиб қолган Диловархўжа кампирнинг гапига қўшилиб қўя қолди:

— Ёлғиз эдим...

— Шунаقا бўлади: киши ўликдан қўрқади, энг яқин кишинг бўлса ҳам қўрқасан. Минг қилса ҳам жон чиққан тана-да! Қани, мана буни хўриллатиб, нон билан ичиб олгин, ўзингга келиб қоласан.— Кампир лиммолим тўлдирилган талинкани унинг олдига аранг сурди.

Диловархўжа қорни тўйиши билан, Содиқнинг оёғини босиб, энди йўлга чиқайлик, деган имони қилди. Кампир ҳам уларни тутмади. Бир буханка нон билан докага ўралган муштумдек тузланган чўчқа ёғини улар қўлига берди:

— Озиқлик от ҳоримайди, олинглар,— деди.

Кампир ёнида турган Диловархўжа нонни олди-ю, ёғига келганда ундан ҳазар қилгандек оғринди, юзи буришди. Кампир ўзича тушунди:

— Қолгани шу экан, ола қол, болам.

Шундай кунда ҳам ирим қилиб юрган Диловархўжадан ижирғанган Содиқ, икки қадам босиб, ёғни ўзи олди:

— Раҳмат, она!

Хайрлашаётиб, кампир деди:

— Ўртоғинглар қабридан ўзим хабар олиб тураман, шам ҳам ёқаман. Бу томонидан кўнглинглар тўқ бўлсин!

Икки қочоқ узун-қисқа бўлиб йўлга тушди. Содиқнинг кўнглига қўрқув келмас, фақат олган йўлининг тўғрими эканлиги уни ташвишлантиради. Йўлда бирор ушлаб олиши, яна лагерга тушиш даҳшати гўё Богун билан бирга ўша жарда қолган, Богун бирга бўлганда-гина қўрқиши мумкинга ўхшаб туюларди.

Диловархўжа, нима содир бўлса ҳам аввал Содиққа йўлиқсин, дегандай ундан икки-уч қадам орқада, етиб слолмаётган одамдек борарди. У безовта эди. Богунни бевақт ўлдирганидан бир лаҳзагина афсусланди. «Жой тайёр экан, ўша ерда қоларди-қўярди» деб кўнглидан ўтказди. Лекин сал ўтмай бу фикридан қайтди. «Қолишига-ку, иссиққина ер экан, қоларди, аммо бирор суроштириб қолса нима бўларди? Шармандамиз чиқарди. Ўзининг боши кетса майли, бизга зомин бўларди. Ула қолса, уларни билмайман, демасди! Жон шунақа ширин нарсаки, ошина-оғайни тугул, ота-онадан тондиради!»

Ана шу мулоҳазага борган Диловархўжа бу томондан кўнгли тўй эди. Бироқ йўл хавотирлиги, эртаги кун тақдирни, бундан кейин қиласидиган ишлари темир занги бўлиб ич-ичини кемирар, учраган ҳар киши унинг жонига қасд қиласи бўлиб кўринар, ҳар қишлоқ бир қопқондек туюлар эди. Содиқнинг ишонч билан боришини кўриб, унга ҳаваси келар, ҳатто: «Шу серка бўлмаганда, бу томонларда йўл топиш менинг учун ўзи бўлармиди!» деб кўнглида мамнун бўлиб қўярди, унга орқа қилиб, унинг далласи билан дадилроқ борар, бўлмаса шу вақтгача аллақайси ковакка уриб кетган бўларди.

Бир ҳафта деганда улар қишлоғи кўриниб турган ўрмоннинг бир четида тунашга қарор қилишди. Содиқнинг тахминига кўра, фронт энди жуда ҳам олис бўлмаслиги керак эди.

— Энди бу ёфи нима бўлади, Содиқжон? — деди Диловархўжа хавотирланиб ва курсидаккина бўлиб турган тўнкага ўтириди.

— Бу ёфи ҳақида эрталаб бош қотирамиз. Ҳозир дам олиш — ухлаш керак, — деди Содиқ режасини аллақачон тузиб, қаноат ҳосил қилиб қўйган кишидек, сўнгра хазондан наридан-бери жой тайёрлаб, устига чўзилди.

— Киши юраги шунақа ҳам дарё бўладими! — деганича Диловархўжа унинг ёнидан поилож жой олди. Унинг тахминича Содиқнинг юрагини дарё қилиб, кенг туттираётган нарса ҳамон ўз гуноҳига иқрормаслиги ва энди қочиб бўлса ҳам яна ҳаётдан ўз ўрнини топаётганига бўлган ишончи эди. Бу нарса унинг юрагига юрак, ишончига ишонч қўшади, уни хотиржам тутади. Худди шуни тасдиқлагандек, сал ўтмай Содиқ bemalol хуррак отиб, уйқуга кетди. Диловархўжа ҳам кўзини юмди,

лекин ҳадеганда ухломади, хаёл тизгинсиз отдек ҳар томонга судраб кетди, бир ерда тўхтамади. Унинг юрмаган тошлоғи, кирмаган кўчаси қолмади, охири ҳаёлиниг кети тушга улангандек бўлди-ю, ухлаб қолди. Қанча вақт ўтганини билмади, бирдан оёқ товушлари келди. «Бўри қулоғи овда» бўлиб, қуш уйқусида ётгаш Диловархўжа, албатта, биринчи бўлиб пайқади. Дик этиб бошини кўтарди, қулоқ солди: чиндан оёқ товушлари...

— Содиқжон! Содиқ! Бизни қуршаб олишди. Туриңг! — деди нафаси бўғзигача тиқилиб у.

Содиқ қаттиқ уйқуда эди, унинг қулоғига «туриңг»-дан бошқа сўз кирмади. У алан-қалан бошини кўтариб:

— Ухласангиз-чи! Мунча шошасиз, аchanгизнинг палови қирмоч олиб кетадими!... — деди. Диловархўжа унинг гапи тугамасданоқ бояги гапини такрорлади. Содиқ ишонқирамай кўзини уқалади:

— Сизнинг нимангизни қуршайди. Қаноти сингаш қушдай чўзилиб ётибсиз-ку, керак бўлса босади-қолади.

Шу пайт беш-олти кишининг шарпаси кўринди. Улар тўғри шу томонга келарди: ҳарбий формада, қўлларида милтиқ.

«Булар ким бўлди?» деб кўнглидан ўтказиб, Содиқ ёнига қараса, Диловархўжа йўқ: анча нарида энгашганича пилдираб кетяпти. «Қаёққа қочасан, подон» дея кулиб кўнглидан ўтказди Содиқ. Буни гўё эшигандек Диловархўжа қўшалоқ ўсан дараҳтнинг орқасига ўзини олиб, унинг айрисидан қуён мўралаш қилди. Бу орада милтиқли кишилар Содиқ олдига этиб келишди. Содиқ уларни кўриб жуда ҳайрон бўлди: кийим-бошлари кир-чир, соқол-мўйловлари ўсиб кетган, пойгадан қайтган отдек юз-кўзлари ҳорғин, милтиқларининг қўндоғига лой теккан.

Улар Содиқнинг кимлиги билан қизиқмай, унинг қаршисида тўхташди. Биттаси манзилимизга етдик, дегандек кеча Диловархўжа ўтирган тўнкага оғир чўкди. Бошқалар ҳам ўтиришди. Тўнкада ўтиргани ҳеч нарсага парво қилмай:

— Бир чектириңг! — деди Содиққа. Содиқ «йўқ» дейишга тили бормай, ҳамон бутоқ айрисидан «қани, Содиқни нима қилишар экан?» деб кўзи олма-кесак териб турган Диловархўжага қўли билан «бу ёққа келинг» деб ишора қилди. Ҳуркиб дараҳт орқасидан зўрга ай-

рилган Диловархўжа уч-тўрт қадам қўйиб, яна хавотирсираб тўхтаб қолди.

— Тамакидан олиб келинг!— деди Содиқ. Ана шундагина Диловархўжага жон битиб, қадамини тезлатди, юзида кулгига ўхшаган бир нарса пайдо бўлди.

— У ким?— қизиқди милтиқлилардан бири.

— Шеригим. Сизларни немис гумон қилди шекилли. Узинглар қаёқдан келяпсизлар?

— Қуршовдан чиқдик. Ўн кун деганда зўрға ёриб ўтдик. Кўплар қолиб кетди. Лаънатининг миномёти нафас олдирмайди. Солдатини танкка ўтқазиб, қўлига автомату, миномёт берганга ўхшайди.

Бу орада қўлида тамаки тўрвасини ушлаб Диловархўжа етиб келди. Унинг қўрққани ҳали ҳам қўлларининг титраб туришидан ва асабий боқишидан аён эди. У тамакини кир-чири, ўсан соқоллари билан ўзини ҳайратга солган аскарларга эмас, нима учундир, чекмайдиган Содиққа тутди. Содиқ:

— Уларга беринг!— деди боши билан аскарларни кўрсатиб.

Аскарлар донга ёпирилган товуқдек тамаки тўрвани қуршаб олишди. Сал кечикишса кайфи тарқаб кетадигандек шоша-пиша ўраб чекишиди. Кайфини баданга сингдираётгандек гап-сўздан қолиб, кўзларини сузиб ўтиришиди, аччиқ тутун ҳам уларни ташлаб кетгиси келмагандек даврада ҳалқа-ҳалқа бўлиб айланарди. Папирослар чекилиб бўлганидан кейингина улар астойдил танишдилар. Содиқ ўзларини аскарликка чақирилиб, бомбардимонда қолган қилиб кўрсатди.

— Энди нима қилмоқчисизлар?— деди тўнкада ўтиргани.

Содиқ ҳали бир фикрга келмаган кишидек елкасини қисди.

— Бу кунларда қисмингларни топиш амри маҳол. Истасанглар, биз билан бўлинглар.

Содиқ умрида бир марта ёлғон ишлатди. У аскарнинг таклифини жон деб эшишиб турган бўлса ҳам, «из нима дейсиз, ё ўз қисмимизни қидириб топамизми?» дегандек Диловархўжага қараб қўйди. Диловархўжа бу ҳаракатнинг маъносини тушунмай ҳайрон эди.

— Майли, жанг қиласиган фронтимиз бир, душманимиз битта бўлгандан кейин қайси қисмда бўлишимизнинг нима фарқи бор,— деди Содиқ.

— Тўппа-тўғри! — унга қўшилди аскар. Лекин бошқа бўди ҳадеб суриштираверган эди, ўша тўнкада ўтиргани силтаб ташлади, Содиқлар ёнини олди:

— Бунча суриштиравердинг, онаиг терговхонада туқсанми? Сендан ош-нон сўраб, ўқ товуши келмайдиган жойга олиб бориб қўйинг деятгани йўқ-ку, бирга жанг қилмоқчи. Ё сенга фашист камайиб қоладими? Хотиржам бўл, сен эмас, оға-инингга ҳам етади!

— Ҳушёрлик... — деб гап бошлаган эди у, яна тўнка-да ўтирган оғзига урди:

— Ёнини тит, яна радиопередатчиги бўлмасин!

Бирдан кулги кўтарилиди. Шу билан гап-сўз тугади.

Содиқ, гарчанд ўша ҳушёрлик ҳақида гапирган аскарнинг фикрига қалбан қўшилса ҳам, ўзининг яхши ният билан ноилож шу қалтис йўлни тутаётганидан, шу лаҳзада унинг турқи совуқ кўринниб кетди. «Бир балони бошламасайди кейин», деб кўнглидан ўтказди. Диловархўжа ҳам ўша аскардан чўчиётган бўлса керак, унинг хатти-ҳаракатидан кўзини олмасдан, баъзан мана бунисининг гаплари илмоқли-ку, кейин тахири чиқмайдими?» дегандек, Содиқ билан кўз уриштириб оларди.

Ваҳима билан бошланган бу тасодифий учрашув уларнинг жонига ора кирди.

Улар уч кундан кейин қуршовдан чиққанлардан тузилган қисмда, форма кийиб сафда туришарди. Ишнинг бунчалик енгил кўчганидан мамнун Содиқ «қалай, энди хурсандмисиз?» дегандек, Диловархўжага кўзини қисган эди, у ҳам «охири хайрли бўлсин» деб жилмайиб қўйди.

— Дўстлар билан бирга жанг қилишдан яхши нарса борми, — деди Содиқ кечқурун ўрнига чўзилар экан, — ҳалок бўлсанг бир чуқурда, тирик юрсанг бир тепада бўласан!

Ёнида ётган Диловархўжа уни эшитса ҳам, ўзини ухлаганга солиб, индамади.

3. ЁВУЗ НИЯТЛИ КИШИ

Мирсалим қанча уринмасин, йўлини қилолмади — фронтга кетадиган бўлди. Гарчанд мактабга «эл бошига тушгани — эр бошига тушгани» деб мақол айтиб, мамнун кириб келган, «ўзим бориб, йўлини тўсмасам бўлмайдиганга ўхшайди», деб керилган бўлса ҳам, ос-

топадан ҳатлаб уйга кирди дегунча, бутуз заҳрани хотинига сочди:

— Мана, хотин, бачканалик қиласидиган эрдан қутублиб қолдинг. Қуруқ кекирмайдиган бирорта бўйни ўйгонни топиб оласан энди.

Хотин гапнинг нима ҳақида бораётганини дарров фаҳмлади. Бошқа вақт бўлса ҳақини юбормаган бўларди. Не чораки, у фронтга кетяпти, қайтиб келиши гумон ерга кетяпти. Бу албатта эри учун эмас, ўзига ҳам оғир эди. Лекин хотин эрининг турқини кўриб, ўзини тутиб олди, тиқилиб келган аччиқ ёшни зўрға қайтарди. Агар у шундай қилмаса, бу йифи ё эрининг яна аччиқ таънисига дучор қиласа ёки унинг фарёдига сабаб бўлар эди. Хотин иккисини ҳам истамас, жуда бўлмаганда, шу охириги кузатув кунларида ўзини тутишга, шу билан эрига ҳам далда беришга қарор қилди.

— Юртга келган тўй, дадаси. Ўзингизни бунақа диққинафас қилиб, куйиб-ёнишингизнинг фойдаси йўқ. Худо насиб қилса тўрт кўз тугал кўришамиз. Қирқ йил қирғин бўлса ажали етган ўлади.

— Борди-ю, менинг ажалим етган бўлса-чи...— Мирсалимнинг кўзида ёш қалқиди.

— Ниятингизни яхши қилинг! Ҳар иш ниятга яраша бўлади.

Мирсалим кечаси билан безовталаниб, ағанаб чиқди. Сурмаган хаёли, кўрмаган туши қолмади, эрталаб шундай бўлиб ўрнидан турдики, туши билан хаёlinи ажратолмай қолди. Кечаси икки марта йиглади. Хотинининг қилмаган тадбири қолмади. Ширин гапирди, далда берди, орқаларини узоқ силаб ётди, оёқларини уқалаб қўйди. Агар бошқа вақт бўлганда Мирсалим хотинининг қўлидан шунчалик меҳрибонлик келишини билиб қувонган бўларди. Лекин у ҳеч бирини ҳозир қадрламас, бунинг барчаси касалнинг ўлими муқаррар бўлганда доктор «энди парҳезнинг кераги йўқ, кўнгли нима тусаса, бераверинглар» дегандек туюларди.

— Мана мени айтди дерсиз, кипригингизга гард юқмай омон-эсон қайтиб келасиз,— деди хотини эрини хаёлдан чалғитиш учун.

— Йўқ, хотин, йўқ... сен билмайсан,— деди Мирсалим шифтга қараб, тоқи санаб ётганича. Лекин хотини нимани билмаслигини айтишга тили бормади, юрагини оч мушукдек тимдалаб ётган дарди уни минг балога

мубтало қиларди, унга тинчлик бермас эди: у фронтга борса, бекорга ўлиб кетса, немис ғалабасидан кейин даври давронни ким суради? У орзу қилганича, дард чекиб ёнганича кўзини юмиб кетаверадими! Йўқ, бунга у асти чидолмас эди, чидагиси келмас эди.

Бу аламини Мирсалим хотинига айтмоқчи эмас, айтгани билан у тушунмайди, башарти тушунганда ҳам қўлидан нима иш келади. Мирсалимдан кейин «вой эримлаб» минг фарёд чексин, бир йил эмас, беш йил қора кийиб азасини тутсин — бундан унга нима наф бор! У ўзи ўша кунларни кўрмоқчи, ўзи даврон сурмоқчи!

Мирсалим эрталаб барвақт уйғонди. Таҳорат олиб, узоқ намоз ўқиди, кўзидан ёш оқизиб, алланарсаларни жойнамоз устида ният қилди. Ихлос билан ўрнидан туриб, қизарган кўзлари билан икки ёнинг салом берди. Эшикдан нонушта кўтариб кирган хотинга очиқ юз билан қараб, «бисмилло» айтиб дастурхонга ўтиреди. Одоб билан нон ушатиб, бир бурдасини оғзига олар экан, қизи Азизани сўради:

— Келмадими?

— Келиб қолади, кеча тайинлаб айтиб юборганман.

Азиза дадаси билан Қодир туфайли ўша гапга борнишиб қолгандан бери бир қанча вақт ўтган бўлса ҳам, ҳамон яра битиб, изи йўқолмаган, қори кетиб, музи қолган эди. У ҳамон ётоқда турарди. Лекин илгаригидек дадаси билан «пўм» эмас, онасининг илтижо-илтимоси билан дадасининг бир оз тоби қочган бир кези салом бериб келган, ҳолини сўраган, шундан бери уйга келиб-келиб турарди. Ҳа, ростдан ҳам, ўша биринчи тўқнашувдан кейин Азиза яна дадасини бир ачитиб олганди. Бу Мирсалимнинг сурбетлик билан Адолат холаларнинг уйини бўшатиб олғанидан кейин содир бўлганди. Бу гал Азиза дадасига тик туриб, башарасига очиқ айтмаган бўлса ҳам, унга эшилтириб, онасига бундай деди: «Бир дастурхондан нон еб, бир пиёладан юй ичган одамнинг ҳовлисини тортиб олгани уялмачингларми? Эртага эшик қоқиб кириб келса, қайси юз ҳилан башарасига қарайсизлар? Майли, бошқа одам ўлсин эди, ўша яхши эди. Лекин сизлар эмас! Бу пасткашлик! Қайси бола-чақангларга жой етмаётган эди. Мен ўлсан ҳам бу ҳовлида турмайман, илгари қайтиб келиш фикрим бўлса ҳам, энди қайтмайман. Кишилардан номус қиласман, уяламан. Уят».

Азида ўз сўзида турди. Бу ҳовлига қайтиб келмади, келиб-кетиб турди, эл-юрт олдида «ота безори, она бе-зори» бўлиб кўринмаслик учун онда-сонда келиб турди. Лекин ғишт қолнипидан кўчган, муомалалар жуда «ўта расмий» эди. У дадасига букилиб пешвоз чиқмаганидай, дадаси ҳам эгилиб «кел қизим» демас, дейишга иззат-нафси йўл қўймас эди. Шундай бўлса ҳам Мирсалим фронтга кетиши аниқ бўлгандан кейин, уни айтиб юбо-ришни хотинидан илтимос қилди.

Азида, уларнинг тахминича, нонуштага етиб келиши керак эди. Чиндан ҳам нонушта охир бўлиб қолганда кириб келди. Орада ҳеч нарса ўтмагандек улар билан сўрашиб:

— Сиз хавотир олманг,— деди у Мирсалимга,— ойим ёлғиз қолмайдилар, хабар олиб тураман.

— Кўчиб кела қолсанг-чи!— майнингина қилиб деди Мирсалим.

— Буни бир ўйлаб кўриш керак. Эҳтимол кечалари ойнимни ёлғиз қўйиб, чўчитмаслик учун кўчиб келарман. Лекин ҳозир эмас. Сал имтиҳонларимдан қутулиб олай.

Бу гап шу билан тамом бўлди. Энди нима ҳақда гап боришини ҳеч ким билмас, ҳар ким шундай пайтларда бўладиган ўй-хаёл билан банд эди.

Охирги қултум чойини ҳўплаб, пиёлани бир четга суриб қўяр экан, Мирсалим Азизага қараб ҳазин товуш билан салмоқлади:

— Нима қилсам, сенлар учун қилдим, нима десам, сенларга жоним ачиғандан дедим. Мана энди фронтга кетяпман. Фронт борса келмасдай жой. Сени бир кўрай деб чақирирган эдим, қизим...

Азизанинг назаридаги дадасини бирор алмаштириб кетганга ўхшарди! Наҳотки, айтганини қилдирадиган, ушлаганини кесадиган дадаси шу киши бўлса!

Азизанинг ўзгариб қолган дадасига раҳми келди, уни «бағритош, дийдаси қаттиқ» деб юрганидан ҳозир ажабланди. Дадасининг кўзида қилт-қилт қилиб турган ёш унинг ҳам кўзига ёш чиқарди, лекин уни тўкишдан Азиза ўзини эҳтиёт қилди. Қандайдир бир сўз айтиб, ўлими олдида хайрлашайтган кишидек кўзида ёш билан эзилиб турган дадасининг кўнглини кўтармоқчи бўлди-ю, шундай таъсири бир сўз тополмади. Факат: «Ундей деманг, дада, фронт кетаётган битта сиз эмас»,— дея олди холос.

— Уларнинг йўли бошқа, менини бошқа,— деди бе-
ихтиёр Мирсалим ва бундан чиқадиган маънодан чў-
чиб, бошқа бир таърифга бурди:— Менинг ёшим улға-
йиб қолган...

— Ёшингиз катта бўлса ҳам, соғломсиз, бақувват-
сиз.

— Ажал соғлиқ суриштирмайди, қизим, учган ўқ-
нинг ақли йўқ.

Азиза энди билдики, шу вақтгача қамчисидан қоп
томиб, сўзидан илон пўст ташлаган ва ботир кў-
ринган дадасининг ичи пўнг экан. Фронтга боргиси
йўқ, ҳар қанча ботирлик керак бўлса, шу ерда қил-
моқчи.

Мана шуларни ўйлаб туриб, Азиза кўзида пайдо
бўлган ачиниш ёшларининг қаёққа кетиб қолганини
сезмади. Унинг ўрнини қандайдир бошқа бир ҳис олган
эди. Бу раҳм ҳисси эмас, балки бўлак бир нарса эди.
Шунинг учун ҳам у йиғлаб турган дадаси билан совуқ-
қина хайрлашиб қолди. Кейинчалик онаси:

— Бунча дийданг қаттиқ, қизим, кўзингга ёш ҳам
келмади-я! Даданг ўгай эмас эди-ку!— деган эди,
Азиза:

— Ўзим ҳам билмайман, нега шунақа бўлди, ойн-
жон,— дейиндан бошқа жавоб қилолмади ва нима
учундир кўзидан дув ёш тўкилди.

Мирсалимнинг режаси бўйича, у тўғри фронтга туш-
маслиги керак. У билан бирга кетаётганиларнинг барча-
си тойланмаган пахтадек бўш, хом кишилар. Умрида
қўлига милтиқ ушламаганлар ҳам бор. Демак уларни
бирор ерга олиб бориб ўргатишлари, машқ қилдириш-
лари шарт. Бу машғулот камида уч ой, бўлмаса ярим
йилга чўзилади. Бу муддат қисқа фурсат эмас. Бу ора-
да уруш тугаши, жилла бўлмаса, «яраш-яраш» бўлиши
мумкин.

Поездда кетаётган Мирсалимнинг фикрига шу хаёл-
лар келди-ю, кўнгли равшан тортиди. «Саранжомингиз-
ни олинг, фалон куни кетасиз» деб буйруқ олгандаи
бери бўғилган иштаҳаси очилди. Ҳамманикидан кўра
кеттароқ сафар қопини олдига сурди. Унда нималар
йўқ эди: шакар аралаштирилган талқон, яхна гўшт,
патир, мева-чева, ширинликлар, бир қутичада чой, чой-
нак-пиёла, иккита қошиқ (биттаси запас), зарур бўл-
ганда биронта командир билан «отамлашиш»да жуда

ўнг келадиган хом қази (пишириладиган жой доим то-
нилади!), иссиқ пайпоқ...

Мирсалим кўнгли тусаган нарсаларни олиб, олдига
қўйди...

Учинчи кун кечқурун Мирсалимни яна ташвиш бос-
ди: нега ҳалигача бирор ерга тушишмайди? Бу кетиши-
да ҳадемай фронтга етиб қолишади-ку! Йўғ-е! Машқ
қилдирмасдан-а!

Мирсалимни машқ, ҳарбий тайёргарлик эмас, шу
орада ўтадиган вақт қизиқтирарди, албатта. У фронтга
тушиш, ёғилиб турган ўқлар, портлаб турган мина ва
снарядлар орасида жанг қилишни тасаввур этолмас
эди. Унинг назарида уруш тугаб қолди, вақтдан ютиш
керак, холос. Лекин поезднинг ҳамон елиб боришига
тушунмасди.

— Тўппа-тўғри фронтга олиб бориб туширадилар,
шекилли,— деди Мирсалим жўрттага ҳамроҳининг фик-
рини билиш учун. Қорачадан келган, дўнг пешона ҳам-
роҳи унинг бу қизиқ саволидан «бунинг ўзи соғ одам-
ми?» дегандек мийигида кулиб қўйди.

— Бўлмасам-чи!— деди қатъий қилиб у,— далага
чиқиб «ҳоммопиш» ўйнамоқчимидингиз?

Мирсалим ичидаги «тўнкага ўхшаб қўпол бўлмай ўл»
деган бўлса ҳам:

— Ахир машқ-пашқ деган нарса бўлади. Ҳали мильт-
тиқ олганимиз йўқ,— деди ётиғи билан.

— Хавотирланманг, ёқалаштиргани эмас, жанг қил-
гани олиб кетишаёт. Ҳали қурол ҳам беришади, қана-
қа қилиб урушишни ҳам ўргатишади.

— Мен ҳам шуни сўрайпман-да, элат,— деди кўнгли
бир оз тинчидан Мирсалим.— Юзингда қўзинг борми, де-
масдан, кишини силтаб гапиришингиз яхшимас.

Дўнг пешона яна кулиб қўйди, узр сўраган
бўлди:

— Кўнглингизга олманг-ку, қўшни, саволингизнинг
ўзи йўнмаган таёқдек бесўнақай эди. Қанча тез фронт-
га тушсак, шунча яхши эмасми! Душман мамлакат ич-
карисига қанча кўп кирса шунча ёмон, ахир уни қувиб
чиқаришнинг ўзи бўлмайди. Унинг йўлига тезроқ гов
ташлаб, тўхтатиш керак. Буни сиз билан мен қилмасак,
ким қиласди!

— Кейин орқасига қайтариш-чи?— унинг гапини
бўлди қаршида ўтирган қош-кўзларига сурма қўйган-

дек чиройли йигит.— Ҳали қиласидиган ишимиз кўп, бирорадар.

— Эҳтимол, сиз билан биз анави дўстим айтганидек, ғов бўлиб душманни тўхтатганча ўша ерда кўз юмармиз, бошқалар уни кетига суреб кетар. Шер ҳамласига қарши ташланган киши ўлчмини ҳам бўйнига олиб қўйиши керак. Биз сайилга эмас, жангта кетяпмиз,— деди Мирсалимнинг ёнида ўтирган суюклари бузуқ, елкаси кенг лўлинамо ўрта ёш киши.

— Албатта! Албатта!— деди жуда ўнғайсиз аҳволда қолган Мирсалим. Лекин у бу кишиларнинг ёниб гапиришига ишонгиси келмас эди: наҳотки кишилар ўлимга кета туриб, анави лўлинамо айтгандек, шер ҳамласига қарши бора туриб, шунчалик дадил бўла олади, бирор ерда беш-олти ой тинчгина машқ қилиб ётишдан кўра тезроқ қнёмат қирғин бўлиб турган фронтга тушишини афзал кўради. Йўқ, бу одамлар ё менинг кўриб юрган кишилардан эмас ёки ўшаларнинг ўзи-ю, фақат тилини сал қайраб олган ва ё бўлмаса, улар бирдан ўзгариб қолган, мен тушуниб бўлмайдиган, менинг ақлим етмайдиган даражада ўзгариб қолган. Бу ёфи энди душман билан қамти келганда маълум бўлади, деб кўнглидан ўтказди Мирсалим, аммо яна ичида, булар ҳам фронтга тушишга кўзи етмаганидан шунаقا дейишияпти. Наҳотки буларнинг жони савил, деб қўйди. Пайти билан уларни бир-бир кўздан кечирди. Дўиг пешонанинг бирор фирибгарлик қиласидиган турқи йўқ, боя гапираётганда қандаи бўлса ҳозир ҳам шундай: хотиржам, бошини сал бир томонга ташлаб поезд тебратиншида аллаланиб бормоқда. На хомуш кўзида бир қувлик бор, на ўтиришида. Қош-кўзига сурма қўйгандек чиройли йигит сұҳбат тугаши билан яна қўлига китобини олиб завқ билан ўқиб кетяпти. Ҳатто чиройли кўзи, кам гўштина юзида кулги аломатлари ҳам кезади. Ташвишли, қув, тили билан дили бошқа одам бунақа сафарда ўзини бунчалик эркин ва бемалол тутолмайди, ҳар қандай ичидан пишган бўлганда ҳам, сохталиги очилиб, миси чиқиб қолади. Анави суюклари бузуқ лўлинамо-ку, икки дунё менга бир қадам. Яшашни билардим, ўлишни ҳам биламан, курашни-ку қойил қиласман. Онам мени асли шунга туққан, дегандек оғир жангда ўзинга тенг келадиган йўлдош қидиргандек ҳаммани бир-бир кўздан кечириб, ўзича хулоса чиқариб,

ишонч билан ёнбошлаб ўтирибди. Унинг хатти-ҳаракати ва сўзида бирор ясамалик бўлишига киши ишонмайди. «Менинг бўлганим шу. Менга ишонсанг мана, ишонмасанг ачангнинг арвоҳига» дегандек, юзига нисбатан кичкина кўзлари сокин йилтиллайди. Унинг нимасидир Мирсалимга Содиқни эслатди. Лекин нимаси ўхшашлигини топиб ололмади. Содиқнинг эсга тушиши эса, Мирсалимни туни билан ухлатмади: уруш эрта-индин тугаса, Содиқ қайтиб келса, унда нима бўлади? Бутун сирларимдан воқиф бўлмаганида ҳам, у ўтирган ҳовлини тортиб олганимнинг ўзи баҳтимни қора қилиш учун кифоя эмасми? Эй, калтафаҳм Мирсалим! Бошини ейишга-ку единг, шу ҳовлига чангл солишининг сенга нима кераги бор эди! Мана энди нима бўлди? Арзимаган ўша ҳовлини деб, тилинг қисиқ, юзинг шувут. Ширинсўзлик билан бўшатиб олган бўлсанг ҳам майли эди. Адолат холанинг оппоқ соchlари билан қон йиглагани эсингдами? Нималар деб чирқилламади, нималар деб илтижо қилмади — ҳеч бирига қулоқ солмадинг, «давринг келди, сур бегим» деб орқа-ўнгингга қарамадинг. Энди-чи. Энди нима бўлади?

Эрталаб турганда Мирсалимнинг мияси бу ташвишлардан анча холи эди, ҳатто кечаси беҳудага шунча изтироб сурганидан мийиғида кулиб қўйди: иодон бошим!

Поезд эса, ҳамон километрлар танобини тортиб, уфққа бигиздек санчилиб борарди. Кечаси саҳро тугаб, ўрнини рус ерининг манзаралари: ям-яшил қарағайзор, буғдоизор, кўм-кўк ўтлоқ, томи ниш, ёғоч уйлар алмашган эди. Ана, шапкасини бостириб олган рус бола ўтлатиб юрган сигири ёнида туриб поездга қўл силкияпти.

— Бу ерларнинг ҳавоси бошқача,— деди қош-кўзи сурма қўйгандек чиройли йигит.— Ҳу анави ўрмонларни қаранг: ичи роҳатижон!

— Бўлганимисиз?— сўради дўнг пешона.

— Йўқ, ўқиганман.

«Ёш-да, ўқиганининг ҳаммасини рост деб юради», дея кўнглидан ўтказди Мирсалим уни эшитиб. Йигит эса бутун умри рус ўрмонида ўтгандек, оғзидан бол томиб таърифини қиласарди.

— Шундан озгинасини бизнинг томонга бермагандай!— дея ўқиниш билан сўзини тугатди йигит. Дўнг пешона эса, Ўзбекистон тоғларидаги арчазорларни мақ-

таб, түрли-туман мевалари билан рус ўрмонидан қо-
лишмайды, деган фикрни айтди. Суҳбат табиат бой-
ликлари ҳақида кетиб, анча вақтни олди. Лекин Мир-
салим фронтга, тиш-тироғигача қуролланган душман
билан жанг қилгани кетаётган бу одамларнинг юрагига
шу гаплар сиғганига ажабланарди. Бу ҳам етмагандек,
чиройли йигит китоби ичига газетадан қирқиб солиб
қўйган бир парчани олиб:

— Ўқиб берайми? Эшитасизларми? — деди.

— Хўш? Хўш? Қани! — деди суяклари бузуқ лўли-
намо киши гавдасига ярашмаган бир қизиқиш билан.

Йигит, сизлар нима дейсизлар, малол келмайдими,
деган каби кўзларини атрофга юргутириб чиқди, кейин
ўқиди. Бу севимли ўзбек шоири Мақсад Шайхзоданинг
«Кураш нечун?» деган оташин шеъри эди. Йигит бу
шеърни илгари ҳам катта давраларда ўқиган ёки яхши
машқ қилган бўлса керак, расмият учунгина қўлида
ушлаб турарди, аслида ёд ўқирди.

Бу кураш истиқбол машъали учун,
Лениннинг мужассам ҳайкали учун,
Бу — элнинг гўдаги, чоли, гўзали,
Навоий «Хамса»си, Бобир ғазали,
Дуторнинг мулоим унлари учун,
Ижоднинг муҳташам қунлари учун.
· · · · ·

Шу учун курашмоқ бизга фарз бўлди,
Юраклар оташин нафратга тўлди.
Эй Ватан, эй дунё, эй инсон, қардош,
Халқлар эрки учун берамиз бардош.
Зафарнинг нашъясин тотиган эрлар:
«Эрк десанг, урушда енгиб чиқ!» дерлар.

— Шоирлар ҳам ўлмасин, дўндириб айтади, ди-
лингдагини топиб айтади,— завқланиб кетди дўнг пе-
шона.

— Дўндиrsa ёssин-да! Ўликнинг нафасидай совуқ
шеърнинг кимга кераги бор! — деди шеър завқидан ке-
йин ўрнига ўрнашиб ўтирас экан суяги бузуқ лўлинамо
киши.

Мирсалим бу гапларга аралашмади, тўғриси, бу
гаплар унинг юрагига сиғмас эди. Поезд юрган сари
унинг кўзига кўлоб бўлиб ётган фронтдаги қон, мурда-

ларни босиб-янишиб келаётгани немис танклари, ўзининг жонигина кўринарди. У бу хаёллардан ўзини зўрлаб ҳам ажратиб ололмас, боши зирқираб оғриб, чаккала-рига бирор бигиз санчаётгандек азобланар, қовоғи оғирлашиб, мудроқ босарди. Ўйқусида ҳам боши-кети-ни тушуниб бўлмайдиган алламбалоларни кўрар, кўзи-ни очганда бирортасини эслаб ололмас эди. Ёнида ке-таётган, ўзи билан сафари бир, тақдири бир кишилар-га ўхшашни баъзан истар, уларнинг суҳбатига гоҳо аралашарди-ю, бари бир қўшилиб кетолмас эди. Бош-қалар эса кундалик ҳаётини янги бир шароитда давом эттираётган, бундан кейин ҳам ҳар қандай шароитда давом эттириши мумкин ва қўлидан келадиган киши-лардек боришарди. Улар учун фронт Мирсалим тушун-ганидек даҳшат эмас, балки булар фронтга, фронт-даги душманга даҳшат солиш учун кетаётганга ўх-шайди. Мана шуниси Мирсалимга яна ҳам қизиқ туюларди.

Поезд бешинчи кун кечаси бир станцияда тўхтади. Мирсалимнинг вагондан чиқиши билан қилган иши атрофга қулоқ солиш бўлди: ўқлар овози келаётгани йўқми? Бу томондан хотиржам бўлганидан кейин станцияни кўздан кечирди. Бу ерда унинг диққатини тортади-ган ҳеч нарса йўқ эди. Дала жойларда бўладиган оддий станция: икки қаватли бир бино.

Нарсаларни машинага солиб, ўзлари саф тортиб, йўлга тушдилар. Сокин тун. Осмон тўла юлдуз, лекин ёруғи йўқ. Йўл бўйидаги дарахтлар ҳурпайган товуқга ўхшаб кўринади, қоп-қора. Саф ярим соатча юргандан кейин ўрмонга кириб кетди. Ўрмон ичи боягидан ҳам жимжит, фақат баланддан дарахт бошларини тебратиб ўтган шамолнинг пихиллашга ўхшаш бўғиқ товуши бир текисда келади. Аскарлар ҳам бу ўрмон тинчлигини бузгиси келмагандек чурқ этмай боришарди, фақат баъзида старшинанинг «Сочилмасдан юринг!» деган товуши янграб қолади, чопиб олдинга ўтгани кўринади. У колонна этагидагилар етиб олиб, саф тартибга тушгунича, саф олдида ўзи секин бошлаб боради, ке-йин яна ёнига ўтиб кетади.

Бир маҳал палаталар тикилган каттагина майдонга чиқдилар. Бу ерда аввал ҳам аскарлар бўлгани биринчи қараашданоқ кўриниб туарди. Янги келганларни от-делениелари билан палаталарга бўлдилар...

Қош-қўзи сурма тортгандек чиройли йигит эрталаб ювениб келиши билан: —

— Поездда менга «ўзинг ўрмонни кўрганимисан?» дейётган ким эди? Қани, ўша одам айтсин-чи, ўрмои ёмон эканми? Роҳатижон-ку! Анави дарахтларни қаранг, сафга тизиб қўйганга ўхшайди-я. Аддлигини кўринг,— дей ўрмон сайлига келган кишидек қувонч билан кунини бошлади.

— Шунинг ўндан бирни мева дарахти бўлармиди!— гапга аралашди кеча Ўзбекистон тоғларини мақтаги дўнг пешона.

— Бобонга ўхшайсиз-а, дарахтнинг мевасизини таш олмайсиз.

— Йўқ, деҳқонман, пахтакор. Дарахтнинг ҳусни бўйида эмас, иним, мевасида.

Мирсалим уларнинг гапига қулоқ солиб туриб, уларнинг ҳамон йўлдагидек бу ерда ҳам беташвиш, бехавотир, ҳар кунгидек одийгина ҳаёт бошлаётгандари га ҳайрон бўлди.

Шу маҳал отделение командири ёрдамчиси билан нон ва қанд олиб келиб қолди. Уларни палата ўртасидаги «қўй бола» столда тақсимлади. Эҳтиёт билан, имкон борича баравар қилиб бўлинган нон устига бир неча чақмоқдан қанд қўйди. Қейин ҳаммани тўплади. Мирсалим кутганидек ўзи улашиб қўя қолмади.

— Қани, ким чақиради?— деди атрофга қараб. Ҳеч кимдан садо чиқмади. Битта аскарни тайинлади. У аскар орқасини ўгириб турди. Отделение командири тақсимланган нондан қанди билан биттасини қўлига олиб:— Кимга?— деди, орқасини ўгириб тургани унга қарамасдан бир аскарнинг фамилиясини айтди, нонни номи чиққанга узатди. Худди шундай Мирсалим ҳам ўз ҳиссасини олиб тумбочкаси устига қўйди. Ҳамма тарқалиб бўлгандан кейин ёнида қолган суюклари бузуқ лўлина-мо кишига:

— Бу нима бачканалик?— деган эди:

— Кўриннишдан-ку, бачканаликка ўхшайди, аслида яхши нарса: бегидир бўлади. Финляндия урушида менга ҳам аввал сизга ўхшаб фалати кўринган эди...

Мирсалим унинг сўзини бўлди:

— Финляндия урушида бўлганмисиз?

— Бир ҳафтагина.

— Кўзи пишганларданман денг. Бахти экансиз, соғ-саломат қолибсиз.

— Урушга борган ўлаверадими, биродар, урушниң бошидан охиригача қатнашиб, гард юқмаганлар бор.

— Йўғ-е! — ажабланди Мирсалим.

— Ўз кўзим билан кўрганман. Одамлар ўқнинг ақли йўқ дейди, бу бекор гап. Ўқ ақлли. Ўқ аввалам қўрқоқни қидиради, кейин бошқага тегади. Боболаримиз, қирқ йил қирғин бўлса, ажали етган ўлади, деб бекорга айтишмаган. Уша ажал ёвқурлиги, довюраклигидан, ўлимни ўйламаганидан етмаган, ҳа, ботирлигидан етмаган, хўп деяверинг! — Унинг гавдасига нисбатан майда бўлган кўзлари, ишонаверинг, бу одам ёлғон гапирмайди, дегандек чақнаб кетди. Лекин бари бир, Мирсалим ишонқирамади. Мирсалим ҳар нарсани ўз қолипига солиб, ўз гази билан ўлчарди. Буларнинг қолипи ҳам, гази ҳам уникига ўхшамайди, ўхшатаман деса ҳам ўхшамаялти.

Биринчи кун ҳаммомга тушиш, кийим-бош — форма олиш, гимнастёркага ички ёқа тутиш, қуроллар олиш, уни кишиларга биринкириш билан ўтди. Эртаси тонг қоронфисидан бошлаб сиқса суви чиқмайдиган пишиқ қилиб тузилган жадвал билан машғулот бошланди.

Мирсалим муродига етган кишидек кўкрак кериб, мамнун нафас олди. Машғулотлар қанчалик оғир бўлмасин, фронтда қон тўкиш, ҳар лаҳза ўлим кутишдан сенгил эди. Солдат камарини қандай қилиб боғлашдан тортиб, душманга қай вақтда қандай ўқ узишгача, бир-бировга честь беришдан тортиб, яраланган жангчига ёрдам кўрсатиш, уни қуроли билан бир четга олиб чиқиб кетишгача, походда қанча ва қай вақтда сув ичишдан тортиб, окоп қазиш, мудофаа тутиш, кейин шиндатли ҳужумга ўтишгача — ҳамма-ҳаммаси ҳақида «бilmасанг ўргатамиз, истамасанг мажбур этамиз» деган қаттиқ шиор билан машғулот борарди. Ҳаммадан ҳам Мирсалимга командирнинг: «Бу ерда қанча кўп тер оқизсак, фронтда шунча кам қон тўклилади», — дегани ёқиб тушди. Кўнглида «қани энди шу ердаги тер тўкишининг ўзгинаси узоқроқ чўзилса!» деб қўйди. Лекин ҳеч ким бу машғулотларнинг қанча вақт чўзишлишини билмас эди. Бирор «Этигимизнинг ғарчи кетиб, милтиғимиз нишонга тегадиган, ўзимиз ҳар қандай қулфга тушадиган калит бўлган куни кетамиз», — деса,

бошқаси: «Ҳали замбаракдан отишни ҳам ўргатиша-ди»,— деб, муддатни орқага сурар, яна бири: «Ҳа, сен-ларни боқувга олиб келган, семириб қолинглар»,— деб пичинг отарди. Бу орада Киевга душман кирди. Рота командирининг сиёсий ишлар бўйича ўринбосари шу куни ўтказган машғулотида: «Бу жуда нохуш хабар, лекин бизни ваҳимага солмаслиги керак. Киевни вақтнинча босиб олган душманни ҳам тор-мор келтиришга ишонч билан ҳарбий техникани ўрганиб, маҳорат билан жанг қилишга ҳар соат тайёр туришимиз керак»,— деди. Политрук бу гапларни фронтга кетиш муддатини билиб айтган эканми, эртаси тонготарда тревога билан йўлга чиқсан батальон икки кундан кейин фронтга келиб тушди. Эртасига жангга кирди.

Батальон душманнинг икки ҳужумини қайтарди. Бирда суюги бузуқ лўлинамо жангчи бир танкни ёндириб, командирнинг ташаккурини олди. Қош-кўзи сурма тортгандек чиройли йигитнинг танкка эргашиб келаётгани фашистларни жуда яқинга келгунинча қўйиб бериб, кейин қўл пулемётидан тутдек тўkkанини ўз кўзи билан кўрган Мирсалимнинг кўзи ўйнаб кетди. Лекин бир вақт қараса, у йигит яраланибди, замбилда олиб ўтиб кетишияпти, бу унга боягидан ҳам таъсир қилди. Дўнг пешона жангчи эса, иккинчи марта душман ҳужуми бошланиши биланқ нобуд бўлди. У Мирсалимнинг кўзи олдида манглайидан ўқ еди, милтиғи душманни нишонга олганича брустверда қолаверди. Шериги окоп ичига олиб ётқизди. Бу даҳшат Мирсалимга туни билан тинчлик бермади, эрталаб сарғайиб чиқди. Душман яна ҳужумини бошлаганда Мирсалим ҳеч нарсанни фаҳмламайдиган девонасифат афрайиб ўтирас, ҳар гал снаряд тушгандагина кўзини пирпиратиб қўярди. Душман бугун кечагидан уч баравар кўп куч билан ҳужума га ўтиб, батальонни чекинишга мажбур этди. Батальон тушга бориб чекинди.

Лекин Мирсалим ўтирган окопида қолаверди...

4. ҚОТИЛ ЯНА ҚОН ИСТАБ ҚОЛДИ...

Бундан сал кун аввал бирор «фронт шунаقا бўла-ди» деса, Диловархўжа асти ишонмас, «ваҳима ҳам сал эви билан-да!» деган бўларди.

Наҳотки, яқинлашиб келаётган фронт қарисига

юриб, каттагина бир шаҳар бўсағасида мудофаа тутиш-ганидан бери немис кўзларини очирмаса! Гоҳ осмондан келиб бомбалайди, гоҳ узоқдан мина ташлаб бетинч қиласди.

Диловархўжа фронт деганда ўша ўзи кўрган пақ-пүқ билан қиличбозликни тасаввур қилиб юрган экан. Бомбалар ернинг ҳалқумидан тутиб, чангини минора қилиб, осмонга отишини, қулочга сиғмас азим дараҳтларни илдизи билан қўпориб ташлашини, ғиштин иморатларни қўмдек тўкишини, не-не тепаликларнинг қашашарини сал вақтда пастга тушириб юборишини ҳеч хаёлига келтириб кўрмаган эди. Ҳаммадан қизифи шу бўлдики, эрталаб бошланган шунча тўс-тўполондан кеёнин ҳам одамлар тирик қолибди. Диловархўжа шунча бомба ва мина портлаганини, ҳамма ёқнинг ўйдим-чуюр бўлиб кетганини кўриб, «Фақат мен худо ёрлақаб тирик қолдим шекилли» деб ўтирган экан. Бир маҳал бомбалашув, мина ташлаш тугаб, гувиллаган бўғиқ товуш келди. Бу нотаниш товуш унинг ҳурқиб қолган миясига бир фикр келтиргунича бўлмай, кимдир томоғи йиртилгудек бўлиб «Танк!» деб бақирди. Бу товуш хўроздарнинг тонгдаги қичқириғидай мудофаа бўйлаб кетма-кет такрорланди. Окопларда аввал милтиқлар найзаси йилтиллади, кетидан жангчиларнинг боши кўринди. Айниқса, атайн олдинга ташланган бронешарнинг ҳаракати тезлашиб кетди. Сой томондан кетма-кет ўшкириб чиқиб, дарров очиқ майдонга сочилиб кетган, тўшида иккита оқ илонни бир-бирига кўндаланг қўйгандек фашист белгиси бор танклар «бу майдон ўзимники, бу атрофда одам зоти қолмагандир, қолгани бўлса менинг емим» деган виқор билан мудофаа қаршисига ўрмалаб қолди. Лекин мудофаа линиясига яқинлашуви билан шунаقا олатасир ўққа дучор келдики, олдиндаги иккитаси чўғ тушган хазондек гувиллаб ёнди, кетидагилар эсанкираб қолгандек бир зум тўхтади, кейин шартта орқасига бурилиб, елиб кетди. Нарироқ бориб яна биттаси ёнди. Ичиди экипажи люкни очиб чиқиши билан кимнингдир автоматдан берган сидирға ўқи ер тишлатди, ҳатто биттаси танк устидан умбалоқ ошиб тушди.

Диловархўжа, олдинда битта-иккита мерган қолган экан-да, деб унга аҳамият бермади. Душман учта танкнинг аламига чидолмади шекилли, бир пиёла чой ич-

гунча вақт ўтмай, мудофаани шунаقا тўпга тутдики, Диловархўжа, энди ажалим етди, боя бир худо асраган экан, деб юборди. Окопнинг тубига тушиб, бошини елкалари орасига олганича гужанак бўлиб, ҳар ер силкенишида бир қалқиб, жонини ҳовучлаб ўтирди. Турли катта-кичикликдаги снарядлар бечора ерни минг оҳангга солиб, қўпориб ётар, зарралари қуюн бўлиб кўқдан ёғилар эди. Унинг назарида боягиси ҳам ҳаловат экан. Бу ҳам етмагандек немис яна танкини майдонга чиқарди. Улар келаётганда ҳам тўпдан отишни тўхтатмади. Яна танклар ўша ерга келганда қаршиликка учради. Биттаси ёнди. Лекин бунга улар бу гал парво қилишмади. Танклар йўл-йўлакай ўқ узиб келар, ҳар ўқ узганда қаттиқ йўталган кишидек бутун вужуди билан бир силкиниб тушарди. Улар мудофаанинг олдинги қаторига келиб, окопларни чир айланиб изғилади. Ана шунда танкларни пансҳ тутиб уларнинг орқасида келаётган автоматчиларнинг чағир-чуғури эшитилиб қолди. Диловархўжа бундоқ қараб, ҳангу манг бўлди. Бақа ранг кийимдаги бу кишилар калта автоматларини қоринларнiga тираб, баъзан қисқа-қисқа ўқ узиб йиқи-ла-қўпа келарди.

Диловархўжа бу ёфи нима бўлганини билмади, оконичида алланималарни пичирлаб, эси кетиб қолибди. Бир вақт кўзини очса, қўшни окопдаги Содиқ қўл пулемётини окопи четига қўйиб олиб, тариллатиб ўқ узялти. Ўқи тугул, кўзлари билан ўққа тутаётган кишиларини еб юборгудай бир ҳолатда эди. Турган окопи торлик қилиб қолгандек, пулемётини кўтарганича чопиб кетди, ундан ўнгроқда бўлган бошқа бирига сакраб тушиб, яна ўқ ёғдирди.

Диловархўжа кўзи Содиқда бўлиб, пайқамаган экан, унинг бу ёнидагилар ҳам, умид билан келибсан, насибангни ол, дегандек ҳоли-қудрат ўқ узиб турибди. Танклардан биттаси ундан сал нарида занжирлари узилиб тўхтаб қолибди. Лекин у ҳамон ўқ узарди. Диловархўжа ичида, бу нима қылгани, ишдан чиқса ҳам, тавба қилмайди-я! Тоза ашаддийси экан-ку, деб турган эди, ўрмонда учрашганда ҳадеб Содиқга савол бериб, кимлигини суриштира берган, кейинчалик «хушёр» лақабини олган жангчи (исми Шубин эди) окопидан чиқиб, танкка қараб эмаклаб кетди. У худди сув остида сузиб бораётгандек бошини қуий этиб борар, баъзан

тўхтаб, ён-верига қараб олар, терлаб кетган юзига қурум ўтирган, кўзида ўт ёнарди. Бўйнига осиб олган автомати эмаклашга халақит берди шекилли, уни бир қўли билан силтаб, орқасига ўтказиб юборди. Худди шу пайт танк ичида гилар уни пайқаб қолишди шекилли, пулемётдан ўқ узишди, чумчук галасидай чийиллаган ўқлар бошидан бир қарич баланддан ўтиб кетди. Энди ўқлар панд беришига кўзи етган Шубин читтакдек чақонлик билан олдинга сапчиб ўтди, яна атрофга олазарак қараб эмаклади. Танкка беш метрча қолгандা чалқанча ётиб ёнидан, немис таъбирича, «Сталин коктейли» номли ёнилғили шишани олиб, яна қорнига ағдарилди. Автоматини бир қўлида ушлаб туриб, шишани танкка ирғитди. Диловархўжа унинг танкка тегиб синганини эшитмади, лекин «гуп» этиб олов кўтарилганини кўриб чўчиб кетди. Аммо нима учундир Шубин орқасига қайтмай, ҳамон ўша ерда автоматини ўқталиб ётарди. Диловархўжа уни қотиб қолган фараз қилди. Йўқ, ундаи бўлиб чиқмади. Шубин тирик, атайнин сичқон пойлаган мушукдек бўлиб ётган экан. Бир маҳал гулхан бўлиб ёнаётган танк жон талвасасига тушиб қолди шекилли, тўпидан устма-уст икки-уч ўқ узди. Шу ўқ билан нафаси ичига тушиб кетди. Шубин танк жуда гуриллаб ёнаётганидан ҳафсаласи пир бўлган кишидай орқасига хомуш эмаклаб қайтди. Диловархўжанинг ёнидан ўтар экан, чиқмади лаънатилар. Ичидагувишни афзал кўрди, деб қўйди ва қурум босган юзидаги терини енгил артди. Диловархўжа шунда билдики, у танкни ёқиб юборганидан кейин ҳам кўнгли тўлмай, ичидан экипаж чиқишини пойлаб ётган экан.

«Бу одамларнинг жони бунча савил», деган Диловархўжа немисларнинг шунга ўхшаш ҳужумидан кечгача яна иккитасига гувоҳ бўлди. Кечгача ўнга яқин танк ёнди, унинг орқасидан каламушдай ўрмалашиб келган солдатларнинг камида ярми майдонда қолиб кетди. Аммо мудофаани ёриб ўтолмади. Эртасига яна шу ҳолат такрорланди. Эрталаб барвақт учған иккита самолёти қандайдир қоғозлар ташлади. Улар ерга тушгунча, комиссарнинг буйруғи окопларда пайдо бўлди: «Варақаларга тегилмасин! Агитаторлар йигиб олиб, куйдириб ташласин!»

Одатда ниманики моне тутилса, қизиқувчилар шунча кўп бўлади. Худди шундай Диловархўжа ҳам қат-

тиқ қизиқди-ю, қўлга туширолмади. Окопидан сал нарироққа тушган биттасини кўзи остига олиб турган эди, Шубин пайқаб қолди. Диловархўжа, қани ўқирмиккин, агар ўқиса мен ҳам сўраб кўраман, деб турган эди у, ҳатто башарасига қарамади, ердан ола солиб қиймакийма қилиб йиртиб ташлади. «Чийратма, лаънати бу «ҳушёр» деб қўйди Диловархўжа ва бу орзуси армои бўлиб ичиди қолди.

Бир маҳал сал тўс-тўполон тинганда зарурат билан сойга тушса, бир нарса кўзига оқариб кўринди. Қўлига олса, ўшанақа қофоз. Дарров қўйнига тиқиб, ўз ишига кетди. Хилватга ўтиб кўз югуртди. Кўз югуртди-ю, кўнгли ёришгандек бўлди. Немис совет жангчиларига мурожаат этиб, Диловархўжанинг кўнглига хуш ёқадиган гапларни ёзар, ўз хоҳиши билан немис томонига ўтганларга олтин тоғ ваъда қиларди.

Бу варақа Диловархўжанинг юрагида устини кул босиб ётган ўлимтик умид учқунини яллиғлатиб юборди. У қайта туғилгандек бўлди. Варақадаги гапларга юз фоиз ишонди. Агар шўроларнинг қурби етганда шунча ергача чекиниб келармиди! Демак шўро урушда ютқизди, бугун бўлмаса эртага ютқизади. Шундай экан, эси борида этагини ёпиб қолиши керак. Ҳаммадан ҳам варақанинг «уруш тугаши билан ҳар ким ўз юртига жўнатилади» деган ери Диловархўжага ёқиб тушди. Варақада қуролни ҳам ўзи билан олиб ўтиш алоҳида таъкидланган эди. Шунисига у бир оз ҳайрон қолди. «Қурол унга нимага керак бўлди, шу қурол билан яна урушга солмайдими?»

Шундай фикрлар билан Диловархўжа бир ҳафтача ўй суриб юрди. Бу орада полк, яхши қаршилик кўрсатиб турган бўлишига қарамай, тунда чекинди. Янги мудофаа тутган тепаликда ҳам узоқ туролмади, энди ўрнашиб олишганида чекиниш ҳақида буйруқ келди: немис, ўнг томондаги қисмни ёриб, буларни ёнлаб ўтиб кетибди, қуршовда қолиш хавфи туғилибди. Уч кунлик поход — чекинишдан кейин полк яна мудофаа тутди. Уларга янги куч келиб қўшилди. Лекин Диловархўжа буларнинг барчасига энди ишончсизлик билан қарап, пропуск ўрида ўтадиган, ёмон кўздан холироқ қилиб «ўғри чўнтағи»га солиб қўйган немис варақасини баъзан «жойида турибдими» дегандек устидан ушлаб қўярди. Уни жон деб ишга солмоқчи бўларди-ю, йўлини

тополмас, топган йўлининг оқибати «вой» бўлиб чиқа-ётганга ўхшаб кўринарди. Назарида ҳамма ҳам ҳолдан толган, ҳатто Содиқ ҳам варақани кўрсатса «бормисиз, биродар, жуда увол бўлиб кетдик-ку» дейётгандек, «ўзим шу ергача бошлаб келувдим, бу ёғига ҳам ўзим бошчилик қиласман. Лекин шартим бор, у ёққа борганда менинг «қизил командир», коммунист бўлганимни ҳеч кимга айтмайсиз, ўтган ишга саловот» дея ёлвора-ётгандек туюлди.

Чиндан ҳам бу мудофаа жанглари Содиқни, ҳамма қатори ҳолдан толдирган, руҳан жуда эзиб юборган эди. «Қўнгил учун бир қадам олға силжишмаса-я! Жонни жабборга бериб жанг қилишади-ю, бари бир чекинишади, бу лаънати немисларнинг техникаси бунча кўл экан, қирган билан адо бўлмайди, ўзидан олдин техникаси ўрмалайди. Солдатининг ҳам кучи шу техникада, техникасини мажақладинг дегунча, ўзи қуён бўлади, яна техникасини олдинга солиб ўрмалаб келади, яна техникаси бардош бергунича урушади. Бўлмаса солдати унча юракли эмас. Қани бизда ҳам шунча техника бўлса!

Бизнинг шунча ҳарбий маневрларда қагнашган, таърифи оламга ёйилган техникамиз қани, қаёқда? Душманни бир қарич ҳам еримизга киритмаймиз, деган эди-ку! Қани ўша куч?»

Ертўла оғзида Диловархўжа пайдо бўлди. Мўйловга ўхшаган бароқ қоши қовоғига уюлиб тушган, бужур бетлари баттар қорайиб кетган. Қовоғидан қор ёради. Бирор билан уришиб, бир-икки мушт ортиқча еб аламда қолган кишидек салом-аликни ҳам унутиб, бир четга оғир чўкди. Содиқ унга қўл узатар экан тегишиди:

— Мунча қўлингиз совуқ, йилингиз қурбақами? Салом-аликни ҳам еб қўйдингизми?

— Жанозага борган одамга «хуш келибсиз!» дейилмайди.

— Тағин нима гап? — тушунмади Содиқ.

Диловархўжа айтадиган гапи кўпу, бир оғиз сўз билан ифодалаб қўя қолишга қийшалаётган одамдек оғзини бир-икки жуфтлаб яна жим қолди. Охир бошини қуян солиб:

— Содиқжон, биз ютқиздик, урушда ютқиздик,— деди. Кейин варақани узатди.— Мана буни қаранг.

Содиқ варақадан ҳазар қилгандек қўлига ҳам олмади.

— Олтин тувак ваъда қиляптими?— деди у, сўнгра сўзига якун ясагандек ҳижжалади:— Олтиндан бўлса ҳам, бари бир тувак!

— Аввало сиз буни бир ўқинг, бошқа гап бор.

— Биламан, ўқиганман. Бизни кафанга ўраб қўйибдими? Ишонманг, ёлғон! Тушга нималар кирмайди, душман нималар демайди.

— Ёлғон?— ажабланди Диловархўжа ва Содиқча тикилиб қолди.

— Сабр қилинг, той минган, от ҳам миниб қолади, немисни қанақа қилиб қийратаётганимизни кўряпсиз. Кўплашса чивин филни ҳолдан тойдиради дейишади. Биз-ку арслонлармиз. Шунақа қила-қила муккалата-миз.

Диловархўжа ғайри табиий ҳикоя эшитаётган одамдек бўлиб турди-ю, бирдан ғаши келиб пўнғиллади:

— Унгача суякларимиз чириб кетмаса денг.

— Чиrimайди. Баҳорда лой кечган кузда мой чайнайди. Тарихда бунақа фактлар кўп.

Диловархўжа очиғига кўчди:

— Бўлса борди. Лекин бунисини, ютқиздик,чув тушдик. Борди-ю, чув ҳам тушмадик, шўронинг қайси қилган яхшиликлари учун лой кечишим, эгар қучоқлаб ўтириб от минишни орзу қилишим керак? Атала ичириб тергов қилгани, бундан кейин ватанинг бетини кўрмайсан деб, ўн йил бергани учунми? Иўқ, Содиқжон, шуларни эслаганда кишига жуда малол келади.

Диловархўжанинг бу гапидан Содиқнинг чойига пашша тушгандек таъби хира бўлди. Унинг аввалги сўzlари ёнидан ўтган бўлса, буниси жонидан ўтиб кетди.

— Бўлмаса боринг, катта холаингиз палов дамлаб турибди! Уятмасми! Шу гапларни менга гапиргани уялмадингизми! Қайси юзингиз билан гапирдингиз! Қишида жиндай номус ҳам бўлиши керак. Бир марта тузлиғингизни булғаб, ўзингиз сув ичадиган қудуқча туфлаб, азобини тортган эдингиз-ку.

Диловархўжа бундоқ қараса, Содиқ уни деворга тақаб қўядиган. Бирдан тусини ўзгартириб, қаҳ-қаҳ солиб кулди.

— Яшанг, пухта экансиз, Содиқжон! Бир синамоқчи бўлган эдим.

— Мени синамаган энди сиз қолувдингиз.

— Аслсиз! Жуда асл,— бўш келмас эди Диловархўжа,— минг марта айтаман-ку, шўро сизни қамаб хато қилган, ўз оёғига ўзи болта урган. Қани энди барча ҳам сизга ўхшаб шўрода жонини тикса. Афсус, сиздақалар...

— Кам демоқчимисиз?

Диловархўжа худди шундоқ демоқчи бўлса ҳам, гапни бошқа ёққа бурди:

— Йўқ! Кўпи қамоқда ётибди демоқчиман.

— Очнқда ҳам кўп. Тўхтаб туринг, ҳали кучини кўрасиз!

— Аслсиз! Асл айнамас, олтин зангламас, деганлари шу. Лекин... аввал жинояtingиз бўлмаса ҳам, энди хиёнатга қўйл уриб қўйдингиз.

Диловархўжа суҳбатдошига ер остидан мугамбирана қаради. У, бу гапни Содиқнинг тилини қисиб қўйиш учун атайин бошлиди. Ахир Содиқнинг бояги ҳужуми ҳазилакам бўлмади, агар ҳазилга йўйиб, кулиб қутулмаса, худо билади, яна нима кунлар бошига тушарди. Содиқ, ўша аввалги Содиқ, шунча азоб чекиб ҳам ётиқодига куя тушмалти!

Диловархўжанинг нимага ишора қилаётганига тушунган Содиқ яна аниқлаб олмоқчи бўлиб сўради:

— Қочибми?

— Ҳа, бўлмасам-чи!— Диловархўжа яна унинг юзи-даги ўзгаришни кўрмоқчи бўлиб зимдан кузатди. Содиқ парво қилмади. Чўчиш ўрнига юзида табассум пайдо бўлди. Бу табассум узоқ чўзилмади, ўрнини ишонч тўлқини алмашди:

— Яхшилик йўлидаги ёлғон айб эмас!

— Шундай бўлса ҳам...

— Бўлмаса бориб айтинг!— пиchinг қилди Содиқ.

Диловархўжа муродига етолмади: наинки Содиқни ўз нияти йўлига буриш, унинг тилини қисиб қўйишни ҳам уddyаломади. Шу гапларнинг чин эканини билиб қолса-я, деган хаёл миясига келди-ю, унинг юраги си-қилиб кетди, чекмоқчи бўлиб тамаки тўрвасини қўлига олди. Ҳафсала билан папирос ўтар экан, Содиқнинг ҳайрон бўлиб қўлига қараб турганини пайқаб қолди. Аввалига унинг бунчалик термилиши сабабини билма-

ди, кейин унинг иккала кўзи тамаки тўрвасида эканини кўрди-ю, юраги «жиг» этиб кетди. Қўлидаги тамаки тўрва Богунники эди. У эсини йиғиб олгунча Содиқ:

— Богуннинг тўрвасими? — деб сўраб қолди.

— Ие, ҳали сизга айтмовдимми? Йўғ-е! Айтгандирман! Ёдингиздан кўтарилибди.— Узини тутиб, ўсмоқчилади Диловархўжа. Ундан қатъий «йўқ» жавобини олгач, бирор «ёлгон, гапиғ ёлғон» дейтгандек изоҳлаб кетди:— Раҳматли, бир маҳал тўрвасини узатиб, «ўранг, бир чекайлик» деб қолди. Шундан дардига даво излайпти шекилли бечора, дедиму, қўлидан олдим. Ураганимча йўқ, сув сўраб қолди, бу ёғини айтувдим шекилли, бир вақт нафасим бўғзимга тиқилиб сувни олиб келсан, бечора дунёдан ўтибди. Қўли мен томонга узатиғлиқ қолибди: сувга узатганми, тамакигами — билмадим. Шу-шу тўрва менда қолиб кетди. Раҳматлинини эслаб ёдгорлик қилиб олиб юрибман. Ё сизга берайми?

— Йўқ-йўқ! Раҳмат! — ғалати бўлиб кетди Содиқ. Бундай ҳолат киши қўли қоронғида шилимшиқ нарсага тегиб кетса ёки жонли нарсани ногаҳон босиб олганда пайдо бўлади. Унинг хаёличувалди: нега шу вақтгacha кўрмаганиман ёки яшириб юрганми? Яширса, нега яширади? Узининг бошқа тўрvasи бор эди шекилли. Урмонда аскарларга тамаки сўраб олиб берганимда шу тўрвамиди? Йўқ, бошқа эди! Агар шу бўлганда таниган бўлардим. Демак яшириб юрган! Бир балоси борки, мендан яширган. Богуннинг ўлиши ҳақида ўша куни ҳикоя қилганида унинг чекмоқчи бўлганини айтмаган эди. Рост, айтмаган эди. Энди нега бунаقا деяпти? Ранги ҳам ўзгариб кетди. Уни ҳеч маҳал шундай кўрмаганиман. Богуннинг мурдаси тепасида ҳам худди шунга ўхшаган ҳолатда кўринган эди. Майли, унда қўрққан бўлиши мумкин. Ҳозир нега ўзгарди? Нимадан ўзгарди? Бу ерда у қўрқадиган ҳеч нарса йўқ-ку. Демак тўрванинг тагида бир сир бор! Ана, папирос ўраётган бармоқлари ҳам сал титрайпти. Кўзини ердан ололмаяпти!

Содиқ ўз ҳаяжонини билдириб қўйишдан қўрқиб, бирпас Диловархўжани кузатиб турди-да, бир баҳона билан ертўладан ташқарига чиқди. Уфқа бош қўйган қуёшдан баркашдаги оловдек яллиғ кўтарилиб турибди. Унга яқин турган увада булутнинг этаги титилган

қизил латтадек товланади. Сал ўтмай, уфқ тўқ қизилдан тўқ сариқса ўтди, кейин сариқнинг туви қорага яқин тус олди, бориб-бориб ним малла рангга айланди. Унга яқин турган увада булут эса, бир парча қора доғдек жойида қотиб қолди. Содиқ шу уфқдан кўзини олмас, хаёли ҳамон ўша тамаки тўрвада, қулоғида Богуннинг вагондаги гапи: «Бу, хотинимнинг ўзи эккан тамакидан. Атайин мен учун экибди... Тўрваси ҳам ўзининг ҳунари... Жабр бўлди бечорага, болаларимиз бирбиридан кичик... Борсам, қўлини совуқ сувга урдирмайман...».

Содиқ бир нарса эсига тушгандек, шарт орқасига бурилди, қўлида хаёл билан эзғилаб ўтирган кесакнинг бир бўлагини зарб билан кукун қилиб, сочди. Ертўлага ўзини босиб кириб борди. Уни қўриб хомуш ўтирган Диловархўжа бирдан тетикланди. Қаёқса чиқиб келганини сўради. Бирор чақиргандай бўлди, деб баҳона кўрсатди Содиқ. Сўнгра Диловархўжанинг иккни бармоғи орасидан буралиб чиқаётган тамаки тутунига қараб қолди. Ертўланинг ишига қўйилган «жинчироқ»ни олди, унинг пилиги учидаги сўхтасини иккни бармоғи билан уқалаб туширди, кейин ёқди. Атайин қилгандай уни ўргага қўйиб, ертўланинг оғзига тутиб қўйилган плаш-палаткани ташқарига ёруғ ўтмайдиган қилиб тўғрилади. Жойига ўтираётib, Диловархўжадан сўради:

- Богун уйғонганда сиз тепасидамидингиз?
- Ҳа, шундоқ ёнида чўзилиб ётган эдим.
- Чўчиб уйғондими?
- Йўталиб уйғонди-ю, типирчилайверди.
- Унда тамаки тўрвани сизга қачон берди?
- Шунда-да! Ишонмаяпсизми? Худо ҳақи шунда берди.

Диловархўжанинг қасами Содиқнинг шубҳасини ошириди. «Наҳотки уни... Йўғ-е! Нима учун, нима учун уни ўлдириши керак. Бир тўрвачаю бир кафт тамакигами? Лагерда эмас эди-ку! Сўраса, Богуннинг ўзи ҳам берарди, сахий, танти йигит эди. Ё у ўлганидан кейин очкўзлик қилиб, ёнидан олдими? Чўчимасдан-а! Йўқ, гап тамакида эмас. Бу чиройли тамакидонда ҳам эмас, бу ерда бошқа бир сир бўлиши керак. Акс ҳолда Диловархўжадай одам асабий титраб, қасам ичмас эди».

Содиқнинг қўли мурданинг совуқ баданига теккан-дек сесканиб кетди.

Диловархўжа Содиқнинг ёмон ўйга борганини се-заб турарди-ю, уни очиқ рад этишга қурби етмас эди. Шунинг учун гинахонликка кўчди.

— Улжикнинг ёнидан уялмасдан тўрвасини олибди, деб гумонсираяпсиз-а, Содиқжон? Ўзим ҳам шундай дерсиз деб ўйловдим. Айтганим келди. Кўнглим бегидир одамман-да, бўлмаса, тамакисини олиб, ўзини бир четга улоқтирганимда билиб ўтирувдингизми? Айб ўзимда, ўзим аҳмоқман. Бу вақтда одамлар тўғри гапга ишонмайди, ёлғонни ёқтиради. Ёлғон чин бўлиб, чинга чечак чиққан. Мана биттаси сиз. Эчкига салла ўратиб, имомликка ўтказяпсиз. Наҳотки мен мурданинг ёнига қўл солсам, қўлим синиб, кўзим ситилиб оқса бўлмайдими!

— Нега қасам ичиб, ўзингизни қарғайсиз! Сизни би-ров бир нарсада айблаяптими?

— Саволларингизни кўрмайсизми, терговчиникидан ўтиб тушади, гёё мен Богунни ўлдириб, тамакидонини ёнидан олгандай зуғумли.

Содиқнинг кўнглига «ҳа, сенга гумоним бор. Гумоним фақат тамакидонгагина эмас!» деган сўз келган бўлса ҳам, ўзини тутди. У оғир аҳволда қолган эди. Даъво-ку қилиш мумкин, лекин исботига қўлида нима бор? Ҳеч нарса! Мана шу нарса тилини боғлаб, шахтини қайтарарди.

— Шу тўрвачани сиз олиб қўйинг, Содиқжон, худо хайрингизни берсин. Раҳматли, мендан кўра сизга яқин эди.

Диловархўжа Содиқ қўлини узатгунча тўрвачани унга ирғитди. Тўрва Содиқнинг қўлига «пап» этиб тушиши билан тамаки ҳиди анқиди, унинг бурнини қичитди. Бир қўли билан димоғини эзғилаб, тўрвачага кўз солди: «шайтонтери»дан тикилган, устига Богун исми ва фамилиясининг бош ҳарфлари ип билан қайд этилган, оддийгина тамакидон. Оғзини бўғиб қўйган чийратма ипининг учларида бинафшадек попуги бор.

Содиқ тамакидонни олгиси келиб турган бўлса ҳам, Диловархўжанинг шубҳасини оширмаслик учун қайта-риб берди:

— Мен чекмасам, нима қиласман.

— Дўстингиздан эсдалик.

- Сизнинг қўлингизда кўриб юрганим ҳам бўлади.
- Ўқ тегиши бор, фронтдамиз...
- Менга тегмайдими? — кулди Содик.
- Тегишга-ку, ҳаммамизга тегиши мумкин. Кўнглингизга гап келгани учун...
- Олсам келмайдими? — яна ўша алфозда деди Содик.

Шу билан гап узилди. Диловархўжа яна бир тамаки ўраб чекди. Қолдигини ерга ташлаб, тупроққа қоришиб кетгуннича оёғи билан эзғилади. У шу билан Содикнинг шубҳасидан кўнгли олинганини билдиromoқчи эди. Чиқиб кета туриб:

— Нима бўлса ҳам босмачи ўтганмиз, Содикжон, бизларга шубҳа билан қарамасанглар бўлмайди. Одатда, игна ўғирлагандан йўқолган сигирни ҳам гумон қилишади,— деди. Содик бир сўз дегунча у ертўладан чиқиб бўлган эди, шунинг учун пардани четлааб орқасидан қаради: у сувга тушиб бораётган одамдек қоронгиликка сингиб борарди.

У кетгач, Содик нима қилишини билмай қолди: ўтирса ўрни, юрса йўли куярди!

* * *

Диловархўжа ичидан ёнар эди. Гарчанд у Содикнинг олдидан пичинг билан аразлагандек бўлиб чиққан бўлса-да, аслида ўзининг бутунлай қармоққа илиниб қолишидан қўрқсан, асабларининг қақшаб бориши бунга гувоҳлик бермоқда эди. У ортиқча ўтиrolмади, ўтириши ҳам энди мумкин эмас эди. Унинг назарида Содик бутун сирдан воқифу, тамакидон шуничуватиб очишига бир восита бўлмоқда. Бўлмаса у шу вақтгача бунақа тилда бирор билан гаплашган эмас, худди терговчининг ўзи-я! Аввалам менинг ўзим аҳмоқман. Унинг гумон қилганича бор. Бу лаънати латтани нимага ҳам олган эканман. Ҳа, яхши, тамаки-ку сенга керак экан, тўрвачаси билан олиб нима қиласан, чўнтагингга бўшат, қўй. Ё тешиб чиқармиди! Тешиб чиқмасди! Мана энди шу арзимаган нарса битган ярани газак олдириб, унут бўлганни эсга солиб ўтирибди. Ҳали бошингни емаса гўрга эди! Эй Диловархўжа, шунча қоқилганинг етмаганидай, яна ғадир-будур кўчадан юрасан-а! Ҳеч ақлинг кириб, тавбангга таянмас экансан-да! Зора

шу ҳам ўтиб кетса! Ўтиб кетармикин? Шу Содиқ бўла-
диган бўлса бости-бости бўлиб кетишига қўярмикин?
Қўймас, сира ҳам қўймас! Турқи бузуқ. Яхши ҳам шуб-
ҳа қилияти, мабодо анигини билиб қолса борми, нақ
ўша ернинг ўзида қозиқ қилиб қоқиб юборади. Хўш,
айт-чи, Диловархўжа, сен нима қилиб, унинг кетида
лайчадек эргашиб юрибсан: ўша станциянинг ўзида йў-
лингни терс солиб кетаверсанг бўлмасмиди? Майли,
учратишга-ку уни учратиб қолибсан, бу ёққа юр, де-
ганда «тақдиришимиз бир тушган бўлса ҳам, энди йўли-
миз бошқа! Сен ўз йўлингдан боравер, мен ҳам жойим-
ни топиб оламан» деганингда «қаёққа, хўжам?» деб
ёқангдан бўғиб судармиди? Ҳеч ҳам-да! Ахир у ҳам
сенек иштонсиз, чўпдан ҳадиги бор эди! Уч-тўрт ой
бирор ковакда жон сақлаб турардинг. Немиснинг шу
босиб келиши бўлса, унчага ҳам бормайди. Эй, режа-
сини билмаган хом калла! Энди нима бўлди?.. Ҳа, май-
ли, станцияда, бомбалаш пайтида учратганингда-ку
хом эдинг, энди кўзинг очилган кўрдек қаёққа бори-
шингни билмасдинг. Кейин-чи? Кейин нега ақлинг кир-
мади, Содиқнинг сенга эш бўлмаслигини, қайнатса қо-
ни қўшилмаслигини билмасмидинг. Ё шўродан алам
кўрди, энди бошқа бўлиб қолди деб ўйладингми? Унинг
шўродан айнимаслиги ўша, лагердаёқ кўриниб турган
эди, бирор марта ғинг дегани йўқ. Аксинча, унча-мунча
ғинғиллаганин оғзига уриб юрди. Шундай бўлгандан
кейин, ялангоч хапжарниш ёнида юришнинг нима ке-
раги бор эди. Жуда бўлмаганда Богундан кейин, унинг
ҳам жанозасини ўқиб қўя қолгин эди. Бир лаҳзанинг
иши эди-ку. Ухлаб ётганда бўғиб кетиш қўлингдан кел-
маганда, бирорта темир ёки сўйил топилмасмиди?
Тош-чи? Қаттароқ бир тош билан ухлаб ётганида мия-
сига ўхшатиб солниш кифоя эди. У маҳалда бу ёқларга
келиб, ҳар учган ўқдан кўзингни чирт юмиб, мина порт-
лаганда астагфирулло айтиб, «ҳозир устимга тушади,
ҳозир устимга тушади» деб жон ҳовучлаб ўтирмас
эдинг. Ўзингдан кўр, хўжа! Аҳмоқ бош оёққа тинчлик
бермайди, деб шуни айтади.

Аслида Диловархўжа фронтга Содиқнинг маслаҳати
билан эмас, ўз режаси билан келганини ҳозир эсламас
эди. Ахир Содиқ фронтга борищ масаласини айтганда,
Диловархўжанинг хаёлига Советлар учун жанг қилиш
эмас, мана шу яқин йўл билан ўз мақсадига етиш --

яъни бир амаллаб нёмис томонга ўтиб олиб, жонини сақлаш учун келган эди. Имкони бўлиши билан бир маҳаллар кишилар орқали алоқа қилиб турган «мусулмонобод» Туркия ёки Афғонистонга сафар қилмоқчи эди. Лагерда кимдандир Иброҳимбек билан Кўршермат йигитларидан анчаси ўша томонда деб эшитган, шундан бери ўша томонларга яна кўнгли суст кетиб юради. Уни танийдиганлар ҳам топилиб қолса ажабмас эди. Ана унда дориламон ҳаёт бошлайди. Ўлдимики, ҳали ҳам бирор эллик кишига саркорлик қилолмаса. Немиснинг шу келиши бўлса шўроларнинг бошини ейиши муқаррар. Унда яна яхши. Шўродан азият чеккан, бир маҳаллар унга қарши курашган «ислом азамати» сифатида кириб келади, ҳаққи-ҳуқуқини олади, эҳтимол бир ҳаҳарга ҳоким бўлса! Қани ана шунда Содиқ қами-ти келса-ю, у билан гаплашса. Гаплашиб, ади-бади айтишиб ҳам ўтирумас эди. Бир бармоғи ишораси бунга ўхшаган юзта яланг оёқнинг товонига мих қоқарди.

Диловархўжа ҳозир бу орзуларини унугтган, ҳамма айбни Содиққа қўйиб, тақдиридан нолиб ўтиради, ичичидан ёнарди. Иложини топса, унинг этини бир бурдан қилиб ташлашга тайёр эди-ю, бенложлигидан яна баттар ўртанар эди. Асаддан сонидаги қичитмасини қишиб, қоп-қора қонга белади! Ётмоқчи бўлиб ўрнига чўзилди — бўлмади, бир пиёла чой ичмоқчи бўлди — томогидан ўтмади, папирос чекди — диққатини ёзмади. Тамаки тўрвача мудҳиш дақиқаларни яна бутун даҳшати билан эснга солди, жаҳл билан уни ерга отди, сўқинди, яна бориб олди — тамакини кўзи қиймади. Яна ўраб чекди, бармоғини куйдирадиган бўлгунича чекди. Барни бир аламдан чиқмади. Тўппа-тўғри Содиқнинг олдига бориб: «Хўш, менда нима аламинг бор, очиқ айт. Қасдинг бўлса, майдонга чиқ, жуда жонимдан тўйиб кетдим!»— демоқчи, ҳатто тик бориб, томогидан олиб бир ёқли қилмоқчи, кейин немис томонига ўтиб кетмоқчи бўлди. Шунда қандайдир ички бир товуш «бу нодонлик. Осмонга туфласанг бетингга тушади! Ўзингни бос, модомики, қасдинг бор экан, ўйлаб иш тут. Уни ўлдирман, деб ўзингни сиртмоқча тутиб берма. Бир маҳал у билан олишиб, ўқинг тошга теккани эсингдан чиқдими? Нодон бўлма. Уни шундай ҳам бирорта ўқ ғажиб кетади. Сен аҳмоқ бўлиб у билан олишиб юрмасдан, ўз ишингни бил: этагингни қоқу, ҳайё-ҳу деб нариги то-

монга ўт-кет. Шундан яхиси йўқ» деса, бошқа бир алам ўтган, асабий товуш — «Йўқ, ҳезимкаш шунақа қиласди. Сен бу йўлдан бормаслингинг керак. Аввалам унинг бошини ейишинг шарт. Наҳотки уни тирик ташлаб кетиб, тинчгина яшай оласан! Яшолмайсан, яшатмайди. Ўша от ўйнатиб, ўқ чақнатиб юрган кездаги журъатларингни эсла-ю, яна бир мардлик қил, худо ўзи мададкор бўлади, савобига қоласан. Сен учун бирдан-бир тўғри йўл — шу!» дея уни талвасага соларди, қўлини мушт қилдиарди.

Диловархўжа ана шу кейинги товушга қулоқ солди, Содиқнинг жонига қасд қилди: бунинг учун фронтда озмунча имкониятлар борми!

Шу лаҳзадан бошлаб, итнинг хаёлидан ёғлиқ суюк кетмаганидек, Диловархўжанинг фикри-ўйни Содиқнинг жони бўлиб қолди.

5. ҚОДИРНИНГ ҚОРА ҚУНЛАРИ

Омадинг келмагандан кейин қийин, текис ерда қоқиласан.

Қодир худди шундай бўлди. Уруш бошланадиган кун кечаси қўярда-қўймай Азизани ўзи ишлаётган қишлоққа олиб чиқди. Шу кечаси у электрини қурган қишлоққа ялпи ток берилди. МТС клубида шунга багишланган кеча бўлди, шаҳардан артистлар чиқиб концерт қўйиб берди. Зиёфат бўлди. Зиёфатда жиндай қизиб олган Қодир, ўтириш охирида Азизага зўрлаб бир оз вино ичирди. «Рақибларимизнинг кўзи куйсин», деб қўлтиқлаб, қишлоқнинг чарогон кўчаларини айланди, кечаси ўзига теккан бир хонали квартирасида олиб қолди.

— Эшитган қулоққа хунук, мени кузатиб қўйинг! — деган Азизага:

— Ҳайнқадиган одамингиз борми? Сиз учун сувга ҳам, ўтга ҳам кираман, деганингиз ёлғон экан-да! — деб хафа бўлди. Ўзининг инженер бўлолмаганини эслаб, шундан баҳона топди.

— Сиз докторга мен чорва албатта teng эмас! — деб Азизани ҳам хит қилди. Кайф аралаш йиғлади.

— Ҳої Қодиржон ака, сизга нима бўлди, бирор нарса деяптими! Ичкилик ҳам ўлсин! Қишини хурсанд қиласди дейиншар эди, турган-битгани ғурбат экан-ку,

деб. Азиза Қодирнинг маъюс бошини тиззасига олди. Қодир шу ўтирганича «учиб» қолди.

Бир вақт уйғониб кўзини очса, тўмоги қақраб, бир пиёла муздай сувга муҳтож. Стол устида турган чойнакка қўлинин чўзиб, диванда ётган Азизани кўриб қолди-ю, вужуди титраб кетди. Сув ичишни ҳам унудти. Бошига келган биринчи савол «мени ким ечинтириб ётқизди?» бўлди. Азизани эслади-ю, баданидан муздай тер чиқиб кетди, кайфидан асар ҳам қолмади. Соатига қараса, тонг яқин. Боши лорсиллаб туришига қарамай, иргиб ўрнидан турди, наридан-бери кийинди, юзини деворга қилиб ётган Азизанинг орқасидан яланг оёқ аста ташқарига чиқди, қўлидаги туфлисини кийиб, орқасидан бирор қуваётгандек йўрғалаб қолди. Салқин шамол таптини олиб, эси ўзига келди. Гоголнинг «Ўйланиши»и ёдига тушиб «Азиза уйғонса, нима деб ўйлайди» деган андиша билан орқасига қайтди. Лекин бари бир хонасига киролмай, кичкина хат ёзиб, очилганда ерга тушадиган қилиб, эшик тутқичига қистириб қўйди. Хатда шундай дейилган эди: «Азизахон! Мен бадбаҳтнинг бу беодоблигини кечирасизми, йўқми, лекин менинг бошим қаршингизда мажнунтолдек эгик. Сиздан узр сўраб Қ.».

Қодир «Азизанинг кўзига қайси юз билан қарайман энди!» деганича минг бор истиҳола билан МТСга келди. Устахонасини очиб, бирор иш қилмоқчи бўлди-ю, қўли ҳеч нарсага бормади. Хаёли чироққа ёпишган капалакдай кечаси бўлиб ўтган гап-сўзлардан нари кетмас эди. «Бунақа ичиш одатим йўқ эди-ку. Нима жин тегди менга! Азиза «мендан чет, бу ёққа чиқиб олиб, шунақа ичадиган бўлиб кетган экан-ку, мен билмасдан юрган эканман», деб ўйласа-я! Ана шармандалигу, мана шармандалилар!»

Қодир пешонасини кафтига олиб, зўр бериб эзғиларди.

Кимдир буради шекилли, МТС ҳовлисидаги радио карнайи тилга кирди. Ундан берилган мудҳиш хабар олдида Қодиржоннинг ташвиши урвоқ бўлмай қолди. У «Уруш!», «Уруш бошланибди!» деганича устахонасидан чиқиб, кимгадир хабар бериши жуда зарур кишидек учиб кетди. Энди унинг кўзига на тундаги кўнгилсизлик, на Азиза олдидаги хижолат кўринарди. У квартирасига кириб борганда Азиза ювлиниб-тараниб, уй ўртасидан сочини бошига турмак қилаётган эдя. Бу муд-

ҳиш хабарни эшилди-ю, қўлидан соchlари елкасига илон-дек тўлғаниб тушди, ўзи ҳанг-манг бўлиб қолди.

Уч кун ўтгач, Қодир военкоматнинг ҳовлисида кетишига шай бўлиб турар, унга Азиза нималарнидир уқтирар эди. Марат эса этагига ўралашиб Чапаевникига ўхшаган қилич олиб келишини илтимос қилиб, қайта-қайта такрорлар эди. Девор остидаги скамейкада ўтирган Адолат хола билан Жаннат Қодирдан кўзини олмас, баъзан «Жонболам хола», «йигитларнинг жонига кўз тикмай, кўзинг тешилсин» деб Гитлерни минг балога гирифтор қиласди, баъзида қариганда шоҳ-шаббасидан ажралган дараҳтдек шўппайиб ўғилларисиз ёлғиз қолаётганидан ўксиниб йиғларди. «Уғлим кўрмасин, эслаганда кўз олдига кўзимда ёшим билан келмайин» дегандай юзини четга ўғириб ёшларини атарди, ўзини тетик тутарди.

Қодир бу ердан ҳамма билан хайрлашиб кетган бўлса-да, эртасига ҳам ҳали шаҳардан жўнамаган эди. Унинг қаердалигини топиб келган Азиза, у фронтдан ғалаба билан қайтгандек бўйнига қўлини ташлаб қулоқлади, юзларидан ўпди. Яна хайрлашар экан:

— Мендан кўнглингиз тўқ бўлсин, тошлар эриб, дарёлар қуриб кетгунча кутаман. Сизни деганим деган, — деди. Ана шунда Қодир кўнглида доф бўлиб ётган дардини очди:

— Азизахон, ўша куни кечаси...

Азиза уни гапиртиргани қўймади:

— Ўша ҳам ўзингизга ярашди. Бошқа одамга ҳам шунақа қилинг-чи! Севгига ишониб, бепарво бўлгандан, ундан хавотир олиб, ардоқлаб турган яхши. Сиз шунақа эмасмиқансиз деб қўрқар эдим, йўқ, кутганим келди. Хурсандман.

— Шунақами, Азизахон! — яшнаб кетди Қодир, — Ушандан бери кўнглим ғаш эди.

— Ҳа, айтгандай, фронтда ҳам кўнглингизни унар-умасга ғаш қилаверманг.

Шу орада дараҳтда омонат ўтирган мусичаларни чўчитиб, сигнал янгради. Бу сафга чақириқ эди. Қодир шошганича, Азизани бағрига босиб, лабларидан чала-чулпа ўпди. Йўл-йўлакай қўлини силкиганча чопиб кетди. Кўзи мўлтиллаганича Азиза қолди.

Бу уларнинг охириги учрашуви бўлди.

Эртасига поездга чиққанларида ўйлаб қараса, Қо-

дирнинг Азизага айтадиган анча-мунча гаплари қолиб кетган экан, шунча бирга бўлиб, айтишга вақт топмабди!

Поезд йўлда икки марта осмондан душман ҳужумида қолиб, охирги фронт бўсағасида уларни туширди. Осмон тўла юлдуз бўлса ҳам, тун қоп-қоронғи эди. Узоқ-узоқлардан тун сокинлигига ер остидан келгандек бўғиқ гумбурлаш эшитиларди.

Улар туни билан қандайдир паст-баланд дарахтзорлардан ўтишиди. Туннинг қоронғилигиданми ёки даҳшат ва қон уфуриб турган фронт ваҳимасиданми, сафда ҳеч ким чурқ этмас, гўё ҳамма ўзининг ички дунёси билан яшар, бу дунё сирларини ташқарига чиқаришни истамас эди. Фақат баъзан олдинда бошлаб бораётган командирнинг «чуқурлик», «кўндаланг ёғоч», «чапда бот-қоқлик» деб сафни огоҳлантирган товушигина эшитиларди.

Қисм эрталаб очиқ майдонга чиқиб, ўзини ўнглаб олгунча бўлмай, жанг бошланиб кетди. Бу жанг Қодир икки йил хизмат қилганида ўргатилган машқларга ўхшамас, жуда ҳам «бетартиб» эди. Душман ўзи кўринмайди-ю, ҳамма ёқ гумбур-гумбур. Осмонга чиққан учта самолёти тосдаги сувга солиб қўйилган балиқчалардай жилпанг-жилпанг қилиб, истаганича ўққа тутди. Улар шунчалик пастлаб бемалол учардики, қорнига ёпишган тутун излари, қанотидаги илон нусха крести, баъзан бир томонга ёнбошлаганда учувчисининг жигар ранг шлёми ҳам аниқ кўрниарди. Баъзан на бир ўқ узар, на бир бомба ташлар, фақат қандайдир чинқироқ бир асбобини асабга тегадиган қилиб чинқиртирганича окопларга қанотини уриб олгудай бўлиб ўтиб кетарди. Жангчилар жон ҳолатда қулоғини беркитади, асаби бутунроғи эса, машқда ўргатилганидек кетидан пақ-пуқ қилиб милтиғидан ўқ узиб қолади. Қодир ҳам бир шўнғиганида нишонга олди, лекин улгурмади. Шўнғиб келаётган самолётни остидан худди унинг тепасига келгана икки-учта зулукка ўхшаш қора нарса ажралиб, срга туша бошлади. Қодир уларнинг майдада бомбалар эканини билиб, кўзини чирт юмди ва ўзини окоп ичига олди. Бомбанинг ўзидан қанча нарига ва қачон тушганини билмайди, фақат салдан кейин ернинг гумбурлаб силкиниб кетганини элас-элас эслайди. Бир маҳал кўзини очса тупроққа кўмилиб ётибди, лекин ҳеч ерида

қон йўқ, яраланмаганидан, ёлғиз бомбанинг шамоли елпиб, окопини бузиб устига ағдарганидан бир қадар хурсанд бўлиб, ён-верига қараса, бақа ранг кителли, камарининг тўқасида бургут нақши бор немис солдатлари юрибди. Бошқатдан кўз олдини қоронфилик босди. Кўзини очиб, ўзидан бир қадам нарида кимнингдир тирсагидан узилиб тушган қўлини кўрди. Узуқ билакдаги соат ҳамон чиқиллаб юриб турарди. Юраги орқасига тортиб, бир зум шошиб қолди: ўзини ўлганга солиб ётаверсинми ёки ўқ узсинми? Ҳали бир қарорга келмай, устидаги тупроқни сал сидириши билан орқасидан унга бирорвонинг нотаниш тилда нимадир дегани эштилди. Орқасига қараб, автомат ўқталиб турган немисни кўрди. Қисмнинг чекингани маълум бўлди.

Шу куниёқ уни майдонда қолиб кетган бошқа ярадорлар билан ҳарбий асиirlар лагерига келтириб ташлашди. Қодир шунда билдики, унинг бошига нимадир қилган, қулоғи ёмон эшитиб, ҳамон ғувиллайди. Миясида бўшлиқ пайдо бўлиб, у қандайдир ҳавога тўладек туюлади.

Қодир қўли, боши боғлиқ ёки ҳали ярасини боғлашга ултурмаган, кийим-боши қон аскарлар билан лагерга кирганда у ердаги кишиларни кўриб, яна даҳшатга келди: усти бошлари кир-чир, соқол-мўйловлари ўсиб ёввойилаштирган, фақат кўзларигина милтиллаб инсон боқишидан дарак беради, бечора ярадорларнинг қачонлардир оппоқ бўлган докасига қараб бўлмайди, қорадан ўтиб, йилтироқ қозон сочиқ тусига кирган эди. Буларнинг ҳам ўзи каби ҳарбий асиirlар эканини билди-ю, ваҳимага тушди. Эрта-индин ўзининг ҳам ўшалар аҳволига тушиши мумкинлигини ўйлаб, тирик қолганига пушаймон қўлди: нега ўша кунги бомба ўлдириб қўя қолмати!

Янги келганларни «томоша» қилиб турганларнинг орасида бир киши кўзига иссиқ кўриниб кетди. У одам ҳам Қодирни кўрди, бир зумгина бир нарсани хотирландек термилиб турди. Кейин орқасига шарт ўгирилиб кета бошлади. Бу вақт Қодир унинг кимлигини эслаган эди. Бу бир вақт акаси қамоқقا олингандан кейин уйларини тинтуб қилиш учун келган НКВД ходимидан бири эди. Уни Қодир яна бир иш билан телефон қилганида ҳам кўришган, икки өғиз гаплашган ҳам эди. Адашмаса унинг фамилияси Пушкарёв эди. Қодир

Пушкарёвнинг орқасига бурилиб кетиши сабабини билди: у ўзини эҳтиёт қиляпти. Ахир немислар унинг НҚВД ходими эканини билса тирик қўймайди-да! Шундай бирдан хаёлига келди: у бу ерда нима қилиб юрибди? Уруш бошланганига ҳали ҳеч нарса бўлгани йўқ-ку, бу қачон асир туша қолибди.

Гарчанд Қодир Пушкарёвни ёмон кунлари гувоҳи сифатида эсласа ҳам, ундан шахсан ёмонлик кўрмаганидан, ўша қабул қилган куни меҳрибонлик билан суҳбатлашганидан, бунинг устига мана шундай даҳшатли ерда биринчи учратган таниш кишиси бўлганидан унинг кўнглида қандайдир шафқат уйғонди. У билан гаплашгиси келди. Кетидан бориб:

— Салом, ўртоқ Пушкарёв! Мени танияпсизми?— деди.

Пушкарёв уни биринчи марта кўраётган кишидек елкасини қисди. Бу йўли эди. Аслида у ҳам боя қарашидаёқ Қодирни таниган, таниб туриб, «яна бир балони бошламасин бу» деган фикр билан ўзини олиб қочган эди. Қодир унинг лагерга тушганидан бери учратган биринчи таниши эди. Тағин қанақа таниш! Унинг НҚВДда ишлашинигина эмас, балки акасининг қамалишида, терговини олиб боришида бевосита иштирок этган киши сифатида билади. Қодирнинг бир оғиз сўзи унинг бошини ейди.

Бу даҳшатли хаёл Пушкарёвнинг юрагига ништар бўлиб қадалиб, дунёни кўзига қоронги қилиб кўрсатган, нима қилишини билмай, икки ўт ўртасида қолиб келмоқда эди. У ўйларди: ишқилиб таниб қолмасин! Таниганда танишдан бошқа чорам йўқ. Лаънати тасодиф!

Мана ўша «ишқилиб, таниб қолмасин» деган одами у кутганидан ҳам тезроқ ишга киришиб, кетидан қувиб келиб, йўлини тўсади. Демак унинг юрагида акасининг алами қат-қат бўлиб ётган экану, фронтга тушиши билан асир туша қолибди. Энди эса, унинг омадини бериб, қаршисидан мен лақقا гўштдек тайёр чиқиб турибман.

Шундай бўлса ҳам Пушкарёв ўзини йўқотмади. Ҳатто бундай ишларда чиниқиб кетган одамларга хос оғирлик билан бефарқ қараб туриб:

— Йўқ, танимаяпман. Сиз кимсиз?— деди.

Бу Қодир учун кутилмаган жавоб эди: наҳот уни танимаса? Йўқ, йўлини қиляпти. Кўзидан кўринниб турибдики, йўлини қиляпти. Ҳа. Иложи қанча! Комму-

иистлигидан бир чўчиса, НҚВД ходимлигидан икки борҳайиқади! Наҳотки мени хоинлик қиласи, деб ўйласа.

Хоинлик ҳақидаги фикрни ўйлаб юраги орқага тортиб кетди. Бирор уни хоинликда айблаётгандек, сеска-ниб тушди. Ваҳоланки, унинг Пушкарёв тугул, бошқа бирорвга ҳам ёмонлик қилиш хаёли йўқ. Фақат шу оғир дақиқада танишини, унинг жуда узоқда қолган она шаҳрини, Азиза билан бирга юрган кўчаларини, яйраб нафас олган боғларини кўрган танишини учратганидан кўнгли сув ичиб кетидан келган эди. Бу бўлса, кўзини лўқ қилиб, ўзини четга олиб турибди!

— Кўрқманг, сотмайман!— деди унинг сариққа яқинроқ юзларига, тикан бўлиб ётган малла соқолига дадил қараб.

— Нимадан қўрқаман? Қизиқ гапни гапирасиз-а!— Пушкарёв бўш келмас эди. Лекин шу билан баравар унинг олдидан қўрққан кишидек шоша-пиша жўнаб ҳам қолмоқчи эмас, «яна нима демоқчисан, гапиравер!» дегандек бамайлихотир турарди, ўзини тутишидан қилаётган ишига ишончи маҳкамлиги аён эди. Қодир аскарлик тамакисини олиб, папирос ўради ва ҳурмат билан унга тутди:

— Чекинг!

Пушкарёв раҳмат айтиб, бир чимдимгина олди.

— Кўпроқ олаверинг, тамом бўлса бирга хуморлашамиз.

Пушкарёв индамади, олганини ўрайверди, шу пайт уларнинг атрофида уч-тўртта кашанда пайдо бўлган, бири қўлини чўзиб, сўраб турарди.

— Сахий бўлсангиз ана уларга беринг!— деди Пушкарёв ўраётган папиросидан бошини кўтармасданоқ.

Қодир папиросини оғзига қистираётib:

— Тамаки одамдан азиз бўлибдими!— деди ва атрофдагиларга бўлашиб берди.

Буралиб чиққан тутунни кўрибми ёки хумор димогларига ҳиди дарров бориб урдими, уларнинг атрофини бир талайгина асиirlар ўраб олди. Бир хили сўлакайини оқизиб, чекаётгандарнинг оғзига кўзини лўқ қилиб қараб турган бўлса, бошқа бирлари, ақлли одамнинг ўзи билади, дегандек ўзларини нима биландир машгулдек қилиб кўрсатарди. Бошлаб Пушкарёв ярмига бориб қолган папиросини устма-уст бир-икки тортиб, ёнида турган биринга узатди. Қодир ҳам шундай қилди.

Сал ўтгач, Қодирдан сўраб олган киши ҳам бошқага узатди. У ундан наринга узатди. Папирослар қўлма-қўл ўтди. Лекин энг биринчى сўраб олган чиноқ асир юзини бир четга қилиб, ёлғиз ўзи чекарди. Пушкарёв унинг тирсагига туртди:

— Уялмайсанми бир ўзинг чеккани!

Чиноқ асир ҳеч нарса демасдан, яна бир узун сўриб, қўшнисига узатган эди, у олмади:

— Аввал ўзинг тўй. Ўзи тўймаганнинг сарқити юрак оғриғи қиласди!— деганича бурилиб кетди. Чиноқ ўсал бўлганича қолди.

Кечқурун Пушкарёв мудраб қолган Қодирни уйрошиб:

— Овқатга юринг!— деди. Уйқуга тўймаган Қодир телба бузоқдек унга эргашди.

Узун навбат туриб, минг қий-чув билан, идиш-оёқ етишмасдан, пачоқ котелокда иккалаларига олган нарсанни бошқа ном топиша билмаганидан «овқат» деб аташса керак. Сув борлиги суюқлигидан аниқ, аммо ичидан ундан бошқа нималар сузиб юрганини, унинг рангини алламбало нотайин тусга киритган нарса нималигини билиб бўлмас эди.

Эркинликнинг ширин таоми димоғидан кетмаган Қодир қорни оч бўлса ҳам, кўнгли тусамади, ирганганга ўхшаб, навбати келганда бир-икки ҳўплади. Бир гал унинг қўланса ҳидидан кўнгли ағдарилиб келди-ю, иштаҳа билан пчаётган Пушкарёв олдида номус қилиб, ўзини куч билан зўрға тутди. Пушкарёв билиб турса ҳам, ўзини билмасликка солди. Лекин Қодир мен «тўйдим, ўзингиз ичиб қўя қолинг» дегандан кейин, қўлидаги нонни таклиф қилишга мажбур бўлди, чунки унинг нима сабабдан «тўйганини» яхши биларди: янги келган кезлари ўзи ҳам бир ҳафтагача оғзига ололмаган.

Аввалига рози бўлмай, оғриниб олган Қодир нонни ҳам тузук еёлмади. Ўндан нондан кўра, бошқа бир нарсанинг таъми келарди, чайнаса оғзида у ёқдан-бу ёққа ўтиб, томоғига кетмас эди.

«Ҳа, шу ерда очимдан ўлар эканман-да» деб ваҳимага тушган Қодир, бир ҳафтадан кейин бу «таъми овқатни» талашиб-тортишиб ейдиган бўлди. Лагерда каравот, кўрпа-ёстиқ йўқлигини ҳам унутиб, «ит ётиш, миরза туриш»га ҳам кўникиб қолди. Энди у ҳақини талаб қилиб, муштлашишдан ҳам тоимас, керак ерда эн-

гаҳини чўзиб ҳам борарди. Унинг ёш, қизиққонлигини билган Пушкарёв бу йўлдан қайтариб, дакки бериб турарди. Нима учундир унинг сўзи Қодирга дарров таъсир қила қоларди. Сабабини ўзи ҳам очиқ билмас эди.

Бир куни эрталаб Қодир кўзини очса, ёнида қорачадан келган, қоши-кўзи чиройли, бурни тўмтоқ, энгажи уч бурчак бир йигит турибди. Йигит шоша-пиша салом берди. Қодир алик олди. Йигит ғайри табиийроқ бир ишшайиши билан:

— Мени танимадингиз, а? — деди.

— Йўқ! — деб ростига кўчди Қодир. Гарчанд уни аввал кўрган бўлганда ҳам, ҳозир таниши қийин эди. Унинг лосдек қоп-қора соқоллари то кўзининг остигача юзини қоплаб олган, пасть томони кўкрагининг жунигага улашиб кетган эди. Пешонасидаги икки қалин ажинига ўтирган кир қора ип ёпишгандек бўлиб кўринарди. Кўкрагига қўйиб турган қўлларининг кирига-ку, қараб бўлмас эди: тирноғи қошиқ бўлиб кетган, ости тўла кир.

Йигит ўша қалбаки ишшайганича ўзини таништириди:

— Сиз Содиқ аканинг укасисиз, шундаймасми? Мен у кишида ўқиганман. Заб муаллим эдилар-да, бунақаси бўлмайди. У киши синфга кирганда бирон бола қилт этмас эди. Дарсни ҳам қийидириб юборардилар. Лекин имтиҳонни ҳам тоза олардилар. Мени жуда яхши кўрардилар. «Сендан ажойиб тарихчи чиқади» деб, нуқул «беш» қўярдилар. Узим ҳам тоза тайёрлардим.

Табиати хушчақчақ бўлиб кўринган бу йигит Қодирни қизиқтириб қолди:

— Сизники қаерда эди ўзи?

— Шундоққина мактабининг ёнида. Дириектор бўлиб турган ерларида қамалиб кетдилар-ку. Ушанда мен тўқиқизинчи синфда эдим. У кишидан кейин Мирсалим ака дириектор бўлди. Икковлари жуда қалин эдилар, лекин Содиқ ака қамалгандан кейин Мирсалим ака дарров тўнини ўзгартириб олди. У кишининг ёздирган конспектларини, «халқ душманинини ярамайди» деб йигидириб олди, мактаб ҳовлисига гулхан ёқтириб, ўзи тепасида туриб, куйдириб ташлади. Лекин конспектларида хато йўқ эди. Битта ўртоғим бекитиб олиб қолган экан, ўшани ўқиб имтиҳон бердик, ҳаммаси тўғри чиқди.

Акасининг шаънига айтилган бу сўзлар Қодирга хуш ёқди, унинг меҳрини товлади. Бу ёқимтой йигитнинг кимлигини яхши билиб қўйиш, вақти-вақти билан ўтган кунлар ҳақида сұхбатлашиб туриш учун унинг исми-шарифини сўради. Шунда йигит нима учундир жуда ўнғайсизланиб, юзида боядан бери барқ уриб турган кулгиларини йиғишириб олди, алланечук бўлиб кетди. Қодир, бунинг бир балоси бор шекилли, деб сабр қилиб турди. Бир оз жимликдан кейин журъат этиб, оғзини гапга жуфтлади:

— Сизга тўғрисини айтмасам бўлмайди: асли исмим Мўрдахай, лекин Мардон бўлиб кетганман, ҳамма Мардон дейди. Сиз ҳам шундай деяверинг. Шу исм яхши, шуни ўзим ҳам яхши кўраман: акангиз ҳам «Шу исм сенга ярашади» дердилар. Рост! Бир неча марта айтганлар.

Қодир бу йигитнинг исмини айтишдан олдин нега бунчалик безовта бўлганини энди тушунди. Ҳозир ҳам, айтиб бўлгандан кейин ҳам, кўнгли жойига тушмаганини, балки аввалгидан кўра бешбаттар ташвишда эканини ҳам фаҳмлаб турарди. Уни шундай нозик жойда «бухор яҳудийимисиз» деб, кўнглига баттар ғулгула солишни истамасдан:

— Үқчиликман денг! — деди.

Мўрдахай ҳам тушунди, дарров жавоб қилди:

— Лекин ўзбек бўлиб кетганман. Уйда ҳам нуқул ўзбекча гаплашардик. Дадам раҳматли, ўзбекдан багри кенг халқ йўқ. Жаҳли чиққандা ҳам кулиб тургандай гапиради, гапи оғир ботмайди, дер эдилар. Шунинг учун мени ўзбек мактабига берганлар. Тилимдан билинмайди, а?

Унинг талаффузида бухор яҳудийлиги сал-пал сезилиб турса ҳам, Қодир унинг юрагига ваҳима солгиси келмади:

— Сира сезилмайди.

— Раҳмат! Қатта раҳмат! Мен билиниб қоладими, деб қўрқиб юрган эдим. Энди сиздан битта илтимосим бор.

— Хўш? Хўш?

— Мабодо бирор суриншириб қолса «уни танийман, ўзбек» деб юборсангиз. Жон ака, шундай дейсизми?

Мўрдахай ҳали-замон бирор томонидан хиппа бўгиб

олиб кетадигану, Қодирнинг бир оғиз сўзи олиб қоладигандек унинг оғзига илтижо билан термилиб турди.

Қодир унинг жавдираб турган кўзига қараб «бу бечораларга биздан ҳам қийин. Билди — бесуд, бетергов отиб ташлайди. Халқнинг ҳам яхши, ёмони бўладими!» деди-ю, унга раҳми келди.

— Хавотирланманг! — деди.

Мўрдаҳай ташаккур айтганича юзида ўша таниш табассум билан туриб кетди. Бир соатлардан кейин тўрт чақмоқ қанд олиб келиб, Қодирга узатди. Қодир бу яқин орада қанд бетини кўрмаган эди, шундай бўлса ҳам биттасини олди.

— Раҳмат! Қолганини ўзингиз енг, Мардон! — деди.

У табиати ёришиб ташқарига чиқди. Куз осмонида тивитсимон булут сузиб боради. Этаги лагерни ўраб турган тикан симларга илиниб қолгудек паст. Эҳ, бу тикан симлар! Шу занг босган тикан симларга, вишкаларда тез-тез алмашиб турадиган бақа ранг кителли соқчиларга кўзи тушганда Қодирнинг бутун аъзойи бадани жўшга келиб фарёд қилгиси, ана шу ҳайқириқ билан соқчиларнинг тилка-порасини чиқариб, тиканли симларни бурда-бурда қилиб ташлагиси келарди. Лекин бунинг мумкин эмаслигини танасига ўйлаб, юрак-бағри эзилиб, бош ургани жой тополмай қоларди.

Ҳозир ҳам у худди ана шундай диққинаfasлик билан ҳар ер-ҳар ерда беҳол-бедармон чўзилиб ётган, кийим-бошлари у ёқда турсин, башараларига ҳам одам қараб бўлмайдиган кир-чир асиirlарга маъсум назар ташлаб кунгай ерга ўтиб борар экан, ўзининг ҳам бора-бора бир куни шу аҳволга тушиши мумкинлигини ўйлаб, юраги орқасига тортиб кетди. «Йўқ, бунга йўл қўйиш ўзимни ўзим ўлимга маҳкум қилишдир» деган фикр билан яна ўзига далда берди ва кунгайга ўтиб ўтирган. Куз бўлишига қарамай, қуёш баданини иситди. Қўлтифи осгида бир нима ғимирлаб, этини қичитди Қодир бенхтиёр қўлини юбориб аста қичинар экан, ёнида ўтирган чиноқ асиirlуқма ташлади:

— Тортинмай қичина беринг, у ўзимизнинг бит бўлади, — деди.

— Йўғ-е! Бит эмасдир! — дея Қодир гимнастёркасини бошидан чиқааркан, чиноқ унинг ёнига сурилиб келди ва Қодирдан аввал кўзи синашта бўлиб қолган чок орасига назар ташлаб:

— Бу-чи? Мана бу нима? — деди у. Кейин Қодирнинг соддалигидан кулиб биттасини кафтига олди, унинг кўзи блнига тутиб, яна тегишиди:

— Танияпсизми? Анчагина семиртириб қўйибсиз.

Битлаш у ёқда турсин, умрида бит зотини кўрмаган Қодир номусдан қизарип кетди.

— Мана, эртага яна келишармиш. Рози бўлсангиз, бу азобларнинг ҳаммасидан қутулиб қоласиз.

Қодир ҳеч нарса тушунмай, чиноқقا боқди. Чиноқ ғошқа гапирмади. «Жонга тегди бу ҳаёт, ўлик бўлиб гўрда, тирик бўлиб тўрда йўқсан. Онам ўлсин мени шу қунларга туғмай!» деганича тўнғиллаб туриб кетди, сал нарни бориб яна қайтиб келди:

— Шу ҳам умр бўлдими! Итдан суяқ қарз бўлиб яшагандан... Йўқ, мен бундан ортиқ чидолмайман.

— Ахир бу аҳволга тушган битта сизми!.. — уни юпатмоқчи бўлди Қодир.

— Ҳар кимнинг гўри бошқа, биродар, фалончи ҳам юрибди-ку, деб ажал ёқамдан тутганича пойлаб ўтиришим керакми? Авваламбор урушда биз ютқаздик. Ҳўш, энди нимани кузатамиз? Бас, ўз жоним ўзимга керак.

Қодир унинг фикрига қўшилмаса ҳам, шу пайт бирор ҳима деб уни эпақага келтиришига ишонмади. Бир томондан унинг немислар томонидан қўйилган айғоқчи эканидан чўчиб:

— Жуда ҳам қисқа ўйламанг! — дейиш билан кифояланди.

Чиноқ «шу ҳам гап бўлибдими!» дегандек қўлини силтаб, жўнади.

Қодир унинг бунчалик изтироб билан нимага тайёрлик кўрганининг сирини эртасига билди.

Эртасига туш пайтида Ўрта Осиё республикаларидан асир тушган «мусулмон» аскарларни бир ерга тўпладилар. Улар қаршисига лагерь идорасидан уч эркак, бир хотин чиқиб келди. Бир эркак граждан кийимида бўлиб, бошида шляпа, эгнида дазмоли бузилмаган жигар ранг костюм, ёқаси крахмалланган кўйлак, бўйнидаги бежирим қилиб тақилган қора галстукнинг тугилган ерида немис фашизмининг крест белгиси. Ўзи буғдој ранг, орнқуни, бошига нисбатан энгахи жуда кичкина ва учи ишшли. Хотинчалиш юриш билан у ҳаммадан олдинда келар, ундан ўнгда немис офицери, чаپ томонда эса,

яҳши кийинган бўлишига қарамасдан истараси сову^н
хунук бир хотин. Орқада эса, автомат таққан солдат.

Костюмлик киши саф тортиб турган асиirlар олдига
кулимсираган бир алфозда хотинчалиш қадамлар билан
келиб, ҳезалак товуш билан ўзбекчалаб сўрашди. Асиirlar
нинг юриш-туриши «ҳол кўр, ранг сўр» бўлса ҳам,
уларнинг ҳол-аҳволини сўради. Уларга ачинган бўлди,
Узоқ гапири Кимнидир қарғаб, аллакимни кўкларга
кўтариб мақтади, немис қуролининг кучига ҳасанот ўқиб,
«жаҳонгир, музaffer фюрер»га ташаккур билдири.
Ўзининг мусулмонлигини пеш қилиб, уларга «ҳиммат
ва муруват қўлини чўзишга жазм этаб, фюрери аъзам-
дан фатво олганини» таъкидлади. Яна алланималарни
узундан-узоқ гапириб, «барча мусулмон болаларининг
бир байроқ остига тўпланиш пайти келганини» уқтириди.
Шу ниятда фюрери аъзам қаноти остида музaffer мусулмон
қўшин тузмоқчилигини, бу қўшин ўзагини мана
шу рўпарасида турган азamat йигитлар ташкил этажа-
гини, бу қўшинга ҳазрат Амир Темурнинг руҳи-поклари
мададкорлигини гоҳ фуур билан, гоҳ ҳазин бир ёлвориш
билан айтиб чиққач, ёнида турган немис офицери билан
бир оз немисчалашиб, кейин кийим-бошлари титилиб
кетган, очликдан ранги рўйига одам қараб бўлмайди-
ган ғариб асиirlарга мурожаат этди.

— Мана шу қўшинга ёзилишга хоҳиш билдириган
мусулмон фарзанди бир қадам олдинга чиқсан!

Ўзини Али Наимхон деб таништирган костюмлик киши, «мен буларни ўз нутқим билан мойдек эритдим, бу
оч-яланғоч ҳаётдан албатта воз кечишади, ҳаммаси гув
этуб олдинга қадам қўйса, яна мени босиб кетишмасин» дегандек иккн-уч қадам орқага чекинди. «Бу занфа
менинг хотиним, немис фарзанди бўлсалар ҳам, Туркистонга нисбатан бўлган ҳурмат ва эҳтиромлари сабабли
мусулмонликни қабул этганлар!»— деб бундан сал аввал
таништирган ёнидаги хунук хотинга назокат билан иш-
шайиб, чап қўли билан унинг билагини қисиб қўйди. Бў-
лажак аскарларининг сафдан чиқишини кутиб турди у.
Оч-яланғочлар сафи бу кутилмаган командадан бир
қалқиб, кейин шундай сокинлик чўккан эдики, осмондан
ўтган қушнинг қанот қоқиши эшитилди. Али Наимхон
сафни кузатиб туар, тоза қириб упа суртилган бўлса
ҳам, соқолининг излари шундоқ қорайиб кўриниб турган
юзлари тагида қандайдир шумлик яширинган табассум

кезарди.. Вақт ўтган сари бу табассум устига кул ўтирган чўғдек сўниб борар, ўрнини асабий бир ҳолат олмоқда эди. Бу ўзгариш охирига етмасдан, унинг кўзи бирдан чақнаб, тишининг оқи кўринди. У Қодирдан ўн одимча нарига қараб:

— Боракалло, азамат! — деди ва барчанинг диққатини ўзига тортди. Қодир у «боракалло» деган томонга боқиб, кечаги чиноқ асирини кўрди. Чиноқ бир қадам олдинга чиқди-ю, атрофда ўзидан бошқа ҳеч ким йўқлигини кўриб шошиб қолди. Яна жойига қайтмоқчи бўлиб, тисарилган эди, унинг олдига етиб келган Али Наимхон:

— Бемалол, bemalol, азизим, tortinmang! Турк ўғли журъатли бўлиши керак! — деб уни тутиб қолди. Бу ташбусдан руҳи кўтарилган Али Наимхон чиноқни мақтаб, бошқаларнинг ҳам чиқишини кутди, бу орада уларнинг «мусулмон аскарлигига» қандай кийиниши, қандай майшатда яшашларини оғиз кўпиртириб мақтади. Лекин бари бир саф қылт этмади, бошқа бир асиринг чиқиши амри маҳол эканини аста-секин фаҳмлаб, сўзининг маромини ўзгартириб борди, охири асабий бир титроқ билан койиди, кейин яна «таналарига ўйлаб кўришни» ётифи билан маслаҳат берди. Бу маслаҳатидан сўнг яна кутди. Бари бир чиноқ ёнига бошқа бирор қўшилмаслигига ақли етгач, у ёнидаги немис офицери билан нималарнидир чуғурлашди, хотинига юзини ўгириб ўзини зўрлаб кулди.

— Кўрқиňяпти, маликам. Большевизм зулми буларнинг юрагини олиб қўйган-да,— деди у ўз хатти-ҳаратини оқлаган кишидек.

— Қизик, нимадан қўрқишиади! Ўз юртлари гўзал Туркистонга улуғ фюрер хайри-паноҳида ғолибона кириб боришади-ку,— деди хотини ҳаммага эшиттириб. Унинг оғзи калхат боласиникидай жуда хунук ва бесёунақай катта эканини эндиғина пайқаган Қодир: «Оғиз ҳам шунақа эски кавушдай бўладими! Лойтовоқдай юзига бирам ярашгани! Гитлер ҳам ўз немисидан қолган сарқитини ташлагани жой тополмаганидан кейин, бу «Туркистонпарвар» жанобга ҳадя қилганга ўхшайди. Дунёда бундан чиройли хотин зоти йўқдек ялаб-юлқашини қара!» деганича анча вақт бу лойтовоқ башара, калхатоғиз «малика»дан кўзини олмади. Шу пайт кимдир орқа томондан:

— Ўзинг ботган ботқоққа тортма бизни!— деди. Яна бошқа бирор бу томондан:

— Биз хони эмасмиз!— деб бақирди.

«Малика»нинг кўзи ўйнаб, шерикларига нимадир деди, немис офицери ҳам безовталанди. Лекин Али Наимхон уларга нималарнидир қисқагина тушунтириб, сафга юзланди. Юзида остини заҳар босиб ётган ғалати бир жилмайиш бор эди.

— Ватандошлар!— деди у, ўзини аранг босиб,— бу нодонликни ташланг. Шайтонга мусулмон кўнглингиздан жой берманг. Биз яхши ният билан ташриф буюрган эдик. Бу жаҳолат нечун!

У анча гапирди. Лекин кўзи билан ўша луқма ташлаганларни ҳамон қидириб турарди. Уни топгандек бўлди шекишли, хотинча юриши билан олдига борди, суриштириди, койиди. Шу пайт, бирдан Қодир унинг бошқача товушни эшитиб қолди:

— Сен жуҳудбачча, бу ерда нима қилиб турибсан? Сенинг касофатингмиди бу!

— Қим? Менми? Мен ўзбекман,— деди сафдан бири. Бу товушни Қодир таниди, бу Мўрдахай эди. «Оҳ, бечора, қўлга тушди», деб эгилиб қаради: Мўрдахайнинг юзида қон қолмаган.

— Олдинга чиқ!— буюрди Али Наимхон.

Ноилож қолган Мўрдахай саф олдига чиқди. У Қодир кутганидан кўра тетик кўринарди.

— Нега ёлғон гапирасан? Қани менга қара!— Али Наимхон унинг кўзидан, серсоқол юзидан бир нарса уқиб оладиган кишидек синчилаб қаради. Кейин нима учундир обёғига, йиртиқ шинелининг куйган ерига кўз ташлади:— Ўзбеклигингни нима билан исбот қиласан?

Мўрдахай бундай савол қачонлардир берилишини кутмаганиданми ёки жавоб қайтаришга ожизлигиданми елкасини қисди, ажабланди, кўзини милтиллатди.

— Йўқ, сен жуҳудсан! Жуҳудлигинг кўзингдан кўриниб турибди,— деди қатъий ҳукмдек Али Наимхон. Бу ҳукмини немис офицерига етказмоқчи бўлгандек, орқасига бурилиши билан Қодир:

— Мен уни танийман, афандим!— деди. «Афандим» сўзи қулогига хуш эшитилган Али Наимхон юзида табассум ёйилди, Қодирга юзини ўғирди:

— Жуҳудлиги тўғрими?

— Йўқ! Мен у билан бир мактабда ўқиганман. Узбек, исми Мардон.

Али Наимхон бирдан қовоғи солинди. У ишонмади. Буни сезган Қодир яна тасдиқлади.

— Рост!

Ҳеч ким легионига ҳоҳиш билдирмай турган шундай нозик бир пайтда «ўзимники тўғри» деб гожлик қилишини ўринисиз билган Али Наимхон бир исқирт асиринг гувоҳлигига ишониб қўя қолишни ҳам истамас эди. Бу ўта соддалик бўлар эди. Шунинг учун яна бир исбот талаб қилди:

— Қани ўзбек бўлсанг, мусулмонлигингга калима келтири.

«Калима» нималигини умрида әшитмаган Мўрдахай яна ҳайрон бўлди. Унинг бу мушкулини яна Қодирнинг ўзи енгиллаштириди:

— Афандим, биз ёшлардан ким калимани билади! Ким ўқитибди-ю, ким ўқитгани қўярди. Наҳотки шуни билмасалар!

Али Наимхон бўшашиб тушди: ахир Туркистонда диний мактаблар бекитилган-ку! Бу йигитнинг гапида жон бор!

— Агар «калима»га қараб ажратадиган бўлсангиз, мени ҳам ўзбек демаслигингиз мумкин.— Яна исботини чуқурлаштириди Қодир. Лекин «мусулмоншунос» Али Наимхон Қодирни ўзбек демасликка ҳеч қандай асоси йўқ эди, чунки Қодир талаффузидан тортиб, қош-кўзи, юриш-туришигача қўйиб қўйган ўзбек эди.

Қодир «енгдим, энди нима важ топар экан?» деб турган эди, лагернинг дарвозаси даранглаб очилиб, ичкарига юқ машинаси кирди. Устида уч-тўртта асири аскарлар. Улар ёнида ва кабинкада учта немис автоматчиси. Машина сафдан сал нарида тўхтади. Ҳамманинг қўзи машинада эди. Қодир уларга қаради. Қаради-ю, ҳангуманг бўлиб қолди: асирининг бирни Мирсалим, унинг севиклиси Азизахоннинг дадаси Мирсалим эди. «Бу ҳам асири тушибди-да!» деб ажаблангўнича бўлмай, Али Наимхон битта ўзи саф олдида ҳамон тумшайиб турган чиноқ асирини машинага чиқишига буюрди. Ана шунда Қодир машинадагилар кимлигини тушуниб, ўз кўзларига ишонмади. «Наҳотки, кўкрагига муштлаб юрган «қизил Мирсалим» хоинликка розилик билдириган бўлса! Йўғ-е! Эҳтимол адашаётгандирман. Одам одамга ўх-

шави мумкин». Қодир шундай ўйлар билан машинага кўзини қадади, ҳатто ўзининг сафдан ажралиб чиқиб қолганини ҳам пайқамади. Йўқ, ўшанинг ўзи. Қодир адашмаган! Худди ўшанинг ўзи! Ахир оралиқ киши адаштирадиган даражада олис ҳам эмас. Қодирнинг кўзи эса, яхши кўради.

«Шу яқиндаги лагерда экан-да, сотқин» деб кўнглидан ўтказган Қодир, зўр бериб, унинг кўзини учратиш ниятида ундан кўзини узмас эди. Мирсалим бу томонга боя бир қараганича, энди бошини ердан кўтармас эди. Аксинча, Қодирнинг бургут бўлиб тикилиб турганини пайқагандек, юзини терс ўғириб олди. То машина жўнаб жетгунича ҳам бу томонга қарамади. Қодир унинг кетидан чақириб, ўзининг кўрганини билдириб қўймоқчи бўлди-ю, бир томонда лагердошларининг «ҳали шунаقا танишларингиз ҳам бормиди!» деб таъна қилишидан, иккинчидан Али Наимхоннинг қаҳрига учраб қолишдан чўчиди. Ахир бу юмшоқ супургининг бир лаҳзада киркига айланиши ҳам ҳеч гап эмас-да! Мўрдахайнинг ёнига тушгани ҳам етади!

Ови кўнгилдагидек ўнгидан келмаса ҳам, бўрилиги ни яшириб, қўзиларча муомала қилган Али Наимхон «мен сизларнинг сўзларингга ишонаман. Сизлар ҳам менинг айтганимга киринглар, бошлаган йўлимга юринглар!» дегандек, Мўрдахайнинг сафга қайтарди.

— Яхшилаб ўйланглар! Шайтон сўзига кирманглар. Биз яна келамиз! — деганича ширин хайрлашиб кетди.

Унинг бу ширин сўзининг тахири эртасигаёқ чиқди. Лагеръ унинг яна келишига тайёрлик кўриб, нималиги шундоқ ҳам номаълум бўлган «овқат»ни яна расво қилди, энди уни оғзига олиб, ионини тишга босиб бўлмас эди — турган-битгани қипиқ. Бу ҳам етмагандек «овқат»нинг ичидан соч толалари, тирноқ, жун, темир-терсак, резина, тери ва яна алланимабало чиқарди. Буларнинг ўз азоб-уқубати ўзига етмагандек, бошқа бир қўшни лагердан озиб-тўзган, кийим-бошининг бутун ери қолмаган, умри саноғлик бир тўда асиirlарни келтириб ташладилар. Улар ўз лагерларида норозилик ғалаёни кўтаришган экан. Қўзғолон бошлиқларини териб олиб, кўзлари олдида отиб ташлашибди. Қолганларини эса, икки ҳафта бутунлай оч-наҳор қўйиб, кейин ибрат бўлсин учун бошқа лагерларга тақсимлаб юборишибди. Улар чиндан ҳам ҳолдан толган эди. Эшикдан кириб, тақсимланган

баракларига етиб боришгунча бир нечтаси йўлда сочилиб қолди. Қодир улардан бирига кўмак бермоқчи бўлиб бориб чўчиб кетди: одам боласи ҳам шунаقا ориқлаб кетадими! Агар кўзининг милтиллаганини айтмаса, тирик ўлик эди у.

Бу ҳол Қодирнинг раҳмини келтириши билан бара-вар, уларни шу кунга солғанларга нисбатан битмас-ту-ганмас нафратини ҳам уйғотди. У бу ерда ҳам кураш зарурлигини англади. Лекин қандай қилиб? Буни бил-мас эди!

6. МАШЪУМ УМРНИНГ СҮНГГИ

Диловархўжа Содиқнинг жонига қасд қилганидан кейин безовталаниб қолди — ахир буни кечиктирмай бажариш керак-да!

Аввалига жуда енгил бўлиб кўринган бу тадбир, таф-силотига ўтган сари мураккаблаша борди. Содиқ инқил-лаб ётган Богун эмаски, ухлаб ётган ерида кавушини тўғрилаб қўя қолса! Бунинг устига атроф тўла одам, арининг уясидай ертўлага бирни кириб, бирни чиқиб туради. У шундай йўлини қилиши керакки, наинки товуши, ҳатто ҳиди чиқмасин. Бу енгил эмас, албатта. Ке-часи ёнига кириб, бўғзига найза санчиб бўлмаганидек, биқиниб туриб пақ этиб отиб ҳам бўлмайди. Демак пайт, хилват, фурсат ва эпчилик керак.

У «мушкулимни ўзи осон қилсин!» деди-ю, ўнг ёнбошини босиб ётди. Эрталаб барвақт туриб, таҳо-рат олди. Бир четга ўтиб намоз ўқиди. Дуо қилди, нола қилди.

«Эй худойим, бир меҳрибонлик қилсанг-чи! Мени қийнаб ўтирмасдан шунча учган ўқдан бирини, шунча бало уфурган бомбанинг аччиқ данакдек бир парчасини унинг жон ерига қадасанг нима қилади. Мен-ку сенинг мўмин-қобил бандангман. Эсимни танибманки, изминг-даман. Фарзингни фарз, суннатингни суннат тутдим. Ешлигимдаёқ «бу сенинг амринг» деб қишлоқ имоми-ни! оғиздан чиқиши билан рўза тутмаган, намоз ўқи-маган, фитр рўза бермаганинг пўстагини қоқдим, қўли эгриларнинг таъзирини бердим. Кейинчалик ўзим шу йўлга кириб кетган бўлсам ҳам, сени унугганим йўқ, масжиднингга бўйра, жойнамоз олиб бериб турдим, закот-

ни канда қилмадим. Ўйламаки, барча топганини ёлғиз ўзи босиб еди деб. Иўқ. Нимаини ўлжа қилган («ўғирлаган» дейишга тили бормади) бўлсам имомга ҳам, қозига ҳам, юзбошига, аминга ҳам чўтал бериб турганман. Улар ҳаммасидан хабардор эди. Бир сафар бир деҳқоннинг қўшга қўшиб турган ҳўқизини ўмарганимда («ўғирлаганимда» дейишга яна тили бормади) қози поччамнинг ўзлари «бадбаҳт, қўни-қўшнига қиласанми! Нариги қишлоқда, сал нарироқда иш тутсанг, оёғингга ел тушадими!» деб қутқариб юборганилар. Бу яхшиликларни, албатта, қуруқ қўйганим йўқ, бир овчининг иккита тулкисини (ўғирлаб, йўқ, сўраб) олиб берганман. Қишлоқ оқсоқоли-ку ўзимнинг отахоним эдилар. Бир почапустин эвазига мардикор рўйхатидан ўчириб берганлар. Кейинчалик бериб турган «совға-саломларим» бунга кирмайди. Омил қори кенжা хотини — аячамни ҳалала қилиб, мардикорга қўшганда, мардикор «энди менинг қўядиган хотиним йўқ» деб туриб олганда, унинг бошига ит кунини согланман. Ҳа, ростдан ҳам шуларнинг ҳаммасини «бисмилло» демасдан бошлаган эмасман, ҳар вақт ўзингни ёдлаб турганман. Демак ҳаммасидан ўзинг воқифсан, маъзур тутсанг бўлади.

Инқилоб бўлиши билан «Ислом туғи остига ўт!» дединг, ўтдим. «Йигит тўпла!» дединг, тўпладим. «Кофири ни қир!» дединг, қирдим. Ҳа, шуни ҳам сенга эслатиб қўйайки, бизнинг сафимизда кадет ўрислар ҳам бор эди, улар кофир бўлмаса керак, чунки ҳазрат муфти улар билан бир дастурхондан нон ушатиб, бир қозондан ошердилар, ҳатто саллаларини олиб қўймасдан ҳушчақ-чақлашиб ўтирад эдилар. Неча-неча қишлоққа ўт қўйиб, неча одамни тифга тортирган бўлсам, сенинг номинг билан, байрофинг остида қилдим. Ахир ўзинг «менинг ихтиёримсиз бандамнинг баданидан бир дона мёйи тушмайди» дегансан. Демак шуларнинг ҳаммасига ўзингнинг ижозатинг бўлган, ўзинг буюриб тургансану, мен содик қулинг, бажо келтирганим. Ўша вақтларда, азиз қулинг бўлиб юрган вақтларимда, баъзан майшат билан бўлиб, беш вақт намозингни канда ёки қазо қилган бўлсам айб мендамас, мен билан «бу шаръийдир» деб май ичишган уламонгда. У кишининг бетидан ўтиб, ўзбошимчалик қилгани ботинмадим. У ҳазрат бўлса, кўп вақт майшатдан кечиб, намозга турмас эдилар... Байрофингнинг сопи синиб, ўзи қизил аскар оёғига пайтава

бўлиб кетгандан кейин кўрган ит кунларим ўзингга аён—
қоқмаган эшигим, кирмаган тешигим, дайди итдек сан-
қимаган кўчам қолмади. Қишида оч қолган қашқир ҳам
мендан аъло эди. Шунда ҳам сени эсдан чиқарганим йўқ,
ойнинг ўн беш куни қоронғи бўлса, ўн беш куни ёруғ
деб, «бу — бирор қилган гуноҳимнинг жазосидир» деб
сабр қилдим. Буёғи яна ўзингга маълум: қўлга тушиш,
тергов, лагерь... Шундай қилиб ҳамма синовингдан «финг»
демай ўтиб келяпман. Мана энди шу кунга келиб, ўзинг
мусулмонободликка ибрат қилиб қўйган юртга юз тутай
деб турганимда, яъни оғзим яна ошга етганида, Содиқ
кофир томоғимга балиқ қилтанағи бўлиб тиқиляпти. Со-
диқнинг кимлигини ўзинг биласан: бирор марта боши
саждангга эгилгани гумон. Бу ҳам майлику-я, ўша илл-
лари байробинг остида бўлганларнинг озмунчасини ша-
ҳид қилганми! Бу қилмишларига яраша жазо бериб, қа-
матган, лагерга ташлатган бўлсанг ҳам, тавбасига
таянгани йўқ, таяниш у ёқда турсин, хаёлига ҳам келтир-
майди. Ҳали-ҳали аввалгидаёт, ҳамон ўз йўлим тўғри дей-
ди, ҳамон ғайридинлар измида. Мен ана шу кофирининг
жонига қасд қилдим. Шу мушкулимни ўзинг осон қил,
йўл кўрсат! Ўзинг «ол қулим, бахтинг ёр бўлсин» демасанг,
асти иложи йўқ. Бу лаънати юрсам йўлинида, ўтири-
сам дилимда тўғаноқ. Э, худованди карим, сендан шу
шўға келиб, ҳеч нарса илтижо қилган эмас эдим, шу бит-
таю битта тилагимни рўёбга чиқар. Содиқни немис тиғ-
ги-барронинг учрату, мени муродимга етказ — яъни не-
мис томонига омон-эсон ўтиб олайнин. Ишқилиб, шар-
манда қилма! Омин!

Диловархўжа ўпкаси тўлиб, димогини тортиб
қўйди. Аста туриб ертўталага қайтаётиб, Содиққа дуч
келди.

— Ҳа, йиғлабсиз? Тинчликими?

— Қечаги гапларингизни ўйлаб, хўрлигим келди. Но-
минг ёмонга чиққандан кейин, тавбангга ишонч йўқ экан!

— Тентак бўлиб қолибсиз, сизга бирор нарса
деялтими.— Ўтган гаплар Содиқнинг хаёлидан анча кў-
тарилган эди.

Диловархўжа «ҳа, кечаги гапларингиз-чи», демоқчи
бўлди-ю, бетга чопишни ҳозир ўзига эп кўрмади. «Ҳа,
найрангбоз, олдимга тўртта ёнғоқни ташлаб қўйиб, қўй-
нимга қўл соляпсан-а!» деган фикр кўнглидан ўтиб, ўп-
караб деди:

— Содиқжон, сиз билмайсиз, одам ўлдиргандан туҳмат ёмон: иқрор бўлсанг дилинг оғрийди, рад этсанг ишонмайдилар.

Содиқ ана шундагина унинг бутунлай бошқа нарса устида ўйлаб келаётганини пайқаб қолди. Лекин ўзининг жонига қасд экани етти ухласа тушига кирмас эди. Шундай бўлса ҳам, уни зиддан кузатиб, кўнгли фаш бўлди. Топшириқ билан келгани учун мақсадга кўчишга мажбур бўлди:

- Ўқ-дори олиб келарканмиз.
- Қачон? Ҳозирми?
- Албатта эртагамас! Ҳозир.
- Қаердан?
- Сойнинг нариги бетидаги чакалакзордан. Полк ўқдорихонаси ўша ёқда-ку.
- Иккаламизми? Ё яна одам борми?
- Иккаламиз борсак бўлармиш.

Диловархўжанинг юрагида бир нарса чақмоқ чаққандек ялт этиб кетди. Унинг кўз олдига қонли режаси ва Содиқнинг оппоқ мудраси келди! «Эй худо, мушкулимни ўзинг осон қиляпсан шекилли!» деган қувончли фикр уни энтикириб қўйди ва бўғилиб кетган кишидек гимнастёркаси ёқасини чиқарди, камарини бўшатди. Гарчанд бутун умиди милтиқда бўлса ҳам, ўзини гўлликка солиб Содиқдан сўраб қўйди:

- Милтиқни ҳам олайми ё ортиқча бўлармикин?
- Ўзингиз қанақа одамсиз, фронтда жангчи ҳам қуролсиз юрадими! Олдингиздан немис чиқиб қолса, «менга тегма, милтигим йўқ» деб мақом қиласизми?
- Сизда бори-чун...
- Мендаги ўзимга керак. Ё навбатма-навбат отамиزمи?

Содиқнинг кулиб айтган бу сўзини Диловархўжа тузук идрок этмади. У ўлиб қолса ҳам милтиқни қолдирмоқчи эмас, бутун умиди шундан эди. У яхши билардики, ҳозир борадиган жойлари анчагина йўл. Сойни ёқалаб бориб, пастига тушилади, кейин чакалакзор бошланади, ўқ-дорихона эса ана шу чакалакзорнинг аллақаерида. Гарчанд у ҳеч бормаган бўлса ҳам, шу ерда мудофаа тутганларида командир эҳтиёт юзасидан айтган эди.

Диловархўжа Содиқ билан олдинма-кейин бора турриб, пастидаги сойга қараб қўйди: сойнинг суви яхши, лекин чуқурлиги қалай экан, одамни кўмадими? Кейин

сойнинг у бетига назар ташлади: дарахтнинг орасида ниқоблаб қўйилган тўп-замбараклар, атрофида битта-иккита аскар юрибди: Улар ҳам анча нарида. Ён-верида эса ҳеч ким йўқ. «Айни жой экану, қаршидан бирорта одам келиб қолиши мумкин-да?»—деди Диловархўжа ва икки қадам олдинда бораётган Содиқнинг сочи ўсиб кетган бўйнига, кўйлаги ёқасидан сал чиқиб турган оппоқ ички ёқасига, шалпангроқ кўринган қулоғига, ҳаммадан ҳам найза санчишни мўлжаллагани чап курагининг остига ички ҳаяжон билан яна бир қараб қўйди. Бу ниятдан унинг бадани сесканмаса ҳам, юраги дов бермади. Сал нарироқ бораверайлик-чи! Ҳали вақт бор-ку.

Шу вақт олдинда уч жангчи кўринди. Уларни кўриши билан Диловархўжа ўзини шошмашошарлик қилиб қўймаганидан қувонди, ўз ақлига қойил қолди. «Шарманда бўлишимга сал қолган экан-а!» деб шукур қилди. Қаршидан келаётган жангчилар иккитадан қутини камарлари билан хуржун қилиб, елкаларига осиб олган эдилар. Айниқса, жуссаси кичкинаси қора терга тушиб кетган эди, уларни кўриши билан:

— Шарбатга кетяпсизларми?— деб сўради, жавоб ҳам кутмай нолиди:— Тентаклик қилиб сизлар ҳам иккитадан олиб юрманглар. Жуда оғир экан. Олдинига биллинмаган эди, энди елкани узиб юборай деяпти.

У юкини ерга авайлаб қўйиб, гимнастёркасининг снигига терини артди. Бошқа бирни ҳам тўхтади, учинчиси эса, «тўхтаганинг билан бирор тақимингни мойлаб қўядими, юриб қолсанг-чи!» дегандек, индамай ўтиб кетди. Нарироқ бориб орқасига қарамай бақирди:

— Осмонга «юнкерс» амакинг чиқиб, ионуштангни бергунча турасанларми? Қани юринглар!

Жуссаси кичкина жангчи пўнғиллади:

— Ҳамманинг сенга ўхшаб уруғидан фил чиққаними!— кейин Содиқдан кўтартириб юборишни илтимос қилди. Юк унча оғир эмас эди. У узоқлашгач Содиқ:

— Этагини ҳилпиллатиб, шоҳи кўйлак кийиб юрганлардан шекилли,— деди. Диловархўжа ўз мудҳиш хаёли билан банд эди. Эшифтади, шошиб қайта сўради:

— Нима дедингиз?

— Хаёлингиз қаёқда ўзи? Ниманинг ташвишига тушиб қолдингиз тағин?— У орқасига ўгирилиб ҳамроҳига қаради.

Диловархўжа сири фош бўлган кишидек типирчилаб

қолди. Содиққа жуда ғайри табиий кўринган бир ҳара-
кат билан важ кўрсатди:

— Шу бугун кечаси ёмон туш кўрдим.

Содиқ қаҳ-қаҳ солиб кулди:

— Шунинг мотамини тутяпман денг. Балли-е, ким
айтади сизни иссиқ-совуқни кўрган деб.

Диловархўжа шундай аҳволда эдикӣ, Содиқ ҳозир «нима туш кўрдингиз?» деса жавоб қилолмас эди. Унинг баҳтига тушга унча аҳамият бермайдиган Содиқ қизиқиб суроштирумади. Фақат кап-кatta одамнинг кўрган тушидан мунчалик безовталанаётганига кулиб қўя қолди. Диловархўжа бундан жуда мамнун бўлиб, ўзини тутиб олди. Яна миясида ўша мудҳиш хаёллар изриб қолди... Гўё унинг мушкулини чиндан ҳам осон қилаётган-дек сал юришгандан кейин бир томони тик қия, бир томони сувга бориб тақаладиган тор сўқмоқ йўл бошланди. Бу сўқмоқнинг полк мудофаа тутгандан кейин пайдо бўлгани ҳали яхши топталмаганлигидан кўриниб турарди. Диловархўжага айни шундай жой керак эди. Ахир қўндоқ билан орқасидан бошига бирни ўхшатиб солса, вассалом! У гангиг сувга тушгунича бир неча тошга урилиши турган гап. Бу тошлар ҳам анча ерини чақа қиласи, кўкартиради, қонатади — бирор унинг қўндоқ билан урилганини билиб ўтирибдими! Кейин, то ҳуши ўзига келгуннича оғзи-бурнига сув тўлади, бу ундан яхши! Маълумки, бўккан киши дарров сувнинг юзига чиқа қолмайди. Ичи сувга тўлиб, шишиши керак. Унгача Диловархўжа немис ташлаган варақани чанглаб, фронт линиясидан ўтиб бўлади. У ёқقا ўтиб кетиш дарров мумкин бўлмаса, Содиқнинг ўлганига кўзи етганидан кейин, айюҳаннос солиб бошига одам тўплаши, уни қутқармоқчи бўлиб ўзини сувга ташлаши ҳам мумкин. Бу йўл ҳам ёмон эмас. Фронт мамлакат ичкариси эмаски, ота гўри қозихона қилиб текшириб юришса! Ана шундан кейин, немисга бемалол ўтиб кетади.

Содиқ эса бу ёвуз ниятдан бутунлай бехабар, кечаги отишмадан жароҳат топган дарахтларнинг шоҳ-шаббабарлиги, снаряд ёки минадан ўпирлиб кетган сой бўйига, кўм-кўк майсалар ўртасида сўгалдек хунук кўриниб турган бомба чуқурликларига назар ташлаб, хаёл сурошиб борарди. Урушга тили йўқ дов-дараҳтлар, бегуноҳ еру паст-баландликлар ҳам қатнашади, дарё, тоғ, унгурлар қатнашади, бир умр инсон оёқ қўймаган қияликлар,

эсдан чиқиб кетган сўқмоқ йўллар қатнашади, улар ҳам инсондек жароҳат топади, сафдан чиқади, бир умр ногирон бўлиб қолади. Демак урушнинг машақатини фақат кишилар эмас, бутун мавжудот тортади, унинг оғирлигини бутун мавжудот елкасида кўтаради, қалбида ҳис этади. Уруш пайтининг гулу чечагидангина эмас, унинг музикасидан, ашуласидан ҳам порох ҳиди келади. Уруш оқбилакларни ёмон кўради. Душмандан нафрлатлиш мардлик ва матонатни түғдиради. Курашда душманга бешафқатлик эл-юрга меҳр-муҳаббатнинг олий босқичидир.

Содиқ шундай одамий ўйлар билан парвойи фалак экан, Диловархўжанинг ичини ит тирнаб, ёвуз ниятини амалга ошириш учун елкасидан милтигини қўлига олди. Буни Содиқ пайқади-ю, яна ўшандай бепарволик билан тегишид:

— Ҳа, милтиқни қўлга олиб қолдингиз, чумчук отасизми?

Диловархўжа ички бир мудҳиш ҳаяжон билан кўзига қон тўлиб турган бўлса ҳам, баҳона топа олди:

— Йўлнинг торлигини кўрмайсизми? Қиши тойиб кетса...

— Қўлда кўтарган яхшими? Ундан кўра, менга бера қолинг, унда жуда ҳам бемалол бўлади.— Содиқ орқасига ўгирилиб қўлини узатди.

— Йўғ-е! Бир кишига икки милтиқ оғирлик қиласди.

— Бўлмаса олдинга ўтинг, шошмасдан йўл бошлайсиз. Тағин тойиб кетсангиз балойингизга қолмайин, ҳали қиласидиган ишларимиз кўп-а!

Диловархўжа «оҳ, билиб қолди!» деди ичиди ва бутун аъзойи бадани титраб, ранги қув ўчди, Содиқ қиялаб туриб, уни олдинга ўтказар экан, кўнглига «нега бу бунчалик безовта? Мана ранги ҳам девор бўлиб кетди!» деган фикр келди. Лекин шунда ҳам ёмонликка жўймади:

— Очиғини айтинг, бирор ерингиз оғрияптими?

— Нега? Йўқ!

— Алланечуксиз-ку! Тобингиз қочиб турган бўлса орқангизга қайта беринг. Бирорта одам топиб, ўзим олиб келарман. Бизга ҳам ҳалигиларники сингари танкка қарши ёнилғи берсалар керак-да!

Диловархўжа орқасига қайтишга рози бўлмагандек, нега бунчалик ўзгариб турганига тузуккина сабаб ҳам

кўрсатолмади. Содиқ эса «эркак киши эмасми, дардини айтгани номус қиляпти» деб бир оз индамай борди. Лекин ўз взводидан икки жангчини учратиши билан уни зўрлаб орқасига қайтариб юборди:

— Уралиб ётинг,— деб тайнинлади,— киши ўзига бепарво бўлмаслиги керак.

У, бу билан ҳам қаноатланмай, ёнилғиларни келтириб командирга доклад қилгандан кейин, доктор бошлаб Диловархўжанинг ертўласига кирди. Қасали нозикроқ бўлса у менинг олдимда уялмасин деб, ўзи ташқарига чиқиб турди. Доктор бирор касал тополмай, елкасини қисганича чиқиб кетди:

— Қўрқанми...— деди у холос.

Докторнинг кетидан Содиқ ҳам ажабланиб елкасини қисди.

* * *

Диловархўжа ўзини бутунлай фош бўлган ҳисоблаб, ўтиргани жой тополмай қолди.

Содиқдай устаси фарангдан келгани йўқ. Кеча Бонунинг тўрвачаси туфайли гапни шунаقا айлантириб бордики, дод деб юборишимга сал қолди. Шунда ҳам дилидагини айта қолмасдан, чиқариб юборди. Бугун эрталаб гўё ҳеч нарса бўлмагандек мулойим кириб келди. Менинг нима туфайли янисб ўтирганимни пайқади-ю, яна олдимга хашак ташлаб, кўнглимни олди, «ўқ-дори олиб келамиз» деб йўл бошлади. Бу кураш тушаётган полвоннинг рақиби белидаги белбоини бўшатиб туриб, бирдан қўлига ўраб, ёнбошига олиши эди. Мен содда буни тушунмай уни йиқитаман деб, қасд қилиб юрибман. Айни долигулига келганда пайқаб қолди, шунда ҳам очигини айтмай, гўё меҳрибонлик қилиб соғлиғимни сўради, қўярда-қўймай ярим йўлдан қайтариб юборди. Ваҳоланки, ўша пайтда ҳамма нарса ранги-рафторимдан кўриниб, қўлларим титраб турувди. Шарт ёқамдан олиб, «Хўш, ниятинг нима?» деганда, қўлимдан нима иш келарди. Ҳеч нарса! Ё милтиқни кўтаришга улгурадим ёки йўқ. Шунда ҳам у юрагини кенг тутиб, яна арқонни узун ташлади. Кичик бир ҳазил билан чегараланиб қўя қолди. Лекин мени олдига ўтқазиб олди, у билиб туриб шундай қилди. Тавба, кишининг шунчалик ҳам асаби маҳкам, юраги дарё бўладими! Бошқа одам бўлганда кечаёқ

о́йимни ўттиз кун қилиб, ҳисобимни тўғрилаб қўя қоларди. Бугун-чи? Бугунгиси-ку, жуда ўтиб кетди. Бунақаси бу ёруғ жаҳонда бўлмайди. Лъяннатининг жони мунча сабил бўлмаса! Ўлмасликка хат олганми дегин. Пинагини бузмайди-я! Тавба! Унинг ўша инқилоб йилларидаёқ «қизил командир» лақабини олиб, бутун бева-бечорани эргаштирганича бор экан. Ахир мендай одам тан бернб ўтиргандан кейин, у ёгини айтмаса ҳам бўлади. Ажаб, шўролар шундай садоқатли одамининг оёғига кишан солиб, лагерга ташлагани қизиқ. Бошингга кўтармайсанми, бошингга! Соянгга кўрпача солиб, йўлингда жонини фидо қилиб юборай деяпти-ку, «қоч, душмансан!» деб кўкрагидан итарасан! Булар ҳаммаси-ку майли, нега энди билиб туриб доктор бошлаб келди? Унинг жонига қасд қилиб турган одамнинг соғлиги унга нега керак бўлиб қолди? Йўлдаги хатти-ҳаракатимни хаспўшлаб, ўз оғзимдан иқор бўлгунимча қўйиб бермоқчими? Ҳаммасини билиб турган одамга, оғзимдан иқор бўлдим нимаю, ёқамдан бўғиб иқор қилдирди нима? Бу мушукнинг чала жон сичқонни у ёқдан-бу ёққа отиб ўйнашига ўхшайди. Иўқ, мен бунга чидолмайман. Модомики, яна ўқим тошга теккан экан, бошқа чорани кўришим керак. Эсим борида этагимни ёпиб олмасам, шармандам чиқади. Бу ер энди менга тор. Бугун бўлмаса, эртага унинг ҳиқилдоғимдан тутиши турган гап. Ё ўзим бориб, унинг ҳам, ўзимнинг ҳам кимлигимни, қанақа қилиб фронтга тушиб қолганимизни айтиб берсамми кан? Хўш, бундан менга нима наф? Ўз бўйнимни ўзим тутиб бера-манми? Унга ҳам тикилган бало бордир. Мен ўз ишимни тўғрилаб кетаверай, то мен ўйчи ўйлагунимча, у тавак-калчи ишимни тўғрилаб қўймасин тағин! Тўғрилаб қўйиши ҳам ҳеч гапмас.

Диловархўжа устига ёпиб ётган шинелинни бир четга отди, ирғиб ўрнидан турди. Содиқ иккита одамни бошлаб кириб, «қўлингни кўтар, қотил» деяётгандек, эшикдан кўзини узмай йиғиштирилди. Эҳтиёт юзасидан милитигининг ўқдонига ўқ жойлади, ёнидаги немис варақасини «ўғри» чўнтагидан юзароққа олиб қўйди. Сафар тўрвасини олмоқчи бўлди-ю, кейин қайтди. Бирор «ҳа, йўл бўлсин!» деб сўроқлаб қоладигандек туюлди. Унинг ичидаги бўлган колбаса консервани чўнтагига тиқди, нонни ҳам пайтава учун берилган, лекин ишлатишга кўзи қиймай юрган оппоқ газмолга ўради, қўйнига тиқди. Оғир

сафарга отланаётган кишидек қандайдир дуо ҳам ўқиди: «Ишимни ўзинг ўнгидан келтир»,— деб юзига фотиҳа тортди. Ертўладан чиқди.

Унинг режасича, ҳамма ўзи билан овора. Бугун отишма бўлмаганидан хурсанд бўлиб, ертўлаларда дам олжапти. Албатта, душман томонни кузатиб ўтирган навбатчи кузатувчилар бор. Уларнинг асосий вазифаси душман томонга кўз-қулоқ бўлиб туриш. Шундай бўлса ҳам Диловархўжа уларни имкон борича узокроқдан четлаб ўтишга қарор қилди. Бунинг учун бирдан-бир йўл тўғри немис томонга эмакламасдан, сойга ўтиш. У ерда нима кўп — паст-баландлик. У ернинг буталари ҳам ётган кишини кўмиб кетгудай ўсиқ. Ана ўшалар жонига ора кириши мумкин.

У ўзини босиб, постга чиқиб кетаётган аскардек миттигини осиб, анча ергача борди. Бир-икки учраган одамга турли баҳона кўрсатди. У ҳаммадан ҳам Содиқдан қўрқарди. Фақат Содиқнина унинг ичини билиши мумкиндай кўринарди. Унинг баҳтига Содиқ тугул, умуман, бу атрофда жангчилар кўринмас эди. У мўлжал қилган еригача юрак ўйноқилик билан келиб, «Худога шукур, энг оғир еридан ўтиб олдим»,— деганича чуқурликка ўзини ташлади, кўкраги тўлиб нафас олди. То нафасини ростлаб олгунича бир ердан қимирламади. Бир кўнгли шом қоронфиси тушишини шу ерда кутгиси келди, бироқ бунга юраги дов бермади, бирор кетидан қувиб келаётганга ўхшади. Белини қаттиқ боғлаб чуқурдан чиқди-ю, «Сисмилло» деганича эмаклаб кетди. Чиндан ҳам ўсиқ ўтлар, ўнқир-чўнқирлар, баъзан чакалакзорга ўхшаган ерлар уни бегона кўздан яшираётгандек эди. Аслида Содиқ «ундан хабар олиб тур» деб тайинлаб кетган жангчи, Диловархўжа ертўлалан чиқиши билан унга хабар берган, бу қизиқ ҳаракатдан ажабланган Содиқ унинг изига тушган эди.

Содиқ Диловархўжа чуқурликка тушиб анча вақт жим бўлиб кетганида «ўзи нима гап?» деб тепасига боргиси келди-ю, тагин «тўхтаб тур, қани бу ёғи нима бўларкин?» деб қизиққанича узоқдан кузатиб турди. Диловархўжа чуқурдан тик туриб чиқиши ўрнига ўғри кишидек у ёқ-бу ёқга аланглаб қаради, кейин бошини паст қилиб елиб кетди. Сал нарироқ бориб, ерга ётиб олди, ётганича эмаклади. Бу ҳаммаси аввалига Содиққа галати туюлди, кейин бундоқ ўйлаб қараса, унинг нияти-

бузук, оёқ олиши хунук. «Ҳа, ит,— деди Содиқ ичида нафрат билан,— олтин тувак хумори тутиб қолибди-да! Тўхтаб тур сени!»

Содиқ то узил-кесил ишонч ҳосил қылгунича уни қўйиб берди. Кейин «тўхта!» деганича тик туриб унга ташланди. Диловархўжа унинг товушини эшитиши билан ўрнидан туриб немис томонга чопа кетди. Содиқ яна товуш берди. Қараса, у ҳадемай немис томонга ўтиб қоладиган, мўлжаллаб туриб ўқ узди. Диловархўжа ўқ теккандан кейин ийқилдими ёки ундан олдин ўзини ерга ташладими, билмай қолди. Иўл-йўлакай милтиғининг ўқдонинга ўқ юбориб, кетидан чопди. У етиб борганда Диловархўжа мукка тушиб ётар, милтиғи қўлидан учеб кетган эди. Содиқ унинг ўқ еганига гумон қилиб, ғазаб билан:

— Тур, хоин!— деди милтиғини ўқталиб, Диловархўжа туриш ўрнига ётган жойида ингради. Шундан Содиқ билдики, у оғир яраланганди. Тепасига келиб, оёғи билан уни орқасига ағдарди. Кўкраги, қорни қоп-қора конга беланганди. Тили сўзга келмади. Чангалида ўша мудҳиш варақа.

Содиқнинг жиндай бўлсин унга раҳми келмади, аксинча, нафратидан дир-дир титрар эди. Унинг жони узилишини кутиб ўтирмай, шапкасидаги совет аскарининг шонли белгиси бўлган «қизил юлдуз»ни юлқиб олди. Унинг милтиғини ҳам бу елкасига осиб, беш қадамча юриши билан Богуннинг тамаки тўрвачаси эсига тушди. «Сотқиннинг чўнтағида қолиши увол» дегандек, қайтиб бориб, ёнидан уни ҳам олди.

Бу вақтда Диловархўжа тўнғиз қўпган эди. Унинг мўйловга ўхшаган бароқ қошлари бўз кўйлакка тушган қора тукли шерстъ ямоқдай бадбашара кўринарди.

7. ЭЪТИҚОДИ БУТУН ҚИШИ

Содиқ ўзини ҳамон бир нарсада кечиролмас эди: нега у сўнгги дамгача Диловархўжанинг ёвуз ниятини пайқаб ололмади? Наҳотки у унча-мунича тош билан чақилмайдиган ёпишқоқ ёнгоқ эди? Унинг-ку бир вақтлар атрофига йигит тўплаб, босмачилик қылганини биларди, шундай экан, нега энди кўз-қулоқ бўлиб кузатиб юрмади? Бу ҳушёрлигининг лами қайтиб қолганиданми ёки унинг бир вақт «ўша йиллар тентаклик қилиб юргаи

эканмиз-да, эсласа кишининг кулгиси қистайди» деб тавба қилганига ишонганиданми? Тўғри, гражданлар уруши йилларида тавбасига таяниб, бизнинг томонга ўтган, кейинчалик ўзининг оқкўнгиллиги, мардлиги, садоқати ва ишбилармонлиги билан ўтмиш гуноҳини ювганлар озмунча бўлмаган. Диловархўжани ҳам ўшанақалардан бири, мамлакат бошига оғир кун тушганда аскатар, ўзини оқлар деб ғафлатда қолдими? Ундаи деса, унинг варақа кўтариб келиши, «урушда биз ютқаздик» деб синамоқчи бўлганлари кўзини очиши керак эмасмиди? Иўқ, барча айб ўзимда, гражданлар уруши йилларининг бундай «сайёҳлар» ҳақида «уларга ишон, лекин изини йўқотма, тўрт кўз бўлиб тур» деган ажойиб шиорини унугтиб қўйдим. У тулкининг тавбаси-ю, муғамбир йиғисига ишонмаслик керак эди. Энди нима бўлди. Ҳамманинг оғзида дув-дув гап: «Бир ўзбек жангчиси қўлида немис варақаси билан душман томонига ўтиб кетаётган экан, отиб ташлашибди. Қандай уят!»

Содиқ ҳаммадан ҳам шунга сира чидамас эди, ҳар эшитганда бир энлик этидан тушарди. «Мен уни яхши билардим, асли душман — босмачи эди, адашиб фронтга тушиб қолган» деса, бирор «ўзинг ҳам ўшанақалардан бўлма, сени ҳам бир текшириб кўриш керак» дёётгандек бўларди.

Бу итялогни ўзимга ҳамроҳ қилишимнинг нима ҳожати бор эди? Қўчаларда дайди итдек санқиб, қўлга тушиб кетмасмиди! Бунақаларнинг жойи асли ўша ерда. Қонун буларни тиканли симдан ташқарига чиқармай тўғри қиласди. Буларнинг оғзи теккан сув ҳаром бўлади, оёқ изи тушган тупроқда гиёҳ уммайди, нигоҳ ташлаган боғи қуриб, гулнинг исини, ҳаётининг баҳорини ўғирлайди. Бир жиҳатдан шармандаларча бўлса-да, қўлга тушгани яхши бўлди, ичимизда юриб, зимдан зиён етказаверганда нима қиласдик? Бундан даҳшати йўқ эди! Яхши бўлди, ҳар ҳолда яхши бўлди!

Шу сўнгги фикр унинг кўнглига тасалли берди, у майда-чуйда гапларни орқага ташлаб, эркин нафас олди, йўқ, шон-шараф излаган ҳам, ўлимни ўйлаган ҳам жанг қилолмайди. Лекин ўлимни писанд қилмаган ҳам панд ейди. Снаряд тушиши билан вақтида ётиб, вақтида туриш, вақтида бирор тепа орқасига ёки чуқурликка чопиб ўтиб олиш қўрқоқлик эмас, балки жанг санъати. Ана шу лаҳзадаги онгли ҳаракат яшаш мақсадида, душман-

га чап бериб, яна курашга имкон топиш учун қилинали. Қимки, ана шу лаҳзада ўлимни ўйлар экан, ваҳимага берилар экан ёки уни писанд қилмай бепарво бўлар экан, нобуд бўлиши турган гап. Жанг ваҳима ва манманликни ёмон кўради. Чунки майдон мардлар учун, эътиқоди бутунлар учун, кўплар қатори яшаш умиди билан ёнганилар учунгинадир.

Содиқ ана шуларни хаёлидан ўтказиб ўтириб, ўтган кунларини кўз олдига келтирди. Уни гражданлар урушидан соғ-саломат олиб чиқсан ана шу тушунчаси ва метин эътиқоди эмасмикин! Ахир ўша йилларда унинг жонига қасд қилиб отилган беҳисоб босмачи ўқлари тупроқларга қоришиб, тошлар орасида қолиб кетган. Мана, яна ўша душман қаршисида тишини ғижирлатиб, кўзига қон тўлиб турибди. Фақат номи бошқа, жаңг майдони бошқа, бўлмаса қонли нияти битта: совет тузумига қасд!

Содиқ ана шундай пайтда тасодиф билан, қинғир йўл билан бўлса-да, фронтга тушиб қолганидан мамнун. Мамлакат бошига жуда мушкул ва оғир кунлар тушган шундай бир пайтда ўзининг маҳбуслар лагернда бўлишини тасаввур этолмайди. Борди-ю, станцияда ўша олтин тасодиф рўй бермаса, ҳозир лагерда ўтирган бўлса нима қиларди? Албатта «фронтга юборинг!» деб ариза берган бўларди. Лекин рухсат этишармиди? Ана шу даҳшатли савол ичидан муздек изғирин ўтгандек қалбини ҳувиллатиб юборди. Йўқ, дейишса, унда нима қиларди. Қийналарди, ёнарди, изтироб чекарди, балки ёлворарди — бошқа нима ҳам қила оларди. Ҳозир ўша лагерларда жонини қурбон бериш иштиёқи билан ёниб ётган, ариза устига ариза ёзаётгандар каммикин?

Йўқ, нотўғри йўл билан бўлса ҳам Содиқ ўз ўринни топди. Унинг жойи шу ерда, шу ўқлар чақнаб, миналар портлаётган, ҳар лаҳза ўлим совуқ ел уфуриб турган муқаддас ерда, шу окоп, шу ертўлада. Душман унинг мурдаси устидан босибгина бу ёққа ўтади. Агар у душманга бефарқ қараса, ўз муқаддас Ватани учун жон тик маса, ўзи ўқ учиб, ўзи ҳимоя қилмаса, бошқалар ҳам шундай қилмаса, унда юрт-эл тақдири, социалистик революция тақдири, Совет ҳокимияти тақдири нима бўлади! Йўқ! Буни у миасига сиғдира олмайди. Арғамчига қил қувват, дейдилар. У ана шу душман томоғидан хиппа бўғадиган йўғон, бақувват арқоннинг ингичка бир

қилип. Бу билан у фахрланади ва охирги нафаснгача шундай бўлиб қолади.

Содиқ ана шундай эзгу фикрлар оғушида мамнун бўлиб милтигини тозалаб ўтиар экан, бирдан немис замбараклари ўқ ёғдириб қолди. Ертўланинг чеккаларидан шувиллаб тупроқ тўкилди, устунга илиб қўйилган котелок тарақлаб тушиб кетди, аллақаер қирсиллаб, нимадир шувиллади. Унинг ёнида ўтирган жангчилар бундай вақтда қилинадиган одат бўйича, милтигини олиб окопларига югурдилар. Гарчанд бу «зилзила» Содиққа янгилик бўлмаса ҳам, шошиб қолди. Чунки у милтигини қисмларга бўлиб ташлаб, ҳафсала билан тозалаб ўтиради. Йиғиштириш учун вақт керак эди. Шундай бўлса ҳам, «автоматчилари дарров босиб келиб қоладими, ҳозирча менинг ишм ийќ-ку» деб ўзига далда берди ва зуд билан милтигини йиғиштиришга киришди. Шошганидан манглайн ва япалоқ бурунлари паррагида майда тер зарралари пайдо бўлиб, ўз окопига етиб борганда бўлинма командири уни суриштириб турган эди.

— Узр, ўртоқ командир! Мен шу ердаман! — дея қўлидаги милтигини окоп брустверига қўйиб, қўзини снарядлар вағиллаб чиқиб келаётган томонга тикди. Кейин бизнинг артиллерия жавоб қайтарди. Шундай қилиб тўпчилар дуэли бошланиб кетди. Икки томоннинг снарядлари ўртада ётган ўқчи, бронтешар, кузатувчиларнинг устидан ҳуштак чалиб ўтар, бўғиқ гумбурлаши асабга тегиб, тутун аралашган чанги ер бағирлаб сузиб юради. Нима учундир, бизнинг тўпчилар отишни сусайтириб бориб тўхтатди.

— Ҳийлага қўчди! — деб қўйди Содиқ ёнидаги гўлабирдан келган отделение командири Зубенко.

— Ким? — тушунмасдан сўради Содиқ.

— Ҳозир кўрасиз.

Содиқ «нимани кўрар эканман» деб турганда уларнинг окопини миномёт шунаقا ўқча тутиб қолдики, у бу яқин орада бунақасини кўрмаган эди.

— Ўзларнинг четга олинглар! — деб бақирди Зубенко ва отделениедан битта кузатувчи қўйиб, ўзи ҳам яширинди. Улар узоқ кутди. Лекин немис миномёти ҳамон тинмас эди. Жангчиларнинг асабига тега бошлади. Содиқ ҳам чидолмади:

— Бизнинг артиллерия нима қиласпти, жавоб қайтармайдими?

— Бояги дуэлдәб юрилиб битди шекилли,— ғўлди-ради унинг ёнида милтигини чоти орасига олиб ўтирган бири.

— Сабр! Жангда ҳам сабр керак,— деди Зубенко ва нима учундир осмонга қараб қўйди.— Сабр қилган ютади. Ҳозир ҳаммаси маълум бўлади.

Командирга ҳурмат юзасидан индашмади. Чунки Зубенко бундан аввал ҳам жанг кўрган, бу орада госпиталда ётиб чиқсан, ўз ишининг мэромини биладиган тадбиркор эди. Чиндан ҳам салдан кейин «ҳаммаси маълум бўлди». Немис танклар билан атакага кўчганда тўпчилар шунаقا ўқса тутиб бердики, «юрилиб битди шекилли» деган жангчи қизарип қолди. Бирорта танк олдинги қаторга етиб келолмади, уч-тўрттаси майдонда дабдаласи чиққанича қолди, қолгани қайтди. Лекин бояги миномёт ҳамон жангчиларни бош кўтартирмас эди. Кичик-кичик пауза қилиб «методик» ўқса тутирди.

— Бу сой томонда!— деди Зубенко миналарнинг учшиига қулоқ солиб,— пана жойга ўрнашиб олганга ўхшайди. Лекин узоқда эмас.

Содиқ унинг гапини синамоқчи бўлгандек портлаётган миналарга қулоқ солиб, қаноат ҳосил қилгандек бўлди.

— Борди-ю, шуни ов қилсак нима бўлади? Окопда ғиқина бериб могорлаб кетдик-ку.

— Жонга тегиб кетди деяверинг,— бу Содиқ билан ўрмонда илк бор учрашганда уларни суриштиравериб, дир дўстидан «онанг терговхонада туқканми?» деб таъла эшигтан жангчи — Шубин эди. У сўнгти вақтда ўша «бесодоблигини» ювмоқчи бўлгандек ўзини Содиққа яқин тутиб юарди. Окоп қазиса ёнидан жой кўрсатади, бир ертўлада туради.

— Қандай ов қиласиз?— қизиқди Зубенко.

— Бўлмаса минаси тамом бўлгунича...— деб Содиқ гап бошлаган эди, Шубин илиб кетди:

— Ё ўзимиз тамом бўлгуимизча бурнимиз билан ер титамиزمи?

Миналар борган сари уларнинг окопи ёнига яқинлашиб келар, ерга тегар-тегмас портлаб, кўм-кўк ерда қопқора доғ қолдиради. Ҳаммадан ҳам уларнинг чийиллаб келиб, қўнишга жой қидиравётган қушдек бир лаҳза лапанглаб туриши қизиқ эди. Агар у кишига зарар ет-

казмаса, учишини томоша қилиш мумкин эди, бирдан ана шундай чийиллаган минадан биттаси уларнинг окопи тепасида лапанглаб туриб пастига шўнфиди, сал нарига тушиб, уларнинг устига тупроқ сочди. Зубенко бўйнига тушган майдага кесакларни териб олар экан:

— Майли, боринг, лаънати ҳали-бери акиллашини қўядиганга ўхшамайди,— деди ва взвод командиридан рухсат олиб берди. Ташаббуснинг нималигини яхши биладиган взвод командири:

— Ким-ким боради?— деди.

— Мен!— деди Содиқ. У сўзини тугатмай Шубин ҳам:

— Мен!— деди. Ёлабирдан келган жангчи: «Мен ҳам!» деган эди, командир кулди:

— Бу ерда ким қолади? Ёғочга каска илиб қўямизми?

Командир Содиқ билан Шубинга рухсат бериб, муваффақият тилади:

— Эҳтиёт бўлинглар! Бу ерда ҳам ҳали қиладиган ишинглар бор.

— Менга қара, Шубин,— деди Содиқ сал четга чиқишлиари билан.— Менинг бошимга бир фикр келди. Шунга сен нима дейсан?

— Хўш?

— Мақсад ўша олти қувурли миномётининг қаердагини билиб, бу ёғини артиллерияга қўйиб беришми ёки сафдан чиқарниши?

— Ўддаласак сафдан чиқарган яхши-я!

— Албатта, тўппа-тўғри бориб бўлмайди. Бир ҳийла ишлатсак.

— Ҳийла?

— Ҳа. Биримиз немис, биримиз рус бўламиш.

Шубин тушунмади:

— Қандай қилиб?

— Қейин айтаман! Сен олдин менга маслаҳат бер-чи, қаердан немис формасини топса бўлади?

— Бунисини билмадим,— ўйлаб қолди Шубин, кейин бирдан яшнаб кетди.— Агар кечаси асирини жўнатмаган бўлсалар...

Шундай пайтда бўладиган одатдаги чақонлик билан Содиқ: «Бу ақлингга балли! Аслида Афлотунсану, ҳеч ким тан олмайди, холос!»— деганича чопиб кетди. Тўғ-

ри разведкачиларга борди, улардан асиринг қаерда-
лигини билди. У штабга кирганда немис асирини олиб
чиқиб келаётган эканлар.

— Шунинг формаси менга керак эди,— деди у штаб
бошлиғига ва мақсадини айтиб берди. Содиқнинг режа-
си қизиқчиликка ўхшаб, штаб бошлиғининг кулгисини
қистатди. Лекин у «ишончи бордирки, дадил киришяп-
ти» деган фикрга келди.

— Эгнидан ечиб оласизми? Ирганмайсизми?— қўли
иғлос нарсага тегиб кетган кишидек ижирғаниб деди
штаб бошлиғи.

— Зарур бўлгандан кейин илож қанча! Қишилар до-
ри бўлади деб илоннинг қусуғини ютган экан.

Штаб бошлиғи бу жўяли жавобдан яна кулди:

— Урушгача ким бўлгансиз?

Содиқнинг юраги орқасига тортиб кетди.

— Ўқитувчи,— бўшашиб деди у.

— Циркда қизиқчи экансизми дебман.

Суҳбатнинг бунчалик енгил тугаганидан хурсанд Со-
диқ индамай қўя қолди. Чиқиб кетаётган ерида бирдан
тўхтатилган немис нима гаплигига тушунмай, кўзи ол-
ма-кесак терарди. Ўзидан кўзини узмай турган Содиқ-
дан хавотирда эди. Ваҳоланки, Содиқ үнинг ўзини эмас,
эгнидаги кийнимини кўздан кечираётган эди, кимга сиға-
ди: менгами — Шубингами?

— Майли, олинг! Лекин қайтиб бериш шарти билан.

— Омонлик бўлса!

— Омонлик бўлишига ишонмайсизми?— бирдан
ажабланди штаб бошлиғи кулгисини йигиб.

— Ишончсиз курашиб бўладими, ўртоқ капитан!

— Албатта, йўқ!

Немиснинг ихтиёри ўзига ўтганини билган Содиқ үн-
га орқасидан юриш ишорасини қилди. Қўшни хонага
олиб чиқиб, ечинтирди. Содиқ кутмаганда немис дир-дир
титраб, ялингансимон алланималар гапира бошлади.

— Ҳа, лаънати, бунча титрайсан, музда ўтирибсан-
ми, қаддингни кўтар,— деди у кителини қўлидан олиб
бир четга қўяр экан.— Танк орқасидан келаётганингда
жуда бошқача кеккаясан-ку! Жонинг шунаقا ширинми!
Қўрқма, биз одам емаймиз, одамхўр! Қани шимни ҳам
чиқар!

Содиқ немис формасини қўлтиғига қисганича Шубин-
нинг олдига келди:

— Мана бу ёғи бўлди! Энди ким кияди? Ўзим киярдим-ку, қорамагизлигим халақит беради, фрицнинг менга ўхшагани бўлмаса керак, гумонсираб қолмасин. Яхшиси сен кий, ҳар ҳолда ўхшашлигинг бор.

— Гапирма! Унга ит ўхшасин!— Шубиннинг зардаси қайнади.

— Ўзинг эмас, афting ўхшайди,— ҳазилга олди Содиқ. Барибир Шубин ён босмас эди:

— Афтим ҳам ўхшамайди!

Содиқ қараса, Шубиннинг чиндан жаҳли чиқяпти.

— Майли, ўзим кияман бўлмаса,— деди.

— Кийишга-ку кияман, лекин ўхшатмагин-да,— бўшашди Шубин.

— Ҳа, майли, ўхшамайсан, сира ҳам ўхшамайсан.

— Албатта, сира ҳам ўхшамайман.

Болаларча бу тортишув Содиқнинг кулгисини қистатган бўлса ҳам, лабини тишлаб, ўзини босди. Лекин Шубин ҳамон тийилмас эди:

— Ростини айтайми, бурнинг фрицниги ўхшайди десанг, кесиб ташлашга тайёрман. Бунақа буруннинг боридан йўғи яхши! Шу формасини ҳам ўлганимнинг кунидан кийяпман, бўлмаса-чи, теккан қўлнимин уч марта совунлаб ювив ташлайман. Фашист одамми! Ҳайвон ундан афзал. Ҳатто тегмасанг ваҳший ҳайвон ҳам сенга даф қилмайди, ёнингдан индамай ўтиб кетади, овчи бўлганиман, биламан. Бу ифлос-чи, эшигингин очмасанг, турмини бузади, уйга киритмасанг, ўт қўяди. Тавба, шуларни ҳам одам боласи туққанми?

— Бўлмасам-чи.

— Ишонмайман, худо ҳаққи, ишонмайман!

— Гап туққанда эмас, дўстим, тарбия қилганда. Тарбия эгрини тўғри қилгандек, тўғрини майиштириб кетиши ҳам мўмкин.

— Ҳей, ўша тарбиячисини...

— Ҳа, балли, энди ўзингга келдинг. Айб ўша тарбиячисида. Бўлмаса қайси онаизор ўз боласини ёмон бўлсин дейди. Ким онасининг қорнидан бомба қучоқлаб, автомат ушлаб тушибди!

Содиқнинг кўз олдига ўз меҳрибон онаси — «Жонболам хола» келиб кетди. У ҳамма оналарни ўзиникига қиёс этар, ўзиникидек мўмйину муштипар деб фараз этарди. Ҳозир қаерда ўтирганикин? Содиқ жим бўлиб кетганидан хавотирдамаскин? Содиқ неча марта унга

хат ёзмоқчи бўлади-ю, тағин бирорта ғаламис изига тушиб қолишидан чўчниди. «Сал ўзимни тутиб, суягим қотсин-чи», деб орқага ташлайди.

— Жуда ярашди,— деди Содиқ Шубин немис форсими кийиб бўлгач. Унга эриш кўриниб бўйнини сал бир томонга эгиб, кўзини қисган эди, Содиқ дарров гапини бурди:

— Ҳазил! Энди қиладиган ишингни биласан-а? Мана бу автоматни қорнингга тираб ол, гўё мени асир олгансану, ҳайдаб келяпсан. Гут? Гутми? Қани бўл!

Улар то маълум ергача биқинишиб, атрофни кузатиб боришди. Ҳамон отишма тўхтамасди. Энди осмонга самолётлар ҳам чиққан. Аллақаерга яширинган зенит тўпларининг ўқлари осмонда гуп-гуп ёрилади. Қаердадир станокли пулемёт сидирғасига ўқ узиб қолади, автомат тариллайди, тўплар гумбурлайди.

Содиқ билан Шубин бир қанча жойгача индамай боришди. Фақат оёқлари остида эзилётган сариқ ўтларнинг шитир-шитири ва қўллари билан ёриб ўтаётган майда новдаларнинг шивир-шивири эшитиларди. Фронт анча четда қолди. Энди тўплар овози бўғиқ ва ер остидан келаётгандек эшитилади.

— Четлаб кетиб қолмадикми?— деди Шубин бир вақт.

— Ҳозир!— Содиқ югуриб бориб бир тепага чиқди, ундан ҳеч нарса кўрмади шекилли, дарахтга тирмашди. Унинг енгил чиқиб кетаётганини кўриб Шубин тегишиди:

— Мушук бўлиб кетинг-е!

— Керак бўлгандан кейин мушук бўлиб тармашмай, ит бўлиб олишмай нима иложимиз бор!— деди дарахтдан тушиб келиб ва бошлаб кетди.— Сал четга ўтибмиз. Лаънати ҳалиям отиб ётибди.

— Ўқи тамом бўлмабдими!— кулиб қўйди Шубин. Унинг ёдига окондаги суҳбат тушган эди.

— Ҳозирча тамом қилмай, отиб тургани дуруст, бўлмаса ориентировкани йўқотиб қўямиз.

— Ундай бўлса, қани товонингизни мойланг, теззалинг, дўстларга жабр бўлиб кетди.

Яна бир оз юришгач, тахмин қилинганди. Улар полкига ҳужум қилаётгани немис қисмнинг сўл қаноти шу ер бўлиши керак эди. Кузатиш буни тасдиқлади.

— Топғаң жойини қара, Шубин, буортма-я! Осмондан келиб қарамасанг, топиб бўлибсан, артиллеријамизнинг қийналганича ҳам бор экан. Ҳовонча-я, ҳовонча!— деди Содиқ Шубинни ёнига чақириб. Чиндан ҳам немис миномётчилари қулай жойда эди. Лекин улар ҳозир, нима учундир, ўқ узмай турарди. Содиқнинг мақтаганини эшишган, ўз позициясининг жуда қулай эканини кўз-кўз қилаётгандек бирдан ҳаракатга келиб қолишиди. Сал орқароқда телефон трубкасини қулоғидан қўймай турган биттасининг алланималар деб берган буйруғи ва бир қўлини кўтариб силташидан кейин ёнма-ён қўйилган миномётларининг учаласи ҳам баравар ўқ узди. Тошибўронга ўхшаб миномёт қувурларидан кетма-кет чиққан миналар вишиллаб кўкка тикка кўгарилиб, кейин олдинга итилиб шўнғиди, сал ўтмай пақир-пуқур ер қўпоргани эшишилди. Яна такрорланди. Яна...

Фронтда душманнинг ўзини бамайлихотир тутишини ва ўқ узишини кўришдан даҳшатли нарса йўқ. Чунки ўзининг кучига ортиқча ишонганидай, қаршисидаги рақибини писанд қилмаганидагина, у шундай иш тулади.

Режа билан кетма-кет отилаётган миналар ўзининг бошига ёғилаётгандек, Содиқ ортиқ чида буролмади. Ёнида кузатиб турган Шубиннинг ҳам кўзида ўт ёнарди.

— Шубин,— деди Содиқ унга ўғирилиб,—қани бўл, мени олдинга сол! Ҳайда! Тўғри миномётга ҳайда! Лекин ўзингни тут! Қиттай хато ҳам иккаламиэнинг бошимизни ейди.

Эгнидаги немис формасини ирганиб кўздан кечирган Шубин юзини буриштириди:

— Шу роль менга ёқмаяпти-да, Содиқ, уddeалолмайман. Кел, сал нарироққача эмаклаб бориб, тўғри ўқ уза-верайллик.

— Йўқ!— қатъий қаршилик билдириди Содиқ.—Шу ергача келдикми, бу ёғига ҳам таваккал қиласиз. Тўртта-бешта расчётини ўққа тутган билан иш битмайди, ўрнига бошқаси ўтади.

— Артиллерия бор-ку!

— Артиллерия! Артиллерия дейдиган бўлсак, ҳозироқ орқамизга қайтиб, хабар қилишимиз мумкин. Лекин ўшангача булар жойида турадими, кўчиб қолса нима бўлади? Кел, қўй, дўстим, битиб турган ишни ор-

қага сурма! Қани, бўл, автоматингни қорнингга тира!
Мен кетдим. Маслаҳат бояги!

Содиқ «келишдикми?» дегандек, орқасига бир қараб, ёқасининг тугмачасини ечди, бошидан пилоткаси ни олиб чўнтағига тиқди, гўё асир қиёфасига кирди.

— Мана буни ҳам осиб ол. Ўлжанг! — деди автоматини узатиб, кейин беш-олти қадам қорни билан сурилиб бориб аста турди, қўлини баланд кўтарганича юриб кетди. Роли ёқмаган Шубин ноилож қолиб, кетидан автоматини ўқталиб йўлга тушди.

Содиқнинг бир нарсадан қаттиқ хавотири бор эди: немислар шошиб қолиб орқадаги «немис» Шубинни кўрмай қолиб, бирдан ўқ узиб юборса борми! Лекин бошқа бир томондан кўнгли тўқ эди: уруш бошлангандан бери узлуксиз олға юравериб, кибри ҳавога берилган немис, чекинавериб гўё жанг жонига тегиб кетган «руслар»нинг бунчалик ҳийла ишлатишига ишонмаслиги мумкин. Унинг назарида гўё совет аскарларининг қаршилик кўрсатгиси йўқ, фақат коммунист командирлар ва комиссарларнинг зўри билан бунга мажбур бўлмоқда. Бу қаршилик ҳам гўё узоққа бормайди.

Содиқ ўз позициясида бамайлихотир иш кўраётган душманни илк бор кўриши эди. Шунинг учун бўлса кепрак, уларга очиқ-ойдин кўзи тушиши билан эти жимирлаб, беихтиёр бораётган кишидек кўнгли алланечук бўлиб кетди. У мўлжаллаган ергача ўзини тутолмай қолиб, ишнинг пачаваси чиқишидан қаттиқ қўрқар эди. Ана шунда у фавқулодда бир куч билан ўзини босиб, кўнглида: «Содиқ, бу умрингнинг синови, йигит бўлсанг ўзингни тут. Ё устидан, ё остидан. Яшашни-ку билардинг, зарур пайтда уdda lab ўла билиш ҳам бир санъат» — деди-ю, қадамини дадиллаштириди. Лекин бу дадиллик эҳтиётсиэлик эканини, душман пайқаб қолиб, шубҳага тушиши мумкинлигини фаҳмлади-ю, яна дарров ўзини «тақдиридан нолиб» бораётган ҳарбий асир ҳолатига солиб олди, қўлларини шалвиратиб баландроқ кўтарди. Аммо энди яққол кўрина бошлаган немислардан кўзини узмас, мўлжалланган ерга етгунча зарурат туғилиб қолса ўзини қаёққа олиш, қандай қаршилик кўрсатишини кўнглидан ўтказиб, ён атрофини кузатиб борарди.

Шубин эса, асабий бир сергаклик билан автоматини қорнига тираб, уни ҳайдаб борар, «ҳайдаб бораётган

асири»дан кўра, кўзи немисларда эди. Содиқнинг «Сен ўзингни тут, икки кўзинг менда бўлсин, иложини қилолсанг, мамнун одамдай сал кулиб тур, мабодо немис дурбиндан қараб қолса, гумонсирамасин!» деганини ҳозир унугиб бўлган эди. Гўё у олдида ҳамма нарсадан умидини узгандек хомуш бош эгиб, лапанглаб, баъзан туртиниб-суртиниб бораётган Содиқни кўрмас эди. Содиқ буни пайқагандек турқини бузмасдан лаб учида аста шивирлади:

— Шубин, ўзингни қувноқроқ тут!

Ана шундагина Шубин ҳайдаб кетаётган «асири»нинг соchlари ўсган, ўртаси чуқур бўйинни, шалпанг қулоғини кўрди. «Нега қулоғининг шалпанглигини аввал пайқамаган эканман? Ё ҳозир кўзимга шунаقا кўриняптими?»—деб қўйди кўнглида Шубин. Шу маҳалда эсига шунаقا бўлмағур нарсалар келганидан ўзи ажабланиб, сал жилмайиб қўйди. «Йўқ,—деди кейин ўзига ўзи,— ҳозир бундай бўлмағур нарсаларни ўйлайдиган пайт эмас, бутун диққатим шу қаршидаги немисда бўлиши керак. Ҳа, ростанам, ҳали ўз вақтида Содиқнинг автоматини ўзига беришим зарур-а! Яна ёдимдан чиқиб қолмасайди! Йўқ, нега эсимдан чиқсан, асосий вазифамдан бири шу-ку! У ёрдамлашмаса бир ўзим ёлғизлик қилиб қоламан. Ҳа, шу пайтда Содиқ нимани ўйлаб кетаётганикин? Бирдан немис ўқ ўзиб қолса бошлаб уни майиб қиласди-я! Йўқ, унга тегмаслиги керак, мен шундай чақонлик қилишим керакки, у зарар топмасин. Унинг юраги увушаётганикин? Увушса керак. Ҳар ҳолда қўлида қуроли йўқ. Қурол кишига катта далда. Йўқ, юраги увушмаса керак, увушса, чўчиса, немисни пайқаши билан «бўлди, қани әнди қайтдик, жуда ноқулай жойда экан, артиллерияга айтсан, ўзи боiplайди!» демасмиди! Мен сал ишора қилганимда ҳам унамади. Демак ўзига ишончи зўр. Бу ишончмикин ёки душманга нафратмикин? Киши душмандан қаттиқ нафратланса, кўзига ҳатто ўлим кўринмайди, дейишади. Шу жуда тўғри. Буни ўзимдан қиёс қилсан бўлади. Агар немис менинг бола-чақамни кўчада сарсон қилиб, ўз кучим билан тиклаган хатамни ёндириб ташламаганида, балки ундан бунчалик нафратланаб, дарғазаб бўлиб, мана бундай қалтис ишга рози бўлмаган, бўлар эдим. Бундай десам, Содиққа қандай алам ўтган? Унинг юрти узоқда, бола-чақаси тинч-ку. Йўқ, юрти узоқлиги тўғри, лекин оиласи тинч эмас. Шу

немис туфайли тинчлиги бузилган. Ҳаловати кетган. Демак, унинг ҳам дарди бор. У ўзоқдаги уйнга ўт қўядиган, оқ соч онасини қон йиғлатадиган фашистнинг қўлини шу ерда, худди шу рус ерида узиб ташла-мокчи!

Шубинчувалиб кетган ўйи билан бўлиб, бундоқ қараса, Содиқ анча узоқлашиб кетиб қолибди. «У чопади, немис қочиб кетаётгани йўқ-ку! Ё асаби бардош беролмай қөлишидан қўрқяптими? Йўғ-е!» деб кўнглидан ўтказди, немис уни ёлғиз пайқаб, бирдан ўққа тутиб қоладигандек қадамини тезлатиб, етиб олди.

— Ана, биттаси бизни пайқади! — деди Шубин салдан кейин.

— Кўриб турибман!

Содиқ немиснинг бунчалик кеч пайқаганидан хурсанд эмас эди. Бирортаси шошиб қолиб, ваҳима кўтариши мумкин эди. Йўқ, ундаи бўлиб чиқмади. Ҳаммадан аввал пайқагани югуриб бориб, телефон трубкасини қулоғидан қўймай, минадан бўшаган темир қутилар устида ўтирган офицерга хабар берди. У бир лаҳзагина трубқани қулоғидан узоқлатиб дурбинини қўлига олди, бош яланг, ёқавайрон, ҳолдан тойгаңдек гандираклаб келаётган «асир»га қаради. Унинг орқасида мамнуният билан автоматини қорнига тираб келаётган «немис автоматчисини» кўриб бир зумда юзига табассум сочилиди. Хабар берган солдат оппоқ тишларини кўрсатиб, нималардир деди. Бу орада бошқалари ҳам пайқаб, «қани, берироқ келсин-чи, бу қанақа коммунист экан, бошида шохи бормикин?» дегандек мўлтиллашиб, турган ерларида қотиб қолишиди. Содиқка шу керак эди. У дарров уларни санаб чиқди. Дурбинли офицерини алоҳида назардан ўтказди. Худди шу вақтнинг ўзида, мабодо улар чекингудек бўлса, қайси томонга қочишлиарини ҳам тахмин қилиб қўйди. У Шубин билан келишиб қўйган шартнига кўра, муккалаб кетган кишидек бир ҳаракат қилди. Шу лаҳзада қиладиган ишини хаёлидан қочирмай келаётган Шубин, фавқулодда бир эпчиллик билан қўлидаги автоматни унга иргитди ва ўзи ёнидаги «ўлжак» автоматга ёнишди.

Эстафетада қўлига калтакча тегиши билан бирдан чопишини тезлатган чопқирдек, Содиқ автоматни илиб олган замон ўт очди. Кутимаган бу ҳодиса немис миномётчиларининг бир нечтасини турган еридаёқ ер тиш-

латди, қочишга улгурганини эса, ўқ қувиб етди. Содик мильтиқдан нишонга олиб отишга ўрганиб қолганиданми, автомат қўлига тегиши билан олдинга ташланиб, бир тўнка устига автоматини қўйиб ўқ ёғдирмоқда эди. Ундан сал чапда Шубин тик турганича ўқ сочар эди. Содик атрофга қараб, оёқ устида бирорта ҳам немис қолмаганини кўрди-ю, олдинга югуриб кетди. Лекин нимага юргурганини ўзи ҳам билмади, осмонга оғзини очиб турган миномётлар олдига бориб тўхтаб қолди. Унинг орқасидан етиб келган Шубин «энди бу ёғи нима бўлади?» дегандек, Содикдан кўзини олмасди. Кутилмаган муваффақият уларни шошириб қўйган эди. Ахир немисни битта ўқ узишга қўймаслик, енгил гапми?

— Қани сен атрофни кузатиб тур! — деганича Содик немис солдатлари ёрдамга келишини гумон қилган томондаги тепаликка югуриб чиқиб кетди, разведкачилардагина бўладиган зийраклик ва қувлик билан атрофга кўз ташлади. Бу ёқдан хотиржам бўлди шекилли, Шубинга:

— Қайни, миномётларини ишдан чиқар. Шундай қилганики, бирортасидан отиб бўлмасин! — деди ва ўзи ўша ерда кузатганича қолди.

Дўстининг ишонч билан берган буйругидан гайратланиб кетган Шубин бошлаб миномётларининг узоқлик ва отиш бурчагини белгилайдиган асбобларини мажақлаб ташлади, кейин ўзини ағдариб, мумкин бўлганича пачақлади, синдириди-ю, «тағин нима қолди!» дегандек орқасига қараб, ётган ерида Содикни нишонга олаётган немисга бирдан кўзи тушиб қолди, «қоч, Содик!» деб уни огоҳлантиргунича бўлмай ўқ унинг ўзини оёқдан ўйқитди. Ўқ товуши билан ҳушёр тортган Содик ёнига ўгирилиб, эгилганича қочиб кетаётган немисни кўрди. Турган жойида ўқ узиб қўя қолиш ўрнига, нима учундир Содик уни қувиб кетди. Бутун жони фақат бўйнида, бўйнини яширса бошқа ерига теккан ўқдан зиён кўрмайдигандек, бўйнини икки елкаси орасига қисиб олган фриц пилдирлаб борарди. Содик эса, бўрига ташланган чўпон итидек қувар, ўқ узиш хаёлига ҳам келмас эди. У энди қувиб етиб, орқасидан ёқасига чангалини солай дегандана немис ўзини таппа ерга ташлаб, ағдарилди-да, унга ўқ узди. Ўқ Содикнинг шундоқ қулоги остидан шанғиллаб ўтиб кетди. Қўрқув аралаш нафратдан дарғазаб Содик чопиб кела туриб унинг тўппонча ушлаган қўлига бирни

тепди. Тўншонча учиб кетди. Немиснинг қўли оғриди шекилли, бўғилганга ўхшаш бир овоз чиқарив, жон ҳолатда оғзига ўша қўлини тиқди. Лекин қаршисидаги қора терга тушиб, ҳаллослаб турган қорамағиз совет жангчиси унга қўлининг оғрифидан ҳам даҳшатли қўриниб кетди. У, қўл экан-ку, ўзини сафдан чиқариши мумкин эди. Қўрқув ичида буни фаҳмлаган немис оғриғини унутиб, ётган ерда иккала қўлини барада кўтарди.

— Даюс, аҳволинг шу экан-ку, ўқ узиб нима қиласдинг,— деди энтикиб Содиқ ва аламдан титраб биқинига бирни тепди. Немис юзининг томири тортишгандек буриштириб, «хик» этиб қўйди, лекин қинидан чиқиб кетай деб чақчайиб турган кўзини ундан олмас эди. Содиқ қаёққа юришини автоматининг уни билан кўрсатиб:

— Тур тўнғиз, олдимга туш!!— деди.

Немис, иштонига булғатиб қўйиб, онасишнинг шапатисини юрак ўйноқилик билан кутаётган гўдакдек кўзи жавдираб, олдинга тушди. У шу маҳал, Содиқ отиб ташламасликка ваъда берса, ит бўлиб акиллашга, чўчқа бўлиб чийиллашга тайёр кўринарди.

Содиқ уни олдига солиб, Шубиннинг ҳузурига келгандада у ўқ теккан ярасини боғламоқда эди. Немис «мана энди, мени унинг кўз олдида отади! Ёки унинг ўзига оттирамикин?» дегандек жуда эсанкираб қолди. У Содиқнинг:

— Кўрдингми, ифлос, қилган ишингни? Онангнинг ҳақи бормиди унда!— деганига тушунмай гоҳ унга, гоҳ бармоқлари қон Шубинга кўзини лўқ қиласади.

Содиқ, немиснинг ўзидан нарироқда орқасини ўғиртириб қўйиб, Шубиннинг ярасидан хабар олмоқчи бўлган эди, немис «мени отгани тўғирляяпти» деб, бағиллаб оғғи остига ўзини ташлади, улар билмаган тилда шафқат сўради, йиглади, ёлворди.

— Ҳолинг шу экан-ку, ифлос, тагин аслзодалик, қаҳрамонлик даъво қиласан. Утир бўлмаса, мен унинг ярасидан хабар олай,— деди Содиқ ва Шубиннинг ҳолини сўраб, ярасини боғлашга ёрдамлашди, қўлидан ушлаб турғизди.

— Уҳ!— деди Шубин оғини босмоқчи бўлиб.— Ишим чатоқ, юриб бўлмайди.

— Хотиржам бўл, сени юргизмаймиз, олиб кетамиз,— деди Содиқ ва немисга ўгирилди,— қани, жаноб олий

ирқ, бир эшаклик қилинг,— кейин Шубинга қаради.—
Бунга опич! Олиб боради, олиб бормасин-чи. Бекорга
уни қувиб, ушлаб келдимми!

Фриц Содиқнинг ишорасини тушуниб, тирик қолиши-
га кўзи етиб, қандайдир миннатдор боққанича елкасини
Шубинга тутди.

— Тортинма,— деди Содиқ ийманаётган Шубинга,—
бизнинг шунча бегуноҳ кишиларимизни қонга ботирган-
да, бир марта эшак қилиб минсанг минибсан-да!

Содиқ миномётчилар позициясидан чиқиб чакалак-
зорга кириб олгунча немислар билиб қолишидан, мабодо
отишишга тўғри келса ёлғизлик қилиб қолишидан юраги
чўчиб борди. Бугун унинг баҳти ростакамига кулган
экан. Ҳеч қандай ҳодиса рўй бермасдан етиб олди.

Уни қарши олган штаб бошлиғи Шубинни опичлаб
келаётган асир немис ефрейторини кўриб, тегиши:

— Сопини ўзидан чиқарибсиз-ку!

Содиқнинг қисқача рапортини эшигиб яна ҳам қуво-
ниб кетди.

— Хилватга ўтиб, минабозлик қилиб ётган экан денг,
о, лаънатилар-е! Боплабсизлар!

Бу сұхбат устига чиқиб қолган полк комиссари улар-
нинг гапига бир оз қулоқ солиб, кўзойнаги тепасидан
қараб турди-да, кўзойнаги халақит берадётгандек, қўли-
га олди, бир қулоғининг орқасига ҳовучини қўйиб тинг-
лади. Сўнгра мамнун термилганча бир қадам олдингā
юриб, Содиқнинг елкасига қўлини ташлади.

— Мана бу матонат! Мана буни маҳорат дейилади!
Балли, сизларга! Сизнинг ярангиз оғир эмасми?— деди
кейин Шубинга. Уни тезда санбатга жўнатиш ҳақида
фармойиш берди, самимий сўзлар билан кўнглини кў-
тарди.— Ишонаманки, сизларнинг бу қаҳрамонлигин-
гизни қўмондонлик керагича тақдирлайди. Энди дам
олинглар.

Шубинни носилкада санбатга олиб кетар эканлар,
Содиқ анча ергача эргашиб борди. Ўзи соғ-саломат қо-
либ, у яралангани учун бир нима демоқчи бўларди-ю,
нимадеб гап бошлашни, тўғриси, нима дейишини бил-
мас эди.

— Оғайни,— деди у Шубиннинг қўли устига қўлинни
қўйиб,— мендан хафа бўлмайсан...

— Нимага?

— Лаънатининг сенга ўқ узганини айтмайсанми...

— Сенга отса яхши бўлармиди? — ўзини зўрлагандек кулади Шубин.

— Шундай бўлса ҳам... яхши бўлмади,— деди ийманиб Шубин.

— Борди-ю, нобуд бўлганимда нима қиласдинг? Бунинг отини жанг дейдилар, ҳаёт-мамот жанги. Қурбон бўлишимиз ҳам мумкин. Ҳаммасини бўйнимизга олиб майдонга кирганимиз, дўстим. Бу ерда сенинг нима гувоҳинг бор!

— Шундайку-я... — иқрор бўлиб бўшашиб Содиқ.

— Лекин сен мени кечиришинг керак, Содиқ. Мен сенга бир беодоблик қилиб қўйганман.

— Беодоблик?

— Ҳа. Катта беодоблик. Биринчи марта учрашганимиз эсингда борми?

— Ҳа, бор.

— Шунда сендан шубҳаланиб, саволлар берганман. Эсингдами?

— Тўғри қилгансан. Мана шеригим пачоқ чиқиб қолди-ку! — деди Содиқ хижолатомуз бир оҳангда.

— Шеригингни гапирма. У одамми! Қоши хунук эди! Ахир мен унимас, сени сўроқ қилганман.

Содиқ қараса, Шубин ўша қилган ишидан хижолатда. Жўрттага ҳазилга бурмоқчи бўлди:

— Сен ҳали ҳам ўшани эслаб юрибсанми? Менинг хаёлимдан ҳам кўтарилиб кетибди. Ўзи қаҷон бўлган эди?

— Биласанми, Содиқ, кишига ишонмасликдан ёмон нарса дунёда йўқ.

— Биламан! Жуда яхши биламан, дўстим, қалбинингга ништар бўлиб ботади.— Содиқ ўзининг шубҳа ва туҳмат билан қамалганини эслаган эди.

— Ана шунинг учун ҳам сен мени кечиришинг керак.

— Аллақаҷон кечириб юборганман.

— Менинг гўллигимни қара, келиб-келиб сендай одамдан шубҳа қилибман-а! Бу калламас мендаги, қовоқ, хом қовоқ.

— Үндай дема, Шубин, мен хафа бўламан. Қани ҳаммада ҳам сеникидай бошу юрак бўлса!

— Шундайми? Чинингми?

— Чиним!

Икки ўртоқ ўпишиб хайрлашди.

Содиқ унинг орқасидан узоқ қараб қолди.

Содиқ билан Шубиннинг шу қаҳрамонлигидан **хабар** топган фронт газетаси, мухбирини юбориб, Содиқ билан сұхбат уюштируди ва суратини олиб кетди. Бир неча кундан кейин каттагина материал билан сурат босилиб чиқди. Гарчанд бу жанговар очеркда мухбир ўзидан ҳеч нима қўшиб-чатмаган, имкон борича бўлган воқеани ҳалоллик билан тасвирилаб берган бўлса ҳам, Содиқ ўзини аллавақтгача ноқулай сезиб юрди. Ҳаммадан ҳам сурати чиққанига хурсанд эмас эди. Фронт жангчи, командирларига ибрат қилиб босилган бу сурат Содиқ учун ёмонликка хизмат қилиши мумкин эди. Ахир Содиқ, ўзининг қилган гуноҳини — қочоқ эканини бирор лаҳза унутмас, баъзан бу нарса қалбини исканжага олиб эзарди. Борди-ю, унинг қочганидан хабар топишган бўлиб, қидирув эълон қилинган, ўша қиди-рувчилар қўлига шу сурат тушиб қолса борми!

Содиқ ана шуларни ўйлаб беш-олти кун қаттиқ бе-зовталаниб юрди. Мухбириниг илтимосини астойдилрад этиб туриб олмаганига ачинди. Ахир, йўқ, керак эмас, деб оёғини қаттиқ тираб турганда зўрлаб суратга олмас эди-ку. Тўғри, камтарлик қилган кишидек бўйин товлади. «Шубин тузалиб чиққанда, бирга оларсиз. Ик-каламиз борганимиз» деб баҳоналар кўрсатди, суратга тушишини ёмон кўришини ҳам айтди, мухбир кўнгандай бўлган ҳам эди-ю, полк комиссари кириб қолиб, ишни катта қилиб юборди:

— Албатта сурати билан беринг, бу кичкина иш эмас. Қандай жанг қилишини бошқалар ўрганишсин! — деб алоҳида таъкидлади. Ноилож қолган мухбир «айб менда эмас, комиссарингиз илтимоси» дегандай аппаратини тўғрилади. Содиқ ҳам ичидан зил кетганича бир нарса дейлмади.. Мана ўша сурат газетада. Кичиккина бўлса ҳам майли экан, каттагина. Яна бирам тиниқ чиқибди!

Содиқнинг уйқуси қочиб ташвишланганича ҳам **бор** эди.

Уни бир маҳал тергов қилган Чуханов ана шу дивизиянинг оператив группасида эди. Уруш бошланиб, фронтда унинг касбидаги кишиларга ҳам зарурат туғилганда сафарбар қилинган ва бир қанча вақтдан бери шу ерда эди. У эрталаб нонуштадан туриши билан унинг ҳазилкаш ўртоқларидан бири:

— Элатингизнинг қаҳрамонлиги билан табриклаймиз, ўртоқ Чуханов!— деб тегишиди, қўярда-қўймай қўлини олиб сиқди.

— Қанақа элат?— бепарвогина сўради у.

— Ахир ўзбекистонликмисиз? Мана, марҳамат, элатингиз билан танишувингиз мумкин!

Ҳазилкаш дўсти артистона ҳаракат билан газетани унга узатди. Чуханов газетанинг учинчи бетидаги Содиқнинг суратнин кўрди-ю, таниш одамини учратгандай бирдан юзи ёришиб кетди. Лекин қандай таниш эканини ҳадеганда хотирлаб ололмади. Унинг қувонганини кўрган ҳазилкаш ўртоғи яна тегишиди:

— Таниш ҳам чиқиб қолдими? Демак, яримтага эрийсиз. Шу бугун кечқурун столга қўясиз, ё ҳозир ташкил қилиб юборасизми?

Чуханов индамади. У кўнгилсиз бир нарсани эслагандек юзидағи табассум пардаси туширилаётган саҳнадек йигиштирила бошлади. Унинг бит кўзлари бир нуқтага қадалиб, сочсиз кенг пешонаси йилтиллади. У Содиқни танигандек бўлди. «Наҳотки у? У қандай қилиб фронтга тушиб қолади? Йўқ, у эмас. Бирор ўхшашидир», деб ўйлади Чуханов ва суратга яна тикилиб қаради. Ўзидан узоқроқ тутиб қаради. «Йўқ, худди ўшанинг ўзи!»

Бу сурат унга қизиқ бир жумбоқ бўлди. Ҳазилкаш ўртоғидан бир амаллаб қутулиб, ўзига ажратилган хонага кирди. Очеркни ўқиб чиқди. Суратни яна қаршишига қўйиб мулоҳаза юритди, тагига етолмади. Совет ҳокимиятидан дакки еган Содиқдек бир одамнинг бунчалик матонат билан жанг қилишига, оддий тўқиашув пайтида эмас, балки ўз хоҳиши билан талаб этиб бориб қаҳрамонлик кўрсатишига Чухановнинг ақли бовар қилмас эди. Ахир бундай мардлик фронтда ҳар куни содир бўлавермайди. Очеркка кўз югуртириб туриб, полк комиссарининг у тўғрида айтган сўзини ўқиди: «Она-Ватанини жону дилидан севган кишигина, душманга қаҳруғазаб билан тўлиб-тоцган жангчигина бундай мардлик кўрсатишга қодир!»

Чуханов бу фикрга қўшилди. Лекин у билган Қўчкоров шундай ишга қодирмиди?

Чуханов Содиқ масаласига жуда қизиқиб қолган эди. Бир хаёл билан ўзи ўша қисмга бориб, суриштириб келмоқчи бўлди. Аммо бу ерда вақти зиқлигига ачиниб,

ўрнига бир ёрдамчисини юборди. Уни узатар экан, тайинлади:

— Штабга кир, ҳужжатларини кўр. Агар командири коммунист, ишончли киши бўлса аста суҳбатлаш: қачон, қаердан келган?

Эртасига ёрдамчи доклад қилди:

— Штабда ҳеч қандай ҳужжатлари йўқ. Қисм қуршовдан чиққан куни йўлдан қўшилган. Тунов куни исемис томонига қочиб ўтиб кетаётганни отган ҳам шу жангчи экан. У қочган ўз ҳамроҳи, ҳамشاҳари бўлган.

Чухановнинг яна шубҳаси ошди. Содиқ, у билган Кўчқоровга, ўзи тергов қилган Кўчқоровга ўхшаса ҳам, унинг ватанпарварлик ишилари ўхшамас эди.

— Ажабо!— деди у бошини чангллаб,— бу қанақаси бўлди? Бунақасини ҳеч учратмаган эдим.

У яхшилаб текширишга қарор қилди.

Худди шу куни кечқурун Содиқни ўзига яқин туладиган, айниқса мана шу машҳур воқеадан кейин у билан фахрланиб юрган взвод командири уни бир четга чақириб, дивизия штабидан оператив ходим келиб, уни суриштириб юрганини айтди.

— Бу нима қилишгани? Бирор ишингиз йўқми?— деди.

Содиқ «йўқ!» деди-ю, юраги «шув» этиб, орқасига тортиб кетди.

8. ХОИН ВА ЖОСУС

Мирсалим ҳам ўша куни Қодирни кўрган эди.

Аввалига «Қодир бу ерда нима қилсан?» деб гумонсиради. Кейин синчиклаб қараса ўша, худди ўша зумрашанинг ўзи! Нима учундир у ҳатто бошқалардан ажralиб турарди. Мирсалим уни таниди-ю, баданин чумоли талагандек тирноғигача жунжиб кетди. Лекин Қодир уни кўрган-кўрмаганини аниқ билмас, шундай бўлса ҳам юзма-юз туришга бардош беролмай, орқасини ўгириб олишга мажбур бўлди. Бу билан ҳам кўнгли тинчимади. Қодир ҳамон унга кўзини ништар қилиб қараётган, бу ништар орқасини тешиб юбораётганга ўхшарди. Назарida, у югуриб келиб «ҳали сизнинг ичингиз билан ташқингиз бошқа-бошқамиди! Кўкракка уриб «шўроларга жон фидо!» деб юришларингиз пах-

тавон ғаплармиди!» деб ёқасини тутиб, акасининг хунини талаб қилаётган, машинадан тортиб тушираётгандек туюларди. Ана шунда янги бошлиқлардан бир оз ўпкалади: ҳа, ҳўп, ўз розилигимиз билан легионингга ёзилганимиз тўғри. Лекин нега бу лагерга олиб келиб, дўст-душман олдида кўз-кўз қилиб юрибсан! Тўғри олиб кетаверсанг бўлмасмиди? Энди нима бўлди? Кинининг кўнгли хижил, хира: калтакесак чақмаса ҳам, кўзинг тушса этинг сесканади-да!

Иштонсизнинг ҳадиги чўпдан, дегандек, то машина гуриллаб, орқасига тутун қайтариб лагердан чиқиб кетгунча Мирсалимнинг ичидан қиринди ўтди. Ташибарига чиққандан кейин бундоқ қараса, баданида терга ботмаган мўйи қолмабди!

Мұхтарам китобхонининг эсида бор, Мирсалим ўша фроўтга тушган куниёқ отишмадан қўёндек дир-дир титраб, ўтирган окопида қолаверган эди. Бир маҳал хуши ўзига келиб, окопдан бошини чиқариб қараса, немислар жанг майдонини хазончинак қилиб юрибди. «Дам шу дамдир, ўзга дамиш дам дема!»— деди-ю, милитарини окопда қолдириб иккала қўлинин кўтариб, бирор «Ие, сен тирик экансан-ку!» деб тарс этиб отиб қўядигандек баланд кўтариб, то немис пайқаб териб олгунча гоҳ уни-сига, гоҳ бунисига кўзини лўқ қилиб турди, беллари толиб, кўзлари тиниб кетди. Бир очатқи немис «окопдан чиқ!» деб ишора қилиши билан лип этиб олдинга тушди. Уруш бошланиши билан ёдлаб машқ қилган немисча сўзларидан битта-иккитасини аранг эслаб, нимадир деди. Немис илжайиш ўрнига хўмрайиб қўйди. «Немисчани билмайдиган немис шекилли бу» деган хаёл билан бошқа хушомад қилмади. Ўқ товушлари узоқлашиб кетганига шукур қилиб, немис имо қилган томонга қўйдек кетаверди. Уни сойда, бир катта шохи бомбадан синиб, осилиб қолган эманининг соясида ўтирган кишиларга олиб бориб қўшиб қўйди. Улар ичидан оёқ-қўли бутун ёлғиз у эди. Шунинг учун бўлса керак, эманга суюниб ўтирган, бир оёғи узилиб тушган сержант у келиши билан «давангидай бўлиб соғ-саломат асир тушгани уялмадингми?» дегандек бир хўмрайдикни, Мирсалим кайфи тарқаган кишидек ҳушёр тортиб, гандираклаб кетди, ўзини упинг кўзидан четга олди.

Мирсалим лагерга тушиши билан ҳеч кимга тузукнина аралашмади, ўзини якка тутди. Лекин у ўлимдан

қаттиқ қўрқар, бир ери сал санчса ҳам ваҳимага тушиб, худога нола қиларди, ғиштнинг орасига кўмиб кслгани, бувасидан қолган уй-жой, ер васиқаси кўз олдидан пир-пир ўтаверарди. Бу мол-мулклар у ўлиб, яна аллакимларга қолиб кетаётгандек ич-ичидан ёниб-куярди. Қизи Азиза ҳам яхши чиқмади. Агар у отасининг измидин чиқмай, нима деса, лаббай деб турганида бирор тагли-тахтли йигитга узатган бўларди. Тагли-тахтли куёв албатта унинг сўзини иккита қилмас, фарзанд ўрнини бошиши мумкин эди. Шунда хотиржам бўлиб, ўша васиқаларни унга бериб келгайн, бирор бахтсизлик рўй бериб (иссиқ жон-да!) қайтолмай қолса, у вақти соати келганда ворис сифатида мулкни ундирган бўларди.

Мирсалим шуларни ўйлаб, оч-наҳор қолиши ҳам кўзига кўринмай юрган кезларда бир куни Али Наимхон келиб қолди. У қўзига нажоткор бўлиб кўрипди, унинг эскича бир талаффуз билан муллабаччалардек юмшоқ гапиришидан эриб кетди. Уруш бошланганда йилтиллаб, фронт ва лагерга тушиши билан устини даҳшат кули босган умид учқунлари яна чақнади. Ҳаммадан ҳам Али Наимхон: «Эй, турк ўғлонлари, ғафлат уйқусида: энди ўйғонинг! Ислом байроғини поклаб, юқори тутиинг!»— деганида кўзига ёш қалқиб келди. «Эй, хизир назар қилган банда, тур, энди ўз жойнингга ўт»,— деди-ю, биринчи бўлиб қўл кўтариб чиқди. Шу онда қизини тагли-тугли куёвга чиқариб, васиқани унга бериб келмаганидан хурсанд бўлди: ўзи ғолиб кириб бориб барчасини ундириб олади, даври-даврон суради!

Мирсалим Қодирни кўриб қолгунича мана шу ширин хәёллар оғушида масти аласт эди. Қодир унинг оромбахш тушини бузиб, бирдан уйғотиб юборган кишидек даҳшатга солди. Ахир у Содиқнинг укаси эди. Акасининг қамалишида унинг қўли борлигини яхши билмаса ҳам, ҳар ҳолда гумони бор, шу гумонини Али Наимхонларга сал билдиrsa борми! Ҳайрят, Қодир бундай қилмади. «Бу ҳам худонинг марҳамати» деган Мирсалим машина лагерь дарвозасидан чиқиши билан оғир бир уҳ тортиб, шукроналик қилиб қўйди.

Машина шу кетганича ҳеч қаерда тўхтамай, уларни поездга солди. Кузатувчилар эртасига поезддан тушириб, яна машинада олиб кетди. Машина Германия босиб олган мамлакатлардан бирининг катта шаҳри ёнидаги ҳарбий лагерга олиб келиб ташлади. Шу куниёқ уларни

ҳаммомга тушириб, немис формасини кийдиришди. Форма немис-фашист солдатиникининг айнан ўзи бўлиб, фақат ёқасига «Олло, Туркистон биз билан» деб ёзиб қўйилган эди. Бўлинмаларнинг командири немислар эди.

Уч кун ўтгач Али Наимхоннинг ўзи келди. «Ассалом, турк ўғлонлари! Шонли ишларингизни олло хайрли қилин» деганидан кейин, барча билан бир-бир суҳбатлашди. Навбатини сабрсизлик билан кутиб турган Мирсалим, у якка-якка қабул қилаётган хонага бисотидаги бутун иззату икром ва назокатини ишга солиб кириб борди. Гарчанд устида ҳарбий форма бўлса ҳам, мулла-баччалардек қўй қовуштириб, қаддини эгиб турди. Али Наимхон суҳбат бошлади:

— Номи шарифингиз, афандим?

— Мирсалим Мирзоҳидий.

— Гўзал Туркистонимизнинг қаеридан бўладилар? У ерда ҳам шу ном билан юрамидилар?

Мирсалим гап фамилияси охиридаги «ий» қўшимчаси ҳақида бораётганини тезда фаҳмлаб, айборларча ишшайди.

— Асли шундай эди, кейинчалик...

— Тушунарли!— Али Наимхон «бас, кўп эзмалик қилма» дегандек унинг сўзининг дамини қайтарди. Лекин қўполроқ чиқиб қолганини ўзи ҳам пайқаб қолди шекилли, кетини табассум билан юмшатди.—«Мир», «камир» сўзининг ихчамлаштирилгани эканини биладиларми?

— Ҳавво, тақсир!— мамнун тиржайди Мирсалим.

— Мадрасада таҳсил кўрганмидилар?

— Бир оз. Қолгани уйда бўлган.

— Жуда яхши! Жуда яхши! Қуръони шарифдан хабарлари бордир, албатта?

— Бор, афандим, бор.

— Қани бўлмаса, бирор суро тиловат қилсинлар. Кўпдан бери ватандошимизнинг табаррук овозларини эшитганимиз йўқ.

Мирсалим кўрсатилган ерга одоб билан ўтириб, биринки томоқ қирди. Қайси сурани яхши билишини хаёлидан ўтказди. Қейин қаршида турган Гитлернинг суратига қўзини тикиб, иккала қўлини тиззасига қўйганича бутун санъатини кўрсатиб қироат бошлади.

Али Наимхон бошини сал бир томонга эгиб қулоқ

солди, лаби билан нималарни дир пичирлаб қўйди. Қироат тамом бўлиб, фотиҳа тортилганда, у ғайри ислом кишиларида гина бўладиган бир қовушимсизлик билан қўлини юзига олиб борди. «Мусулмонлиги бешакдур, лекин қўли бундай ишлардан чиқиб кетибди. Бўлмаса, қуръон ўқилган пайтда бош яланг ўтира миди. Олло ўзи кечирсинг!» деб қўйди уни кўриб Мирсалим.

— Сизга бир хизматни топшириш ниятида турибман,— деди Али Наимхон қуръон тиловатидан кейин чўккан жимликни бузиб,— албатта рад эт масалар кепрак.

Али Наимхон ўзига «тақсир», «афандим» деб мурожаат этилишини хуш ёқтиради. Буни келган куниёқ кимдан дир эшишиб, кўнглига тугиб олган Мирсалим шу торни зарур-нозарур черта бошлади:

— Бош устига, афандим! Гўзал. Туркистонимиз шаъни-шукуҳи учун ўтга киришга ҳам розимиз, тақсир!

— Ҳа, балли! Офарин! Олло ниятингизни берсинг!— деди Али Наимхон, гарчанд ёш жиҳатидан Мирсалимдан фақат икки-уч ёш катта бўлишига қарамай ўзини улуғвор ва юксак мансабдор сифатида тутиб. Мирсалим эса, хушомад билан баттар чўкиб бора ради:

— Ташаккур, афандим!

— Ёшларимиз ислом расми-русларидан анча бегона бўлиб қолибди. Бу, албатта, бандай мусулмонга уят. Шу гумроҳларни ўзлари йўлга солсалар, ибрат кўрсатсалар.

Мирсалим вазифаси нимадан иборат эканини тўла ва аниқ тасаввур қилолмаса-да, бундай иззату ҳурмат ва мартабадан талтайиб, миннатдорлик билан қабул этди.

— Токи йигитлар орасида мавқелари мавжуд бўлсин учун зарур унвон ҳам берурмиз,— қўшиб қўйди Али Наимхон.

Сал кундан кейин бу амал ва унвон нималиги маълум бўлди. Шу кундан бошлаб Мирсалим Мирзоҳидий «обер-мулла» унвони билан бўлинма йигитларига қайси ёнбошни босиб ётиш шаръийлигидан тортиб, қандай таҳорат олиб, беш вақт намозни қандай ўқиши гача — ҳамма-ҳаммаси ҳақида таълим беришга киришди.

Мирсалим олдинига оддийгина кўринган бу вазифанинг кунлар ўтган сари мазасига тушуниб, мартаба да-

ражасини кўтарди. Бир хонани масжид учун ажратиб олди. Унинг қибла томонига меҳроб ўйдирб; қуръондан бир байт шеър ёздириди. Аллақаердан истамбул докасини топиб, салла ўрида бошига ўраб, имомликка ўтди. Бора-бора йигитларнинг шапкасини тескари қилиб намоз ўқини ҳам ёқмай қолди. Дўппини, иложи бўлса ҳар бирининг бошида салла бўлишиниң кўнгли тусади. Болалигини эслаб, оқ картон билан тушъ топишларини буюрди. Ундан чуст дўппи ясаб, намуна қилиб кўрсатди. Гарчанд қалампир нусха гули тўйган зулукка ўхшаб қолган бўлса ҳам «дўппи — мусулмонлик рамзи» деб мақтади, ҳамманинг ўзига биттадан дўппи ясаб олишини, шу дўппи билангина намозга кириши шартлигини алоҳида таъкидлади. Эртасига ёқ бу фармойишни бажармагани, яна шапкада чиққани учун бир йигитни беш қамчи урдирди. Бошқа бирини сўз қайтаргани учун гаупваҳтага юборди. Шундай қилиб «ўз обрўйини тиклаб», ҳар ўтганида солдатларни мутеларча қўл қовуштириб турадиган қилиб олди. Бу табнатан мансабпаст Мирсалимнинг айни муддаоси эди. У ўзини сувга ташланган балиқдек эркин ҳис қилиб, эртанинг завқ-шавқи билан маст эди. У энди ғолиблар қатори Туркистонга кириб боришига шак-шубҳа қилмас эди. Ёз бўйин яхши ҳужумда борган немис армияси қиши кириши билан тўхтаб қолиши, кейин Москва остонасида пешонаси турра бўлиб чекиниши унинг кўнглига бир оз шубҳа солган бўлса ҳам, кейинчалик Али Наимхон билан бир қилган сухбатидан сўнг яна ишончини тиклаб олди. Бу орада Али Наимхон нима учундир қисқа муддат Туркияга бориб келди.

У ердан олиб келган, лупа билан ўқиладиган чўнтак қуръондан биттасини зўр ифтихор билан Мирсалимга узатди:

— Марҳамат, обер-мулла афандим, бу биздан сизга инъом!

— О, нақадар шараф бу! — Мирсалим қуръонии Али Наимхон қўлидан гарчанд кафтда йўқ бўлиб кетадиган кичкинагина бўлишга қарамасдан букилиб, икки қўллаб олди ва ўпиб пешонасига босди, аллақаёқдан кўзида ёш ҳам пайдо бўла қолди.

Обер-мулла Мирсалим Мирзоҳидий китобининг дуч келган ерини очиб, ўқимоқчи бўлгандек кўз юритди, кўзи ўтмади, ҳайрон бўлди. Али Наимхон «эй гўл, шун-

га ҳам фаҳминг етмадими?» дегандек таъна билан ишшайиб, ёрдамга келди:

— Бу, мана бундай ўқилади, афандим!— деди вақуръоннинг бир четига ингичка ишак лента билан биркитилиб қўйилган тангадек лупани олиб, сўзлар устида юритди.

— Бу мўъжиза!— яшнаб кетди Мирсалим. Хатга кўз юритди.— Жуда тиниқ кўринар экан! Қандай бежирим, ёнда олиб юрса бўлади.

— Худди шунинг учун ҳам ихчам ишланган.

— Қани ҳар йигитимизга бўттадан бўлса!

Али Наимхон индамади. Унинг қараши «мен улардан ҳезалак муллабачча эмас, солдат тайёрлайман, менинг шаъни-шукуҳим учун жон олиб-жон берадиган автомат-солдат тайёрлайман. Бу қуръону сен қилаётган ишлар ҳаммаси бир гапики нарса! Буларга менинг ўзимнинг ҳам ортиқча ихлосим йўқ» деган маънони ифодалаб турарди.

Али Наимхон легиончиларининг бир умум Ӣифилишида «турк қардошлардан» бўшашибгина салом топширди, бошқа бир нарса демади. Мирсалим бир вақт орзу қилган бу «ажойиб мамлакат» ҳақида сўраб-суриштиргиси келди-ю, ботинмади. Шунча қулай вақт қидирди— бўлмади.

Бугун эрталаб Мирсалим ҳар кунгидан ҳам барвақт туриб, казармани айланди. Эшик олдидан навбатчи легиончининг бош қийинини бир четга олиб қўйиб, мудраб ётганини кўриб жон-пони чиқиб кетди. Постда ухлаб қолгани бир айб бўлса, бош яланг ўтириши зўр гуноҳ эди. Олдига оёқ учida келиб, шарт қулоғидан олди-ю, чўзиб тортиди. Кутимаган бу даҳшатдан чўчиб уйғонган навбатчи қаршисида турган обер-мулла Мирзоҳидийни кўриб дағ-дағ титрарди. У немис командиридан ҳам бераҳм эди.

— Бу нима қилиқ, аплаҳ!— деди Мирсалим.

— Маъзур тутасиз, обер-мулла афандим, айб менда!

— Иккита совет разведкачси кириб, ҳаммани ча вақлаб кетса нима бўларди!— деди атайин баланддан келиб Мирсалим, гарчанд то бу казармага келгунича йўлда қанча соқчи борлигини у яхши билса ҳам.

Легиончи ҳамон дағ-дағ титраб, мўлтайиб турарди. Мирсалим бундоқ қараса, эндигина мўйлаби сабза урган ёшгина йигит. Агар шу оқарниб турган юзларига қон

югуриб, сал кулса борми, қиз боладек чиройли бўлади-қолади. Ахир унга ҳам бир хизматкор керак-да! Қачонгача бўлар-бўлмас ишларга ҳам ўзи югуриб, чойини ўзи дамлаб, ўрнини ўзи тузатади. Али Наимхоннинг ёнида ҳам доим мирзалик қилиб юрадиган бодомқовоқ чиройли йигитча бор.

Мирсалим шундай ширин ўйлар билан қаршисида турган легиончини яна бир бор кўздан кечирди, бирдан жиловиңи бўшатгиси келмади.

— Бунинг учун отиш керак!

Йигит йиғлаб юборди: бу ерда одам отиш ҳеч гап эмас-да!

— Афандим, афандим...

Мирсалим раҳми келгандек, оёғига ташланган йигитнинг бошига қўлинин қўйди.

— Кўз ёшинг ҳаққи, кечираман, тур. Турк боласига йиғлаш уят! Сенга ўзимнинг алоҳида хизматларим бор.

— Бош устига! Жоним билан, афандим!

Шу ондан бошлаб йигитча унинг бармоқларига боғланган визвизак бўлди: истаса айлантиради, истаса ёнига солиб қўяди. Шу кундан бошлаб Ашрафхон (у йигитнинг номи шундай эди) Мирсалим оёғини ювганда сув қушиб, ҳаммомга тушса ходимчилик қилиб, кирини ювиб, ботинкасини тозалаб, ўрнини тузатиб, чой дамлаб бериб юрди. Қилган жинояти янгилигига унча малол келмаган бу ишлар кунлар ўтган сари оғирлик қилиб, энсасини қотирди. Мирсалим Ашрафхоннинг пайига тушди. Бир куни зўрлаб олиб кириб, унча-бунча иш буюрди. Билдики, энди у билан муроса қилиб бўлмайди. Уни чиқариб юбориб, кетидан икки-уч ерини бир амаллаб кўқартирди, кийим-бошини йиртиб, орқасидан фарёд солиб югурди. Казарма дарвозасида унинг ёқасидан бўғиб ўзига суиқасд қилганини, улуғ фюрер шаънига ножӯя гаплар айтганини, қочиш ниятида ундан пул сўраб кирганини бичиб-тўқиб, қамоқقا олдириди, кейин оттириб юборди. Кўнгли тинчидан бошқа бирини кўз тагига солиб қўйди. Бу орада легионга келиб қолган Али Наимхон унинг зийраклигидан миннатдор бўлиб, кўнглини сўради:

— Шундай бўлди, афандим, сал бўлмаса лаънати бетавфиқ...

Унинг сўзини бўлди Али Наимхон:

— Олло ўзи бир сақлабди. Зийраклик ҳар вақт за-
пур, айниқса бизнинг ишда.

— Албатта, афандим, албатта.

Мирсалим бир ҳезалак легиончига буюриб тиктирган
чуст дўппини иззату икром билан Али Наимхон бошига
кйгизди.

— Бай-бай, зап ярашди, афандим!— дея нархни
кўтариб қўйди.

Аслида ярашиш у ёқда турсин, уни жуда тасқара
қилиб юборган эди. Дўппи кийишнинг ўзи ҳам Али
Наимхоннинг эсидан чиқиб кетган бўлса керак, бошида
туппа-тузук турган дўппини пешонасига суреб, худди
калнинг ўзи бўлди-қўйди. Қейин қўлига олиб, томоша
қилди, ношуд қўл тиккани кўриниб турган бўлса-да,
санъатини мақтади. Мирсалим буни қочириқ тушуниб:—
Гўзал Туркистонга муборак пойқадамлари етган куни
бир аъло дўппи биздан, афандим,— деди.

— Албатта! Албатта!— деди тамагирларча Али
Наимхон. Сўнgra дўппини катта оғзи чакаги узилган
эски кавушдек таноби қочиб турган ёнидаги хотинига
узатди. Хотин ўша хунук ишшайишда темир қанот қар-
қиноқ қўлига тушган боладек қотиб қолди. Икки-уч ай-
лантириб томоша қилди.

— Офарин! Минг офарин!— деди ўзининг лайлак уя
сочи устига дўппини қурбақасалла қилиб қўндирап
экан.— Қаёқдан олдинглар?

Али Наимхон бу тайёрланаётган совғадан ўз айғоқ-
чилари орқали аллақачон хабар топган эди. Хотинининг
«легионда ҳали шунаقا ойимқизлар ҳам борми?» деган
хаёлга боришидан андиша қилган Али Наимхон Мирса-
лимга муғамбирларча кўз қисиб, ўзи жавоб қилди:

— Анқо қуши гўзал Туркистонимиздан келтирган,
хоним афандим.

— Бўлмаса бу сизга ярашади, жаноб президент,—
деди хотини ва яна калга ўҳшатиб, эрининг бошига қўн-
қайтириб қўйди.

Али Наимхон мамнун табассумдан ўзини аранг ту-
тиб турарди.

Шу куни у Мирсалимни ўзи билан бирга овқатла-
нишга таклиф қилди. У келиб тушган мәҳмонхонада ўт-
ган бу мәҳмондорчилик Мирсалимнинг анча кўзини оч-
ди. Али Наимхон қанча «олло, худо» демасин, чўчқа
гўштидан ҳазар қилмайди, ҳаромдан қайтмайди, унда

миллий, урф-одатлардан ҳеч парса қолмаган: дастурхон устида бурнини дастрўмолчага қоқади, овқат қолдиғи устига уволдан қўрқмай папирос кули ташлайди, ерга тушган ион увоини олиб қўймайди. Ўрнига дам олгани чўзилар экан, оёқ панжалари орасига бармоқларини солиб кирини уқалади, кейин тишига кириб қолган гўшт толасини ўша қўли билан олиб ташлади. «Гўзал Туркистон» ҳақида фикри ҳам жуда ғалати. У ердагиларнинг барчаси аҳмоқ, нодон, гумроҳу, бефаҳм, фақат ўзигина маърифат олиб борадиган кўринади. У бормагунча Туркистоннинг ҳусни очилмайди! У ўзини қанча фуқаро-парвар тутишга уринмасин, шиша орқасига чироқ шуъласини яшириб бўлмаганидек, унинг худбинлиги, шуҳратпастлиги, тезроқ Туркистон тахтига ўтириш учун ичикиб ўлаётгани, бағритош, бераҳмлиги яққол кўриниб турарди.

— Қилич бир қонга беланиши шарт, акс ҳолда Туркистон тўғри йўлга тушиб ололмайди,— деди у ётган ерида сигара тутатар экан, бошланган сухбатни давом эттириб.— Давлатни бошқарадиган кишилар шу ердан бориши керак. Қилич кесмаганин сўз кесниши лозим. Биз учун ҳазрат Гитлердан ортиқ меҳрибон йўқ. У киши Туркистонни яхши кўрадилар. Фюрернинг музaffer қўшини Туркистон дарвозаларига етиб бориши билан у ёғини ўзимизнинг йигитлар сурисиб кетади. Бунинг учун ҳам ташқаридан, ҳам ичкаридан тайёр бўлиб туришимиз шарт. Шундай эмасми, Мирзоҳидий афандим.

— Албатта!— тасдиқлади, у гарчанд винодан боши ғувиллаб гапнинг мағзига тушунмаган бўлса ҳам.

— Эҳтимол, сизга масъулиятли вазифалар юклашга тўғри келиб қолади. Барчасига ҳозир турмоқ ҳам қарз, ҳам фарз.

Гап Туркистонга борганда бериладиган лавозим ҳақида боряпти, деб лабининг таноби қочган Мирсалим, қуллуқ қилиб:

— Сиз нимани маъқул топсангиз шу!— деди.

— Қани энди барча ҳам сизга ўхшаб зарбу шижоат билан ғайрат камарини боғласа!

Эртасига Али Наймхон уни ўзи билан Берлинга олиб кетди. Етиб боришган куни тушгача уни ўз машинасида шаҳар айлантириди, томоша қилдирди. Ярим яланғоч чиройли қизлар саҳнchasида рақс тушиб турган муҳташам бир ресторонда овқатланишди. Рақс тугагач, Али

Наимхонинг ишораси билан оркестр «Қичқир, хўрозим» кўйини чалди, ўзи хиргойи қилди. Мирсалим ўзи яхши кўрган, кўнгли хушнуд бўлиб турганда хиргойи қиладиган ашулани Али Наимхон ҳам ёқтиришини кўриб ичидан офтоб чиқиб кетди. Мароқланиб қўшилди. Куй тугагач, Али Наимхон керилиб қўйди:

- Ўзим ўргатганман.
- Ўзингиз нима чаласиз? — жуда қизиқди Мирсалим.
- Най. Болалигимда сал-пал машқ қилган эдим.

Сиз-чи?

Мирсалим дутор, танбур чалишни пеш қилгиси келиб турса ҳам, шу онда ботинолмади:

- Бир оз танбурга ҳавасим бор.

— Биз ҳам Туркистонда мана шунаقا нозанинлар ўйин тушадиган ресторонлар ташкил қиласиз, албатта ташкил этамиз.

— Ҳа, ростанам, бояги гапнингиз чала қолди, — деди Мирсалим йўлдаги суҳбатни эслаб, — кўп хотинлик масаласида ўз фикрингизни айтмоқчи эдингиз!

— Модомики, шариат йўлини тутмоқчи эканмиз, бир эркакка тўрт хотингача ижозат берамиз. Бошқа илож йўқ.

— Демак учта запасим Туркистонда денг, — тиржайди Мирсалим. Али Наимхон уни маъқуллагандек кулиб қўйди.

Овқатдан кейин у Мирсалимни қаватини санаб улгурмаган кўп қаватли қоп-қора бинонинг дабдабали бир хонасига олиб кирди.

Эшикдан кирган заҳоти Али Наимхон «Хайл Гитлер!» дея олдинга қўлини узатган эди, қаршидан худди шуңдай ҳаракат билан бир ҳарбий киши чиқиб келди. Анчадан бери қўли ўрганиб қолган Мирсалим ҳам буни такрорлади ва кабинетга кўз ташлади. Шер панжали катта стол. Усти тўла телефон. Девор остларида чиройли стуллар. Тўрда Гитлернинг жуда катта сурати. Ўнинг ўнг томонидаги деворда Гиммлерники, лекин у кичикроқ. Паркет полга патгилам тўшалган. Хуллас, кабинет жуда ҳашаматли.

Улар кабинет эгаси — чигирткадек кам гўшт, бурнига пенсне қистирган, ялтироқ этикли кишининг таклифи билан ўтиришди. Али Наимхон у билан немисчалашиб кетди. Легионга келганидан бери немис тилини ўрганишга астойдил киришган Мирсалим уича-мунча тушу-

ниб турарди. Гап Мирсалимнинг кёлажаги ҳақида борарди.

— Шу киши жуда боп. Синалган ва тажрибали,— деди Али Наимхон.— Айниқса ислом динига ижозат берилган ҳозирги Туркистон учун бу кишининг диндан хабардорлиги жуда қўл келади.

Немис Али Наимхонга қаттиқ ишонганиданми ёки Мирсалимга ўхшаганлар билан учрашавериб, пих ёрганиданми, ортиқча гапни чўзмай:

— Яхши!— деди ва кнопкa босиб, одам чақирди. Мирсалимни кирган кишига топшира туриб:— Қисқа муддатликка!— деб уқтириди.

Шу кундан бошлаб Мирсалимга жосуслик таълими ўргатилиб, Ўрта Осиё шаҳарларидан бирига юбориш тайёрлиги кўрила бошлади.

9. СЎНГГИ ШУБҲА, СЎНГГИ ТАШВИШ

Содиқ, дўсти Шубинни санбатда кўриб чиқиб келарди. У «узоқлашиб кетсан ўз полкимни йўқотиб қўяман», деб госпиталга кетишга рози бўлмаган, бунинг устига яраси ҳам унчалик оғир эмас эди. Содиқ ўтган гал келганида «орденингни тақиб келмабсан-да, ярашган ярашмаганини айтиб берардим» деб тегишган, «бир савлат тўкиб келишини» илтимос қилган эди. Ҳали ўзиники қўлига тегмаганидан ҳаваси келяптими (унинг тузалиб чиқишини кутиб туришарди), майли тақсам тақиб келай, ҳарна кўнгли кўтарилигани. «Кўнгли кўтариқлиникнинг дарди тез арийди, дейишади» деган хаёл билан бугун Содиқ жанговар Қизил Байроқ орденини тақиб келган эди. Унинг кўкрагига кўплар суқланиб қараган, ҳатто баъзи тафсилотларини суриштирган, фахрланса арзигудек мукофот бўлса ҳам бари бир Содиқнинг дили равшан эмас, кўнглининг аллақаери хира тортиб, аллақаери ҳувиллаб турарди. Чунки бу зўр мукофотга сабаб бўлган воқеа қанчалик унинг обрўйини оширган бўлса, шунчалик ташвишга ҳам солиб қўйган эди. Сурати газетада чиқиб, қандайдир оператив ходим суриштириб кетганидан бери ўз қилмиши ўзига аён. Содиқ ўйлаб ўйига, юриб ўйлига етолмас эди. Шундан бери ҳаловати кетган, чақирилмаган ерга меҳмонга келган кишидек ўзини ноxуш ҳис қиласарди, ранги рўйн ҳам ўзгарган бўлса керак, ўртоқлари «Сенга мукофот ёқма-

ди!»— деб тегишарди. У, ўша кўнгилсиз хабарни взвод командиридан эшитган туни деярли киприк қоқмади. Ётган ери тош битиб икки-уч ташқарига чиқиб келди. Ертўла оғзида турган аскардан тамаки сўраб, кафтига олиб чекди, то бармоғи куйгунча сўриб чекди. Қейин окопдан чиқариб ташланган нам тупроқ устида ҳулкар оғишига, юлдузлар учишига қараб ўтириди. Тун жимжит. Гир атрофда на йилт этган бир чироқ бор, на қилт этган ҳаракат. Дараҳтлардан тушган соялар олабужир, мудҳиш ва сирли. Фақат немис кузатувчисининг баъзан-баъзан отиб турган ёруғ мушаги борлиқни қоплаган қора пардани бирдан кўтариб, бир зумгина яна алланечук совуқ кўриниш кашф этади. Ана ўшандай мушакдан бири камалак каби доира ясаб, нурли из қолдирганча кўйка вижиллаб кўтарилиди, кейин пақ этиб товуш берди-да, ҳамма ёқни тиник ёритди ва шўнғиб кетди. Содиқ унинг ёруғида кундузи отишма бўлиб ўтган, кўзига хунук кўринган қонли оралиққа назар ташлади. У ер ҳозир қанчалик тинч. Кундузи у ерда юзлаб мина ёрилганига, минглаб ўқлар учганига ҳозир киши ишонмайди. Бу соқинлик эмас, ҳатто кундузги ажал ҳиди келиб турган отишмалар ҳам шу лаҳзада унинг диққатини тортмади. Ҳаммасига қўл силтагандек беларво ўрнидан туриб, кириб ётди. Барибир уйқуси келмади. Шу кечаси унинг ўйламаган ўйи, тузмаган режаси қолмади. Демак оперативчилар унинг пайига тушган. Эртами-индин келиб, ҳайдаб олиб кетади. Яна тергов, яна суд. Бу сафар албатта суд қилиншади, ўтган галдагидек «максус кенгаш» орқасидан ҳукм чиқариб қўя қолмайди. Бу гал суд учун материал етарли. Яна ўша занглаган тикан симли лагерь. Конвой билан ишга бориши. Ишдан қайтиш. Эрксизлик. Яна уфқда йилт этган нури йўқ ҳаёт...

Содиқ эркин ҳаётнинг энди таъмига тушуниб, қоясига кўтарилиган сор бургутдек парвоз қила бошлаган бир пайтда яна лагерга қайтишининг оғирлиги учунгина эмас, балки элу юрт тақдирни жанг майдонида ҳал бўлаётган бир вақтда оёқ-қўли боғлиқ кишидек ёки қўлидан бирон тузук иш келмайдиган ногирон-мушфиқдек лагерда ўтиришига асти чидамас эди! У, бу гал ўзини маҳбусликдан қочган кишидек айбдор ҳисобларди. Бу гуноҳнинг кечирилмаслигини биларди, биларди-ю, ич-ичидан куйибёнарди. Ахир у бу гуноҳи содир бўлгунча бутун вужуди билан ўзини бегуноҳ ҳис этиб, истаган ташкилоти ва

кишисига мурожаат этишга маънавий эркинилк сезарди. Энди-чи? Энди унинг тили қисиқ. Энди унинг бу тарихини билган киши ҳеч ёнига тушмайди. Эҳ, қани ўша одамлар ҳаётида бўладиган нуқсону тасодифлардан қўрқмаса-ю, кишининг юрагига, ишу идрокига қулоқ солса. Эҳ, кўкси сўқирлик кўзи сўқирликтан қанчалик ёмон! Шунча ажойиб машиналар кашф этган доно одамлар нега кишининг юрагини, фикру эътиқодини рўйирост кўрсатадиган, аниқлаб берадиган бирорта асбоб ўйлаб тополмайдилар! Ана шунда қандай яхши бўларди. Терговчилар ҳам қаршисига турғизиб қўйиб, «қани кимсан, нимасан, юрагингни очиб ташла!» деб қон бўлиб ўтирмас эди. Ана ўша машинага рўпарў қиларди-ю, ҳаммасини биларди-оларди.

Содиқ сой устига ташланган яккачўп «қўлбола» кўприкка келганда, нима учундир, ундан ўтишга оёғи тортмади, кўнгли алланечук бўлиб, сув ёқасига ўтиреди. Назарида, шу «қўлбола» кўприк афсонадаги пулсиrotу, унинг устидан ўтиши тақдирини ҳал қиладигандай эди.

Содиқнинг кўнглига шундай шубҳа тушувига жиндай сабаб ҳам бор эди. Сойнинг у соҳилида штаб ўрнашган бўлиб, уни зимдан суриштириб келган оперативчилар ўша ерда эди. Содиқ у соҳилдаги ёғоч уйларга назар ташлади: уни суриштириб келган ва бугун-эрта олдига солиб ҳайдаб келадиган оперативчи қайси бирида яшаркан? Анави тунукаси кўкка бўялганидами ёки бўсағасидаги йўғон эманга болалар қушга тахта уя қўйганидами? Эҳтимол усти қамиш билан ёпилганидадир! Йўқ, улар бу уйларнинг ҳеч бирида турмайди. Уларга алоҳида пухта ертўлалар қазишган — ахир маҳфий ҳужжатлар шундай омонат, бир бомба билан дабдала бўладиган уйларда сақланармиди! Демак улар хавфсиз ерларда яшашади. Ана шундай хавфсиз ертўлалардан бирида унинг ҳам янги очилган делоси сақланади. Ўнда нималар ёзилганикин? Эҳтимол, улар Содиқни бундан бехабар деб ўйлашса керак. Бўлмаса нега шунча вақтдан бери индашмайди. Ёки лагерга хат ёзиб, аниқлашаётганмикин? Шундай бўлса керак, акс ҳолда, аллақачон унинг оёғини ерга тегизмай олиб кетишарди. Ёки «қочган билан сичқон уясини ижарага олиб, бир ковакда тиқилиб ўтирмабдику! Жонини фидо қилиб жанг майдонида юрибди. Ёмон инияти бўлганда шу вақтгача ошкор бўлиб қоларди. Соғ бир совет граждани бўлса, шунчалик бўлар-да! Келинг,

уни безовта қилмайлик. Нотўғри ишлар қилиб қўймаслик учун зимдан кузатиб турсак кифоя» деган фикрга келишганмикин? Қани энди шундай бўлса! Майли, истаганларича текширишсин, астар-аврамни ағдаришсин, кузатишсин, лекин эркимни қайтиб олишмаса, кўп қатори гражданлик бурчимни шу фронтда оқлашга рухсат беришса, бас! Менинг шундан бошқа олий орзум йўқ!

Бу ўйлар сув ёқасида хомуш ўтирган Содиқни бирдан жонлантириб юборди, туман босган тоғдек кўнглига нур тўлдирди, руҳини кўтарди, ҳатто бояги мудҳиш ўйларга борган ўзи эканига шубҳаланиб қўйди. Демак энди уни қамашмайди, унинг гуноҳини кечишган, у кўп қатори бехавотир жанг қила бериши мумкин.

Содиқ иргиб ўрнидан турди. Сувни шалоплатиб юзини ювди, гўё сув билан унинг кўнглига ўтирган гард ҳам ювилиб кетгандек енгил тортди. Шу пайт ўзидан сал нарида, сувдан чиққан барғи қалин ўтга бир оёғини тираб турган қурбақага кўзи тушди, унга гап қотди:

— Шунаقا ишлар, оғайни, энди яна фрицнинг онасини учқўрғондан кўрсатамиз. То чиққан ковагига қўйиб келмасак асти ҳисобмас. У ҳали чучварани хом санаб, сичқон бўлиб, филга ташланиб юрибди.

Қурбақа унинг сўзига тушунаётгандек бўртиб чиққан йирик кўзини бир-иққи пирпиратди, оппоқ бағбақасини серкиллатиб, бесўнақай катта оғзини очиб ёпди.

— Нима, сенинг ҳам юрагингда армонинг борми? Ким сени безовта қиляпти? Сен ҳам туҳматга йўлиққан-мисан? Бечора! Сабр қил, ҳаётдан умидингни узмасанг бас. Ҳақиқат ўз ўрнини топади. Лекин унинг кўп вақт поездга ўхшаб кечикиб келиш одати бор. Шуниси ёмон! Майли, эзгуликнинг эрта-кечи йўқ. Яна яйраб қоласан. Мен ҳам ўз уйимга, бола-чақам олдига кетаман. Биласанми, менинг ерга урсанг кўкка сакрагудай шўх ўғлим бор. Сенга ўхшаб у ҳам сувни яхши кўради. Эртаю кеч сувдан чиқмас эмиш. Қоғоз қайиқлар оқизармиш. Уша ариқда сенинг элатлариниг бордир. Қайтиб борганимда сендан уларга салом айтами? Албатта айтаман, кўнглинг тўқ бўлсин.

Қурбақа «яхши, бу олижаноблигингни сира эсимдан чиқармайман. Раҳмат! Хайр!» дегандек яна чақчайган кўзларини пирпиратиб, оппоқ бағбақасини серкиллатди, кейин «шўлп» этиб сувга шўнгигиб кетди. Содиқ меҳрибон сұхбатдошидан ногоҳ ажралган кишидек қўл

силкиб, кузатиб қолди. Содиқ, қурбақага юрагида йифи-лиц өтган дардини тўкиб соганидан бўлса керак, боягидан ҳам хурсанд, ҳалигина ҳаммомдан чиққан кишиндек руҳи жуда енгил эди. У қирғоқдаги оқ қайиннинг жигар ранг чивифини синдириб олди, ўйин қилиб этиги қўнжига урганича «қўлбола» кўприкдан ўтди. Ҳалиги таниш қурбақа яна сувдан чиқиб уни кузатиб тургандек орқасига қараб, боя шўйниб кетган ерни кузатди, Қурбақа кўринмас эди, у оёғини қўйиб турган новча ўт эса, майин тўлқинга эргашиб силкинарди.

Содиқ папирос чекиб келаётган аскарни кўриб, қўнгли суст кетди, чекадиган одамдек хумори тутди.

— Бир чектирмайсизми, биродар?— деди у етиб келиши билан.

— Шу қолганини беришим мумкин,— деди аскар, лекин уни ҳам дарров бера қолмай босиб-босиб икки-уч тортди. Содиқ шунга ҳам рози бўлиб туар экан, аскар унинг кўкрагидаги орденни кўриб қолди, бирдан ўзгариб:

— Кечирасиз, мен бошқа бераман,— деди ва чўнта гидан катта бир чимдим олиб, қофоз билан узатди,— мен сизни танимабман. Немис миномётчиларининг таъзирини берган сиз бўласиз-а! Жуда қойил қилибсиз! Комиссар кеча партия мажлисида сизни гапирди. Партиясиз экансиз-а?

«Партиясиз экансиз» сўзи Содиқнинг қулоғига алла-печук эшитилиб, тамаки берган аскар кўздан ғойиб бўлганича ҳам қулоғи остида янграб турди. Тўғриси, таънага ўхшаб эшитилди. Наҳотки у партиясиз! Ноҳақ қамалгани қамалган, наҳотки партиядан ўчганича қолиб кетаверади!

У, шу муносабат билан батальон комиссарининг тунов кунги суҳбатини эслади. У ҳам Содиқни партиясиз ҳисоблаб, «Сиздақаларнинг ўрни партияда!»— деганди. Бечора, билмайдики, унинг стажи ўзиниқидан кам эмас. Шундай бўлса ҳам Содиқ: «Анча тайёрлик кўриш керак»,— деган баҳона билан орқага силтади. Комиссар: «Албатта тайёрланинг. Битта тавсияни ўзим бераман»,— деганича кетди. Содиқ эса, ёлғон гапирганидан яна виждони бешбаттар қийпалганича қолаверди. Бир хаёл билан комиссарга ҳаммасини очиб ташлагиси келди, лекин унинг оқибатидан юраги чўчили: оперативчилар уни бошқа бир иш юзасидан суриштириб юрган бўлса буни эшишиб, панд бериб қўйишмасин. Комиссарининг ўртага ту-

шишга, ажратиб олишга қурби етадими? Етмай қолса нима бўлади? Йўқ, яна бир оз сабр қилиш керак. Чўнтағидаги партбилет эмас, виждан инобат, виждоним коммунистик бўлса бас-да!

Худди шу пайт кўк тунука уйлар томонда бетартиб отишма бошланиб қолди. Содиқ ўқлар товушига қулоқ солиб, немис автоматини дарров таниди. «Ие, немис автоматчиларими?» дея ҳаёлини йиғиб олгунича, унинг қаршисидан бир тўда жангчилар елиб келаверди. Содиқ бундоқ қараса, энг олдинда полк комиссари, қўлида яланғоч тўппонча. Содиқ қаршисига чиқиб «нима гап ўзи, демасданоқ, комиссар: «Десант! Немис десанти!»— деди-ю, елиб ўтиб кетди. Содиқ унинг ҳаракатидан билдики, немис штабни бирдан босиб олиш ниятида тўсатдан қандайдир десант ташлаган. Десант кечикиб пайқалган, акс ҳолда комиссар бунчалик шошиб, ўзи шу атрофдаги жангчиларни бошлаб, ҳужумга оғланиб қолмас эди. «Ие, мен бу ерда нима қилиб турибман», деб қараб қолган Содиқ, автоматини елкасидан олиб, комиссарнинг ёнига ўтди. Улар бораётган ер майда ўрмонлик бўлиб, йирик дараҳтлардан бачкасан, майда шохобчалиги кўп эди. Бу майда новдалар гоҳ юзга, гоҳ кўзга шарт-шарт урилиб, юришга халақит берарди, йўлни ўзгартириб туришни талаб этарди. Комиссарнинг бошлаб боришига қараганда улар мўлжалига етолмай ўрмонга, унинг ёнидаги паст-баландликка чекинган десантнинг ёнидан чиқишилари керак эди. Худди шундай бўлиб чиқди. Комиссар немис десантлари кўриниши билан бенжозат битта ҳам ўқ узмасликни алоҳида тайинлаб, эмаклаб олдинга сурилишга буйруқ берди, ўзи олдинга тушди. Ёши анчага бориб қолган, кўзойнаксиз ёмон кўрадиган комиссарнинг бунчалик эпчилик билан қорнида сурилиб кетишини кўриб Содиқ ажабланди, умр бўйи шуни машқ қилган кишига ўхшарди. У анча ергача шу хилда боргач, тўхтади. Угирилиб орқасига қаради. Жангчиларнинг ҳаммаси етиб келишини кутиб турди, кейин ўрнидан иргиб туриб, «Ватан учун, олға!» деганича олдинга ташланди. Ҳамма «ура!» билан унга эргашди. Отишма бирдан қизиб кетди. Буларнинг муваффақиятли маневридан руҳланиб кетган қаршидаги штабчилар ҳам ёпирилиб келди. Икки томонидан қуршаб олинган немис десанти жон-жаҳди билан қаршилик кўрсатарди. Аслида унинг

бошқа иложи ҳам йўқ эди. Бу пайтда улар таслим бўлишни ҳали ўзига ор бвлар, ўз кучига ҳаддан ортиқ бинс қўйинб гожлик билан қаршилик кўрсатар, яраланса ҳам, охирги патронгача отишар эди.

Жанг қизигандан-қизиб борди. Содиқнинг иккиси кўзи комиссарда эди. У, шундай жанговар тўқнашувларга жангчи бошлаб кириб юрган командирдай зийраклик ва идрок билан ўз тўдасини йўлга солиб турар, нишон олиб тўппончасидан ўқ узарди. Ана, у тўппончасида ўқ тугаб қолганини тепкисини бир-икки босганидан кейингина фаҳмлаб, уни қинига солди-ю, ҳалигина йиқилган жангчининг автоматини қўлидан олди, гужанак бўлиб чекиниб бораётган десант кетидан йиқила-кўпа ўқ узди. У терлаб кетган, гимнастёркасининг бир енги тирсагигача йиртилган эди.

Содиқ комиссардан кўзини узмай, унинг ёнида душманга ўқ ёғдириб борар экан, ўзидан анча нарнида бир командирнинг уч-тўртта немис автоматчиси қаршиненда ёлғиз қолганини, ҳали-замон нобуд бўлиши мумкинлигини фаҳмлаб ўзини ўша томонга урди. Содиқ етиб келганда командир паноҳ тутиб турган тепалик орқасидан сапчиб чиқиб, немисларга ташланди, иккитасини ўқ билан йиқитиб учинчисини босиб тушди, бир-бирини ағанатишиб олиша кетди. Елиб келганидан командир нафаси тиқилиб, энтикиб қолдими ёки барзангидай немисга чоғи келмадими, ҳадеганда остига тушганича чиқиб ололмади, то Содиқ улар тепасига етиб келгунича уддалолмади. Қўтосдай немис эса, бирратўласи уни бир ёқлик қилиб қўя қолиш ниятида қўлидан учиб кетган автоматига зўр бериб интиларди. Шунинг устига етиб келган Содиқ фрицнинг бошига автоматнинг қўндоғи билан бирни тушириб, уни суплайтириди-да, командирнинг устидан суриб олиб ташлади. Ҳамон ўзини ўнглаб ололмаган, усти боши қон командирни кўриб, Содиқ девор бўлиб қолди. Уз кўзларига ишонмади, мудҳиш туш кўраётгандек сесканди. Неиложки, туш эмас, ўнги эди. У бир зумгина жанг майдонида эканини унугтиб, турган ерида ўтириб қолди. Командир эса, ётган еридан зўрга туриб ўтириди. У яраланган эди.

— Раҳмат! Сиз етиб келмаганингизда... бу фриц бошимни ерди,— деди ҳолдан толган командир бўшашиб, Содиқнинг эса тили сўзга келмас эди!

Бу командир — Содиқнинг терговчиси Чуханов эди. Чуханов Содиқнинг қайси аҳволдалигини билиб турганиданми, очигина кўчди:

— Мен сизни таниб турибман. Сиз ҳам мени танилингиз, албатта. Мени ўлимдан қутқариб қолганингизга жилла ҳам хурсанд бўлмасангиз керак. Шундай масми?

Содиқ уни эшитмас, унинг қулоғи аллақачон том битиб қолган, кўзлари бир нуқтага қадалиб, хаёли мудҳиш камерада, бир маҳал тергов берган номерли хоналарда сарсари бўлиб кезиб юради. У энди ўзининг адойи тамом бўлганига шубҳа қилмас эди. Ахир у Чухановнинг қанақалигини яхши билади. Ахир шу қаршисида ўтирган ярадор ўша ўзи билган Чуханов бўладиган бўлса, унинг қўлидан нималар келиши маълум! Ахир энди уни кўраётгани йўқ!

Содиқ, бўлар иш бўлди, деб таваккал билан тик боқиб:

— Таниб турибман! — деди. Лекин уни ўлимдан қутқариб қолганига қандай муносабатда эканини айтмади. Бу эса, Чухановга ғалати таъсири қилди, очик айтиб қўя қолди:

— Ўлимдан қутқариб қолганингизга пушаймонингиз бўлса, отиб ташлашингиз мумкин. Бу тўполонда ҳеч ким билмайди. Бемалол!

Бу гап Содиқнинг нафсониятига теккан, ҳатто ғазабини келтирган эди, чидаб туролмади, у ҳам очигина кўчди:

— Сиз мени ким деб ўйласангиз ўйланг, лекин мени ҳақорат қилманг. Мен фронтга сизни учратиб, ўчилиш ниятида келган эмасман. Гарчанд тасодиф билан фронтга тушган бўлсан ҳам.

Чуханов унинг қизишиб бораётганини қўриб, жўрттага ҳазил билан қистирди:

— Диловархўжа босмачини отиб ташлаганингиз ҳам тўғри.

— Бу ҳам тўғри! — ҳамон ёниб тутақар эди Содиқ. — Хўш, айтинг, энди нима қил дейсиз? Қуролимни ташлаб, лагерга қайтиб кетайми? Шуми муддаонглар!

— Бирор сизни лагерга қайting деётгани йўқ. Агар қайтарадиган бўлсак, аллақачон ўша ерда бўлардингиз,— босиқлик билан деди Чуханов.

— Бўлмаса нега орқамдан сурншгириб юрибсизлар?

— Бу бошқа гап. Сурнштирганимиз тўғри. Сурнштирилдиқ, билдик, муҳокама қилди.

— Кейин... кейин... нима қарорга келдинглар?—шошиб қолди Содиқ. Боя сув бўйнда кўнглига севинч солган хаёл ҳақиқатга айланадек кўзлари чақнаб кетди, илк марта Чухановнинг кўзига кўзини уришириб, тик қаради. Чуханов бўлса, мурдага ҳаёт инъом қилаётган кишидек мамиун кулиб туради.

— Индамай қўйганимиздан кейин нима қарорга келганимиз ўз-ўзидан маълум.

— Демак гуноҳимни кечдинглар?

— Биз кечганимиз йўқ, ўзингиз гуноҳингиз йўқлигини исбот этдингиз.

— Яъни?

— Кўкрагингиздаги орденни нимага олган бўлсангиз, ўша билан!

Содиқ кўкрагидаги орденни энди биринчи марта кўраётган кишидек унга суқланиб боқди, унинг нақадар кўркам ва салобатли эканини энди фаҳмлагандек бўлди, чанг ўтиргандек устини артиб қўйди. Шундан кейингина Чухановнинг яраланиб ётганини эслаб, кўмак бермоқчи бўлиб чўнтагидан шахсий тиббий пакетини олган эди, Чуханов:

— Ўзимники бор,— деди.

Чуханов ўнг кўкрагининг тепароғи — елкага яқин еридан ўқ еган, ўқ ичкарида қолибди. Содиқ унинг гимнастёркасининг олдини шарт йиртиб ташлаб, яра оғзига пахта қўйиб, докасини елкаси оша икки айлантирган эди, узоқлашиб кетган отишма бирдан яқинлашиб қолди, қандайдир ўқ үлар тепасидаги қарағайнинг кўмкўк шохини ширт узиб туширди. Яна иккитаси шу атрофда чатнади.

— Қани туринг, четроқча ўтмасак бўлмайдиганга ўхшайди,— деди Чуханов ва Содиқнинг елкасига қўлини қўйиб ўрнидан турди. Содиқ доканинг учини ушлаганича уни суяб борди. Улар панароқ ерга ўтиришди. Содиқ ярани боғлаб бўлгач, ачингандек:

— Ўқ ичидা қолибди,— деб қўйди.

— Ҳеч нарса қилмайди, магнит билан тортиб олишади,— деди Чуханов жилмайиб. Содиқ бу гапнинг чинми, ҳазилми эканини билмади.

Бир оздан кейин отишма тугади. Қирилиб битгандан

қолган немис десатчи-автоматчиларини ҳайдаб олиб ўтиб кетишиди. Чуханов Содиқга суюниб санбатга борар экан, юрагини очди:

— Кўчкоров! Бошқа кўришамизми, йўқми — билмайман. Шунинг учун сизга бир ҳақиқатни айтмоқчиман. Мен сизни қаттиққўллик билан ўша вақтда тергов қилган эканман — бу тўғри. Хафа бўлишга ҳаққингиз бор. Лекин шуни унумтсангки, мен сизни душман деб, душманга қилинадиган муомалада бўлганман. Бу менинг бурчим эди.

— Қизиқ. Туҳмат бўлса ҳам-а!

— Бу сиз учун, бошидан кечирган киши учун қизиқ, холос. Ахир биз уч кишининг гувоҳлигига қандай қилинб ишонмаймиз. Лекин баъзан шубҳаланардим ҳам... Ўша суратингиз чиққан куни яна шубҳам ошди, биз қилган хатони қандайдир бир мўъжиза йўли билан тузатаётганингизни билдим. Чунки сиз биз айблаган киши бўлганингизда фронтга эмас, бошқа ёқقا йўл олган бўлардингиз, бирор хилватда Гитлернинг ғалабасини кутиб, унинг тани-жони соғлигини тилаган бўлардингиз. Фронтга йўл олишингизнинг ўзи кифоя қилгани ҳолда, яна жонбозлик кўрсатиб жанг қиляпсиз. Буларнинг ҳаммаси бизга маълум бўлганидан кейин хатомизнинг нақадар қўпол эканига иқрор бўлиб, сизни безовта қилмасликка қарор қилдик. Лекин сизнинг барча кузатувимиздан хабар топишингиз қизиқ. Бу сир қолиши керак эди. Сизга ким айтди?

— Бу сир,— кулди Содиқ.— Кечирасиз, айттолмайман, беодоблик бўлади.

— Энди аҳамияти йўқ, майли,— уни хижолатдан чиқарди Чуханов. Кейин барча гапига якун ясагандек,— мана шунаقا гаплар, ўртоқ Содиқ Кўчкорович Кўчкоров! — деди. Бир оздан кейин яна қўшиб қўйди: — Энди нима ёрдам керак бўлса, марҳамат.

Содиқ шу кунгача нафрат билан эслаб юрган одамининг юрагида шунча самимий гаплари боридан жуда ҳайратда эди. Унинг елкасига қўлини қўйиб, қоқилиб кетса яраси зирқираб келаётган Чуханов, у билган, уни бир неча кунлаб қаттиққўллик билан тергов қилган Чухановга сира ўхшамас, Содиқ уни қанча ўхшатишга ҳаракат қилса ҳам, ўхшатолмас эди. Ана шунда, наҳот одамнинг қалбида шунча эзгу ҳислари ётиб ана ўшандай ташқи кўриниш билан яшай олса! Ё хизматлари

шунга мажбур этадими деб ўйлади. Бир томондан унга раҳми ҳам келди — демак уларга ҳам енгил эмас экан.

Булардан ташқари, Содиқнинг ўз дарди ҳам унинг юрагини тирнарди-ю, очилиб гапиришга нимадандир хавфсиарди. Шундай бўлса ҳам учини чиқаришга мажбур бўлди:

— Биласизми, менинг ҳужжатларим ҳали чатоқ. Шуни бир ёқлиқ қилиш керак эди.

— Биламан. Партия масалангиз ҳам.— Шунда Чуҳановнинг юзида бирдан табассум пайдо бўлди, ҳазил қилди.— Партияга кирмоқчи бўлсангиз иккинчи тавсияни мен беришим мумкин.

— Шундан ҳам хабардормисиз?— деди Содиқ комиссарнинг «партияга биринчи тавсияни ўзим бераман» деганини эслаб.

— Ҳа, бўлмасам-чи! Овқатни қайси жағингизда чайнашингиздан тортиб, чўнталингизда бир украин ўртоғингизнинг ёдгор тамаки тўрvasи борлигигача биламиз!

Содиқ ўзининг элакдан роса ўтказилганига энди сира ҳам шубҳа қилмади. Бу эса унга бемалол гаплаша бериш ҳуқуқини берди. Яна ҳалиги илтимосини такрорлади.

— Очигини айтайми сизга? Бу масала ҳозирча мурракаб, ўзининг оғиздан ўлжасини қайтариб олишдек хавфли. Кўп жойларга ёзиш керак. Бирорта калтабин яна халақит бериб қўйиши, ишнинг пачавасини чиқариши мумкин. Бунинг ҳозирча аҳамияти ҳам йўқ. Виждингиз пок. Қийналаётганингиз йўқ.

— Шундай бўлса ҳам...

— Бу тўғри. Лекин кейинроқ тўғрилаш енгил бўлади. Уруш бир оз олдинга босиб, енгишимиз ҳаммага ошкор бўлсин. Ҳозир алғов-далғовроқ.

Содиқ «қўлбола» кўпридан ўтишгач, бир оз дам олишга таклиф этди. Чуҳанов қаршилик билдирамади. Ендан тамаки чиқариб ўради, Содиқقا ҳам тутди:

— Раҳмат, чекмайман.

— Чекардингиз-ку.

— Диққинафаслигимдан баъзан чекиб қўяман.

— Энди-чи?— боя йўлда кулганига ўхшаб жилмайди Чуҳанов.

— Энди зарурат йўқ.

— Ундаи бўлса жуда хурсандман. Кераги йўқ, чекманг!

Чуханов папирос тутатди, Содиқ боя ўтирган ерига бориб, сувга қаради. Таниш қурбақани излади. Нариги соҳилда турган бир қурбақани кўриб қолди. «Ўшамикин?» деди-ю, термилиб қолди. Унинг оппоқ бағбақаси чиройли кўриниб кетди, бағбақаси эмас, ҳатто ўзи ҳам эски қадрдондек меҳрини тортди. У билан юрагини очиб суҳбатлашгани эсига келди-ю, Чухановдан ийманиб, унга:

— Қурбақа ҳам қизиқ махлуқ: эртаю кеч сувда. Музлаб кетмагани! — деди.

Унинг кўзига фақат қурбақа эмас, қирғоқдаги анави тош ҳам, пўрсилдоқ сассиқ ўтлар ҳам, сийрак булатли кўкка учларини найза қилиб санчиб турган анави қарафай, оқ қайин, эман, арча ҳам, кишилар оёғи остида эзила бериб кукун бўлиб кетган қумлар ҳам — ҳамма-ҳаммаси ҳозир жозибадор бўлиб, ўзгача ҳусну латофат кашф этиб кўринарди...

...У шу кечаси биринчи марта оёғини бемалол узатиб ётди.

10 СИНОВ ДАҚИҚАЛАРИ

Қодир эрталаб кўзини очса, баракнинг ҳидига туриб бўлмайди. Бу аччиқ ва қўланса ҳиднинг ифлос кийимбош, бир қанча вақтдан бери ювнимаган бадандан чиққан тер, қони оқиб ётган яралар осталариға солинган пичан чириги ва яна алланимабалолардан мураккаб топганини у яхши биларди. Айниқса, ғалаён қилган лагердан келтирилганлар қўшилганидан кейин жуда ҳам сасиб кетди.

Қодир турли алфозда ғужанак бўлиб ётган одамлар орасидан ўтиб, иложи бўлмаганида устидан ҳатлаб ташқарига чиқди. «Эҳ, тоза ҳаво, бор экансан-ку» дегандек, чуқур нафас олиб, бурун катаклари керилди. «Шу пайт битта папирос бўлармиди?» деган фикр кўнглига келди. Унинг эрталаб чекиш одати бор эди. Узига ўҳшаб тоза ҳавога чиқиб, тўдалашиб юрган кишиларга кўз ташлади: қани бирортаси чекаётган бўлса, уят бўлса ҳам сўрарди, таги билан эмас, бир тортиб бериш учун сўрарди! Иўқ, ҳеч ким чекмаяпти! Шу пайт, худди унинг ғашига тегишини ният қилгандек бир немис солдати чекиб ўтиб қолди. Папирос унинг кўзига шунаقا чиройли кўриниб, тутуни димоғига шунаقا хуш ёқдики,

кўзи тиниб кетди! Бундоқ ўйласа, бу яқин бир ой ичида чекмаган эди. Немис, Қодирнинг кўнгли папиросга суст кетиб турганини сездими ёки одатдаги «эрмак»ларидан бирини қилгиси келиб қолдими, икки қадам бурилиб, чекиб турган сигаретини қаттиқ бир тортди-да, итга суяк ташлагандек ерга ирғитди.

— Ол!— деди масхаралаб Қодирга.

Қодирнинг қанчалик чеккиси келиб турмасин, «оф-зинг тўла қон бўлса ҳам душманинг олдида туфурма», деган хаёл билан ўзини тийиб:

— Раҳмат! Чекмайман!— деди.

— Чекишингни биламан. Ол! Сенга нозни ким қўйибди! Ўлиб турибсан-ку. Ол!— немис қўнжи калта этигининг учи билан сигаретани унга яқин сурди.

— Сарқит чекмайман! Гадой эмасман!

Немис истеҳзо билан қаҳ-қаҳ уриб ёнига қўл солди, сигарета олиб, масхаралаб узатди.

— Бутунини чекасизми! Билмабман, хах-хах-ха. Совет кишисиман денг. Гурурим баланд денг!

Қодир билмади: «ҳа, совет кишисиман, нима дейсан!» дегандан кейин бир мушт солиб, немисни ағдардими, ёки ағдаргандан кейин шунаقا дедими, бир вақт эси ўзига келиб, бундоқ қараса, бегона бир баракининг даҳлизида турибди. Орқасига ўгирилиб, немис йиқилган ерда олағовур кўтарилиганини кўрди. «Бир оз босилсин!» деганича шошиб ўзини баракка олар экан, эшик орқасидаги юмшоқ бир нарсага оёғи тегиб кетди, ундан чўчиб устидан ҳатлаган эди, умбалоқ ошиб кетишига сал қолди. Эшик орқасида ётган ўлик эди. Унинг устида қандайдир жонли нарсалар ўрмалашиб юради. Қодир уларнинг каламуш эканини дарров пайқади, чунки уларнинг барагида ҳам кечалари чийиллаб уйқу бермас эди.

Қодир тимирскилаб ердан тош топиб, каламушларга отган эди, у бориб мурданинг юзига «шалоп» этиб тушкиди. Бу товуш Қодирни шунчалик даҳшатга солдики, додлаб эшикка чиқиб кетганини ўзи билмай қолди. Бунинг олдида немисга тарсаки соглани ҳеч гап эмас эди...

Шу куни кечқурун текширишда етти киши етмади.

— Улар қани?— деди лагерь фельдфебели асиirlардан танлаб «капо»— кузатувчи қилиб қўйган ўз кишисига.

«Капо» унинг олдига итоаткорона югуриб бориб доклад қилди:

— Ўлган.

— Ўлган бўлса нима қилиш керак эди! Ё ҳар куни эслатиб туриш шартми!

— Йўқ, шарт эмас, жаноб фельдфебель! Ҳозир!

Югурдак «Сен! Сен! Сен!» деб беш-олти кишини сафдан олиб, чопиб кетди. Салдан кейин ўликларни бараклардан судраб чиқиб, фельдфебелнинг оёғи остига, саф олдига қатор қилиб ётқизиб қўйди. Қодир уларга боқиб «отган тошим башарасига тушгани қайси бири экан? Ҳа, анависи бўлса керак, қулоғини каламуш кемириб кетибди-ку» деб хижолат тортиб ачинди.

Ҳисоб тўғри чиқди. Саф тарқатилди.

Қодир шу кечаси «немис эртага таниб қолса нима қиласман?» деган ташвишда эмас, мурдага қилган беодблигидан даҳшатга тушиб ухлолмади.

* * *

Қодир умрида кўрмаган бир қуш келиб улар ўтирган ердаги баракнинг чети нураб кетган томига қўнди, ундан ниманидир чўқиб, тикка кўтарилди, қатор-қатор тикан симлар, унинг ёнида турган автоматчиларнинг устидан бемалол учиб ўтиб, кўздан ғойиб бўлди.

Қодирнинг унга ҳаваси келди: шу қушчà ҳам бахти йўқ. Шу қушга айланишга рози эди.

Уни кузатиб турган Пушкарёв:

— Одам бахтли бўлиши учун кўп нарса керак эмас, шундаймасми, Қодир? — деб қўйди.

— Албатта. Масалан, менга ҳеч нарса бермасин, ҳеч нарса демасину, фақат ўз ҳолимга қўйиб берса бас. Тўғри дарвозага борсам, уни очсан, ундан чиқиб кетаверсам, кетаверсам.

— Кейин нима қилардинги? — унинг соддалигидан жилмайди Пушкарёв.

— Кейин нима қилардим? Жангга кирардим, душман енгилгач, маза қилиб яшардим.

— Тўғри, Қодир, бир инсонча яшадан яхши нарса йўқ. Менимча, ҳар одам ўз тақдири билан дунёга келади. Бирор умри бўйи эзгу ишдан бошқани билмайди, унча кўзга ҳам ташланмайди.

— Кузда, хазончинак пайтида қалин барглар орасида қолган тўппидек беҳига ўхшаб, — гап қистирди Қодир.

— Беҳи ўсган боғларни тоза соғинибсиз-а?

— Соғинмай бўладими, айниқса мана бу жаҳаннамда. Очиғини айтсан, соғиниш нималигини энди билдим. Киши қанчалик оғир кунда қолса-ю, узоқ кетса, шунда қаттиқ соғинар экан. Эҳ!

— Бу тўғри,— деди Пушкарёв асл мавзуга қайтиб,— баъзи одам эса, умрида бир марта, фақат бир мартагина рўйирост туриб «олға!» дейиш учун туғилади, узоқ ҳам яшамайди. Модомики, шундай экан, умрнинг узунқисқаси йўқ. Дунёга келиб, бир шамча ялт этиб кетган умр умрми? Одамдан «Қанча яшадинг?» деб эмас, «Дунёга келиб нима қилдинг?» деб сўраш тўғри бўлади. Бирор бутун бир китоб ёзади...

— Бошқа бирор «шип» этган товуш эшилса, кирпига ўхшаб бошини ичига олиб яшайди,— унинг сўзини оғиздан олди Қодир.— Эҳ, ҳаёт, ҳаёт! Нақадар мураккаб нарса! Мен шу ҳаёт китобига бир вергул қўёлсан жон дердим.

— Ҳали вергул эмас, бутун-бутун сўзлар ёзасиз. Ҳали сизга аталган ишнинг бирорта қати ҳам бузилгани йўқ.

Буларнинг шундай жаҳаннамда ўтириб, баҳор чечакларнинг иси билан маст бўлаётганларидан кулгиси қистаган Мўрдахай «буларнинг эси жойидами?» дегандек бир-бир кўздан кечириб, бўйнини қичиди. Бу гаплар унга эртак бўлиб туюлди. У, шу кунлари жуда забун юради, озиб-тўзиб кетган эди, бошини титроқ чолдай лиқиллатиб:

— Мен ташқарини ўйламай қўйдим. Қорим тўйиб турса бўлгани эди,— деди.

— Қоринг тўйиб турса бўлдими?— кесатди Қодир.

— Бошқа нима илож бор? Қочганларни кўряпсиз-ку, отиб, оғифидан судраб келишяпти.

— Уша ҳам ўлими олдидан бир неча минут бўлса-да, эркин нафас олиб қоляпти. Ўзингни тут, Мўрдахай!

— Ичи тўла заҳар бўлгандан кейин косаси олтин бўлди нима-ю, сопол бўлди нима, Қодиржон ака, барни бир эмасми!— Мўрдахай маъюс бир қарааш қилиб, дўстларини менсимагандек туриб кетди. Бу Қодирга алам қилди.

— Бўлмаса легионга ёзилинг, усингиз бутун, қоринингиз тўқ бўлади.

— Нега мен ёзилишим керак экан? Сиз-чи? Сиз не-
га ёзилмайсиз!

— Чунки мен сизга ўхшаб қорним ғамига тушиб қол-
ганим йўқ.

— Қорним ғамига тушганим хоинлик қиласман дега-
ним эмас. Сиз мени яхши билмас экансиз. Акангиз сизга
уйда қанақа тарбия берган бўлса, менга мактабда шу-
нақа таълим берган.

Бу кутилмаган жавобдан Қодирнинг нафаси ичига
тушиб кетди. Пушкарёв ҳам «кераги йўқ, тортишманг»
дегандек унинг тирсагини тутди. Мўрдахай жадаллаб
юриб кетди. Орқасидан Пушкарёв:

— Мана бу узоққа бормайди,— деди.

— Сабаб?

— Қорни ташвишига тушган узоққа бормайди. Бу
ерда қорин ғами билан эмас, қадр ғами билан яшаш
керак. Ҳаёт ишончини, эркинлик ишончини йўқотмаслик
керак. Йисон ўзи ўйлаганидан кўра, бардошли ва қуд-
ратли. Бундан ўз ўрнида фойдаланиш учун эса, юрак
ва ишонч керак. Яна бир-икки ой ўтсин, ўзингиз билиб
қоласиз.

— Яна бир-икки ой? Наҳотки!

Пушкарёв кеча қошиқ сопидан цементга едиреб қи-
линган «қўлбола» устарада олинган, бир неча ери ке-
силган оқ-сариқ юзини йилтиллатиб жилмайди.

— Ҳа, эртага қўйиб юборади, деб ўйлайсизми?

Қодир эрта-индин қўйиб юборилишини ўйламаса
ҳам, бу ҳаётнинг яна бир неча ой чўзилиши мумкинлиги-
дан ваҳимага тушди, бирдан тутақиб кетди:

— Йўқ-йўқ! Яхиси ўзимни ўлдираман!

Кўпни кўрган бу ёши улуғ Пушкарёв Қодирнинг бо-
лалигидан кулди.

— Бу мардлик эмас. Мана бу бадбахт ҳаётдан омон
чикиш, кейин яшаш ва курашиш мардлик.

У синовчан кўзлари билан кузатиб турар экан, Қо-
дир у кутган жавобни қилди:

— Буни қаранг,— тиканли симларни кўрсатиб тўрт
томонга аланглади Қодир,— қуш бўлиб учиб ўтмасанг ..
Йўқ, илож йўқ!

— Гап шунда-да! Иложи бор!— товушини пасайти-
риб қулогига деди Пушкарёв.

— Иложи бор?

— Ҳа.

— Мен тайёрман.

— Тайёрман, дейишнинг ўзи етмайди, тайёрланиш керак.

Қодир тушунмади.

— Қандай тайёрланиш керак?

— Фақат сизу мен билан иш битмайди-да. Тўнғизни фоз ўқи билан отиб бўладими?

Қодир фаҳмлади, кўплашмаса бу зулм тошини кўтариб бўлмайди.

— Мен розиман. Қани, нима қил, дейсиз?

Пушкарёв Қодир тобига келганлигига қаноат ҳосил қилди, шунча вақт уни кузатиб чакки қилмапти, энди унга ишонса бўлади. Лагерда олиб борилаётган яширин ишдан уни хабардор қилди, лекин ҳеч кимнинг номини тилга олмади.

— Сиз биласиз вассалом, бошқа билан ишингиз йўқ. Мен эса сизга ишонаман.

— Раҳмат! — Қодирнинг қоронғи дунёси ёришиб кетди, лабининг таноби қочди.— Энди бу иш қачон бўлади?

— Тайёрлик кўришимизга боғлиқ. Лекин сизни огоҳлантириб қўйишим керак: тунов кундаги сингари қизишиб, немисни тарсакилаб юришни энди қўйинг, бефойда, тошга сув сепгандай ўзингизга саҳрайди.

Қодир хижолат тортиб, ўзини оқламоқчи бўлди:

— Қишини масхаралагандан кейин...

— Масхаралаш? Отиб ташлаганда қўлингиздан нима келарди. Яхшиям тополмади!

Қодир бошини қўйи солди.

— Гап шундай, дўстим, булар барчаси беҳуда уринишлар, бирлашиб, тагидан қўпориш керак. Шундай қилиш керакки, зилзиласи Гитлернинг уйқусини қочирсин! Қелишдикми?

— Келишдик.

— Ҳа, ростданам, бирортаси гапга солса, оғзингиздан гуллаб қўйманг тағин. Патриот ниқобидаги иғворлар ҳам бор-а бу ерда.

— Хотиржам бўлинг!

Қодир бу томондан қўнгли тинчиб, бир неча кундан берни юрагини ғаш қилиб келаётган бир саволни унга берди:

— Тунов куни келган Али Наимхон ким? У қаёқдан Гитлер билан тил топишиб олибди?

— Пес билан пес қоронғида топишар, деган мақсат бор-ку, худди шунинг ўзи. Бир маҳал Германияга ўқишига келиб, қолиб кетган савдогар боласи, ватанфуруш. Энди Гитлернинг тувагини ялаб юрибди.

Али Наимхоннинг қилмиши эмас, товушининг ҳам хунуклиги Қодирнинг эсига тушди, ифлос нарса босиб олгандек кўнгли беҳузур бўлиб кетди:

— Ватан, ватандошлар, эмиш! Қайси қўйган устуnung учун жонинг ачииди! Уялмагани!

Пушкарёв яна таъкидлади:

— Гап шу, ўртоқ Қўчқоров!

— Албатта, ўртоқ Пушкарёв! Үлмоқ бор, қайтмоқ йўқ!

Қодирнинг хаёли баҳор қушлариdek чаман кезиб кетди. Кўз олдига Азиза келди. «Қани энди у юрган кўчадан яна бир юрсам, у узган гулдан ҳидласам, у чанқоғини босган ариқдан бир ҳовуч сув исчам, у севги уфурган ҳаводан кўксим тўлиб нафас олсан. Майли эди шундан кейин ўлсан, ўлдирсалар! Йўқ, шундан кейин ҳаётнинг қадрига етиб яшасам, маза қилиб яшасам. Яшшим керак!»

Пушкарёв Қодирга топшириқ бериб, барак орқасига ўтиши билан, уни бир «капо» тўхтатди. «Оббо, лаънати, бутун гапимизни эшишиб турган экан шекилли» деб у ўзини қаршилик кўрсатишга тайёрлаб улгурмай «капо» гап бошлади:

— Мен сиз билан очиқчасига гаплашмоқчиман. Ростини айтсам, сиз жуда қалтис иш тутяпсиз. Эҳтиёт билан иш кўраётганга ўхшайсизу, ҳаммаси сезилиб турибди. Мана ҳозир шу қорача йигит билан учрашувингизни олайлик. Нима гаплашганингизни эшитмаган бўлсан ҳам, билиб турибман.

— Нима гапиришибмиз? Ҳеч нарса гаплашганимиз йўқ!

— Ўзингизни гўлликка солманг! Ҳаммасини биламан: кеча оқсоқ украин билан кўришганингиз-чи! Анави пучуқ казак-чи! Тунда бурни катта арманини нимага четга олиб ўтдингиз. Тунов куни нега бошқа баракда ётиб қолдингиз? Ёнингиздагилар ким эди. Барчаси кафтимда.

Буни Пушкарёв кутмаган эди. У шак келтиролмаса ҳам, иқор бўлиши мумкин эмас эди. Бу хилдаги курашни ўзига касб қилиб олган кишиларга хос ирода ва ма-

тонат билан сира пинагини бузмади. Бундай кишилар өгилмайди, тик турганича йиқилади.

— Мени ким биландир адаштиряпсиз,— деди хотиржам.

— Сизнинг бу хотиржамлигингиз мени ажаблантирмайди, чунки сизнинг кимлигингизни биламан, жуда яхши биламан, ўртоқ чекист! Ҳозир гап бунда эмас, бошқа ёқда! Сиз мени сотқин ҳисоблайсиз. Бир томондан бу тўғри. Менинг вазифамни бажариш ўзи хоинлик. Лекин мен хоинманмий? Бу бошқа масала! Мен сиз билан бирга бўлмоқчиман. Ишонасизми?

Бу учрашув оқибати бундай кескин тус олиши Пушкарёв учун сира кутилмаган янгилик эди! У чексиз хаёл тўғонида қолиб кетди: бу ким? Уз қилмишидан пушаймон кишими ёки ифвогарми? Ифвогар бўлса ҳамма нарсада́н хабардор экан, нега энди унинг ўзига айтиб ўтирибди? Ўзини бир кўрсатиб олиб, кейин хўжайинларига хабар бермоқчими? Ёки шу атрофдаги яширин партия ташкилотининг топшириғи билан лагерда ишлаётган одамми? Унда бундай қўйол бир йўл билан алоқа боғлашининг қанчалик зарури бор? Е жони шириналлик қилиб қолган қўрқоқми?

Ишқилиб, Пушкарёв қанча уринмасин, унинг кимлигини тушуниб етмади. Лекин бир нарса аниқ эди: агар у чиндан ҳам ифвогар бўлса, уюштирилаётган қочишни барбод қилиш учун етарли маълумотга эга. Демак шундай экан, ортиқча ўтиришнинг ҳожати йўқ. Пушкарёв шарт кесди:

— Борди-ю, сизга ишонсак нима нафингиз тегади?

— Бу сизнинг қобилиятнингизга боғлиқ! Мен лагерь корчалонлари қўйнига узатилган қўлингиз бўла оламан. Истасангиз юрагини, истасангиз жигарини суғуриб бераман.

Бу ўта ботирлик Пушкарёвни яна чўчитди: ё у чиндан ҳам довюрак ёки сояси юпқа чиранчиқ.

— Майли,— деди у,— эртага қош қорайганда еттинчи барак орқасида учрашамиз.

— Хўп!—«Қапо» хайрлашмасдан жўнаб кетди. Нарироқ бориб ҳуштак билан қандайдир куйни хиргойи қилгани эштилди. У жуда бепарво бораради.

Пушкарёвнинг эртагача ваъдалашибдан мақсади шундай эди: эртагача ҳамфирлари билан маслаҳатлашади, агар қочишни уюштираётган яширин қўмита унга ишонса-ю, хўп-хўп, ишонмаса унда нима бўлади?

Беш кишилик қўмита шу куни кечаси ва эрталаб узоқ маслаҳатлашди: бир фикрга келишнинг иложи бўлмади: ҳаммадан ҳам «капо»нинг олтин тоғ ваъда қилиши, тили ботирлиги уларни эҳтиёт бўлишга ундарди. Шунда бирдан Қодирни иккита немис аскари келиб олиб кетганини эшитиб қолдилар.

— Тамом! Извогар экан ў! — деди бири.

— Агар извогар бўлса мендан бошлиши керак эди,— деди Пушкарёв.

— Сабр қил, сен билан менга ҳам навбат келиб қолади.

— Қизиқ, нега Қодирдан бошлиши? — тушунмас эди Пушкарёв.

— Чунки у орқали калавани чувалатиш енгилроқ бўлса керак,— деди кеча «капо» тилга олган казак.

— Қечирасиз! Қодир унча-мунча тошда чақиладиган ёнғоқ эмас! — қатъий деди Пушкарёв.

— Мана энди маълум бўлади,— гапга аралашди «капо» тилга олганлардан бири — арманийигит.

— Агар ўша менга учрашган «капо» хабар берган бўлса, Қодирдан сўраб ўтиришнинг ҳожати йўқ. У ҳаммани билар экан. Қодир ёлғиз менингни сотиши мумкин.

Пушкарёвнинг шу сўзидан кейин ҳеч ким ҳеч нарса демади. Ҳамма ўз фикри-ўйи билан бўлиб қолди.

— Тўдалашиб, хаёл суриб ўтиришимиздан фойда йўқ. Қани бир қарорга келайлик! — деди ташаббус кўрсатиб Пушкарёв.

— Бу хилда ўтиришимиз бўлса, қидириб юришмасдан ҳаммамизни шу ерда босиб олиб қўя қолишлари турган гап,— бошини кўтариб деди казак.

Қарор Қодирнинг иши бир ёқлик бўлгунича йиғилиш-маслик, «капо»ни эса бўғиб ташлаш бўлди. Бу ишга киши тайинланди. Лекин бир маҳал ўлимга ҳукм қилинган «капо»нинг ўзи Пушкарёвни қидириб, баракка келиб қолди. Уни кўриши билан Пушкарёв «ҳа, ифлос, мени олиб кетиш учун одам бошлаб келяпсанми?» деб кўнглидан ўтказгунча, у жуда эҳтиётлик билан бир четга ишора қилди. Пушкарёв «бўлар иш бўлди — энди очик гаплаша бериш керак», деб кўрсатган томонга ўтиши билан «капо»:

— Қодирнинг ишидан хавотирланманглар,— деди ва тафсилотини айтмасдан бепарво юриш қилиб чиқиб кет-

ди. Пушкарёв суриштиришга улгурмади, кишилар хала-
қыт берди.

Пушкарёв бу хабардан ҳайрон бўлганича қолаверди. Ҳамфирларига маълум қилди. Улар яна ишонишмади. Ҳамма нарсани яна бирор кишининг лагердан турмага олиниши ҳал қиласди. Агар «капо»нинг қўли бўлса, у билган кишилардан бирортаси бугун-эрта қўлга олиниши керак эди. Кечгача ҳеч қандай ҳодиса содир бўлмади. Қош қорайиб келарди. Тайнинланган кишилар «капо» билан ваъдалашилган ерга келса, уни нобуд қилиб қўйишлари мумкин эди. «Эҳтимол у иғвогар эмасдир!»— шундай фикрга келган Пушкарёв шерикларига учрашди, қарор ижросини орқага суришни маслаҳат кўрди:

— Чиндан ҳам иғвогар бўлса-ку хўп-хўп, бир эмас, минг бор ўлдирсанг ҳам оз. Борди-ю... йўқ, ўртоқлар, яхши ўйлаш керак. Унинг бизга кўп фойдаси тегиши мумкин.

— Пушкарёв, сен бу мулоҳазаларинг билан ҳаммамизни қопқон бир-бир оёғимиздан қисгуңча сабр қила-
диганга ўхшайсан. Мен бу фикрингга қўшилмайман. Биздан биттамизни олдими, иложи бор экан, биз ҳам биттасининг бошини еймиз,— деди казак.

— Сеники жуда христианчасига-я: тиш учун тиш, бош учун бош!— ҳазилга олди Пушкарёв.

— Қандай тушунсанг, шундай тушунавер! Лекин мен душманга шафқат қилолмайман!

— Бу шафқат эмас, эҳтиёткорлик, дўстим! Бегуноҳ чиқиб қолса, айт-чи, кейин виждонинг қийналмайдими?

— Бегуноҳ бўлса «капо»лик қиладими! Қўйсанг-чи?!

— Бу менинг фикрим холос. Яна кўпчилик билади.

Кўпчилик ҳукмни икки кун орқага сурди. Бугунги учрашувга Пушкарёвнинг ўзи борадиган бўлди. Қодирнинг нимага турмага олинганини, ўзини қандай тутаёт-
ганини билишни унга топшириқ қилиб беради.

Бир жиҳати бу «капо» учун синов — тақдирини ҳал қиласди.

* * *

Қодирнинг қўлга тушиши қизиқ бўлди.

Қодир, қизнинг ўзидан ҳам хаёли ширин бўлар экан,
деб кўнглида Азизани ўйлаб, қуёшдан кўзини пана қилиб ёнбошлаб ўтирган эди, бирдан кимдир:

— Тур, камарни еч,— деб қолди.

Юзига ташлаб қўйган рўмолчасини олиб, тепасида турган немис фельдфебелининг ўзини кўрди Кундан-кун дармонсизланиб бораётган тиззаларини қирсиллатиб ўрнидан турди. Фельдфебель унинг кир бўлиб кетган гимнастёркасининг этагини кўтариб, шимини тутиб турган энлик камарни кўрсадти.

— Чиқар!— деди яна.

Қодир дарров фаҳмлади: фельдфебельни камар эмас, унинг тўқасидаги қизил аскар рамзи бўлган беш қиррали юлдуз бетинч қиляпти. Пушкарёвнинг «энди қизишиб иш тутманг» деган насиҳати эсига тушиб, камарни чиқариб бермоқчи ҳам бўлди-ю, шимининг тушиб кетишини ўйлаб хаёллаб қолди. Лагернинг ҳокими мутлақ хўжайнини фельдфебелга шунинг ўзи етиб ортарди. У тутақиб кетди. Бир тарсаки туширди, сўкинди. Қодирнинг тарсаки зарбидан кўз олди чақнаб кетган бўлса ҳам, Пушкарёвнинг танбеҳини эслаб, индамади, ноилож беш қиррали юлдуз қадалган қизил аскар камарини чиқариб берди. Лекин фельдфебель, айтган заҳоти чиқариб бермаганиданми ёки ўзининг итлиги тутдими, иккита кишисини чақириб, уни бериб юборди. Қетидан ўзи бориб:

— Нима учун қизил юлдуз олиб юрганингни биламан. Яна кимларда бор?!— деб дағдаға қилди. Қодир бўш келган сари ошиб кетаверди, яна бир-икки уриб қолди. Шунда Қодирнинг сабри тугаб, нималардир деб бақирди, сўкди, турмага тушди.

Турма лагердақ девор билан ажралган бўлиб, лагерь ва кўча томондан эшиги бор. Бу ерда девори қалин, поли цемент қоронғи ва зах камералар бир талай. Шулардан бирига Қодирни киритиб, устидан шарақлатиб қалин тахтадан бўлган, қўш қулфли эшигини ёпдилар. Қодир бу турма ҳақида аввал эшитган — унинг тирик мозор эканини биларди. Шундай бўлса ҳам, ортиқча қўрқмади, «битта камар учун отиб ташламасалар керак, ахир» деган умид билан қоронғи ва каталак камеранинг бир четига, цемент полга ўтирди. Камерада на каравот, на табуретка бор эди. Фақат бурчакдан, тўпнинг оғзицек туйнукдан ёруғ тушиб турарди, у ёруғнинг ҳам ярмини темир панжараси бўғиб қоларди. «Панжара тутмаса, бу ердан одам қуш бўлиб учиб чиқиб кетадими?» деб ўйлади у. То зах цемент ҳиди келиб турган мудҳиш бу хонанинг қоронғисига ўргангунича кўп вақт кўзини

юмъаб турди. Аста-секин кўзи кўникан сари бу камера-нинг даҳшати очила борди: деворлари доф-дуғ, қолган қон излари, шифтнинг бурчакларини ўргимчак уяси босган. Полидан муз чиқади, бирпас ўтириши билан бутун баданини совуқ қоплади. Кейин туриб юришга мажбур бўлди. Унинг нима қилаётганини кузатаётгандек эшикдаги тия кўэидек тешикдан кимдир тез-тез қараб турарди.

Ана шуларнинг ҳаммасини аниқ кўриб, тасаввур қилгандан кейин, Қодирни ваҳима босди: арзимаган бир иш учун шундай жойга ташлаган фельдфебель нега отиб юбориши мумкинмас? Ким ундан ҳисоб олади-ю, кимдан у ҳайқади!

Эртаси тушгача Қодирнинг бор-йўғини ҳеч ким суриштирамади. На бир бурда нон бор, на бир қошиқ сув, фақат тунда бир-биридан тўрт энлик олисликда ёнма-эн михланган тахта-шита узатдилар. Шунинг устида ётди. Ётиш қаёқда, ағанаб чиқди. Тахтанинг қаттиқлигидан эмас, камеранинг захлигидан, тақдери қоронгилигидан кўзига уйқу келмади.

Эртасига тўйнукдан тушган ёруғдан кун ёришганини сезиб ўтирган эди, бирдан қўш қулфли эшик даранглаб қолди. Уни олиб чиқиб кетдилар. «Яна қаёқка олиб борадилар?» деб юрак ўйноғи бўлиб борган Қодир, беш минут ўтмай, ўзини ўша фельдфебель билан яна бир СС офицери ҳузурида кўрди. Русчани унча-мунча билган фельфебель СС офицерининг сўроқларини яримта-юримта қилиб таржима қилиб турди. Берилган саволларнинг юлдузли камарга алоқаси йўқ эди. Офицер жуда баланддан келарди:

— Лагерда сенинг нима иш қилишингни биламиз. Агар ўзинг иқрор бўлиб, шерикларингни ҳам номма-ном айтиб берсанг ҳаётингни сақлаб қоламиз. Истасанг Туркистон легионига юборамиз.

Қодир аввалига чўчиб тушди: кўз олдига Пушкарёв келди. Наҳотки булар ҳаммасидан хабардор? Агар билса, нега энди мендан суриштириб ўтиради? Билмайди. Билса бундай қилмас эди. Менинг нимамга жони ачиди. Булар қоронғи уйда тахмин билан тош отиб юрибди.

Шу ишонч унга куч бағишилади ва ўзининг ўлимдан хабари бор, аммо бундай «аҳмоқлик»лардан мутлақо бехабар қилиб кўрсатди. Офицер бари бир унга ишонмади, конкрет сўроққа кўчди:

— Анави рус тунов куни сенга нима деди?

Қодирнинг юраги шифиллаб кетди:

- Қайси рус?
- Ўзингни гўлликка солма, офтобда учрашганинг.
- Эсимда йўқ. Ҳеч ким билан учрашмадим. Қимни кўрибман?

Бирдан унинг қулоги тагига шапалоқ тушиб қолди:

- Нега ёлғон гапирасан. Мана бу нима?— у сурат кўрсатди. Унда Қодир Пушкарёв билан ёнма-ён туарди.

— Мана бу-чи?— яна бирини узатди.

Мана энди сени қўлга туширдим деб қибрланиб турган офицер, Қодирнинг жавобидан бешбаттар тутоқиб кетди.

Қодир эса, суратни кўриши билан «бу фақат сурат, сўзимизни қаёқдан билади. Шу билмаганидан мени тергаяяти-да, акс ҳолда, унинг оёғини ерга тегизмай олиб келарди. Демак, бу ёғи менга боғлиқ. «Эй қалбим, энди менин бўл, тилларим тош қот! Үлсанг ўлу, лекин сиринг ичингда қолсин» деган фикр билан жавоб қайтарди.

— Ҳа, буми, бир маҳал бизнинг томонларда бўлган экан, ҳозир ўзгариб кетгандир деб сўраётган эди.

— Яна нима деди?

— Ҳеч нарса.

— Исми нима экан? Қизил Армияда ким бўлган экан?

— Бунисини айтмади, мен ҳам суриштирганим йўқ. Унинг исмини билганим билан қорним тўярмиди.

— Қорнингни тўйғизсак, билиб берасанми?

— Айтармиди? Айтмайди. Бу ердаги одамлар пишиқ экан.

Унинг соддалиги офицерга ёқди, мағрур жилмайди, фельдфебель билан кўз уриштириб олди:

— Биз ёрдам берамиз.

— Уддалолмасман... Уддалолмайман! Бекорга айғоқчи деб ўлдириб қўйишиади.

— Жонинг шунаقا ширинми?

— Кимнииг жони ширин эмас. Қари онам бор...

— Ҳа, балли, ўша қари онангни кўргинг келса, биз билан ишлашинг керак. Устинг бутун бўлмаса ҳам, қорнинг тўқ юришига кафилмиз.

— Йўқ. Қўлимдан келмайди, уддалолмайман.

— Очликдан ўлиб кетасан-ку, бу ҳолда.

Қодир «бошқа қандай иложим бор?» дегандек ел-

касини маъюс қисди. Шунинг устига тунов куни Пушкарёвни тўхтатиб, ўз хизматларини таклиф этган «капо» эшик тақиллатиб, кириб қолди. У эгилиб салом берди, лекин офицер ҳам, фельдфебель ҳам менсимагандек сал бош иргаб қўя қолди.

— Демак, сен советлар келиб, озод қилишидан умидворсан, ҳа, қизил шайтон!— Офицер яна қутура бошлади. Унинг энгаҳидан кўтариб қўйди,— бўлмаса нега очдан ўлишга розисану, биз билан ишлашмайсан?..

— Қўлимдан келмайди,— яна бўшашиб жавоб қилди Қодир.

— Келади! Келтирамиз. Рози бўлсанг бас.

Бу гал Қодир индамади. Тўғриси, нима деб жавоб қилишни билмасди. Яна ўша жавобни қайтариш қутурган ит оғзига қўл тиқиш эди.

Офицер унинг оғзини пойлаб турди, ҳадеганда жавоб бўлавермагач:

— Хўш, нима дейсан?— деди сабри тугаб.

Қодир жўрттага яна бўшашибди, «йўқ, қилмайман» дейишга ботинмай ётиғи билан:

— Қилолмайман, уддалолмайман,— деди.

— Уддалайсан!!

— Йўқ.

— Қиласан!

— Йўқ!

Ана шундан сўнгра Қодир етти ухлаб тушига кирмаган қийноқни кўрди. Уни бегона қўрага кирган дайди итдек уриб-суриб қўшни хонага олиб чиқдилар, бир сёғига арқон солиб, шифтдаги ҳалқага осиб қўйдилар. Бутун еган-ичгани оғзига келиб, оёғидан ушлаб, бозордан олиб келинаётган жўжакахўрöz қанотидек қўллари шалвираб, анча вақт қолиб кетди. Бу орада офицер шошмасдан битта сигарета чекди. Алланима ҳақида «капо» билан немисчалашди, фельдфебель қаёққадир чиқиб келди. Яна папирос тутатиб чиқиб кетди. Кейин офицер «капо»га немисчалаб гапирди, у Қодирга таржима қилиб бериб турди. Савол яна бошидан бошланди: «Анави рус сенга нималар деди? Ниманинг режасини туздиларинг? У қасрда ишлаган экан? Биз билан ишлашга рози бўласанми-йўқми?

Қодир тушундики, жавоб бериш бефойда. Модомики, ўзига маълум сирни очмоқчи эмас, улар билан ишлаш нияти йўқ экан, ҳар қандай жавоб фақат ортиқча калтак.

ва ҳақорат учун восита бўлиши мумкин. У индамади. Назарида оёғи узилиб кетаётгана ўхшарди. «Икки оёғимдан осганда ҳам бунчалик бўлмасдим» деган хаёл билан тишини тишига қўйди. Аввал тўпифи, кейин тиззасининг кўзи, ундан кейин бели кесак бўлди, сезиш ҳиссини йўқотди. Бора-бора икки қўли ҳам ўзига оғирлик қилиб қолди, қўлтигининг ости зирқиради, томонғига нафаси тиқилиб, кўз олдини туман босиб келди. Худди шу пайтда офицернинг:

— Хўш, ўйлаб бўлдингми? — деган товуши аранг қулоғига кирди. Салдан кейин ўйлаш эмас, эшитишдан ҳам қолди: қулоғи том битиб, кўз олдини тун қоронғилиги босди.

У ҳушига келганда бошқа бир камерада ётарди. Бу ер аввалгисидан сал катта бўлиб, иккита занг босган каравот ҳам қўйилган эди. Биттасида ётган одам у кўзинни очиши билан ўрнидан туриб, саломлашди. Нимага қамалганини сўраб, ўзиникини айтиб берди. Шу билан камерада одатда бўладиган дастлабки сухбат тугади. Салдан кейин у одамни олиб чиқиб кетдилар. Туни билан қайтмади. Эрталаб:

— Гитлерни кўмишга чиқдим. Мендан бошқа ҳеч ким йўқ, оёғидан судраб кўмиб келдим,— деб қаҳ-қаҳ солиб кириб келди. Куни билан кулгидан тўхтамади. Туйнукдан тушиб турган ёруғга қараб, қушга ўхшаб талпинди, каравоти устига чиқиб сакради. Жим қолди. Яна қаҳ-қаҳ урди. Камерада Қодир борини пайқамади ҳам. Ўзи билан ўзи сервар бўлиб, кунни ўтказди. Кечга яқин олиб чиқиб кетдилар, бошқа қайтмади.

У жинни бўлиб қолган, уни отиб ташлаган эдилар.

Қодирнинг унга раҳми келиб, ўз тақдиридан ваҳимага тушди: мен ҳам жинни бўлиб қолмасам!

Эртасига бу даҳшатли ваҳимадан қутилиб, камерага «қўнинкан»дек бўлди. Уни кўздан кечирди: аввалгисидан сал ёруғ. Ташқаридан сал-пал товуш ҳам эшитилади. Бу товуш қулоғига илк бор кирганда бағрини тилиб кетди: инсон товушининг бунчалик ҳаётбахш эканини энди туйгандек эди. Чанқоқ киши сувга ёпишгандек қўлинин ҳовув қилиб, ташқарига қулоқ солди, лекин товуш келарди-ю, уни англаб бўлмас эди. Бу ҳам бора-бора жонига тегди. Камера деворларини «томоша» қиласётуб, бирдан чумчуқ қўзидек ковакдан бир нарсанинг чиқиб турганини пайқаб қолди. Гавҳарга йўлиқдан га-

дойдек энтикиб, уни тортиб олди. У ҳимарилган қофоз эди. Бу қафтдек қофозга хат ёзилганини ёруғга солган-дагина билди ва ўқиди:

«Бу ерда сиёҳ йўқлигидан қоним билан гугурт чўпида ёзяпман. Мен оддий совет кишисиман. Маслагим йўлида ҳалок бўляпман! Қалбим тинч. Хайр, дўстлар! Биз енгамиз! А. Овчаренко».

Бу хат унга бир олам куч-қувват баҳш этди.

* * *

Пушкарёв, умуман қочишни уюштирувчи яширин қўмита Қодирдан кейин ҳеч кимни немислар безовта қилмаганидан ҳайратда эди. Мана бугун бешинчи кун. Уни кузатиш учун топшириқ олган «капо» ҳам еттинчи барак орқасида ўша бир учрашгандан кейин лагерь зонасида кўринмай қолди. Бу яна қизиқ эди.

Бу жумбоқ қўмитанинг қўлинни боғлаб қўйган эди. Агар шу ҳодиса рўй бермаса ёки «капо» орага тушиб қолмаганида шу бугун-эрта лагерь оёққа турган ва ўз баҳтини синаб кўрган бўлар эди. Ҳозирги ҳолатда иш бошлаб бўлмас эди. Балки немислар шу ҳодисанинг бошланишини бутун лагерни қириб ташлаш учун бир баҳона сифатида атайин кутиб тургандир. Унда барча тайёрлик бир пул бўлиши турган гап.

Қодирни яхши таниган Пушкарёв жуда безовта эди, қўмитанинг иши орқага судралиб путур етишидан бир чўчиса, ёшгина ажойиб йигит Қодир учун яна бир жони ачир эди. «Нима ҳодиса рўй берди экан» деб ўйлаб ўйига етмас эди. Шу пайт фикрдоши арман йигит уни қидириб келиб қолди:

— Чиқ, «капо» ҳовлида юрибди. Сени қидираётган бўлмасин! — деди.

Пушкарёв шошганиданми ёки ҳаяжониданми иргиб ўрнидан туриб, эшикка отилар экан, орқасидан етиб келган арман йигит фақат у эшитадиган қилиб:

— Ҳовлиқма! — деб қўйди. Шундагина Пушкарёв ўзининг ноўрин ҳаракат қилганини сезиб, дарров бепарво туслага кирди.

Чиндан ҳам «капо» уни кузатиб юрган экан, Пушкарёвга кўзи тушиши билан бир четга ишора қилиб, унинг орқасига ўтди. У орқасида юрганича гапириб кетаверди.

Пушкарёв ҳам ўзича кетаётгандек қулоқ солди. «Капо» Қодир ҳақида тўплаган хабарини етказиб, кетидан:

— Унингиз унча-мунча олмос кесолмайдиган ойна экан!— деб қўйди.

— Яхши!— деди хотиржам бўлиб Пушкарёв, лекин Қодирнинг тортган азобидан юраги ачишди.— Энди ни-ма бўлади?

— Айтотмайман. Камерада ётибди.

— Аниқ айби бўлмаса чиқариб юборишлари ҳам мумкини?

— Айтиш қийин. Лекин йигит ўн йил ётганда ҳам сизларга касри урмайдиган. Бу ёғидан хотиржам бўли-шингиз мумкин. Бунақаси кам бўлади.

— Худди шунақалиги учун ҳам уни қутқариш ке-рак-да! Акс ҳолда сатқайисар дердик.

«Капо» бош қашиб қолди: бу жуда оғир жумбоқ эди.

— Сенга топшириқ шу: бир йўлинни қил!— деди Пуш-карёв қатъий.

Боши қотиб қолган «капо» ўйлаб туриб:

— Бирор тўполон бўлганда эди, мен уни олиб чиқ-сам....— деб қўйди.

«Капо»нинг бу гапи қочишини уюштирувчи «яширин қўмита»нинг ишини тезлатишга туртки бўлди.

Қодирдан кўнгли тинчиган қўмита, яна икки автомат қўлга туширганидан кейин қочиш кунини белгилади. Отишма вақтида Қодирни камерадан олиб чиқишини тур-мани яхши билган «капо» билан яна беш-олти кишига топширилдилар.

— Бу бошқа гап!— деди «капо». Кетидан қистирди:— Омон-эсон бу жаҳаннамдан қутулиб олсак, ме-нинг кимлигим ҳақида ўзингиз гувоҳлик берасиз-да.

— Бу ёғидан кўнглинг тўқ бўлсин.

— Бу амалим хатоимнинг мажбурий оқибати эди. Бир куни ҳаммасини айтиб бераман.

— Албатта.

Якшанба куни немислар айни ширин уйқуда ётади-ган тонготарга яқин лагерь оёққа турди. Таёёрлик пух-та бўлганидан операция шунаقا тез ва муваффақиятли амалга ошдики, қочоқлар бир соат ичида мўлжаллан-ган ўрмонларига кириб олдилар.

Қодирни камерасидан жуда эпчиллик билан олиб чиққан «капо» лагерь дарвозасида ўқ еб йиқилгач, уни икки кишилашиб ортмоқлаб келган Қодир салдан ке-

йин йўлда, ўрмон оғзида қолдиришга мажбур бўлди. У ҳаётдаги ўз бурчини ўтаб бўлган кишидек кўзини мангу юмган эди. «Капо» ўз ҳалокатини билгандек, қўйнидаги бир парча қофозга шундай деб ёзиб қўйган эди: «Павлинский Вадим Тодорович, немис тили ўқитувчиси...», кейин адреси.

Бир ойдан кейин ўрмонда пайдо бўлган партизанлар отряди оғизга тушди, бу атрофда немисларнинг ҳаловати йўқолди.

11. ОНА ЮРТГА ҚАЙТГАНДА

Қодир она шаҳрига кириб келганда айни ёз эди.

Бу юртнинг ёзига нима етсин: ишкомида чарос қорайиб, полизида қирқ хил қовун дум беради, нашватиси атири таратиб, қимизак олмаси кўнгил очади, гилоси кўз қамаштириб, анжири тил ёради. Қайрағочдаги сават уясида лайлак томоқ қоқиб мусичалар кукулашганда захча ҷағиллаб, булбуллар боғу чаманин куйга ғарқ қилганда, ариқ суви осмондек тиниб, қўнғирофини бир текис чалгаида, кундузи тупроғига тухум кўмсанг пиширгудек исиб, оқшоми оромбахш салқин тортганда бу ўлкани айланганмисиз? Миришкор боғбон супасида бир бош ҳусайнин ёки эчкиэмарни сувга чайиб, сб бободеҳ-қон чайласида тунаб, саҳарда ананас, кўкча, оқуруғнинг тарсиллаб ёрилишини эшитганмисиз? Шода-шода кўсак боғлаган кўм-кўк паҳтазор бошида, айни туш пайтида, уста паҳтакор қўлидан бир пиёла кўк чой ичиб, ёғлиқ паловдан кейин ўнлаб канал, юзлаб анҳорлардан бирига шўнғиганмисиз? Йўқ? Демак, мўъжиза юртни кўрмабсиз, дунёда шундай оромижон ҳам бўлишини билмабсиз!

Ана шуларни ўйлаб она шаҳрида поезддан тушган Қодир, илк қарашидаёқ ҳамма ёқда бундан неча-неча минг километр узоқдаги даҳшатли урушнинг таъсирини кўрди. Юзидан ўшлик шоду хуррамлиги, қувноқ шўхлиги сочилиб турган йигитлар сийрак. Отаси, акаукаси, эри, фарзандини фронтга жўнатиб, уларнинг ўринини босган қиз-жуvon, ўсмир-кексаларнинг ранги-рўйида аввалги завқ, шукуҳ, табассум йўқ. Кийим-бошлири ҳам соддалашган: енгил ботинкалар, туфлилар ўринини қўпол этик, или қайнишли оғир ботинкалар, ипак ўрнини ип алмашган эди. Қарашлар оғир ва ўйчан. Бошига мушқул иш тушиб, пардоз-андозни унутган жу-

вондек кўча-кўйларнинг бурунги файзи йўқ. Трамвайнинг жиринглаган товушида ҳам қандайдир ўзгачалик бордек. Уруш гўё бу шаҳар, бу юртнинг ҳуснини ўғирлаб қўйганга ўхшарди.

Қодир телеграмма бермаган эди. Ҳамманинг ўз иши бошидан ортиб ётган ҳозирги тифиз пайтда ҳеч кимни овора қилгиси келмади. Азизанинг фронтдалигини хатдан билади. Уни кутишга ойиси-ю, Жаннат кенойиси чиқа олади, холос. Ким билади, онаси акасининг ғами устига Қодирнинг шунча вақт бедому дарак бўлиб кетганидан кейин қандай аҳволга тушган? Эҳтимол ғам букиб қўйган, станцияга чиқишга ё кучи етади, ё йўқ! Бу оила бошига қора кун тушганда меҳрибонлик қилиб турган кенойисини безовта қилишни ўзига эп кўрмади. Иннайкейин, бу кунларда вокзалда киши кутиш, гул тутиш қабристон тепасига «Марҳабо, хуш келибсиз» деб ёзиб қўйгандек эришга ўхшаб кўринди. Шошмасдан кириб борса ҳам бўлаверади. Нимани қойил қилиб келятпики, уйига телеграмма бериб, вокзалга одам тўплайди!

Ўша тонгда немис лагеридан қочгандан кейин Пушкарёв тузган партизан отрядида жанг қилиб юрди: поезд қулатди, кўприк портлатди, кўп қатори чори келган немис гарнizonларига ҳужум қилди, хоинларни тутиб отди, разведкага борди. Хуллас, нима буюрилса йўқ демади, қўлидан не иш келса, бош тортмади.

Шундай тўқнашувлардан бирида сони ва қорнидан ўқ еб, узоқ ётди. Охир бўлмагач, самолётда «Катта ер»га эвакуация қилишди. Денгиз ёқасидаги бир шаҳарда керагича даволаб, мана энди олти ой отпускага юборяптилар.

Қодир таниш кўчалардан ўтиб, эшигига яқинлашган сари юраги гуп-гуп уриб, нафаси ўпкасига тиқиларди.

Бу нима? Ҳаяжонми? Йўлида кўзи тўрут меҳрибон онасининг соғинчими? Немис лагерида тортган азобуқубатларнинг ҳоврими? Тўккан қоннинг шукуҳи, она шаҳрининг олов меҳрими? Нима бу?

Ў, бир бурда қора нонга зор бўлиб, лагерда озибтўзиб, битлаб юрганда, ифлос немис офицери калтаклаб-калтаклаб, ёғидан шифтга осиб қўйганда шу лаҳзани, шундай тотли лаҳзани ўйлаганмиди? Ҳа, булар бари осмондаги ойномага қараб талпинган гўдакникидай ширих хаёллар эди, холос. Мана, кўз олдидан бир

лаҳза ҳам нарни кетмаган ўша оддийгина эшик! Мана, унинг остонаси тубидан шилдираб оққан кумуш ариқ. Мана, чинорга бир шохини эркалиқ қилиб қўйиб турган акация дараҳти. Шоҳлар орасида чумчуқлар ҳам аввалгидек чуғурлашади, осмон ҳам ўша, қуёш ҳам ўша. Ҳамма-ҳаммаси ўз жойида. Фақат, улардан уруш туфайли файзу ором кетган,, тинчлик кетган. Ана шу чинор, ана шу ариқ, ана шу чумчуқлар, ана шу осмон, қуёш, ер, эсган шамол, ана шу она шаҳар, гўзал юртнинг ҳусни, латофати, кўрки жозибаси бўлмаса, завқи шавқи, фароғати, файзи ҳаловати бўлмаса, уларнинг дарди билан ёнмаса, фронтларда қон кечиб, лагерда зардоб ютиб, душман орқасида жанг қилиб юрармиди! Шулар борки, унинг бағри бутун, кўнгли тинч.

Қодир ҳаяжондан титраган қўллари билан эшик зулфини ушлади, аста итарди: қани илк бор кимни кўраркин?

Ховли сув қўйгандек жимжит. Адолат хола қўшни-никидан ўтган балхтут соясидаги супачада нима биландир ивиришиб ўтирибди: кўзида кўзойнак, бошида оппоқ дока рўмол. «Мен кетганда кўзойнак тутмас эди, демак, анча қарибди-да. Тағин ҳам фил экан — шунча ғамга бардош бериб келяпти», деб ўйлади Қодир. Бирдан кириб бориб уни қўрқитиб юбормаслик учун томоқ қириб йўталди. Ҳар қачонгидай зиёрак «Жонболам хола» кексаларга хос сиполик билан товуш келган томонга қаради, қаради-ю, эшикда турган одамнинг кимлигини аниқ кўрмаган бўлса ҳам, оналик қалби билан унинг Қодир эканини тўйди. Дарров кўзидан кўзойнагини олиб, яна термилди, энди яхши таниб, шошиб қолди. Урнидан турман деб, супа четидаги пиёлани тушириб юборди.

— Қодиржон, болам, болагинам! — она бошқа бир сўз айтолмай, яланг оёқ келиб, ўғлининг елкасига қўлини ташлади, йиғлаб юборди, севинчидан ҳўнг-ҳўнг йиғлади. — Ўз оёқларинг билан эшик қоқиб кириб кела-диган кунларинг бор экан-ку! Онанг бечорани бунча қийнамасаларинг. Бирингниги етмагандай сенини ҳам бормиди, жон болам. Сен-ку, қамоқда эмас эдинг, бунча жим бўлиб кетмасанг. Онам куйиб ўлсин дедингми!

Адолат хола йиллаб юрагида йиғилиб ётган севинчини ҳам, гинасини ҳам айтиб тугатолмас эди. У дам куйиниб йиғлар, дам кўз ёшлари орасидан кулиб, ўғ-

лини қаерга ўтқазишини билмас эди. Қодирнинг ҳам ўпкаси тўлиб, димоги ачиб келса-да, ўзини аранг тутиб, ёшини ичига ютди. Елкасидаги сафар тўрвасини супа четига қўйиб, ўзи ҳам шолчага омонат ўтирди. Адолат хола уйдан нимдошгина кўрпача олиб чиқиб тўшади:

— Тур, болам, ерда ўтирасанми, кўрпачага ўт. У ер захлик қилади.

Қодир этигини чиқариб ташлади. Она нимдош бирекалини олиб келиб, супа остига қўйди:

— Акангники, болам келса кияди деб олиб юрибман. У келгунича сен кийиб тура тур. Ака-уканикининг айби йўқ. Бориб келганимиздан бери ундан дарак йўқ, болам. Нималигни билмайман. Хат ёзамиз, жавоб йўқ, суриштираман бирор бир нарса демайди. Уз ёғимга ўзим қовурилиб юрибман.

Она бу гал ўртаниб, юрак-бағри эзилиб, кўзига ўш олди. Лекин бари бир қаршисида ўтирган ўғлининг келиш севинчи устун чиқиб, дока рўмолининг бир учи билан кўзини артди, бу қилмишига узр сўрагандек:

— Сен хафа бўлма, болам, кўзим шунаقا серёш бўлиб қолган, киши қаригандан кейин шунаقا бўлар экан!— деди ва самоварга олов ташлаб юборди. Дастанхон ёзар экан, нонга бўлган очереддан нолиб қўйди:

— Қаллан саҳарлаб очередга чиқаман, мана бугун гафлат босиб ухлаб қолган эканман, нонсиз қолдим. Энди кечқурун келганидан оламан. Очередим бор. Ҳуринисонинг кетиданман.

Адолат хола дастанхонга биттагина қора гижда қўйиб, қуруқ мева-чева сочди:

— Бу ўзларингга асраб қўйганимдан. Бултургисига қурт тушниб кетган экан, данагини чақиб едик. Буниси янги. Барака топкур Икром ота ҳар йили бир-икки челякда ўрик, тоғолча, шафтоли бериб юборади. Ҳеч кимга бийлатмай «бу ердагиларнинг оғзи тегиб юрибди» дейману қуритаман-қўяман.

Қодир сафар тўрвасини олдинга тортиб, ундан нон, консерва концентрати олиб, дастанхонининг ойнисига яқин томонига гўё совға-саломдек қўяр экан, Адолат холанинг юзи ёришди: шукур, тузатиб кутиб ололмаётганимга яраша ўғлим ўзига тўқ экан!

Адолат хола аввалгидан анча чўккан, чакак тишлари тушиб, лунжлари ичига ботиб кетган эди. Сочининг ҳам қораси қолмабди ҳисоб. Кўзининг қорасини парда

босгандек, оқиши тортган, унча-мунча нарсага чимирилиб қаарди.

«Темирни занг, одамни ғам кемиради» деб кўнглидан ўтказди Қодир, ялпиз ҳиди келиб турган шафтоли қоқидан оғзига солар экан. Кейин ҳаммани бир-бир суриштириб чиқди.

— Қеннойим соғ-саломат юрибдими?

— Шукур. Яхшиям бахтимга ўша бор экан.

Онасининг жавобидан кўнгли алланечук ҳолга келган Қодир Маратни сўради. Она бирдан яшнаб кетди:

— Дастьёр бўлиб қолди. Бирам ширин бўлган шу кунда...

Адолат хола ўғлининг жим бўлиб қолишини ўзича тушуниб, ёрдам бермоқчи бўлди:

— Азиза томонни сўрамайсан, хабаринг борми?

Қодир сал қизариб:

— Ҳа, Азизанинг фронтдалигини биламан. Хат олгандим,— деди.

— Йўқ, Мирсалим шумқадамнинг келганини айтяпман.

— Мирсалим? Мирсалим aka келдими? Қачон? — чўчиб тушди Қодир.

— Ҳа, анча бўлиб қолди. Тут пишигининг охирида эди.

— Шу ердами?

— Қаерда бўларди, болам, шу ерда. Ёмонни бало ҳам урмайди! Юрибди. Тани носоғроқ шекилли, боласини ташлаган биядай бўшашиб юрибди. Тунов куни узоқдан бир кўзим тушган эди. Сен уни фронт-мронта учратганинг йўқмиди?

— Йўқ. Нима қилди?

— Шундай, ўзим айтяпман.

— Ё бирорвга мени кўрдим дебдими?

— Йўқ. Безовта бўлганингга айтяпман.

— Дарров қайта қолганинга ҳайрон бўляпман,— гапни бурди Қодир.

— Бунақалар тегирмондан ҳам бутун чиқади, йўлини топади.

«Чиндан ҳам йўлини топганмикин?»— ўйлаб кетди Қодир. Унинг кўз олдига ҳамма лавҳа бир бутун келди: ҳарбий асиirlар лагери, галстутида фашист белгиси бор Али Наимхон, дарвозадан кириб келган усти очиқ машина, унинг устида Мирсалим...

«Ажабо, бу қандай бўлди? Ахир у легионга ихтиёрий ёзилганлар қаторида эди-ку? Еки кейин эси ўзига келиб, яна бу ёқса қочиб ўтдими? Бошқа иш билан, ёвуз ният билан келган бўлса-я! Али Намхоннинг темир чангалидан чиқиш ўнгай эмас, бунинг бир балоси бор! Суриштириб кўриш керак».

Шу мулоҳазаларга борган Қодир уни у ёқ-бу ёқдан чўқилаб кўриб, ишлаётган жойини сўради.

— Жаннат, куздан ўз мактабига борар эмиш, деяётган эди. Ҳозир бекор юрибди шекилли! Ҳа, болам, бунча сўраб-истаб қолдинг?

Қодир кулгига олди:

— Қайнатам бўлганидан кейин қизиқаман-да!

Адолат хола лақ этиб тушди, ишонди:

— Азизанинг ўзи яхши бола, отасига ўхшамайди-ю, тилим қисиқ. Бўлмаса...

— Хўп, демасмидингиз?— яна ҳазилнамо қилиб сўради Қодир.

— Менинг жағимни очма, болам,— оғрингандек бўлди Адолат хола,— пайғамбар бўлса умматлигидан чиқиб кетарди. Дарё бўлиб эшигим тагидан оқса оғимни чайқамасдим, қизини келин қилиш экану! Одамми? Ундан тўрт оёқли ит яхши. Кет десанг тушунади, боқсанг дўстлик қиласди.

— Шундайку-я...— хаёл суриб кетди Қодир. Адолат хола буни «гапим боламга оғир ботди, минг қилганда Азиза унинг севгани-да» деб ўйлади, юпатди:

— Лекин, болам, сен кўнглингни бўлма! Азиза топилмайдиган қиз. Сендан кейин то фронтга кетгунича биздан хабар олиб турди, мен ҳам ширин сўзимни аяганим йўқ. Сен йўқ десанг ҳам, мен йўқ демайман. Кейин, болам, сени деб озмунча азият чеккани йўқ. Минг балога қалқон бўлди.

— Мен бир нима деяпманми, ойи!— ўзини оқлагандек деди Қодир.

— Шундай бўлса ҳам... Берган сўзинг устида тур, йигитлик бурдингни кетказма, болам.

Қодир Азиза ҳақида ўйламаётганидан бу танбеҳлар унга оғир ботмади. Унинг фикри-ўйи Мирсалимда эди. Унинг қандай қилиб келиб қолганидан ҳайрон.

«Ҳар ҳолда бир суриштириб кўриш шарт. Ножӯя чақилган битта гугурт оламни ёндиради-я!» деган қарорга келди.

Бу орада кўча беткайидаги қатор тераклърнинг шамдек ёниб турган ўчидан олов ўчи. Жаниат билан боғчадан қайтган Марат амакисининг бўйнидан қучоқлаб кўришиб, бир вақт, фронт кетаётганида буюриб юборган «Чапаевникига ўхшаш қиличини» даъво қилиб қолди.

— Қани? Олиб келдингизми?

Қодирнинг эсидан чиқиб кетган эди, хижолат тортгандек бўлди. Ўртага Адолат хола тушди:

— Дадангнинг ўзи олиб бораман, дебди.

— Шунақами, амаки! Маза!

Марат ўзида йўқ қувониб, амакисининг бўйнидан яна қучоқлади, бошқалар хомуш тортди.

* * *

Мирсалим Қодирнинг олти ой отпускага келганини эшилди-ю, чўғ босиб олган яланг оёқ одамдек типирчилаб қолди.

«Энди қандай бўлди? Қодир ўшандада мени лагерда кўрмаган бўлса-ку, хўп-хўп. Кўрган бўлса-чи? Унда иш тамом». Йўқ, кўрмаган. Умрида мени ҳеч ҳарбий формада кўрмаган одам қандай қилиб дарров таниб ола қолади? Ҳа, мен уни таниганимда, нега у мени танимайди? Таниган! Кўрган! Менинг бу ерга қайтганимни ҳам эшилган. Эшилгану органга хабар берган. Орган «қани, ўзинг келиб исбот қилиб бер» деб уни отпуска баҳонаси билан чақирган. Йўғ-е, жуда ҳам бунчалик эмасдир! Ҳа, айтгандай, ўзи қандай қилиб бу ёққа ўтиб қолди? Мен уни лагерда ўлиб кетгандир деб юрибман. Ўлмабди-да. Шунча азоб-үқубатга бардош берганини қара! Бўлмаса, қанча одам очдан қирилиб кетди. Тавба, жони пўлат эканми дейман! Эҳтимол ўзининг ҳам этаги ифлосдир. Тағин подадан олдин чанг чиқариб, ўзимни-ўзим балога қўймай! Сабр қил, Мирсалим, сабр. Сени бу ёққа ўтказиб юбораётгандарига нима деган эди бошлиқларинг: устингга тоғ қуласа, дод демасанг ютасан! Ҳали бу нима бўпти? Фақат шубҳа-ку! Эҳтимол ҳеч нима бўлмас. Йўқ, бепарво ҳам бўлма, отингни қамчилга, олдини ол!» — шундай мулоҳазалардан кейин Мирсалим Қодир билан тасодифан бир учрашиш, унинг қўйнига аста қўй солиб кўриш фикрига келди. Мис чилимини бир-икки босиб тортиб, хотинининг: «Ҳой, да-

даси, айтган ширчойингизни қиляпман», дейишига қарамай наридан-бери кийиниб чиқиб кетди. Эрининг келганидан бери бугун кечасидай бетоқат бўлганини кўрмаган хотин, «ўзи бунга бир нарса бўлдими, чаён чақан одамдай бир ерда ўтиrolмай қолди!» деганича ширчойнинг оловига сув сепди.

Мирсалим кўчага Қодир кутиб тургандек қанчалик шошиб чиққан бўлса, хўжайнларнинг: «Шошиб иссанг, совуқ сув ҳам оғиз куйдиради» деганини эслаб, бирдан шунчалик тез ҳовридан тушди. Бошидаги сурма ранг чор қирра дўпписини олиб, жияигига ёпишган гардин бармоғини ҳўллаб, тозалади, кичкинагина қулоқлари тепасидаги энди оқ оралаган сочини бостириб қайта кийди, ёқасини тузатди. Бу орада у анчагина юриб қўйган, катта кўча юзига чиқиб қолган эди. Муюлишда тўзиб ётган қандайдир қуш патларини кўриб, нима учундир, юраги орқасига тортиб кетди: унинг кўзи олдидан мушук босган парранда кетмай қолди. Бағритош Мирсалимнинг ўша қушга сабабсиз раҳми келди, кейин кўнглини ғаш қилиб, диққатини оширди. Нега? Ўзи ҳам билмас эди. Ё шу парранда куни бошига тушадими?

Мирсалим кўчани анча айланиб юрди, Қодирларнинг эшиги рўпарасидан бир-икки ўтди, у юриши мумкин бўлган кўчаларга бурилди. Ҳеч қаерда Қодир йўқ эди. «Аксига олади, бир маҳаллар рўпарамдан чиқавериб, ғашимга тегарди, энсамни қотираради. Энди-чи? Энди хоҳласанг кундуз чироқ ёқиб қидир!» деганча, Мирсалим қорни очиб уйига қайти. Унинг рўзгори ташқаридан ғарибона кўринса ҳам, аслида бут эди. У жуда катта пул билан бу томонга ўтган, хўжайнлари унинг бир-икки йилиннинг ғамини еган. Фақат пулгина эмас, у керакли ҳужжатлар ва алоқа қилиб туришга зарур турли-туман аппаратлар билан ҳам таъминланган, бу ихчам нарсалар кийим-бошининг чоки, тугмачаси, астари, елкаси, пошиаси, чарми орасига жойланган эди. У омон-эсон етиб келган кунининг эртасига ёқ буларнинг барчасини ўргатганларидек қилиб, шаҳар че-тидаги гадой топмас бир хилват жар ёқасига яширган ва хўжайнлари билан боғланишга ҳам улгурган эди. Унинг асосий вазифаси бу атрофга ички Россиядан кўчирилган ҳарбий обьектларнинг қаердалигини хабар қилиш ва халқнинг аҳвол-руҳиясини билиб туриш, ке-

рак ерда тутантуроқ тутиб юбориш эди. Али Наимхон бир суҳбатда айтганидек, унинг зиммасига «Туркистонни ичдан тайёрлашдек олижаноб бурч» юкланган эди. Бу иш қанчалик оғир ва мураккаб, Мирсалим қанчалик тихирлик қилган бўлмасин, бунинг оқибатидаги шону шараф, бойлик, обрў, қолаверса, «Хайл Гитлер!» деб ичган қасами мажбур этган эди. Кейин бу иш узоққа чўзилмайди, то немис келгунича, вассалом. Унинг Туркистонга кириб келиши эса, узоқ эмас. Ундан кейин, оёғини узатиб ётади: дегани деган, айтгани айтган!

Мана булар барчаси энди худди саробга, айниқса, Қодир келганини эшитган дақиқадан бўён аллақачон кўрилган ёки аллакимдан эшитилган тушга ўхшарди. Берлинда таълим олиб юрган кезлари беш-олти ой эрта-индин келадиган кундек жуда яқин туйилган бўлса, энди ҳар соат бир йилга, бир ой бир асрга ўхшар, санааб тугатолмас эди. Агар немис-фашист қўшинларининг ёзчиқиб, қилиб турган ҳужумлари бўлмаса, у «ўзи хон, ўзи бек, дориламон кунлар»ни кута-кута, унинг илинжида аллақачон жинни бўлиб қолган бўларди. Ҳозир эса уларнинг ҳеч бири унинг эсига келмас, факат жони кўзига кўринар эди. Қодир уни лагерда кўрмаган бўлса-ю, уни тинч қўйса бас! Унга бошқа ҳеч нарса керак эмас! Йўқ, аслида бундаймас, ҳозир дўпинси тор келиб тургани учун шундай деяпти. Эртага тинчиди кетса, яна ўша тотли орзуси кетидан қувади, уни деб бутун бир шаҳарга ўт қўйишга тайёр бўларди!

Мирсалим диққинафас бўлиб уйига қайтди. Хотини эрталабки ширчойни иситиб, олдига қўйган эди, зардаси қайнаб кетди:

— Мен буни нонуштага буюрганман! Тишга босадиган бирор нарса пиширсанг ўласанми, падар лаънати!

— Падаримни ўқимасангиз ўрнига ўтмайдими? Сизга падарим нима қилди? Қизини сизга чўриликка бериб, ҳеч кимга зиёни тегмасдан гўрида ётибди!

— Ҳа, бир зиёни тегмаган ўша гўрдаги даданг қолувди! Гапир!

— Шунча қора кунни кўриб, тавба қилмаган ношукур банда! — деди хотин унинг олдидан ширчойни олиб, ошхонага бурилар экан.

Аламиини кимдан олишини билмай турган Мирсалимга шу кифоя эди. Иргиб ўрнидан турди. Зарб билан ош-

хонанинг эшигини очиб, бир зумда дакангхўроздай хотини қошида пайдо бўлди:

— Нима дединг? Яна бир қайтар!

Хотин ўгирилиб қарагунча бўлмай, Мирсалим бир тарсаки қўйди, бунга ҳам кўнгли тўлмай тепиб юборди. Ағанаб тушган хотинининг тепасига бориб яна ўдағайлади:

— Мен шу ёмон кунларниг не-не азобини ким учун чекиб юрибман? Сен учун, манжалақи! Қизинг учун! Отасининг юзига туфуриб кетган қизинг учун!

Қўлидан учиб кетган коса синиқларини йигиб олар экан, хотини йиғи аралаш деди:

— Худо хайрингизни берсин, мен учун бўлса, ҳеч нарса қилманг. Ўзатган оёғингизни йифманг. Мен ўлаю, сиз қутулинг.

Мирсалим шу куни кечгача қилар ишини билмай, овсар одамга ўхшаб юрди. Шом қоронғисида яна чиқиб Қодирнинг йўлини пойлади. Яна қон бўлиб қайтди. Назарида Қодир қаердадир унга чоҳ қазиш билан овора эди!

Айвонга ўтса хотини ўрнини бошқа солиб ётибди. Бу яна алам қилиб кетди. Жаҳл билан бориб «мен «пуп сассиқ» бўлиб қолган бўлсан, бор, яхшисини топиб ол» деб тепиб-тепиб юборгиси келди-ю, яна шайтонга ҳай берди, ўзини тутди. Ўрни устида бошини солиб ўтиради. Туриб ҳовлида юрди. Бир кўчага чиқиб келди. Фикрини қанчалик ширин хаёлларга бурмасин, охири айланиб бориб, Қодирга тақаларди. Қодир эса, уни томоғидан хиппа бўғиб, НҚВДга судраётганга ўхшарди. Уйга кириб яшириб қўйган эҳтиёт ампуласини кўздан кечирди — уни сичқон тортиб кетган ёки бирор олиб қўйгандек кўринарди. «Наҳотки сен жонимга қасд қилиб, шу ерда турган бўлсанг!» — деб унинг оғирлигини салмоқлагандек кафтига олди. Бу хўжайнларининг «керак бўлишиига ишонмаймизу, қондада бор. Энг сўнгги чора сифатидагина зарур бўлади» деб берган заҳарларидан бири эди.

Мирсалим ампулани кафтида ушлаб туриб, ўзига жуда-жуда раҳми келди. Эртаги ажойиб кунлардан маҳрум бўлаётган одамдек жони ачиди, бекорга ўлиб кетаётганига хўрлиги тутди. «Али Наимхонга маза, ўша ёқда юрганларга маза! Уларни ҳеч ким таъқиб қилмайди. Истаса, яланғоч хотинлар рақс тушган ўша ҳашаматли ресторонларда айш-ишрат қиласди. Оёғини bemalol уза-

тиб ётىб, эрталаб хотиржам ўридан туради. Мен-чи? Мен ниша ютган итдек бетоқатман. Бугуним қанақа ўтишини билмаганим устига эртамдан хавотирдаман. Аслида ўша ёқда «йўқ» деб туриб олсам бўлар экан. Мен ҳам ўшаларга ўхшаб тайёрига кириб келардим. Қатта бўлмаса, кичикроқ бир амал тегарди, албатта. Йўқ, яхши бўлмади! Ажойиб, баҳтли кунларнинг келишини билиб, бунга ишониб туриб ўлиб кетиш қандай даҳшат! Наҳотки ўша кунларни кўрмайман? Йўқ, кўраман, кўришим шарт. Фақат бардош керак, бардош»— шундай ўйлар билан ўзини овутган Мирсалим, заҳарли ампулани жойига қўйди. Унинг ўрнига токча орқасида турган шиша-даги спиртни олиб, жиндаккина сув аралаштириб ичди. Бирпастда боши гувиллаб, шерга айланди. Қодир кўзига чивинdek кўринди. Ўзининг бояги ҳолатидан кулиб айвонгә чиқиб келди. Қатиқ тўкилгандек олачалпоқ ойдинда ётган хотинининг ёнига ўтирди. Ҳамма нарсани унутиб, унинг бағрига қўлини юборди. Хотини чўчиб уйғониб:

— Бу нима қилинқ?— деган эди:
— Ҳа, қизлигинг эсингга тушдими, жоним,— деб устига ўзини ташлади.
У, нима учундир, хотинини йиглаб қучоқларди.

* * *

Қодир Мирсалим билан учрашиб, уни шубҳалантисириб ўтирмасдан, тўғри керакли идорага хабар қилди. Қаршиисидаги мўъжазгина майдонида денгизчи йигит ҳайкали турган бу идора ходими, Қодирнинг ҳикоясини бир сўз қўшмай охиригача эшитиб, ўзи папирос тутатди-да, унга ҳам тутди:

— Сиз кечикиб хабар беряпсиз, ўртоқ Қўчқоров,— деб кулди у.— Мирзоҳидов сизнинг устингиздан аллақачон анонимка ташлаб бўлган. Марҳамат, мана ўқинг!

Қодир кўзларига ишонмади: анонимка унинг тўғрисида нималар демас эди — уни ўз ихтиёри билан душманга топширилишидан тортиб, гитлерчиларга қилган аллақандай хизматларда айбларди. Сўнгига «партизанда бўлгани бекор. Ҳужҷатлари сохта» дейилган эди.

— Қалай, бунга нима дейсиз?— илжайди ходим.

— Текшириш керак, эҳтимол шунақадир.

Ходим яна кулди:

— Бунда ҳам кечикдингиз.
— Йўғ-э!
— Ҳа,— иккала кўзини чирт юмиб қўйди ходим.
Анонимка Мирсалимнинг дастхати эмас эди. Қодир ҳайрон бўлиб:

— Бу Мирзоҳидовнинг хати эмас-ку!— деди.
— Ҳали ҳам соддасиз, Қўчқоров, шунча чийриқдақ ўтиб ҳам пишмабсиз. Анонимка ёзган киши очиқ имзо қўйиб, ўз хати билан ташлайдими!

Бунақага ҳеч иши тушмаган бечора Қодир бу найрангларни қаёқдан билсин! У елкасини қисиб қўя қолди. Ходим унинг қўлинин сиқди:

— Раҳмат, ўртоқ Қўчқоров! Катта ёрдам бердингиз. Бу ёғи энди, бизнинг ишимиз. Ишонамизки, барчасини сир тутасиз. Шундай қилингки, Мирзоҳидовнинг ўзи ҳам сиздан шубҳаланмасин!

...Бир қанча вақтдан кейин Мирсалим бутун ашқолдашқоллари билан жиноят устида қўлга олинди.

12. ҲАҚ ЖОЙИГА ҚАРОР ТОПАДИ!

Содиқ бугун эрталаб кўзини очди. Кўзини очди-ю, бошини боғлиқ, ўзини госпиталда кўрди. Лекин қачон яраланганини эслолмади. Фақат кўкда немис самолёти пайдо бўлгани ва кимнингдир «Қўчқоров! Қоч!» дегани ёдида. Демак шунда...

Содиқ бошини ёстиқдан сал кўтариб, ярасининг зирқирашига қулоқ солди: унча оғриқ сезмади. Ён-верига назар ташлади: оқланган оддий хона. Шифти тилимтилим тахтадан. Эшиги бир тавақалик. Итальянча дебразасининг кўзларига очиқ қайчи шаклида қофозлар ёпиширилган. Юқоридаги бир кўзи ўрнида кўкимтирикардон. Ёnidаги ярадор унга орқасини ўгириб ётганидан ухлоқми-үйғоқми билолмади. Битта ўрин бўш. Ундан наригисида соchlari сариқдан жигар рангга ўтиб кетган биттаси ётибди, кўзи очиқ бўлса ҳам, қилт этмайди: ё қаттиқ хаёлда, ё яраси оғир. Содиқ уни безовта қилишини истамасдан ўзи ҳам шифтга кўзини тикди, хаёл уни судраб кетди.

Эшикни аста очиб, тиббий ҳамшира кирди. Ўйноқи кўзлари Содиқка тушиши билан дўндиқ юзини кулги тўлқини қоплади. «Тез юрсам этагимнинг шамоли озор бермасин сизларга» дегандек, қадамини мулойим босиб

ҳаммани бир-бир кўздан кечирди-да, Содиқ қошида тўхтаб, сал энгашди:

— Кўзингизни очиб ётганингиз қандай яхши! Ҳадеганда ўзингизга келавермай, бирам ҳаммани қўрқитиб юбордингиз! Азиза Мирсалимовна сизни танир эканми, жула қўрқиб кетди.

Содиқнинг кўз ўнгига чақмоқ чақилгандек бўлди! Лекин бу таниш исмни дарров хотирлаб ололмади:

— Азиза Мирсалимовна?

— Ҳа, бизнинг врач. Танийсизми? Мирзоҳидова!

Содиқ нима дейишини билмай қолди. «Танийман» деса, эҳтимол бутун тарихни очишга мажбур бўлиб қолар, шунинг учун дудмал қилди:

— Кўрсам танимасам...

— Вой, мен ҳозир чақираман!— Тиббий ҳамишча ўлжаси бегона бўлиб кетаётган кишидек шошиб қолди. Қўлидаги дорини Содиқ каравоти олдидаги тумбочка устига қўйиб, энди югуриб чиқиб кетмоқчи бўлган эди, Содиқ қўлидан тутди:

— Менга аввал бир пиёла сув беринг, томоғим қуриб кетяпти.

Ҳамишира чиқиб кетгач, Содиқ ўзини қандай тутишини ўйлаб, стакандаги сувни чўзиб ичди.

Бир маҳал коридордан тапир-тупур оёқ товушлари эшитилди. Кейин қия эшик шарт очилиб, оstonада оқ халат кийган, Содиқ назарида, у юз йилларча бурун кўрган қиз пайдо бўлди. Азиза ўша-ўша эди. Фақат кам гўшт юзларида, чақнаб турган кўзларида, асабли қисилган лабларнда ёшига яраша улуғворлик, сиполик ва билимдонлик барқ уриб турарди. Тўғри, Содиқ у билан ҳеч қачон ёзилиб гаплашган эмас, лекин орқаваротдан таърифини кўп эшитган эди. Кейин билса, Қодир билан иккиси бир-бирини севишиб қолибди. Шундан кейинн-ку, унга сира кўринмайдиган бўлиб кетди, ҳатто Мирсалим уйига меҳмонга чақирганда ҳам у бўлмас эди. Ана шунда Содиқ ўзини тутган, ақли бутун қизга ўхшайди, ўз обрўйини тутиб юрибди, олдимга чиқиб «мен укангизнинг маъшуқаси бўламан» деб жилпанглай берганда нима бўларди, деган фикрга келган, агар Қодиржон уйланишдан оғиз очса, тўйига бош-қош бўлишни орзу қилган эди.

Азиза шиддат билан очган эшикни ёпишни ҳам унуби, тўғри Содиқнинг тепасига келди, келди-ю, нима

дэйишини билмай йиглаб юборди. Мижжасидан тирқи-раб чиққан маржон ёшлар оқаринқираган кам гүшт юзида йилтироқ излар қолдириб, Содиқнинг узатилган қўлига томди.

— Сизни ҳам кўрадиган кун бор экан-ку!— дея олди Азиза ва титраган қўллари билан ғойибона қадрдан бў-либ қолган Содиқнинг қўлини ушлаб, кўксига бошини қўйди. У пиқ-пиқ йиглар, оқ қалпоқ кийган боши, энсиз елкаси силкиниб-силкиниб тушарди. Нималардир деб сўзларди-ю, йиғи товушини бўгиб, эшишига халақит берарди.

Бундай самимий учрашувдан шошиб қолган Содиқ унинг титраб турган елкасига қўйиб, оталарча силар, зўр бериб:

— Нега йиғлайсиз? Йиғламанг, қўйинг!— дер эди.

Азизанинг кетидан кирган бояги ҳамшира эса уйнинг ўртасида қотиб қолган эди.

— Фронтда экансиз-ку, бир энлик хат ёзмайсиз-а!— дея гап бошлади Азиза.— Бизлар... уйингиздагилар минг хаёлга бориб ўтиришибди. Уша-ўшасиз-а, Содиқжон ака. Ҳеч ҳам ўзгармабсиз! Фронтга юборишдими, ё ўзингиз талаб қилдингизми?

— Үзим...— астагина жавоб қилди Содиқ.

— Жуда яхши-да! Ҳозир одамнинг сараси фронтда.

Азиза дастрўмолини олиб, юзида йилтилаб турган ёш изларини артди, пешонасига тушган майда сочларини тузатди. У севинчини қанақа қилиб ифодалашни билмас, эсига келган гапларни палапартиш гапириб ташламоқда эди. Унинг бу оқкўнгиллиги ва самимий соддалиги Содиқни бир зумда мафтун этди. Ичидан укасининг дидига тасанно ўқиб қўйди, Азизага ҳурмати ошди.

— Адолат холам яхши юрибдилар, икки кўзлари сизнинг йўлингизда, қиши келса узум асраб, ёз келсарайҳон ўтириб, «ўғлим келса, ошига кертиб ичади» деб ўтирибдилар. Марат-ку, азamat йигитча бўлиб қолган, қачон бўлса «дадамни поездда борсангиз кўрасиз» деб паровоз бўлиб қичқиргани-қичқирган. Жанинат кенингимдан ажралмайди, боғчаларига бирга бориб, бирга келади. У киши ҳам соғ-саломат.

Содиқ «Қодирни қанақа қилиб таърифлар экан» деб Азизанинг оғзини пойлаб турган эди, у буни пайқади шекилли, бирдан қизариб, сипо тортди.

— Қодир акам фронтдалар,— деб қўя қолди.

— Анча бўлдими кетганига?

— У киши уруш бошидаёқ кетган.

Содиқ Азизанинг баттар қизариб кетаётганини, ҳатто бурни устига майда тер тошганини кўриб, Қодир тўғрисида бошқа гап сўрашни лозим топмади.

— Дадангиз-чи?— дея бошиқа ёқса бурди. Бу Азида учун кутилмаган савол бўлиб тушди. У дадасининг сўралишини, айниқса, ундан озор чеккан киши томонидан шу лаҳзада сўралишини кутмаган эди. У бирдан ҳушёр тортди. «Жўрттага сўрайпти, мени синаяпти. Муносабатимни билмоқчи» деб ўйлаб, пинагини бузмасдан жавоб қилди:

— Фронтдалар, «урушга кириб кетяпман» деб икки энлил хат ёзганларича дом-дараксиэз кетяптилар.

Содиқ бир нарсани фаҳмлагандек димоги билан астагина «ҳимм» деб қўйди. Нима учундир, кўз олдига Мирсалим эмас, Диловархўжа келди.

Содиқ Азизани зимдан кузатиб, «дадаси туфайли мулзам қилиб қўйдим шекилли» деган фикрга келган эди, йўқ, ундаи бўлиб чиқмади. Азида «дада танлаш менинг ихтиёrimda бўлса, ўзим билардим» деганга ўхшаб малол чекмай ўтирас, ҳар қанча савол бўлса ўзига олмасдан жавоб беришга рози кўринарди. Ана шундан кейин Содиқ бир вақт мактаб илмий мудирининг «қарқиноқдан булбул чиқсан» деганини, Жаннатнинг «Мирсалимнинг қизи дадасига ўхшамайди, ўз ишига пухта, мустақил, унча-бунча совуқса барги қовжирамайди» деб таърифлаганини эслади ва уларнинг фикрига қўшилди. Унга меҳри товланиб:

— Ўзингиз кўпдан бери бу ёқдамисиз?

— Ҳа, институтни тугатдиму, сафарбар қилишди.

Эшикда шошинқираган кишининг боши кўринди:

— Доктор Мирзоҳидова! Янги ярадорлар келди!— деди у ва ўтиб кетди. Азизанинг оғзидағи оғзида, бўғзидағи бўғзида қолиб, кечирим сўраганича чиқиб кетди. Содиқ орқасидан «булар ҳаётдаги ўз ўрнини яхши билади, ота боласи бўлишдан одам боласи бўлишнинг нақадар афзаллигини тушунади. Булар совуқда музламайди, иссиқда айнимайди!» деб қўйди, кўнгли таскин топгандек ўрнига бемалол чўзилиб, оёғини узатди. Лекин сал кўзи илинган экан, кўнгли хира тортиб уйғонди. Бундоқ ўйлаб қараса, Азизага ёлғон гапириш билан иш

бітмайды. Шунинг учун у Азиза янги келган ярадорларни қабул қилишда ёрдамлашиб, яна кириб келгандан барча воқеани очиқ-ойдин айтиб берди.

— Шунақа гаплар, синглим,— деди у охирида,— уруш тугасин-чи, кейин нима бўлса бўлади. Ҳозир «ҳайт» деган туяга дармон бўлиб турган пайт.

Азиза хомуш тортиб қолди. Зийрак Содиқ буни сезса ҳам, аччиқ-чучукни кўра бериб пишиб кетганидан ортиқча парво қилмади.

— Азизахон! Кечирасиз, албатта. Бир вақтлар Қодир билан учрашиб туришингиз қулогимга чалинган эди. Ҳозир қандайсизлар, деб сўрашга тилим бормаяпти. Менинг фожиам зарар бермадими?

Энтиккандек қизариб кетган Азиза уялинқираб жавоб қилди:

— Олдинига сал... кейин ўзимизни тутиб олдик.

— Раҳмат, синглим («келин» деб юборишига сал қолди), Қодир ёмон йигит эмас,— деди Содиқ, кейини кулиб қўшди:— Бизнинг уруғда ёмон йўқ, лекин ёмонга чиққан бор. Масалан, менга ўхшаб.

— Қани ҳамма ёмон сизга ўхшаган бўлса, шаҳарга соқчи-ю, дарвоза керак бўлмас эди!

Азизанинг бу ишончи Содиқни руҳлантириб юборди:

— Ростини айтами, Азизахон, турмаю лагерь менинг юртимга, партиямга бўлгап меҳру муҳаббатимни қилининг қийиғича сусайтиргани, аксинча, уларни қалбимда яна ҳам яхшироқ ардоқладим, мана шу меҳр мени шу кунгача омон сақлаб келаётган бўлса ажаб эмас. Йўқ, шу меҳр, фақат шу меҳр туфайли барча қийинликларга бардош бердим. Ишончи комил бўлмаган, умидсизликка тушганларнинг озмунчаси нобуд бўлиб кетдими! Бу йиллар мен учун бир синов бўлди, зўр синов бўлди.

— Бундай эътиқод, бундай прода ҳар кимда ҳам бўлавермайди,— деди Азиза кўпни кўрган одамлардек ҳикматомуз қилиб.

— Чунки виждоним пок эди. Виждон пок бўлса киши бардошли бўлар экан! Жисмоний азобдан виждон қийноғи ёмон-да! Ўша ерда ажалим етганда ҳам балки қийналмасдан ўлардим. Виждони тоза одам енгил ўлади, дейишади.

— Қўйинг, ўлим қурсин! Шунча одам ўлиб, ер тўйяптими?

— Йўқ, синглим, ўлимдан қўрқаннинг куни қурсин. Ўлим қўрқоқа даҳшат! Ҳаётда ўз ўрнини топган, идеали юксак одам учун ўлим умрнинг қонуний якунланиши! Чунки у нима мақсадда яшаб, нима учун ўлаётганини билади. Олий мақсад йўлида яшаб, дунёдан ўтиш нақадар шараф! Масалан, мен ҳозир яраланиб ётибман, оғирми-енгилмп билмайман..

Азида «ярангиз оғир» дейишга тили бормай:

— Унча оғир эмас!— деб қўя қолди.

— Оғир бўлганида ҳам, жиндай бўлсин ташвишим йўқ, чунки тўкилган қонимнинг қимматини биламан. Эҳтимол эртага ҳалок бўларман. Шунда ҳам беармон кетган бўламан. Нега десангиз, эл-юртимнинг энг оғир кунларида йириғига ямоқ, узуғига улоқ бўлдим, гарчанд ғирромлик қилиб фронтга тушган бўлсам ҳам, меҳнатимда, жангимда ғирромлик йўқ. Ахир файласуфлар «тасодиф зарурат элчиси» дейишади-ку.

— Бу ҳам сизнинг бахтингиз, Содиқ ака, жуда катта бахтингиз. Бўлмаса сиз тушган вагон қулармиди!

— Секинроқ айтасизми! Агар шу тасодиф рўй бермаганда, билмадим, лагерда қандай яшардим. Ўзимни сб қўйсам керак эди! Шу кунларда юртига астойдил хизмат қилмаган одам, бир куни келиб «мен чин совет кишисинман» деса бекор! Инсоннинг марди ҳозир майдонга чиқиши керак. Бу кунлар зўр синов: сараги саракка, пучаги пучакка ажralадиган пайт.

— Баъзи бир пучаклар кейин ўнгланиб олишади!— қулиб қўйди Азида. Унинг эсига олий маълумотли бир қўшнисининг уруш бошланиши билан бир заводга брони учун ишга киргани келди.

— Виждонини-чи? Виждон теракнинг барги эмаски, икки бети икки хил бўлса. Партия бунга йўл қўймайди, йўл қўймаймиз! Ҳозир асосий масала улар эмас, фронт. Фронтни тўғрилаб олиш керак. Душман Москва бўсағасида манглайидан зарба егани билан ҳали кучли. Ҳали анча-мунча иш бор: талай куч, талай одам керак.

Содиқ дардини тўкишга ҳамдард топган, юрагини бўшатган, энди дунёда армони қолмаган одамдек енгил эди. Ичиди қамалиб ётган ўша оғир ҳавонинг энг сўнгисини ҳам чиқариб ташлаётгандек узун нафас олди.

— Уруш яқинда тугармикин?— хотин-қизларга хос соддалик ва кўнгилчанлик билан сўради Азида.

— Жоннигизга тегдими? — яна мийифида кулиб деди Содиқ.

— Менинг-ку жонимга теккани нима бўларди, ярадорларни кўриб раҳмим келади.

— Ҳалок бўлаётганларни айтмайсизми! Иигитларнинг сараси кетяпти. Начора! Биз уруш бошлаганимиз йўқ. Урушишга мажбурмиз, еримизда охирги гитлерчи автомат билан юрар экан, жанг қиламиз — бу бурчимиз. Гитлерчининг бу иши семиз қўчқорнинг қутуриб, темир дарвозага калла қилишига ўхшайди, шохи синлиб, боши пачоқланишини билмайди.

Содиқ мизғиб қолганида бўш каравотга келтириб ётқизилган ярадор уйқу аралаш инграб уларнинг диққатини тортди. Азиза ирғиб ўрнидан туриб, унинг қошига борди, одеялини бошидан тушириб, юзига боқди.

— Қаттиқ оғрияптими? — деди. Ярадор кўпдан бери аёл кишининг майнин ва ёқимли товушини эшилмаганинданми, бирдан кўзини очди. Тепасида ёшгина қизнинг меҳрибонона боқиб турганидан иймангандек, бошини кўтаришга уринди.

— Қўзғалманг! Қўзғалманг!

Бари бир ярадор хотин киши олдида узала тушиб ётишни ўзига эп кўрмагандек ярим туриб ўтирди, оғриқни куч билан енгаётгани юз гўштларининг таранг тортилиб, тишини тишига босиб туришидан сезилмоқда эди. У аввал Азизага, кейин боши салладек қилиб доқалар билан ўраб ташланган Содиқса салом берди. Содиқ ярадорларнинг илк учрашганда бир-бирига берадиган саволи билан янги қўшнисига мурожаат этди:

— Қаерда яраландингиз?

Янги ярадор шундай шаҳарчанинг номини айтдики, Содиқ ўз қулоқларнiga ишонмади. Аниқламоқчи бўлди:

— Ташлаб чиқиши дейсизми?

— Йўқ, озод қилишди. Кеча фрицни у ердан қувиб чиқардик. Ҳозир бизникилар анча илгарилаб кетишли.

Гарчанд бу хушхабар бўлса ҳам, Содиқни ташвишга солиб қўйди. Ярадор тилга олган шаҳарчани Содиқ яхши билар, у ерда ўз сапёр отделениеси билан (у сўнгги вақтда сержант унвони олиб, отделение командири эди) жанг қилган, тутиб туришнинг иложи бўлмаганиндан кейин, полк ташлаб чиқсан эди. Ана шунда командир уни чақириб, шаҳарчада бўлган биттаю-битта тўрт қаватли мактаб биносини миналаштириб чекинишни

топширган, Содиқ буни икки жангчиси билан немис киришидан салгина олдин тугатган, бино учинчи куни кечүрун портлаши керак эди.

Содиқ шошинқираб туриб, ўрнига ўтириди:

— Ростданми?

— Фронда ҳам ёлғон гапирадими киши!— ярадорнинг нафсониятига теккандек бўлди.— Кеча ўша шаҳарчадаги дала госпиталида эдим, мактаб биносида.

— Мактаб биносида?— Содиқ баттар энтиди,— тўрт қаватли-а?

— Ҳа, биласизми?

— У бино миналаштирилган эди-ку! Ана холос!

Содиқ нафаси оғзига тиқилиб, Азизадан қаҷон бу ерга келганини сўради. Сўради-ю, яна бешбаттар бўлиб, оёғи куйган товуқдек зир югуриб қолди. Каравоти тепасида турган гимнастёркасига ёпишди. Уни кийиб, тұғмасини солмасданоқ эшикка югурди, эшикда қиласидан ишини шу ерда ҳам битириш мумкинлигини идрок қилиб қолдими, орқасига қайтиб, Азизага тушунтира кетди:

— Мана, ҳозир соат бир, яна беш соатдан кейин бино портлайди. Ичи тўла одам, ярадорлар.

Азиза ўзининг нима ёрдами тегишини тушунмай кўзи жовдираб турарди. Янги келган ярадор ҳам ўрнига ўтириб олган, бу даҳшатнинг ваҳимаси билан ўз оғрифини унутган эди.

— Госпиталнинг машинаси борми?— деди қатъий бир фикрга келиб Содиқ. Азиза бор, дейиш ўрнига ўша ваҳиманинг ташвиши билан шошиб эшикка отилди, орқасидан Содиқ югурди. Азиза майда қадам билан чопиб борар, унинг орқасидан етиб олгудек бўлиб Содиқ шошарди. Азиза коридорнинг у бошига бориб, бир эшикни тортди. У очилмагач, ёнидагини тортди. У ҳам берк эди. Кейин Содиққа:

— Сиз шу ерда туринг!— деганича пастки қаватга тушиб кетди. Ҳар лаҳзаси бир соат туюлган бир неча минутдан кейин Азиза паканадан келган, дум-думалоқ бир кишини — госпиталь бошлигини бошлаб чиқди. Бошлиқ шошмас, бунақа нарсаларни кўравериб эти ўлиб қолганлигидан салмоқлаб гапиради:

— Бугун кечқурун портлаши аниқми? Ё портлаб бўлганмикин? Яхши биласизми?

— Албатта! Ўз қўлим билан мина қўйганман!

— Сиздан бошқа биладиганлар ҳам борми?

— Бор! Лекин портлағични қаерга ўриатилганини ёлғиз мен биламан. Мендан бошқа одам зиёнсизлашти-ролмайди.

Бошлиқ «аттанг, сендан бошқаси ҳам билганда яхши бўларди. Сени шу аҳволда қандай юбораман» дегандек уни кузатиб, ахир:

— Бошингиздан жиддий яраланганингизни биласизми? — деди.

— Биламан, ўртоқ медицина хизмати майори. Лекин илож қанча! Шунча одамнинг нобуд бўлиши...

— Хабар бериб қўя қолсак нима қиласди? Ярадорларни тезда олиб чиқишади — вассалом!

— Бино-чи, бино?

— Шунча вайрон бўлган биноларнинг биттаси-да!

Содиқ —«шундай дейишга уялмайсизми?» деб юборишига сал қолди.

— Ўша машинада ўзим бора қолсам бўлмайдими?

— Мен сизга тушимни айтапманми? — деди жеркиб бошлиқ. У Содиқнинг бу «беодоб»лиги учун ўзидан баъланд турган бошлиқлар олдида жавобгар бўлиб қолишдан чўчиётган эди. Бу қўполлиқдан Содиқ «семирно» ҳолатига келди. Бошлиқ калта оёқларини катта-катта босиб пастга тушиб кетди. Уз бошлиғининг бу қўполлигидан хижолатда қолган Азида, изоҳ берди:

— Ўзи ёмон одам эмас, бир оз юраги торроқ.

— Машина бермаса бермасин, бари бир бораман! — деди Содиқ ғазабдан кўзлари чақнаб. Бу асабийликдан боши зирқираб кўтди, қўллари билан иккни чаккасини чангallади.

— Кўряпсизми? — деди Азида ҳам раҳми келиб, — бошлиқнинг рози бўлмаганича ҳам бор. Ярангиз оғир.

— Ўша бинода ётган, кечқурун кули кўкка совуриладиган ярадорларга енгилми? Уларнинг жони жон эмасми? Бошлиғингизни оқламанг, кимлигини кўриб туррибман: дунёга ўт кетса кетсин, менинг кабобим пишса бас, дейдиганларга ўхшайди.

Содиқ шу гапларни айтди-ю, зарда билан қўлинни силтаб пастга тушиб кетди, бирор ўткінчи машина билан жўнашин мўлжаллаб, катта кўчага чопди.

Салдан кейин Азизани кабинетига чақирирган бошлиқ:

— Тажанг ҳамشاҳарингиз қани? Айтинг, ташқарида

машина турибди, бориб келсин,— деди. Азиза эшикдан чиқар экан, яна огоҳлантириди:—Иссиқроқ кийинисин!

Сал бўлса Содиқнинг назарида қораланиб қолай деган яхши бошлигининг бу меҳрибонлигидан хурсанд бўлган Азиза, Содиқни қидиришдан аввал ўз хонасига кириб, сафар қопчиғидан оппоқ иссиқ пайтава олди, ўрни устидаги одеялни қўлтиғига қисди.

Бу пайт Содиқ катта кўча четида совуққа қотган одамдай у ёқдан-бу ёққа асабий бориб-келиб турарди. Ёнига келиб тўхтаган машинани кўриши билан унга ташланди, бояги гина-кудурати эсидан чиқиб, Азизанинг қўлинни сиқди.

— Раҳмат, Азизахон! Мана бу бошқа гап!

Азиза бошлигини оқлаб олмоқчи бўлиб:

— Майор юборди!— деди.

— Бошлиқ деган мана бундай бўлибди! Хайр, Азизахон.

— Нега хайр бўлади, ҳали қайтиб келасиз-ку.

— Албатта!— Содиқ машинага ўрнашиб ўтирди,— у ерда бошқа қиладиган ишим йўқ. Бирорта жонон врачами, ҳамширами ушлаб қолмаса!

— Шунақа ишларингиз ҳам борми?

— Бўлмаса-чи!— Содиқ мамнун эди.

— Ҳали тўхтаб туринг, ҳаммасини Жаннат кеноимга айтиб бермасам.

— Йўқ, йўқ! Тавба қилдим. Бўйнимга осилса ҳам ташлаб келаман.

Азиза хандон солди:

— Ҳа, қўрқмас экансиз!

— Буни қўрқиши эмас, ҳурмат дейдилар, Азизахон, ҳурмат!

Содиқ Азизанинг зўрлашига қарамасдан фақат иссиқ пайтавани олди, одеялни қайтарди.

— Кишини тантиқ қилиб юборманг жудаям!

Азиза шунга ҳам хурсанд бўлиб, қўл силкиб қолди. Сал ўтмай машина уфққа бигиздек санчилиб бориб, кўздан фойиб бўлди.

Қорасовуқ эди. Яланғоч дарахтлар чўлтоқ супургига ўхшайди. Унда-бунда учраган арча ёки қарағай «совуқ менга чўт эмас» дегандек кўм-кўк бўлиб турарди.

— Неча соатда етиб борамиз?— деди Содиқ машинанинг бензинидан бошини четга тутиб.

— Уч соат вақт кетади,— деди шофер унга қарамасдан. Кетидан изоҳ берди:— Йўл ёмон! Қўрятпизми, чўтирнинг бетига ўхшайди, рессорни синдириб юборай деяпти. Кейин сизнинг бошингизга тез юриш тўғри келмайди, бошлиқ тайинлаган.

— Машинанинг тез юра оладими, ҳайдайверинг!

Ўз касбини яхши кўрган шоферга жон кирди, ичида «бормисан, ўзимнинг ҳам юрагим сиқилиб бораётган эди» деди-ю, учириб кетди.

— Мана бу бошқа гап!

Содиқнинг мамнун бўлганини кўрган шофер мийифида кулиб, гап ташлади:

— Ҳалиги доктор қиз сизга ким бўлади?

— Ҳамшаҳар.

— Ажойиб одам-да. Бунақаси кам бўлади. Баъзан жаҳли чиқиб койиса ҳам, мукофот бераётганга ўхшаб туюлади. Бўлмаса унар-унмасга ишшая бермайди, қовоғини солиб юради. Ўзи кўрган замонинг юрагингдан «жиз» этиб оладиган чиройли ҳам эмас, шу нимадан бўларкин? Одамлар кўнгли очиқлигидан дейишади.

— Эҳтимол,— деди Содиқ оҳиста. Унинг бутун фикри-ўйи ўша мактаб биносида эди: вақтида етиб борадими? Безиён қилишга улгурадими? Ё ҳисобда адашган бўлса, портлаб бўлганми? Анча одам ҳалок бўлгандир. Йўғ-е! Ҳали вақт бор. Албатта етиб боради!

Бино портлаб кетгудай бўлса, у кечирилмас жиноятга қўл урган, фақат у туфайли шунча киши нобуд бўлган, умрбод виждон азобида қоладигандек ўзини ҳис қилиарди. Шу маҳал сапёрликка ўтганидан ҳам хафа бўлиб кетди: жангчилигини қилиб, пақ-пуқ отишиб юраверса бўлмасмиди? Энди нима бўлди? Ҳудо кўрсатмасин, портлаб кетгудай бўлса, шунча одамнинг уволи бўйнида!

— Ҳайданг, иним, ҳайданг. Кечиксанг бўлмайди, ҳа, айтгандек, ҳеч нарса олмабман; бирор ердан ломми, кирками топиладими? Болта ҳам бўлади.

— Топилади. Йўлда ишлаётганлардан оламиз.

— Шундай қилинг. У ерда қидириб юрамизми. Қайтишда ташлаб кетамиз.

Шофер жавоб ўрнида бошини қимирлатди. У рулга ётиб олгудек энгашган, икки қўзи йўлда эди. Йўлнинг четида пачоқ машиналар, дабдаласи чиқиб кетган аравалар, ёнбошига ағдарилиб тушган бузук тўп-замбарак ва унинг ускуналари, занжири узилганича ўтириб қолган

ёки куйиб қорайиб кетган немис танклари тўпларининг ҳалқумини кўкка тираганча қотиб қолган. Ана биттаси-нииг люки қийшайиб кетибди, замбарак ўқи теккан бўлса керак. Текис ерлардаги қорларни шамол ялаб кетган бўлса ҳам, бомбадан пайдо бўлган чуқурларда оппоқ тўпланиб ётибди. Ана, анави' тепачанинг орқасидан бир гала ола қарғалар бири қўниб-бири учади, қаф-қуғи оламни тутади, ниманидир хомталаш қилади. «Одам мурдаси эмасмикан?» деган фикр Содиқнинг хаёлидан ўқ тезлигига ўтди ва этини жимирилатиб юборди, кетидан «фиризники бўлса, бу ҳам кам!» деб ўзига тасалли берди.

Машина учиб борарди...

Икки қишлоқдан босиб ўтишди, бирида хумча илгудек қозиқ ҳам қолмаган, ҳамма нарса вайрон бўлган, қолганини олов кемирган. «Ҳаммом» деган тунука вивеска битта михга илиниб қолибди, шамолда соат маятнигидек бориб келади. «Кишилари қаёққа кетганикин?» деб ўйлади машина ойнасидан қараб бораётган Содиқ... Бундан кейинги қишлоқ анча бутун қолган, баъзан ёғоч уйлар мўрисидан «бу ерда ҳаёт бор» дегандек тутун бурқсийди. Кимдир кўча юзидағи вайронаси чиққан ғиштих иморатининг деворига плақат ёпиштириб кетинти. Сочига оқ тушган ишчи кийимдаги бир киши, сенга гапирияпман, дегандек бармоғини бигиз қилиб турибди, остида: «Ўртоқ! Душман устидан галабамизни яқинлаштириш учун бугун сен нима иш қилдинг?» деган ёзув бор. Бу плакат Содиққа ёқди, «ҳамма ерга буни ёпиштириш керак экан, ҳатто жангчининг окопида ҳам бўлсин» деб кўнглидан ўтказди.

Машина бирдан тормоз бера бошлади. Содиқ бузилдими, деб чўчиб кетди. Буни пайқаган шофер:

— Ломми, кирками керак деяпсиз-ку. Анавилардан оламиз,— дея изоҳ берди. Содиқ «ҳа-ҳа!» дегуйча шофер машинани кўчанинг бир четида тўхтатиб, кўприк тузатаётган аскарлар олдига кетди. У аскарлар билан нима ҳақдадир тортишди, лекин Содиқ эшитмади. Бир маҳал шофер битта киркани елкасига олиб, кетига бурилган эди:

— Ўзингдан оламан, машинаниг таниғлиқ!— деган товуш қулоғига чалинди. Үнга шофер:

— Қўрқма, махоркага алиштириб чекмайман, да-дангдан мерос қолган бўлса ҳам!— деганича орқасига қарамай келаверди. Лекин уни машинага ташлар экан:

— Пишиқ йигитлар экан, бунақалар отининг нушхўртни ҳам бегона қилмайди,— деб қўйди.

Машина яна йўлга тушди, Содиқ безовталаниб, немисдан ўлжа туширган, тунда ёнадиган соатига қараб қўйди, ўзича ҳисобни чиқарди: улгуради! Машина бузилиб қолмаса ёки бирор ҳодиса рўй бермаса, бас!

Лекин яrim соат ўтар-ўтмас, у хавотир олган нарса содир бўлди. Қаердандир пайдо бўлган иккита «Миссер-Шмит» йўл ҳаракатини тўхтатиб қўйди, узун йўлнинг у ёғидан бу ёғига шўнғиб машина, араванигини эмас, ҳатто кўзга ташланган ҳар бир кишининг кетидан қуварди. Бунақа йўлларда юравериб, пих ёрган шофер, самолётни кўриши билан машинасини чакалакзорга урди, устига шох синдириб ташлаб ниқоблади, ўзини четга олди.

Самолётлар ҳали-вери кетадиганга ўхшамас эди. Содиқнинг ичини эса, мушук тирнарди: кўзи кўкда сурлик қилиб вағиллаб юрган самолётда, хаёли миналаштирилган бинода эди. «Кечгача шу ҳол давом этса-я!» деб ваҳимага тушиб кетди. Шу пайт йўл устида бигиллаган бола товуши келди. Бенхтиёр югуриб борган Содиқ билан шофер йўл ёқасида, чуқурда қонга беланиб ётган кампирни ва унинг тепасида бигиллаб турган 5—6 яшар қизчани кўрди, самолёт уларни пайқаб, ўқقا тутиб кетган эди. Содиқ бора солиб, қизчани бағрига олди, кейин уни шоферга узатиб, ўзи кампирнинг бошини кўтариб, ҳаёт сўниб бораётган кўзига боқди. Кампир:

— Неварам... неварамни,— деди-ю, бошқа сўз айтолмай унинг қўлига шилқ этиб тушди. Шу лаҳзада яна улар тепасида пайдо бўлган самолёт, ўз «санъати»нинг самарасини томоша қилаётгандек, бир қанотини қия қилиб шўнғиб ўтди, сочган ўқи улардан сал нарини нуқталаб, қора чангини чиқарди. Шу кетганича самолётлар қайтиб келмади. Содиқ қизчани тўпланган бешўнта қишлоқ аҳолисидан бирига «қайтиб келгунимча, омонат» деб топшириб, ўзи машинага сакраб чиқди:

— Ҳайданг, жуда кечикиб кетдик.

Чиндан ҳам вақт жуда зиқ қолган эди. Энди Содиқ хаял ўтмай соатига қарап, йўли борған сари олис тортиб кетаётгандек туюларди, умрида машинанинг бунчалик секин юришини кўрмаганга ўхшарди. Охир чидолмади:

— Ҳайдасангиз-чи, бунча эҳтиёт қиласиз, ҳар мурвати олтин бўлса ҳам!

— Юз ўнда кетяпмиз, ортигини мотор кўтармайди!

Содиқ «наҳотки шу кетишда соатига юз ўн километр босяпмиз» деб шофер олдидағи тезлик күрсатгичига шубҳа билан қараган эди, тұғри чиқиб, шофердан хижолат тортди, кейин то етиб боргунча оғиз очмади. Шаҳарга яқинлашған сары мудхіш фожиалан хабар топиб, ёрдамға келаётған одамдек юраги дук-дук уриб нафаси оғзига тиқилди, ҳатто тер чиқариб юборди. У нима учундир бинонинг бутун турганига шубҳа билан қарап, бу шубҳа унинг виждонини бешбаттар қийнар эди. Ана у күчадан бурилиши билан бино күэзга ташлаши керак: мана юз метр қолди, мана эллик мана ўн.. «Ха хайрият, ҳали бутун экан!» деб юборди, бағридан тұғон күтариб чиққан севинч юзига мамнуният табассуми сочди, боши зирқираб, күзи чақнаб кетди. Лекин соатига қараб бағрига муздай ел уфургандек бўлди: бинонинг портлашига йигирма беш минут қолган эди!

У бино олдида машинадан тушганды ҳаммаёқ жимжит, бинога ўрнашған дала госпитали ўзининг одатдаги иши билан машғул эди. «Наҳотки унинг йигирма минутдан кейин портлаб кетишини ҳеч ким билмаса!» деганича подвалга ўзини урар экан, шофер:

— Менинг керагим йўқми? — деди.

— Нима эди?

Шофер нозик иши бор бўйдоқ йигитлардек маъноли қилиб кулди:

— Бир ерга кириб чиқаман.

Содиқ «севған қизи шу ерда экан-да» деб рухсат берди-ю, ўзи подвалга шўнғиб кетди. Подвал қоронғи, ундан зах ҳиди келарди. Содиқ шофердан олган қўл фонари билан йўлини ёритиб, таниш бурчакка ўтди. Яна йигирма минутчадан кейин портлашига ишора берадиган «машина» мана шу ердаги деворнинг ғиштин фундаменти орасига жойлаштирилган эди. Уни Содиқ ўз қўли билан шундай пухталаб қўйған эдики, ҳозир зиёнсиzlантириш анчагина вақтни оларди. Бунинг устига немис шубҳа қилмасин, деб подвалда турган ўтин қақир-қуқирларни иккى жангчиси билан шу бурчакка қалаштириб ташлаган, энди уни олиб, жой очиш ҳам ҳазил иш эмас эди. Ана шунда шоферга рухсат бериб чакки қилганини билди. Бир хаёл билан госпиталдан ёрдам сўрамоқчи бўлди, лекин кишилар билиб қолиб, тўс-тўполон, шов-шув кўтарилишидан, бу орада вақт ўтиб, улгуrolмай қолишидан чўчиди. «Ўзим қилганим

яхши!» деди-ю, ўтинни жадал билан олиб ташлай бошлади. Ўтин унинг назарида шунчалик кўп эдик, қанчалик ҳез ва зуд билан олмасин, бу яқин бир-икки соат ичидаги тугайдиган кўринмас эди. Ўнга сари қўли-қўлига тегмай ишлар, бармоқларининг тимдаланиб кетганига, аллақаерининг чанг кириб ачишига қарамай қучоқлаб олиб ташлар, икки кўзи очиладиган девор фундаментида эди. Унинг ҳатто соатига қарашга юраги бетламас, борди-ю, бир-икки минут қолган бўлса нима қилади.

Ахийри энг сўнгги тўнкани олиб, бир четга улоқтириди. Қора терга ботган юзини чангли бармоқлари билан сидириб, киркани қўлига олди. Мўлжал қилиб, зарб билан урган эди, фундаментдан ялт этган олов чиқди-ю, кирка орқасига силтаниб кетди, камарига қистириб қўйган қўл фонари ерга тушиб чил-чил синди, ҳамма ёқни қоронғилик қоплади. Чироқ қидирадиган пайт эмас эди. Содиқ фонаръ қизғиши шуъла сочинб турганида эсида қолган ерга тусмол билан янга кирка урди. Қўли билан пайпаслаб, олмадай ғиштнинг қолгани кўчиб тушди. Кейин унинг ёнидагиларни кўчириш қийин бўлмади. Содиқ мўлжални тўғри олган экан, бир оз ўтгач ҳосил бўлган ковакка қўлинни тиқиб, ҳозир унинг назарида энг катта даҳшат бўлган ўлимбахш қутининг муздай «танасинни» сезди. Энди унга қутидан тортиб олиб кетилган симни узиш керак эди. Пичноқ қани? Пичноқ тугил, ёнида бирор дами ўткир буюм ҳам йўқ эди. У ўйлаб ўтирамай, қутини ковакдан сугуриб олди-да, бир оёғини деворга тираб, силтаб тортди. У шундай шиддат билан тортган эканки, сим узилибгина қолмай, ўзи орқаси билан силтаниб бориб, йиқилди, боши қаттиқ нарсага урилиб, кўзидан ўт чиқиб кетди, кўнгли беҳузур бўлди. Шунда ҳам даҳшат тўла қутини тацлаб юбормади. Эсими йиғиб, унга қулоқ солди. Портлашга сигнал берадиган қутидаги пружина физиллаб бориб, чиқ этиб урилди. Демак, портлаш муддати бўлди, лекин у безинён эди! «Икки минутча қолганда улгирибман-а!» деган Содиқ оёқ-қўллари бўшашиб, ўтирган еридан турди ва маст кишидек гандираклаб эшикка йўл олди.

У кийим-боши тупроқ, юз-кўзи тердан лой, бошидаги докаси қонга беланиб подвалдан чиққанда, госпиталдагилар бинонинг миналаштирилганидак энди хабар

топиб, қий-чув билан ярадорларни ташишар, деразалардан кўрпа-ёстиқ ҳовлига учар, ит эгасини, мушук бекасини танимас эди!

Ҳолдан толган Содиқнинг подвалдан гандираклаб чиқиб келаётганини кўрган командир кийимидағи бир киши «анави ким?» дегандек ёнидаги шеригининг тирсанидан тортиди. Шериги бир нарсани фаҳмлагандек Содиқнинг қаршиисига шахдам юриб келди. Содиқ ҳам ўшалар томонига девонасифат боқиб келарди. Улар етиб келиши билан куч-қуввати узилган кишидек зўрға оғзини очиб «бино зиёнсизлаштирилди!» деди-ю, ўрилган пичандек турган ерида йиқилди, қўлидаги қути учиб кетди.

Бу унинг охпирги сўзи бўлди. Шу ҳушидан кетганича қайтиб ўзига келмади. Узи ўлимдан қутқарган ярадорлар ётган шу бинода ярим соатдан кейин жони узилди.

Эртасига ўтказилган дағи маросимида унга партияга киришин таклиф қилган комиссар қабри устидга:

— У олтин одам эди! Олтин эса, зангламайди! Эрйигит эл учун тугилади, эл учун ўлади. Унга шон-шарафлар бўлсин!— деди ва қабрига ўз қўли билан Содиқнинг исми-шарифи ёзилган, учи беш қирра юлдузли темир таёқ қадади, ўз тўпночасидан ўқ узиб, унинг шаънига берилган салютга қўшилди.

13. ХОТИМА

Кечагина чирсиллаб турган қаҳратон бирдан бўшашди.

Йилт этиб кўзи кўриниши билан тарновдаги кумуш сумалак учидан чиқ этиб бир томчи ерга тушди ва ойна синиқларидек чил-чил бўлиб, нурланиб кетди. Тушга бориб, тарновлар тўлиб сув оқди, том бошида қор қолмади.

Сал кундан кейин ариқ лаби кўм-кўк сабза уриб, балхтут шохида турган чумчуқ ипдек ингичка чўлни қўндаланг тишлаб бўғот остига кириб кетди.

Кейин бинафша лаб очди, чучмома бўй чўзди, лола хандон кулди. Кейин оппоқ бўлиб бодом, чўғдек бўлиб шафтоли гуллади, ёнғоқ кучала ташлади, кейин... кейин баҳор, тенги йўқ гўзал баҳор барқ урди!

Шу баҳор майсасидай мўйлаби сабза урган, қуралай .

кўзларидан баҳор қуёши яширинган, бўйдор ва миқти вужудидан ўсмирилик камолоти гуркираб, бир боқишдаёқ дадаси Содиқни эслатиб турган Марат ўртоқлари билан боф сайрига чиқиб, бир ҳовуч довучча олиб келди. Айвон устунига суюниб, хира кўзларини ҳовлида чир айланәтган оқ тўш қалдирғочларга тикиб ўтирган бувисига:

— Буни қаранг, буви, данаги қаттиқ бўлибди!— деди ва оппоқ зич тишларига бир данагини чирс этиб босиб, мағзини айириб олди, этини эса, бувисининг ҳавасини келтираётгандек касир-кусир чайнади. Адолат хола ҳам йўлини топди: бир кафтини ошга бостиради, иликдек юмшатиб нордонгина тамшади.

— Ойим ҳақларини кетказиб бўлибдилар!— деб кулди буни кўриб Қодир. Тиззасида ўтирган бир яrim яшар Лоланинг ҳам оғзига довуччанинг этидан эзиб солди. Лола аввалига нотаниш бу хушхўр таъмдан аяси Азиза-никига жуда-жуда ўхаш қош-кўзларини бир чимириб, кейин чапиллатиб еди. Унинг акаси Алишер эса, 6—7 ёшли болаларга хос шўхлик ва «очкўзлик» билан дадасининг олдиндан чиққан довуччаларни сапчиб олиб оғзига солар, кимнингдир ҳавасини келтираётгандек бошини сарак-сарак қиласарди.

— Бунақа қилма, уят бўлади, жон болам!— деди унга таълим бериб мункиллаб қолган Адолат хола.— Яхши бола бўлсанг, Марат аканг эртага ҳам олиб келиб беради.

Маратнинг ёнида ўтирган, соchlари оқ бўлса ҳам юзларини унча ажин босмаган, ёниқ кўзларida бардош ва матонат олови гуриллаб турган Жаннат, ўзига хос меҳрибонлик билан олдиндан чиққан довуччани Алишерга узатиб туарди, у билан кўз уриштириб «бемалол еявер, яна чиқса сеники» ишорасини қиласарди. Алишер мамнун ишшайиб, Маратнинг болалигини унга эслатарди.

Самовар ёнида ўтирган Азиза ошдан кейин биринчи пиёла чойни ўриидан сал қўзғалиб иззату икром билан қайнанасига узатди.

Жамоат жам, шу тотли дам олиш оқшомининг эртасига почтальон ташлаб кетган тўрт энлик хат оиласининг шаънига ҳамон иснод келтириб, дилини ғаш қилиб ётган доғни баҳор тошқинлари қиши қирмоchlарини сидиргандек тозалаб, ювиб кетди.

Бу Содиқнинг пироварди расмий жиҳатдан ҳам реабилитация қилингандиги ҳақидаги хабар эди!

Қодир олти ой отпускасидан кейин яна фронтга кетган, уруш тугагач Венадан қайтиб, Азизадан акасининг тарихини эшигтан, кетидан қувган эди. Бари бир ҳеч нарса чиқмади. Фақат партиянинг XX съездидан кейингина баҳор кунларидан бирида унинг ҳам аризасига кенг йўл очилган эди.

Онла ўз ҳақ-хуқуқларини сал кунда тиклаб олди. Марат дадаси ҳалок бўлган шаҳар комсомол комитетига хат ёзиб, у портлашдан олиб қолган мактаб пионерлари билан алоқа боғлади. Пионерлар Содиқнинг қабрини гопиб, уни кузатиб туриш оталигини олганликларини хабар қилишди. Кейин ўз мактабларини Улуғ Ватан үруши, қаҳрамони Содиқ Кўчқоров номига қўйиш масаласини қўзғаб, бунга муваффақ бўлишди. У билан бирга жанг қилишганларни қидириб топишди. Ўз навбатида Марат ҳам суриштириб, унинг дафи маросимида иштирок этган, муҳтарам китобхонимизга таниш, батальон комиссари билан боғланышди. Комиссар Содиқнинг ўша қаҳрамонлиги учун олий мукофотга тавсия этилганини батафсил ёзиб, Москвадан, архивдан суриштиришни маслаҳат кўрди, ўзи ҳам ҳаракат қилажагини билдириди. Чиндан ҳам Содиқ Ленин ордени билан мукофотланганини маълум бўлди.

Мана шу жума куни кечқурун ана шу мукофотни марҳумнинг оиласига топшириш маросими бўлди.

У директор бўлган мактабнинг катта залига одам сиғмас эди.

Умрида биринчи марта президиумга чиқиб ўтирган Адолат хола, ҳамма фақат унга қараётгандек ўзини ноқулай сезиб, атрофга кўз юритар экан, кимнингдир пастдан «ҳой, айланайлар, ўтирайлик, мажлис увол бўлмасин» деганини эшитиб, мийигида кулиб қўйди. У билан бирга президиумнинг олдинги қаторида бутун оила аъзолари ўтирибди, орқада — саҳна тўрида эса, Содиқнинг катта қилинган фотосурати гулларга ўраб қўйилган. Ҳаммадан ҳам Марат терисига сиғмай мамнун.

Мажлис олдидан орденни кимнинг қўлига топшириш ҳақида гап борганда кўпчилик Адолат холани маъқул топган бўлса-да, «Жонболам хола»нинг ўзи қарши турди.

— Ўгли олсни, отасининг чироғини ёқадиган у. Мен

мингдан-минг розиман! — деди. Маратнинг шу вақтдаги фурурини кўрсангиз!

Район партия комитетининг секретари шахсга сифи-ниш даврининг хунук оқибатлари тўғрисида гапириб келиб, охирида шундай деди:

— Совет кишилари — олтин кишилар. Олтин эса, зангламайди. Ҳатто шахсга сифиниш йилларининг рутубатлари ҳам унга путур етказолмади. Коммунист Содиқ Қўчқоровнинг қисмати бунга ёрқин мисол бўла олади. У бутун ақлу идроки, меҳру садоқатини энг оғир кунларда Ватан йўлига бағишлай билди. У доим биз билан бирга, биз уни унумтмаймиз.

Район халқ маорифи бўлнимининг мудири Содиқнинг маориф соҳасида қилган ажойиб хизматлари ҳақида, кекса ўқитувчи-пенсионер Икром ота Содиқнинг инсоний фазилатлари ҳақида гапирди:

— Кишиларнинг оғирини енгил қилиб юрар эди, умрининг охирида ҳам кишиларнинг фалокатини аритиб, дунёдан ўтибди, йигит бечора. Чироқнинг сасиб узоқ ёнгани эмас, қисқа бўлса ҳам чарақлаб, барчанинг дилини ёритиб ёнгани инобат. Содиқжон ана шундай чироқ бўлди! — деди у кўзига ёш олиб.

Икром отадан кейин ҳарбий комиссар минбарга чиқиб Содиқ ҳалок бўлган шаҳардаги Содиқ Қўчқоров номли мактаб колективининг хатини ўқиб берди. Мактаб коллективи ўз мактаблари биносини, ундаги юзлаб ярадор кишиларнинг ҳаётини ўз жони эвазига сақлаб қолганини алоҳида қайд қилиб, шундай фарзандни тарбиялаган онага, халқа миннатдорлик билдиради, унинг онаси, хотини ва ўғлини шаҳарларига таклиф қиласади. Қасиданома бу хат шундай сўзлар билан тугалланарди: «...Содиқ Қўчқоровнинг ўқитувчидан чиққанлиги бизни айниқса фахрлантиради. У қандай яшаш ва курашишни ёш авлодга синфдагина ўргатиб қўя қолмай, вақти келганда унинг ажойиб намунасини ўз тимсолида кўрсатди. Биз унинг помини пок сақлашга вайда берамиз!»

Сўнгра комиссар гулдурос қарсаклар остида Маратга орденни топширди. Гайрат ва чаққонлик билан ўрнидан турган Марат бутун залнинг ўзига иштиёқ билан боқаётганини кўрди-ю, боядан бери ҳижжалаб ўтирган чиройли сўзларни эсидан чиқарди-қўйди. Ҳаяжондан титраган қўллари билан олий мукофотни олар экан:

— Отам каби яшашга, отам ишини давом эттиришга тантанали сўз бераман!— дея олди. Бу қасам Марат кутганидан ҳам зўр қарсакка сабаб бўлди.

Адолат хола эса, севинчидан ҳўнг-ҳўнг йиғлаб ўти-рарди.

Тантана тугаб, Жаннат Адолат холанинг қўлтиғидан олиб турғизар экан, чидолмади, унинг нимжон елкала-рига бошини қўйиб, йиғлаб юборди, ёшларини тиёлмай йиғлади. Бу ёш шунча йиллардан бери ичидаги йиғилиб ётган алам, ҳасрат, кудуратини ювиб чиқараётган ўкинч ёши эди!

Уз қисматидан рози Азиза йўлда келаётib. Эри а деди:

— Ху анави гапингиз эсингизда борми, Қодиржон aka?

— Қайси гапим? Сизга жуда кўп гаплар гапирганман.

— Йўқ, биттаси жуда алоҳида. Ўлсам ҳам эсимдан чиқмайди.

— У қайсиси экан?

— Акангиз қамалиб, сизни институтдан бўшатишга-дан («ҳайдашгандан» дейишига тили бордами) кейин биз учрашдик-ку, чинорли хиёбонда. Мен сизни уйингиздан чақириб чиқдим.

— Хўш? Хўш?— Қодир ўша мудҳиш кечани эслади.

— Ана шунда «энди орани очди қилиб қўя қолайлик, Азиза!» дегандингиз. Шундай дейишига қандай тилингиз борган? Шу гапингиз эсимга тушса, ҳали-ҳали сесканиб кетаман.

Қодир юраги орқасига тортгандек бўлиб кулди:

— Шунақа деганманми, а, Азиза? Ўзимиз ҳам ҳазилакам кунларни бошимиздан кечирмадик-да!

— Тўғри! Ҳеч кимнинг севгиси бизнікичалик қаттиқ синовдан ўтмагандир! Е бизга шунақа кўринадими, дадаси?

— Билмадим, аяси!— ҳазилга олди Қодир ҳам.

Қодирни қўлтиқлаб келаётган Азиза унинг қўлларига шундай қаттиқ ёпишники, пинжига кириб кетгудай бўлди, эркаланди.

Шу пайт Марат улар орқасидан етиб келди

— Дарров кетиб қолибсизлар. Мен сизларни қидириб юрибман.

— Биз сени Гули билан танца тушгани қоғдинг деб ўйлабмиз.

— Ойиси билан келган... — деди Марат уялинқираб.
— Ойиси бўлса танца тушолмайсанми?

Марат индамади, кеннойисини қўлтиқлаб олди. Азиза «болани қизартирманг!» дегандек эрининг қўлини қисиб қўйди.

Кумуш баркашдек ой қоқ тиккага келган эди.

Шунча ғам-ғуссага чидаган Адолат хола, яхши кунлар севинчини кўтаролмади: тантанадан кейин уч кун ётиб, вафот этди.

1963 — 1965.

Тошкент — Москва — Тошкент

ҲИКОЯЛАР



Ўлмасхоннинг кўнгил ғашлиги Варвара Петровна нинг келаётганини эшигтан кунидан бошлаб яна кучайди.

Кечакибош инженер уни чақириб «кутишга сиз ҳам чиқнинг» деди. Буни бош инженер атайлаб қилгани йўқ, балки яхши инженерлардан бири сифатида таклиф этди. Лекин бу нарса Ўлмасхонга: «Мана, сен танқид қилмоқчи бўлган проект инженерларидан бири ўз оёғи билан келяпти, ўз қулоғи билан эшишиб кетади. Қалай, бу сенга ёқадими?» дегандек бўлди, кўнглидаги ғашликка ғашлик қўшилди.

Ўлмасхон студентлигига Варвара Петровнадан иккӣ лекция тинглаган. Варвара Петровна жуда серзавқ, хўшфөъл ва меҳрибон, айниқса миллий республикалардан келган студентлар билан жуда иноқ эди. «Оlamни қуёш, инсонни илм ёритади. Билмаслик айб эмас, ўқимаслик айб» деб уларга насиҳат қиласарди. Уларни жондан севар, ҳатто уларнинг биографияларигача билар, исми ва отасининг исмини айтиб чақиравди. Баъзан шанба кунлари дачасига олиб кетиб, зиёфат қиласар, ийманган студентларни кўриб, «уялманг, буларнинг ҳаммаси қарз. Юртларингизга меҳмон бўлиб борганимда ортиғи билан узасиз» деб куларди. Кейин, ўзининг ёқимли ва жарангдор товуши билан шеър ўқишига бошларди. У, айниқса, Маяковский билан Есениннинг муҳлиси эди. Уларнинг кўп асарини деярли ёд биларди. Унинг шеърга бунчалик ишқибозлигини кўрган студентлар тегишардилар.

— Шоира бўлишингизга сал қолган-да, Варвара Петровна!

— Нега сал қолади? Мен шоирман. Лекин шеър ғэздиған эмас, халқа шоирона уй-жойлар яратиб берувчи ижодчиман. Йўқ, кулманг. Қурувчи-инженер шоир бўлиши керак. У проект қилган, у қурган бинодан шоирона руҳ барқ уриб турсин. Халқ унда завқ ва ғуур билан яшасин. Ҳўш, врачдан Чеховдек ёзувчи чиққанда, инженердан шоир чиқса, ажабланадиган нимаси бор?! Лекин кўп афсус, ўшанақаси кўринмай турибди. Умид қиласманки, чиқиб қолар. Ё орангларда машқ қилувчилар борми? Бўлса, тортинимай ёза беринглар. Бу икки касб оға-ини! Мана кўринглар, шулар шоирнинг ижодидан камми?— деб ўзи проект қилган биноларнинг суратлаи қўйилган альбомни варақлаб қоларди.

Ўлмасхон учинчи курсдалигида бир ойча тоби қочиб касалхонада ётди. Узлуксиз хабар олиб турганлардан бири шу Варвара Петровна бўлди. Бош врачга учрашди. Консилиумга ўзининг қандайдир таниш врач-профессорини бошлаб келди, камёб дорини топишга ёрдамлашибди. Унга сари Ўлмасхон ўнғайсизланарди. Бир куни Варвара Петровна пайқаб қолиб, уни койиб берди кетидан кулиб мақол ўқиди:

— Ўзуфингнинг улоги, йиртифингнинг ямоғи бўлмаган дўстнинг боридан йўғи яхши. Дўстнинг синови ташвишли кунлар, айрилиқ, шундаймасми? Ахир сиз билан биз бир дарахтнинг баргларимиз, нега ўнғайсизланасиз!

Ўлмасхон тузалиб қайтиши билан Варвара Петровна уни яна дачасига олиб кетди. Бир ҳафта олиб қолди:

— Шошманг. Аввал соғлиқ керак, бусиз илм олиб бўлмайди. Ойнага боқдингизми? Қасал одам ёғ ичидаги ярамайди. Чаман ҳам соғлом кишига завқ беради

Кейин ўз фанидан унга алоҳида консультация берди. Бошқа профессорлар билан ҳам гаплашиб берди. Хуллас Ўлмасхонни етқизиб олди.

Мана беш йилки, Ўлмасхон обод бўлаётган шу янги шаҳарда қурувчи-инженер бўлиб ишлайди. Олган назарий билими тажриба билан бойиди, бойидигина эмас, анча камол ҳам топди. У аввал бешинчи қурилиш участкасида прораб эди. Унда уч йил босим ишлади. Бу орада қурилаётган биноларнинг проекти ва услуги ҳақида ўзининг фикрларини билдириб, кўпчиликнинг диққатини ўзига тортди.

У ҳозир бош прораб. Яқинда катта бинолардан бирини эксплуатацияга топшириб, бошқасини тиклашга

киришди. Ана шу бошланиши лозим бўлган улкан, беш қаватли бинонинг министрликдан тушган проекти билан танишаркан, ҳар битта детални алоҳида-алоҳида ўрганди. Айниқса, унинг диққатини бинодаги ортиқча ҳашамат торти. Кунботар томонга чиқариладиган балконларнинг бунчалик сербезак ва дабдабали кўрикиши унга итальян архитектурасининг узоқ ўтмишини эслатди. Бунинг устига унинг қимматга тушувини айтмайсизми! Ана шунда Ўлмасхоннинг хаёлидан Бутуниттифоқ қурувчилар кенгashi ўтди. Бу кенгашга Ўлмасхон қатнашган, илгор қурувчи мутахассисларнинг ажойиб нутқларини зўр иштиёқ билан тинглаган эди. Шу эшитганларини қўлидаги проектга татбиқ этиб кўрса, проектда анчагина ортиқчаликлар бор. Кўра туриб, проект авторларидан бири ўз севимли муаллимаси Варвара Петровна бўлса ҳам, индамай кетишга, шу проект бўйича иш бошлашга кўнгли бўлмади.

Бу ҳақда бир куни дугонаси Ҳанифага ганирди. Ҳанифа унинг болаликдан сирдоши. Улар институтининг учинчи курснгача бирга ўқишиган, кейин нима бўлди-ю, Ҳанифа ўқишидан совиди, арзимаган ёарсани баҳона қилиб институтни ташлаб кетди, дугоналарининг гапига қулоқ солмади. Бу енгилтаклигига ҳали-ҳали ачинади. У ҳозир Ўлмасхон ишлаётган қурилиш бошқармасида чертёжница. У, умуман, Ўлмасхоннинг бирорлар проектига тузатишлар киритишини ёқтирилас, «ўз ишингни билсанг-чи, бирорлар боғига тош отиб нима қиласан» деб юради. Варвара Петровнанинг проектини танқид қилмоқчи эканини эшитиб, тепа сочи тикка бўлди.

— Ҳали сен Варвара Петровнанинг совунига кирювига кўрмаган экансан. У сенга ўхшаш энди «темир қанот» бўлган инженерларни икки оғиз гап билан лол қилиб қўяди. Уқитувчи Усов билан бўлган воқеа эсингдами? Унинг узрини қабул этмаган-а!

— Ўшанда улар ўртасида нима гап ўтган экан?

— Нима ўтганини билмайману, лекин Варвара Петровнанинг унинг кўришга кўзи йўқ эди,— деб Ҳанифа Ўлмасхонга тик қаради ва давом этди:— Иннакейин, Ўлмас, ўз муаллимангни танқид қилишинг яхши эмас. Сенга бу иш ярашмайди. Жуда қаттиқ хафа бўлади. Яхшиликларини унутмагин-да.

— Ахир, мен унга ёмонлик қилмоқчи эмасман.

— Барибир. У кекса, танқидингни кўтара олмайди. Нақ Усовнинг куни бошингга тушади. Ўйлаб кўр.

Ўлмасхон аввалига Ҳанифанинг сўзига парво қилмади, ваҳима, деди ва ўз ишини давом эттира берди. Лекин, кунлар ўтіан сари унинг сўзлари ёдига тушиб, Усов кўз олдидан кетмайди ан бўлиб қолди. Йиккиланиш сошланди. Баъзида Ҳанифа ҳақдек бўлиб кўринарди. Баъзан кўз олдига Варвара Петровна келар: «Балли-балли! Шунча яхшилигим эвазигами бу? Қачон яхшиликка яхшилик қайтиби!» деяётгандек кўринарди. Бошқа ички бир ишо: «Фикринг тўғри. Айт, Варвара Петровна хафа бўлмайди» деб даъват этарди. Шу томон енгди. У ўз фикрини узоқ тунлар ўйлади, пишитди, узил-кесил ҳал этди ва бош инженерга маълум қилди. Атоқли инженерларнинг проектига қарши чиқиши биш инженер уччалик ёқтирумаса ҳам, Ўлмасхоннинг ўринли таклифида кейин, умум муҳокамасига ташлашни лозим топди. Ана шу муҳокама шу ҳафтанинг ўртасида ўтиши керак эди. Бу орада Варвара Петровнанинг келаётгани маълум бўлиб қолди. Бу хабар Ўлмасхонни анчагина шошириб қўйди. Яна иккиланиш, шубҳалар бошланди.

Ҳанифанинг сўзлари қулоги остидан кетмай қолди. Бу ҳам етмагандек Ҳанифа қурилишда уни учратиб:

— Хўш, энди нима бўлди? Шунча яхшиликлар қилган оппоқ сочли муаллимангнинг башарасига қараб: «Сиз мендан ўрганинг», дейсанми? Яхшимас, Ўлмас! Кишига ҳаё керак. Билимдонлик ҳам эви билан! Ҳали ҳам шу ишингдан қайт, ҳали кеч эмас. Кейинги пушаймон — ўзингга душман. Мана мени айтди дерсан: Усовнинг кунига тушасан! — деди.

У астойдил жон куйдириб гапиради. Шунинг учунми ёки Варвара Петровнанинг ўзи келаётганиданми, бу гал Ўлмасхон ҳар галгидек Ҳанифага қаттиқ қаршилик кўрсатмади. Яна ўйлаб кўрадиган кишидек, индамай қўя қолди. Ҳанифанинг сўзлари қалбини тирнарди. У қаттиқ ўйга толди. «Ахир мён ном чиқариш учун, ўзими кўрсатиш учун танқид қилиб бирор юқори мансабга кўз тикаётганим йўқ-ку. Мақсадим кўркам, ихчам, пухта ва арzon тушадиган бино қуриш, холос. Варвара Петровна ҳам худди шу ниятда проект тузган. Шундай бўлгач, нега хафа бўлади! Хафа бўлмаслиги керак!» деб ўйларди. Лекин Варвара Петровнанинг Усов билан

нимагалир юз кўришмас бўлиб кетгани эсига тушса, яна юраги орқасига тортиб, шахтидан қайтарди. Ҳанифа «қалайсан энди» деб кулаётганга ўхшарди. Тўғри, проект билан танишиб, унинг камчилигини айтмоқчи бўлганида авторларидан бири Варвара Петровна эканини яхши билса-да, юзма-юз туриб гапиришни ҳеч хаёлига келтирмаган экан. Бетма-бет туриб танқид қилиш, айниқса шунча яхшиликлар қилган, ўқитган кишингни танқид қилиш нақадар оғир эканини энди чуқур ҳис қила бошлади. У, назарида, Варвара Петровна ёзган дастурхонга оёқ узатиб, ёмонлик, кўрнамаклик қилаётганга ўхшарди.

Ўлмасхон, Варвара Петровнани кутиб олишга борар экан, ҳамон шундай ўйлар қучоғида хомуш эди.

— Телефонда йўқлатсак йўқ экансиз? — деди Ўлмасхонни қарши олиб бош инженер станцияда.— Тобингиз қочдими, рангингиз?..

— Йўқ. Яхшиман,— деб қўя қолди Ўлмасхон. Лекин «Наҳотки, рангим ўзгарган? Йўғ-е, учалик эмасдир!» деган ўй кўнглидан ўтди.

Поезд келиб тўхташи билан Ўлмасхоннинг юраги гуп-гуп уриб, ўзи алланечук бўлиб кетди. Бу узоқ вақтдан бери севимли муаллимасини кўрмаганиданми ёки муаллимасининг келишини эшитгандан бери чекаётган изтиробининг сўнгги чўққисими — билиб бўлмасди.

Варвара Петровна уни дарров таниди, самимият билан бағрига босди. Узоқ вақт фарзандини кўрмаган она-дек унинг кўзларига термулди. Унинг балоғатга етиб, мустақил ҳаёт йўлига чиқиб олганидан мамнун бўлгандек кулиб қўйди:

— Диidor кўришганимиздан жуда-жуда хурсандман, Ўлмасхон Сафаровна, ҳатто сизга олиб келган поезддан ҳам миннатдорман,— деди у Ўлмасхонни бағридан қўйиб юбормай.

— Ҳуш келибсиз, Варвара Петровна! Мен келишинизни эшитиб, жуда хурсанд бўлдим,— деди Ўлмасхон ҳаяжонда.

Варвара Петровна ўша-ўша: Ўлмасхон таниган ва тарбия олган вақтидек ширинсўз, қувноқ. Аввал-гидек ҳамма нарсани бирдан кўриб олгиси ва билгиси келади. Шунинг учун ҳам Ўлмасхонни саволларга кўмиб ташлади. Ҳатто ундан қизининг номигача сўраб олди.

— Мен меҳмонхонага тушаман,— деди машинага ўтираётib Варвара Петровна, Ўлмасхоннинг шоферга ўз адресини айтганини эшитиб.

— Қўйинг-е! Бизники турганда меҳмонхонага тушганингиз нимаси! Эшитган одам нима дейди?— Ўлмасхон қаршилик билдириди. Варвара Петровна кулгига олди:

— Нима дерди? Муаллимасини иззат-икром билан станциядан кутиб олибди, меҳмонхонагача бирга узатиб қўйибди, дейди-да. Ё яна бирор нарса дейиши мумкиними? Демас! Мен сиз ўзбекларни биламан: меҳмондўстсиз. Сизниги тушсам меҳмондорчиликдан бошим чиқмай, ишларим қолиб кетади. Ахир иш билан келганман. Сизниги алоҳида бошқа келаман.

— Ҳали бирор кун ҳам меҳмон бўлмайман денг?

— Йўғ-е... Бир бораман, албатта. Йиғилиб қолган анча гапларим бор.

«Ҳамма гапдан хабари бор шекилли» деб ўйлади Ўлмасхон.

Ўлмасхон меҳмонхонада Варвара Петровна билан анча вақт суҳбатлашиб қолди. Суҳбат орасида ўзини безовта қилаётган масала юзасидан неча бор гап очмоқчи бўлди-ю; ботинолмади. Улар тузган проект бўйича қуриладиган бинога прораб қилиб тайинланганини айтиб, у ёғига тили бормади. Охири:

— Шундай, Варвара Петровна, фақир киши панада дегандай ишлаб ётибмиз,— деди.

— Бу жуда яхши, азизим. Ролларнинг катта-кичиги бўлмайди, артистларнинг катта-кичиги бўлади. Марказдан узоқроқ бир қурилишда бўлсангиз, бу сизнинг қўлингиздан ҳеч иш келмайди, деган гап эмас,— деди у кулиб.

* * *

Ўлмасхонни не-не ўйларга олиб борган проект муҳокамаси уч кундан кейин бўлди. «Қани, Ўлмасхон ўз муаллимасининг проектини қандай қилиб таңқид қилас экан» дегандек бундай йиғилишларга келмайдиган мастер ва бригадирларгача келганди. Ўлмасхон залга кириб борганда Варвара Петровна бош инженер билан шу бугун муҳокама қилинадиган проектнинг сметасини синчилаб кўздан кечирарди. Ўлмасхонни кўриши билан у сметадан бош кўтариб, ҳар галгидан кўра бошқачароқ кўришиди. Бу унинг иш билан қаттиқ бандлигиданми ёки бугун-

ги муҳокамадан норозилигиданми — Ўлмасхон билолмади. Қўнгли бир хил бўлиб кетди.

Муҳокама бошланганда ҳам Варвара Петровна ўша ўтиришини бузмади. Фақат бир маҳал кимнингдир унчалик ўринли бўлмаган даъвосидан кулги кўтарилганда ҳаммага қўшилиб кулди. Ана шунда пайдо бўлган табасум юзидан анча вақт аримади.

Ҳаммадан қизифи шу бўлдики, Ўлмасхон кутгандек унинг танқидидан кейин ҳам Варвара Петровна ўз проектини ҳимоя қилиб сўзга чиқмади. Қурилиш бошлиғи «Варвара Петровна, сўзлайсизми?» деганда у қуруққина қилиб:

— Йўқ, ўйлаб кўришим керак,— деди.

Бу сўзлар Ўлмасхонга оғир ботди. Чунки у ўз даъволарининг қанчалик тўғрилигини Варвара Петровнанинг сўзига қараб баҳоламоқчи, шу билан кўнглини тинчитмоқчи эди. Демак, яна кўнгли тинчимайдиган бўлди. «Варвара Петровна танқидимни тан олмади. Мендан хафа бўлди. Ҳанифа тўғри айтган экан», деган хәёлга келди. Мундоқ атрофига қараган эди, Ҳанифанинг кўзини учратди. Унинг кўзлари «хўш, энди қалайсан? Ким ҳақ экан? Маслаҳатимга кўнмадинг, айб ўзингда» дегандек эди. Бунинг устига, муҳокама тугагач, Варвара Петровна бош инженер билан суҳбатлашиб чиқиб, Ўлмасхон билан хайрлашмай кетиб қолгани унга жуда галати туюлди.

Ўлмасхонининг кўнгли баттар хира бўлиб уйига қайтди. У ўз режасича, шу кеча Варвара Петровнани театрга таклиф этмоқчи эди. Энди нима бўлди? Бирдан унамай қолса-я? Йўқ, яххиси кутиш керак. Қани, охири нима бўларкин. Зора Варвара Петровнанинг ўзи муҳокама ҳақида биронта одамга оғзидан гуллаб қолса. Ана шунга қараб тош қўяди.

— Театрга бормоқчи эдик шекилли, хоним. Кечикмайлик тағин,— деди кутиб ўтирган эри соатига қараб.— Устозингизни ҳам таклиф этмоқчи эдингиз.

— Шундай эди-ю, сал тобим қочиб турибли. Бугун бормасак нима қиларкин,— деди Ўлмасхон. Унинг ўпкаси тўлиб турганини ва ёлғон гапирганини эри пайқади.

— Муҳокаманглар яхши ўтмадими? Наҳот фикрини гизни...

Ўлмасхон бардош беролмади. «Ҳа, эплолмадим. Устозимни хафа қилиб қўйдим» деган фикр яна кўнглини эзиз келди-ю, кўз ёшларини аранг тутиб, ичкари хонага

кириб кетди. У ўз устозини хафа қилиб қўйганига асти чидолмасди. «Наҳотки, Ҳанифа ҳақли?» дерди нуқул.

Эрининг далда беришларидан анча кўнгли тинчиган бўлса ҳам, барибир туни билан тинч ухлолмади: алла-қандай мужмал тушлар кўрди. Эрталаб оғир касал бўлган кишидек ранги синиқиб турди. Лекин руҳи кечагидан анча енгил эди. Соатга қараб анча кеч уйғонганини кўрди-ю, наридан-бери ювениб нонушта тайёрлашга киришди.

— Ухлаб қолибман. Уйғотмабсиз ҳам,— деди у эрига ўпкалаб.

— Ўзингиз ухладингизми?— деб кулди эри,— ухласангиз ҳам тонгга яқин кўзингиз илингандир-да.

Ўлмасхон ҳеч нарса демади — тўғриси ҳам шу эди. У эрини нонушта қилдириб ишга жўнатди-да, қизини боғчага олиб боришга тайёргарлик кўраркан, эшик қўнгироғи жиринглаб қолди. «Ким экан шу маҳалда келган?» деди ичиди. Эшикни очди-ю, қаршисида «безовта қилмадимми бевақт келиб» деб турган Варвара Петровнани кўриб, жуда шошиб қолди: унинг назарида Варвара Петровна уни холи топиб, аламини олгани келган эди. Ундаги ўзгаришни кўриб, Варвара Петровна:

— Тинчликми? Соғмисиз? Нега рангингиз ўзгариб кетди?— деб сўради.

— Иўқ, соғлигим яхши. Яхши келибсиз. Сизнинг шу одатингизни яхши кўраман,— деди Ўлмасхон ўзини тутиб.

Улар ичкари киришди. Стол атрофида бир-бирларига рўбарў ўтиришди.

Варвара Петровнанинг юзида ҳар вақтдагидек хушфөъллик, дилкашлиқ, меҳрибонлик барқ уриб турарди.

— Сафарим қариди, Ўлмасхон Сафаровна, эртага қайтаман. Кетишим олдидан сиз билан бир отамлашай деб келдим.

Ўлмасхон «мана энди бошланди» деб ўйлади-ю, кўз олди жимирашиб кетди.

— Мен кечаги мулоҳазаларни туни билан синчиклаб ўргандим. Мен шахсан розиман. Қани, шерикларим нима дейишади. Айниқса, сизнинг чукур ва атрофлича фикр юритишингиз мени қувонтирди. Бу ақлни балоғатингиздан далолат. Мен хурсандман. Меҳнатларим бекор кетмабди. Сизнинг келажагингиз порлоқлигини ўша вақтдаёқ пайқагандим. Бугун самарасини кўриб,

бениҳоя мамнун бўлдим. Ўз шогирдингнинг балоғатини кўрмак — ўзи зўр баҳт, катта баҳт.

Ўлмасхон қулоқларига ишонмасди. Наҳот шуларни гапираётган Варвара Петровна! У энди жуда шошиб қолди, ҳаяжондан титради, чимчилагандек бежирим бурнининг парракларини майдада, нозик тер босди. Беихтиёр ўрнидан туриб столни айланаб борди-да, Варвара Петровнанинг бўйнидан қучоқлаб, оқ тушган соchlаридан ўпди ва деди:

— Раҳмат... Раҳмат, Варвара Петровна! Сизни хафа қилиб қўйдим деб кечадан берин кўнглим фаш эди.

— Мени? Нега? Танқид қилибми?

— Ҳа,— деди Ўлмасхон аранг.

Варвара Петровна қаҳ-қаҳ уриб кулди:

— Ана холос! Ҳали шунинг учун сизни ҳайратда кутиб олдим, шунинг учун рангим синиқсан денг. Бара-калла! Хафа бўлиш хаёлимга ҳам келгани йўқ. Аксинча, сенинг ўсганингни, балоғатингни кўриб қувондим. Нима, сен менга тухмат қиласмидинг. Йўқ, йўқ, тўғри дарахтдан эгри соя тушмайди! Мана энди, шу гапингдан хафа бўлдим. Чиндан хафа бўлдим. Сен мени билмас экансан! Наҳот мен дўстона фикр, танқиддан юз ўғирсанам. Ахир сен билан бизни балоғатга етказган, улғайтирган мана шу дўстона танқид ва тузатишлар-ку! Демак сен менинг ўрнимда бўлганингда хафа бўларкансан-да. Шундайми?

Ўлмасхон жавоб ўрнида бошини қўйи солди.

— Танқиддан хафа бўладиган киши келажагидан умидини уза берсин. Дўстона, тўғри танқид, тузатишларга қулоқ солмаган одам илдизига бузоқбоши тушган мевали дарахт. Ҳосилдан қолади. Тўғри танқид жizzаки, ўз кучига, уқувига ишонмаган кишиларда қасос, алам туйғусини уйғотади. Ахир шамол ҳам енгилни учиради-да, оғирни қўзғатиб кўрсин-чи!

Бу гаплардан кейин Ўлмасхоннинг бағрига ел тегиб, ечилиб кетди.

— Сизнинг бу ерга келишингилини эшитибманки, хаёлимдан бир нарса кетмайди. Усов билан ўртангизда бўлиб ўтган жанжал эсингизда бўлса керак. Мен билан ҳам юз кўрмас бўлиб кетасизми, деб қўрқардим.

Варвара Петровнанинг юзида яна кулги қўринди:

— Унга ҳеч ким ўҳшамасин! У тухматчи-ку! Устимдан шундай анонимкалар ёзибдикни, ҳар биридан илон пўст ташлайди. Охир нима бўлди у? Эл назаридан қол-

ди. Наҳот сен ўшанга ўхшасанг! Сен юзимга ҳалол, беға-
раз танқид қилдинг. Биз қурувчилармиз. Яшайман
десанг ертўла ҳам жой. Лекин инсонга турар уй-жой
қуриб бермоқчи эканмиз, унинг кўрки, санъати, ҳисоби
ва файзи бўлмоғи керак. Шу ниятда берилган ҳар бир
холис таклиф ва танқид ҳурматга сазовор.

Варвара Петровна нонуштадан кейин ҳам анча сух-
батлашиб ўтирди. Кун тиккага келганда кетишга ижо-
зат сўради.

— Қаёққа шошяпсиз? Ҳали қишининг бир куни бор,—
деди Ўлмасхон кулиб.

— Бир оз дам олмоқчиман. Қексаларнинг мадор
манбаидан бири — уйқу.

Ўлмасхон севимли устозини шу ерда дам олишга қан-
ча қистамасин, у кўнмади, яна бошқа ишлари борлигини
айтиб меҳмонхона тинч, беташвиш эканини қўшиб қўйди.

— Қариб қолибсиз, Варвара Петровна,— деди Ўлмас-
хон устозининг сўнгги жумласидан хулоса чиқариб ҳа-
зил билан.

— Юзимдаги ажинларимни кўриб айтяпсизми? Бу
қайғу ва қариллик белгиси эмас, кулгиларнинг изи. Улуғ
мақсад йўлида хизмат қилувчи кишилар қаримайди, фа-
қат йил ўтган сарп ёши улгаяди.

Эртасига Варвара Петровна бу ердаги ишларини
тутатиб жўнаб кетди. Ўлмасхонни «балофатга етган шо-
гиридим» деб эркалади, қуюқ хайрлашди. Бир ҳафтадан
кейин, «Танқидий фикрларингиз қабул. Проектнинг янги
вариантини кутинг» деган телеграмма келди.

Ўлмасхон беҳад шод, ҳатто ҳовлисидан ўтадиган
ариқ ҳам унинг шодлигига жўр бўлаётгандек чиройли
куйлаб оқарди.

1956

Нима бўлди-ю, вақтида уйланолмадим, ёшим ўтия-
кираб қолди. Тепа сочим сийраклашиб, чаккамда уч-
тўртта оқ тола ҳам пайдо бўлибди. Сўлиган гулдан
асалари бол эммайди — бу тўғри гап. Бўлмаса бирорта
қизга ёқиб қолардим. Ё ўзим хушомад қилишни бил-
майманми? Ундоқ эмас. Атроф-теваракка кўз қири
ташлаб тураман.

Тўғри, бир хил бўйдоқлар бўладики, улардан қизлар
қочади. Чунки ундаи бўйдоқларнинг муҳаббати кеч
баҳорда ёқсан қорга ўхшайди: бир ёқдан ёғса, бир ёқ-
дан эриб кета беради. Меники зинҳор ундоқ эмас. Мен
астойдил севмоқчиман, севилмоқчиман ва сағана тошини
босгунимча бирга-бирга умр кечирмоқчиман. Бу гапим
рост, бунга ишонса бўлади. Ахир мен шу ёшга киргунча
умримни бекор ўтказганим йўқ. Ўн йилликни битириб,
армияда уч йил гражданлик бурчимни шараф билан ўтаб
келдим. Кейин ўқишга кирдим. Уни яхши баҳолар би-
лан тутатдим. Аспирантурада олиб қолишиди. Мана бу
йил иккинчи курсдаман. Хуллас мендан, назаримда,
камчилик топиб бўлмайди: йигитмисан, йигитман. Бир
жонон, санама раста қизнинг қўлтигида юрсам хижо-
латда қўймайман. Бир шохда очилган қўшоқ гулга ўх-
шаб кетсак керак.

Худди шу ниятда Назокатхон билан танишганман.
Тўғриси, мен уни кўз остимга олиб юриб, пайти билан
танишганим йўқ. Тасодифан танишиб қолдик: ўртоғим
Қосим қўярда-қўймай Янги йилни бирга кутишга кўн-
дирди.

— Кўйсанг-чи, ўртоқ, сенлар оилавий ўтириш қилсаларинг ораларингда буғдойга тушган қорамиқдай мен нима қиласман,— дедим.

— Нима қиласдинг, ўғлим Элдор билан уч фидиракли велосипед минишасан,— деди Қосим кулиб, кейин жиддий давом этди:— Бундай одам ёви бўлиб юрсанг, юра берасан-да. Бўйдоқ деган ўтли-шудли бўлади. Томирингдаги қонми, сувми? Иннайкейин биласанки, мен кийимнинг янгисини, дўстларнинг эскисини яхши кўраман. Сен билан биз эски қадрдонлармиз. Пўлатхўжа қўноқнинг теракларига чумчук бола излаб чиқ-қанларимиз эсингдами?

— Шундоқ бўлса ҳам...— дедим бўшашиб.

— Унутма... Турмуш тасодифга кон. Эҳтимол, баҳтинг шу кеча очилар?!— деди дўстим бир нарсага ишора қилгандек. Шу гапдан кўнглим сув ичгандек бўлди, юрагим бир орзиқиб тушди.

Тайнланган кеч бир жуфтгина беш юлдузли коњ-якни хитой қоғозига ўраб, ўртоғимниги кириб бордим. Жамоат жам, фақат менгина етишмагандек. Қосим менга жой кўрсатар экан, тегиши:

— Узукка кўздай ярашиб турибсан, бормайманмиш...
Бўйдоқ.

Сиримни фош қилиб қўйгандан сал ўнғайсизландим. Қаршимда ўтирган холдор, хунукина жувон, ёнидаги кўркам, ёшгина қўшнисига маъноли қараб, пастки лабини тишлаб қўйди. Қўшниси менга бир қаради-ю, одоб билан бошини эгди.

Ҳадемай, соат ўн иккенинг занги урилди. Қадаҳлар жаранги хонани тўлдирди. Қадаҳлар сўнгига қадаҳ улангандек, сўзлар кетига сўз уланиб борди. Бирор соатлар ўтгач, ҳамма ўзи билан овора бўлиб қолди. Бир оздан кейин танца бошланди. Қосим менинг бир четда турганимни кўриб, хотини билан қаршимга келдида, кулиб деди:

— Мана сенга шерик. Фақат сенга ишонаман.

Биз бир жуфт танца тушдик. Ундан кейинги музика жуда тез ҳаракат талаб этгани учун шеригим розилик бермади, бир четга чиқиб томоша қилдик. Қелганимдан бери қаршимда ўтирган, бир неча бор қадаҳ уриштиришга улгурган бояги холдор жувон ҳамроҳи билан биздан сал нарида гаплашиб турарди. Бизнинг танца тушмаётганимизни кўриб, олднимизга келишди. Ҳар бир ҳарака-

тидан нозу истиғно барқ уриб турган кўркам қизнинг исми Назокатхон экан. Қайси мавзуда гаплашмайлик у аралашмади, гоҳ-гоҳ табассум билан гапимизни тасдиқлаб турди. Фақат суҳбат охири бўлиб қолганда мендан сўради:

— Сизларнинг институтга ҳам кириш жуда қийин-дир-а?

— Яхши ўқиган кишига қийинлиги йўқ,— деб кулдим. У ҳам юмшоққина кулди. Қўзимиз учраши. Уялгандек табассум билан кўзини ерга олди. Шу маҳал менинг руҳимни бир нарса ёритгандек бўлди. Дўстимнинг хотини буни фаҳмладими, ҳарқалай бир нарсани баҳона қилиб ташқарига чиқди. Ҳолдор жувон бирпас сұҳбатимизга аралашиб турди-да, у ҳам қаёққадир кетди. Тушунадиган кишининг садағаси кетсанг бўлади, деб қўйдим ичимда. Лекин, у кетди-ю, сұҳбат ҳам бўлинди. Қосимнинг: «томирингдаги қонми, сувми?» дегани ёдимга тушди-ю, ташаббусни қўлга олиб, гап бошладим. Қиз уялиб, қисқа-қисқа жавоб берарди. Лекин унинг бунчалик уятчан эмаслиги кўзидан кўриниб туарди. Мен билардимки, бундай тортинчоқ қизларнинг баъзилари ичидан пишган бўлиб, кейинчалик очилиб кетади. Шунинг учун узоқ мулоҳаза қилмай, танцага таклиф этдим. Аввалига «вой, мен танца тушмасдим-ку» деди-да, кейин розилик билдириди. Эпчилик билан белидан ушлаб, даврага олиб кирдим. У чакки танца тушмас экан. Унинг юмшоқ бадани қўлимни куйдургудек қиздиради.

— Яхши тушаркансиз-ку,— дедим, ўйиндан кейин тирсагидан ушлаб, бир четга ўтарканмиз.

— Вой, зўрға тушдим. Икки марта оёғингизни босиб олдим-ку, яхши әмиш,— деди Назокатхон таманно билан.

— Биз танца тушиб турсак бўларкан,— дедим, «учрашиб турсак бўларкан» деган маънода. У ҳам пайқади шекилли, паст лабини астагина тишлаб, кўзини четга олди. Бу орада ҳолдор ҳамроҳи келиб қолди, кўнгилдан бошланган сұҳбат бўлинди. Мен ўз жасоратимдан терлаб кетгандим. Ташқарига чиқдим. Ҳаво очиқ. Юлдуз чаман. Тун совуғи чарсиллайди. Ҳовлида вақтинча ўзоқ қуриб ош қилаётган ошпаз олдига бордим. Учоқда олов гуриллаб ёнарди.

— Зерикдингизми?— сўради ошпаз.

— Бир оз,—дедим беихтиёр. Аслида оёғим шу ёққа тортган, лекин сабабини аниқ билмасдим. Ошпаз стул қўйиб берди. Оловнинг тапти юзимга уради. Бир оздан кейин елкасига қоракўл ёқали пальтосини ташлаб Назокатхон ҳам чиқиб келди. Мени ногоҳ учратгандек:

— Вой, сиз ҳам шу ердамисиз? Мен сизни кетиб қолдингиз деб юрибман,— деди.

— Сиз кетялпсизми?

— Йўқ, шамоллагани чиқдим. Уйни бир тутун босиб кетдикни... Сиз нима қилиб ўтирибсиз?

— Қишининг гулини томоша қилиб,— дедим оловга имо билан.

— Қишининг гули олов эканми?— кулди у.

— Бўлмасам-чи. Ҳам ўзингизни, ҳам кўзингизни яшнатади.

Олов ҳам ўз мақтовидан фахрлангандек гуриллаш ёнар, Назокатхоннинг кулча юзида товланарди. Мен унга стулимни тутдим. У ўтирмади. Қаршимиздан оромбахш иссиқ ураг, орқамизни муздек туи совуғи яларди.

— Сизларнинг институтингизда ўқиш беш йил-а?— деди бир оздан кейин Назокатхон узилиб қолган суҳбатни бошлаб ва жавоб олмаёқ давом этди,— ўқимай қолганимга ачинаман.

— Ҳали ёшсиз, ўқисангиз бўлади.

— Йтнинг кейинги оёғи бўлиб-а? Мен тенгилар институтни битириб бўлишди.

— Илм олишнинг эрта-кечи йўқ.

У ўзи ҳақида сўзлаб берди. Саккизинчи синфи битирган йили отаси вафот этиб, рўзгор унга қолибди. Яна битта укаси бормиши. Ўзи универмагда ишларкан.

— Наҳотки мени ҳеч кўрмагансиз? Энг ходовой ипак кийимликлар бўлимида ишлайман. Мен сизни танийман. Хосият опам билан бир маҳал киргандингиз. Мен иккаланглар турмуш қўргандирсизлар, деб кўрадим. У киши бошқага турмушга чиқсан эканлар-да, а? — деди Назокатхон очилиб, кейин эркаланиб деди.— Барибир у киши сизга бўлмасди.

— Шунақами? Сабаб?

— Ўзингиз ҳам биларсиз, ўсмоқчиламай қўя қолинг,— деди у карашмали кулиб.

Лекин, мен ҳеч нарса билмасдим.

Қаёққадир кетган ошпаз келиб, сўзимизни бўлди. Назокат: «Совуқ едим» деб қўзғалди. Мен: «Совуқ бўл-

са нега ейсиз, иситиб енг» деб тегишдим-да, у билан бирга юрдим. У мени тўхтатиб:

— Сиз сал кейинроқ киринг,— деди ва ширин бир кулиб, уйга кириб кетди.

Бутун кеча ўтгунча у менга кўз ташламади ёки ташлаган бўлса ҳам мен уни учратмадим. Қайтишда уни ҳамроҳи холдор жувон билан бирга кузатиб қўйдим. Тун совуқ эди. Назокатхоннинг тивит рўмолга ўралиб олганини кўриб тегишдим:

— Аямажизми?

— Аямажиз бўлса, сиз эркакларга нима, бош ювармидинглар?

— Ювса нима?

— Кишининг боши титроқ бўлиб қолади,— деди Назокатхон жиддий. Мен шундай мода билан кийинган ёш қизнинг иримга ишонганига ажабланиб, кўзига қарадим. У рост, деб яна тасдиқлади.

Назокатхон менга ёқиб қолганди. Кунлар ўтган сари унинг ўзидан ҳам хаёли ширин бўла бошлади. Хаёлимда аслидан ҳам чироилироқ кўринар, йўқ фазилатлари очиларди. Энди унинг ўзи эмас, у турган кўча ҳам жозибали бўлиб хаёлимдан ўтарди. Бир кун ҳатто тушимга ҳам кириб чиқди. Ўша куни дарсдан кейин универмагга келдим. Одам кўп. Олдига боришининг иложи йўқ. Бир оз кузатиб турдим. Одам бир оз товсилди. Яқинлашдим. Юрагим эшитилгудек гуп-гуп уради. Рангим ўзгарган бўлса ҳам ажабмас. Назокатхон мени кўриши билан қўлидаги метрни ўйнаб, ёзғира кетди:

— Ҳеч кўринмай деб аҳд қилган экансиз-да. Икки марта телефон қоқдим — бирортасида чақириб беринса қани. Нуқул, қанақа танишлари бўласиз, деб қиҳ-қиҳ кулишади. Сингиллари бўламан, десам, у кишининг сингиллари йўқ, деб ўшқиришади. Жуда қулоқларини бураб қўйган экансиз-да.

— Шунчалик керак бўлиб қолганмидим?— деб кулдим мен. У нозланиб:

— Бемсҳр,—деди. У бугун дадил эди, тортинмасди. Мен ҳам бўш келмай, учрашувга ваъдасини олиб қайтдим.

Буни қаранг, худди ўша ваъда куни эрталабдан ёмғир ёғиб, тушдан кейин роса авжига чиқса бўладими. Таъбим хира бўлиб кетди. Бахтимдан нолидим. Унинг келишига гумон қилиб қолдим. Шундай бўлса ҳам бордим. Не кўз билан кўрайки, кутиб турибди. Мен андак

кеч қолибман — соатларимиз турлича юраркан. Бир оз гаплашиб турдик, кейин кинога кирмоқчи бўлдик. Ёмғир ҳамон ёғарди. Мен уни авайлаб, зонтикни деярли унинг боши устида ушлаб борардим.

— Кўрқманг, қоғоз гул эмасман,— деди у кулиб.

Шу-шу бўлди-ю, гоҳ-гоҳ кечқурунлар учрашадиган бўлиб қолдик. Сўзларимизга муҳаббат шакари сепила бошлади. У энди мени қаердан топишни биларди. Бир куни халқ кутубхонасида мутолаа қилиб ўтирадим, у жуда ясаниб-тусаниб келиб қолди. Пардоз бошқача. Кўш қамчидай бир жуфт улама соч тақим ўпади. Турмуш ташвишидан холи бўлган ёш қизлардек майда қадам билан дикиллаб келди-да, қошимда тўхтади:

— Мунча китобга мукка тушмасангиз, мойн чиқадими. Соғлиқ ҳам керак. Ташқарида бирам ажойиб ҳаво-ки, юрган сари, юргинг келади. Шунча машқ қилганингиз етар,— деди минг бир карашма билан атрофга атири ҳидларини таратиб.

— Машқ қилиб, бойитиб турилмаган илм сувнинг буғланишига ўхшайди, яхши қиз, бирор йилдан кейин ҳеч нарса қолмайди.

— Бугунгисини холодилнийга солиб қўя қолинг, буғланмас,— чиройли кулди Назокатхон.

Ташқарига чиққаҷ, у мени мурти шафтоли тукларидек энди сабза урган бир ўсмири билан таништириди:

— Укам. Бу бечоранинг яқинда етуклик аттестатига имтиҳони бошланади. Бир оз дам олсин, деб ола келдим. Иннайкейин сиз билан танишиб қўйисин — ўқимишли кишиларни яхши кўради.

Кун чиндан ҳам яхши эди. Баҳор кўкраги тўлиб нафас оларди. Куртаклар лабида эрка табассум. Ариқ бўйларида барра ўт.

— Бу киши,— деди йўлда Назокатхон менга ишора қилиб, укасига — сен яхши кўрган институтда аспирант, ўқитувчи. Эҳтимол сени ҳам ўқитарлар. Унда ишинг беш бўлади. Шундаймасми?

Сўнгги савол менга қаратилганди. Ҳазилга олдим.

— Яхши ўқиса, албатта беш бўлади.

— Ундан сал пастроқ ўқиса «беш» қўёлмайсизми, мен учун-а?— кулиб, ўзига ярашган назокат билан деди Назокатхон.

Мен нима дейишимни билолмадим. Бахтимга қаршидан ўт ўчирувчи машина ғайри табиий ҳайқириб ўтди-ю,

фикримизни бўлди, гап чалғиди. Учаламиз концертга кирдик. Қайтишда уларни кузатиб борарканман, Назокатхон укасига деди:

— Мулла акангни яхши таниб олдингми? Ҳа, таниб ол. Қўй боради қўзи билан, бир-бирининг изи билан. Этакларидан маҳкам ушласанг бўлгани.

Уч кун ўтгач, универмагга кирсам Назокатхон олдида бежиримгина бир хотин турибди. Иккиси ниманидир пичирлашарди. Назокатхон мени кўрса ҳам сўзини бўлмади, бош иргаб қўя қолди. Охири хотиннинг қўлига хайрлашган кишидек бўлиб яширийча бир нарса қистирди. Бир четини кўриб қолдим: чек. Бежирим хотин узоқлашгач, Назокатхон изоҳ берди:

— Укам ўқийдиган мактаб директорининг хотини. Бир ҳарса илтимос қилувди, бугун мавриди келиб қолди. Оила бошлиғи бўлганингдан кейин қийин: укам бечора қийналмасин, битириб олсин дейман.— Маъюслангансимон сўзлади у, кейин кулибгина қўшиб қўйди:— Шунаقا Носиржон ака, бурга тутиш учун ҳам бармоқни ҳўллаш керак!

Бу гап ўзига ҳам ғалати туюлди шекилли, гапни бошқа томонга буриб юборди.

— Ҳай, мана булардан бир кийимлик-бир кийимлик олиб қўйсангиз-чи, кениойимга. Керагида излаб тополмайсиз.

— Вақтида, киядиганнинг ўзи билан танлармиз. Ош ҳам эгаси билан ширин. Йўқ бўлиб кетса сиз бор-ку!

Кейинги жумлани учуриқ қилиб айтдим. Назокатхоннинг бугунги хатти-ҳаракати кўзга тушган оқдек менга ғалати кўриниб кетди. Тезроқ чиқиб кетгим келиб қолди. Лекин нимадир ушлаб турарди. Назокатхонг қўзига қарадим: ўша-ўша Назокатхон! Балофатга етган қизларга хос ҳусн билан порлаб турибди, бояги гапни айтган у эмас. Ички бир товуш менга «қаёққа борасан шундай қизни ташлаб. Кимда нуқсон йўқ» деб ҳайқиради. Оёғимдан дармоним қуриди. Ана шунда унинг муҳаббати юрагимга қўрғошин бўлиб қўйилиб кетганини бутун вужудим билан ҳис этдим. Унинг нуқсон бўлиб қўринган хислатлари ҳам дабдаба билан кўқдан тушиб, бир неча дақиқада эриб кетган дўл доналарига ўҳшарди. Менга унинг нуқсони ҳеч гапмасдек туюлди, ўзимни совутдим; тарбиялаб оламан, тарбия тақани тўғрилайди!

Баҳорнинг қанақа қилиб ўтиб кетганини билмадим. Киши баҳтли, шод ҳаёт кечирса шунақа бўлади. Аспирантуранинг иккинчи курсини ҳам мувоффақиятли таомладим. Бир оз қимизхўрлик қилиб, дам олиб келиш мақсадида Қирғизистонга жўнадим. Келишимни кимдандир эшитган Назокатхон гулдаста билан кутиб олди:

— Сиз хабар қилмасангиз ҳам чиқдим. Симсиз телефониз-да, ҳаммасини биламиз.

Чиндан ҳам у ҳамма нарсадан хабардор эди. Кечқурун кўлда сайр қилиб юрарканмиз, мени институтга кирувчилардан имтиҳон олишга тайинланганим билан табриклаб:

— Мен жуда-жуда хурсандман. Бу — катта ишонч, обрўй, баҳт. Дўстингни баҳтли кўрмак ўзи бир баҳт,— деди.

Унинг бу қувончининг сири бир ҳафтадан кейин билинди: укаси шу институтга ариза берган экан! Бу орада Назокатхоннинг ширинсўз, меҳрибон бўлиб кетганини асти қўяверасиз. Соямга салом берарди. Меҳрибонлик муҳаббат элчиси, дегандек мен содданинг меҳри унга борган сари ошиб борарди. Ҳатто бир куни у менга бир украинча кўйлак совға қилди: бу янги нусха эмиш. Яна бир учрашувимизда укасининг институтга киришига кўмак беришимни сўради.

— Жоним билан,— дедим мен,— консультацияларга келиб турсин. Китоблар керак бўлса — марҳамат!

Менинг жавобим у кутгандек бўлмади, Назокатхон ўзгаринқиради.

— Ўзи нимжон. Бир оз дам олса. Институтда ўқиш — куч! Орқасидан бир амаллаб юборишнинг иложи йўқми? Ҳойнаҳой, ҳамма ўқитувчилар танишингиз, ўртоғингиз.

Мен лол бўлиб қолдим. Ўз қулоқларимга ишонмасдим. Бу илтимос бўйнимга осилган тош бўлиб бошимни эгди. Олдимда икки масала турарди: ё ошна-офайнигарчилик, ё ҳаққоният, тўғрилик. Кейингиси енгди. Очик айтиб қўя қолдим:

— Бу иш яхши эмас-ку, Назокатхон. Бу қўлимдан келмайди.

Шу гапни зўр билан айтдим-у, кўз олдимдан унинг укаси ўқиган мактаб директори хотинининг чекли қўли ўтди. Назокатхон бирдан мен танимас ҳолда ўзгариб

кетди, бурун катаклари кенгайиб, оқарди, қошлари чимирилди, лаблари чўччайди.

— Нокас тароғлик бўлди, тароғи керакли бўлди!— деб бир ўшқирди-да, шартта бурилиб, орқасига қарамай юриб кетди. Мен ўз ўлжаси қўлидан учган овчидаи ортидан термилиб қолдим. Ўз кўзларимга ишонмасдим Эртасига кўчада кўрдим, тескари қараб ўтди. Уч кундан кейин бир бола келиб, у совға қилган «янги нусха» украинча кўйлакнинг пулини сўради...

1956

Ҳалигина пари олинган уккидек ҳурнайиб ғазаби тўлиб, кимга заҳрини сочишни билмай турган Ҳури хола эри эшикда қўриниши билан унга ташланди:

— Ҳа, қариб қўйилмаган, ачиб суйилмаган чолғ Қизимда нима аламингиз бор эди, дунёдан тоқ ўтсин, девмидингиз? Эл-юртдан уялмадингизми? Эшитган одам нима дейди?

Рустам ота гап нима ҳақида бораётганини дарров фахмлаб олди. Ҳудди шундай бўлишини боя хаёлидан ўтказган эди. Ҳотинининг «куйди-пишди»лиги ўзига маълум. У ётиғи билан жавоб қайтарди.

— Нима дерди, Рустам чол яхши қилибди, дейди-да.

— Ҳа, яхши қилибди! Ҳамманинг сизга ўхшаб қаригандага мияси суйилмаган, эс-хуши бутун. Олдингизда индамаса ҳам орқангиздан кулишади.

— Орқадаги гап — охирдаги нушхўрд. Мард бетга гапиради. Ҳеч ким гапираётгани йўқ.

— Қулоғига пахта тиққанлар эшитмаётган бўлмаса...

— Ҳа, баракалла! — деди Рустам ота дадиллашиб, — ўз қадрини билган кишилар бирорвлар ўртасидаги гапга қулоқ осмайди. Сен ҳам қулоғингга пахта тиқиб олсанг яхши бўларди. Ишдан ҳориб-толиб келган кишини эшикдан қопиб кутмасдинг, олдига дастурхон ёзиб, кеъин...

— Ўша сизга ақл ўргатганлар ош дамлаб кузатмати-да! Бу душманнинг иши. Ўша сизга ўргатган — душманнингиз. Мирсаиджонга кўз тика-тика қўлини бурнига тиқиб қолганларнинг иши! Сиз лақма ўшаларнинг

гапига учиб, қўй оғзидан чўп олмаган йигитни хафа қилиб ўтирибсиз... Шошиб-пишиб фотиҳа қилмай — мен ўлай. Энди эл-юрт кўзига қандай қарайман, шарманда бўлдим! Фотиҳа бузилса нима деган одам бўласиз?!

Шу гап Рустам отанинг иззат-нафсига тегди:

— Қизимни ташлаб кетади, деб юрагинг ёриляп-тими? Шунга ташлаб кетса, кета қолсин. Боши туйнукдан чиқиб кетаётган қизим йўқ. Мен уни ақлли, ҳушли деҳқон деб ўйловдим.

— Ҳа, бўлмаса аҳмоқ эканми?

Рустам ота шарт кесди:

— Агар шунга хафа бўлса — аҳмоқ. Бу гапга асл деҳқон хафа бўлмайди.

Ҳури холага бу гап дард устига чипқон бўлди. У бидиллаб кетди:

— Йўлини тўсиб, қархисида қўлнингизни пахса қилиб, дакки берингу — хафа бўлмасин!

— Кўриб турувдингми? — кулди Рустам ота.

— Ҳа, кўриб турувдим,— деди жеркиб Ҳури хола,— кўрмасам ҳам биламан, сизнинг қанақа қилиб гапиришингизни. Онангиз сўзга туққан! Ү сизнинг икки туғишиб бир қолганингизми! Минг қилса ҳам бегона! Колхознинг сиздан бошқа киши кутувчиси йўқми? Эртага қизингизга уйланиб, куёв бўлай деб турган кишига дакки бергани уялмадингизми? Қандай юзингиз чидади? Қизингиз кўзингизга кўринмадими? Жилла бўлмаса ўшанинг иззатини қилинг эди!

— Олов учқунларидан қўрққан киши темирчилик қилмайди, хотин. Мен зўрлаб куёв қилаётганим йўқ.

Ҳури хола «ўзлари севишган, топишган деб оёқ ости қиласерасизми!» деб бидиллай бошлаган эди, Рустам ота унинг сўзини бўлди:

— Ҳай хотин, мунча чакагнингга суяна бердинг. Шунча кучинг бор экан, далага чиқ! «Ҳа» деган карвонга дармон. Осмон ҳам сенга ўхшаб, заҳрини қаерга сочишни билмай турибди. Ҳар соат ғанимат.

— Ҳа, энди ёпишмаганингиз мен қолувдим. Вақтида терганман, энди ёшлар терсин. Ярим челак сувни сойдан зўрга олиб чиқаман-ку...

— Бўлмаса ёшларнинг йўлига чўп ташлама.

Ҳовуридан тушунқираган кампир киноя билан кулди:

— Сиз ҳам ёшми?

— Ҳа, бўлмасам-чи! — деди чол.

— Бу яқин орада ойнага қарадингизми?

— Қараганда нима! Кишининг ёшини ажин босгаш юз, бевақт оқарган соч-соқол эмас, иши, меҳнати белгилайди. Эчки ҳам соқолли туғилади-да!

Рустам ота касалманд хотинининг хафалиги ошиб кетиб, эртага кўрпа-ёстиқ қилиб ётиб қолишидан қўрқ-кан эди. Унинг шунаقا одати бор: хафаликни кўтаролмайди. «Тўқнашув»нинг бунчалик «хайрли» тугалла-нишидан мамнун бўлган Рустам ота бари билан ағдарма этигининг чангини қоқиб ичкари кирди. Ҳовуридан тушса ҳам кампир ҳамон гапириб келарди.

— У бечора қопни тешган сичқонга ҳам ҳеч нарса демайдиган мўмин-қобил йигит бўлса-ю, сиз унга дакки берсангиз...

— Мунча узиб улай бердинг, хотин. Ке қўй! Овқатни олиб кел. Йигит деган шунаقا қилиб пишийди. Пишиган лойнинг чинниси тоза бўлади. Уларнинг оёқ яланг лой кечиб, колхознинг оғир хизматини қиласидан пайти. Ҳа, сен унинг ёнбошига пар ёстиқ қўя берма, эртага тўрга чиқиб олиб, қизингга «Мени ишлаб боқ!» дейди. Ўшанда нима қиласан? Уйингга кўчириб келиб боқасанми? Йигитнинг баҳтини меҳнатнинг зўри очади.

Кампирнинг хира кўзлари чарақлаб кетди. У хаёлига келмаган гапларни эшитарди. «Чиндан ҳам шундай бўлиб қолса-я!» — деб ўйлади.— Дунёда нима ёмон: «қайтиб келган ёв билан қайтиб келган қиз!» Аслида бу гапларни Рустам ота жўрттага айтган эди.

Воқеа бундай бўлган эди: эрталаб нима бўлди-ю. Рустам ота Чуқурсой томонга ўтиб қолди. Бўлмаса унинг бригадасининг бу томонда ери йўқ. Мусобақадош Норбўта карвоннинг бригадасида теримнинг бориши суст. Шундан хабар олмоқчи бўлди. Дўстингга отилган кесакнинг чангি сенинг ҳам кўзингга тушади-да, ахир!

Рустам ота мусобақадошининг ерига кириши билан арава йўлига тушиб олди. Атрофда ишлаётганларни кўздан кечирди, баъзи ердагиларни кўзи билан санаб қўйди. Бирдан кўзи Султонсовуқча тушди. «Модомики,— деб ўйлади ота,— шу Султонсовуқни далага чиқариби, демак, энди иш жўнашиб кетади». Шу пайт ўйл устида ётган бир сиқим пахтага кўзи тушди. Уни тупроқдан олиб, «пупф-пупфлаб» тозалади. Сал юргач, яна учратди. Уни ҳам олди. Лекин бу гал шундайгина энгашиб эмас, жаҳл билан ўзича сўкиниб олди. Чунки ундан

нарироқда яна бир сиқими сочилиб ётарди. Энди чолнинг тоқати тоқ бўлди. Пахтани қўйиб, арава кетган томонга қаради. Нимагадир қулоқ солди.

Рустам ота энг кейин кўрган бир сиқим пахтани ҳам гижимлаб олди-да, арава изидан кетди. Юрагидан тозиб чиқаётган ғазаб қадамини борган сари тезлатарди. Ўзича ниманидир пичирлаб борар эди. Бунинг устига йўлда яна бир-икки жойда тўкилган пахтани кўрди. Бу унинг ғазабини баттар қайнатиб юборди. Ҳадемай араванинг қораси кўринди. Ота қадамини тезлатди. Унинг бу хилда шошилиб кетаётганини кўрган одам «бу кишининг арзанда фарзандининг касали оғирлашиб қолибди-ю, докторга кетяпти» деб ўйлаши мумкин эди. Отанинг манглайнин муздек тер босган бўлса-да, ўзи тобора қизиб борарди. Аравага етиб боргунча сабри чидамай, эллик метрча қолганда, «арава!» деб бақирди. Аравакаш эшитмадими, индамади. Ота яна такрорлади. Бу гал арава тўхтади. Аравакаш отдан тушиб, қаршисига чиққунча, Рустам отанинг ўзи етиб келди-ю, от устида ўтирган бўлажак куёви Мирсанд эканини кўриб, ҳайрон бўлиб қолди. Ахир бу биттаю битта қизи, кўзининг оқи-қораси, умрининг гавҳар донаси Комиланинг кечаги ҳафта унаширилган куёви. Ҳадемай йиғим-терим олиниши билан тўй бўлади, фақат шунга қараб туришибди.

Рустам ота қизиқ ҳолга тушди. Уни икки нарса қийнарди: бири бўлажак куёванинг иззат-ҳурмати, иккинчиси тўкилган меҳнат терининг қадри. Инсофли киши учун иккаласи ҳам азиз. Буни яхши билган миришкор деҳқон Рустам отага бири деб, бирини қурбон қилиш жуда мушкул эди. Иккиси икки бармоги: қайси бирини тишласа, ўшаниси оғриди. Қаршисида турган Мирсандни номус букиб, куёвлик ҳаёси босиб бошини қуий эгди. Бир лаҳзада терга ботди. У Комилахонга унаширганидан бери, қайната ёки қайнанасига кўриниб қолишдан уялиб, уларнинг боғ кўчасидан ўтмайди. Йўлни узайтиб бўлса ҳам нариги кўчадан юради. Улардан биронтасини узоқдан пайқаб қолса, ўйлини терс солиб кетарди. Энди бўлса қайнатаси унинг қаршисида турибди. Қўлида тупроққа қоришган бир сиқим пахта. Рустам ота дарров ўзини тутиб олди. Аммо шахтидан қайтмади. Етифи билан деди:

— Мана шу сизнинг аравангиздан, ўғлим. Киши бундай бепарво бўлмайди. Асл деҳқонга бу нонтекилик.

Рустам ота тупроқقا қоришган қўлидаги пахтага яна кўзи тушибми, ёки Мирсаиднинг куёви эканини бирлаҳза унутиб қўйдими, бирдан тутақиб кетди:

— Кун тифида кетмон урмабмидингиз, қадрига етмайсиз. Аравангиз орқасидан туюя ямлаб кетса ҳам билмайсиз. Номус керак кишига. Сиздан бошқа нимжонроқ киши йўқ эканми арава мингани! Уят!

Мирсаид чурқ этмади. Боши яна қўйи тушди. У оғир, уятчан йигит эди. У, ота қачон кетди, қўлидаги тупроқقا қоришган пахтани қачон аравага иргитганлигини кейинчалик аранг эслади. Ота кетгандан кейин анча вақт караҳт бўлиб туриб қолди. Отга «чув» деб қамчи босиши эсига ҳам келмасди. Фақат, от думи билан ниманидир ҳайдаб бир сесканганда, ўзининг от устида ўтирганини пайқади. Атрофга бир назар ташлаб терини артди-да, отга қамчи босди. Сал юриб, яна тўхтатди. Эгардан тушшиб, арава орқасига ўтди. Қопларга назар ташлади. Оғзи бўш тикилган қопнинг пахтасини шиддат билан муштлаб, пухталади. Ундан бир кафт пахта ҳали-замон тўкилгудек ҳурпайиб туради.

Аравадан тушаётуб отанинг тўп сада остида раис билан гаплашаётганини кўрди. Юраги шифиллаб кетди. «Албатта менинг ҳақимда гаплашяпти, эй! Аравасидан ўргилай! Нимага энди, Аширмат букурнинг гапига лаққа учеб, аравасига миндим, ўша далам тинч эмасмид! Қанча гап-сўз, шармандалик. Ҳали чол «бунақа аравакашга берадиган қизим йўқ» деб қолса-я. Ана унла...»— Мирсаиднинг юраги орқасига тортиб кетди. Аравани жадал ҳайдади. Бригаданинг ери этагидан пахта тераётгандар ичидан Аширмат букурни чақирди-да, у етиб келгунча отдан сакраб тушди ва қамчини тутди:

— Раҳмат, карвон! Бопладинг! Учинг бормиди, букур! Ҳе, ўша аравангдан ўргилай! Қани, этакни еч!

— Ўзи нима гап, хўжам, тинчликми? Эзилиб кетдингиз, бирор кун қаддингизни ростлаб олинг, деб бергандим. Ёқмаса, ўзимизга тан. Ҳафа бўлмасинлар. От ҳам ҳунарини чавандозга кўрсатади.

Мирсаид Аширмат·букурнинг гапларига қулоқ солмай, унинг бўйнидан этакни чиқариб олиб, пахтазорга кириб кетди. Кечқурун Комилахонни кўргандагина уечилди:

— Дадангиз бугун мени тоза тузлади-да. Ер ёрилмади-ю, ерга кириб кетмадим. Гуноҳинг бўйнингда бўлган-

дан кейин кишининг тили буралмай қоларкан. Бошимни кўтаролмасам-а. Маст кишидек учиб қолибман. Бир вақт бундоқ қарасам, йўл устида — отда бир ўзим турибман, отангиз кетиб қолиптилар. Мени жин урмаса, туппа-тузук пахта териб турган одам Аширмат букурнинг фирром сўзига учиб, бугун арава минаманм! Бунинг устига йўл-йўлакай пахта экиб боришими айтмайсизми!

— Эшитдим,— деди Комила.

У, бу гапни кундузи эшитган, ўшандан бери «Мирсаид хафа бўлмадимикин? Дадамнинг тезлиги қурсин» деб ташвишда эди. Мирсаиднинг очиқ юз билан кутиб олиб, дилхушлик билан ҳикоя қила бошлаганидан қувониб кетди. Шундай бўлса ҳам атайлаб сўради:

— Ишқилиб хафа бўлмадингизми?

— Тўғри гапдан киши хафа бўлмайди. Отангиз ўзи учун бунчалик куйинаётгани йўқ. Азбаройи жони ачиғанидан деди. Ўша тупроққа қоришган пахта сиз-бизнинг меҳнатимиз эмасми! Дадангиз-ку, ўзимизники, борди-ю, райкомданми, райисполкомданми бирортаси кўриб қолганда нима деган одам бўлардим. Дадангизни хафа қилиб қўйдим, яхши бўлмади.

— У киши кек сақламайди. Агар сиз сақламасангиз...

— Мен сиз учун ҳаммасини мойдек сингдириб юборман. Рост, аввалига анча оғир ботди, лекин сиз ёдимга тушишингиз билан баҳорда ёқсан қордек дарров эриб кетди. «Минг қилса ҳам қайнатам-да!» деб қўйдим. Ахир, отангиз менга ёмонлик кўзламас, ё пичоқ ўз сочини кесадими?

— Йў-ўқ!— деди Комила эркалангандек,— ахир сиз ҳам ўшанақа қилиб арава минмассиз энди.

Комила бу билан «энди сиз шунақа ножўя иш қилмассиз» демоқчи эди, буни Мирсаид пайқади.

— Аравасини елкамнинг чуқури кўрсин.

Мамнун кўзлар табассумда учраши. Узоқдан уларни кузатиб турган Ҳури холанинг ҳам қаримсиқ босган юзига табассум югуриб, ажинлар орасида сингиб кетди.

Кўнглидан: «Э аттанг, чолни бекор хафа қилган эканман», деган фикр ўтди.

Садирнинг айтишича, унинг ўтган умрида энг қувончли куни битта. У ҳам бўлса мана шу иккинчи хотини Мехрининг ҳомиладор бўлганини пайқаган куни! Агар хотини омон-эсон бўшалиб олса, иккинчи баҳтли ва зўр қувончли куни шу бўлади...

Дард ҳам қизиқ нарса: кутмаган жойда бошланиб қолади. Бўлмаса Садир Мехрининг қорни сал қаппайиб, эл қўзига ташланадиган бўлганидан буён ташвишда. Ишда ҳам баъзан хаёли уйга кетади, қўшнисини безовта қилиб бўлса ҳам кунда бир маҳал телефон қилишни кандо қилмайди. Ишдан чиқиши билан уйига югурди. Йўлда учраб гапга тутмоқчи бўлган таниш-бишлишларига не-не ёлғон важларни кўрсатиб, қўлидан чиқиб қочади.

Узоқ йўл юргизмай (ваҳоланки, докторлар ой-куни яқинлашган сари кўпроқ юришни маслаҳат берарди) əрдоқлаб олиб ўтирган хотини зерікиб кетиб, далани қўнгли тусаб қолди.

Садир сапчиб тушди:

— Шу вақтда-я? Э, қўй-э!

— Ҳа, билиб қўйинг: болангизнинг бурни қийшиқми, қўзи ғилами бўлса, мендан эмас,— деди Мехри ана шундай пайтларда қўл келадиган эркалик билан. Гапнинг бу оҳанги Садирга таниш эди. У кимдандир эшитган эдики, ҳомиладор хотиннинг раъйини қайтариб бўлмайди. Қайтарса, болага зиён: унинг бирон ери кемтик, нуқсонли бўлиб туғилади. Садир эса, шунча йил орзу қилиб юрган фарзанднинг нуқсонли бўлиб туғилишини ас-

ти истамасди. Ахир у Мехрининг «боши қоронғи» кезларидан озмұнча қийналдымы. Хотини ҳам үчакишигандек лимонга боши қоронғи бўлди. Октябрь ойида бу томонларда лимон қаёқда: отлиққа йўғу! Садир бир ўртоғидан илтимос қила-қила Батумидан олдириб келтирди. Бу гал ҳам хотинининг истагини қайтаролмади. Кўчага чиқиб, такси машинани тўхтатди, ўтиргичининг пружинасини қўли билан босиб кўрди. Кейин ёллади.

— Мехрихон, мана машинани олиб келдим, лекин шу ишингга юрагим чопмай турибди,— деди у эшикдан кириб.

Улар ана шундай дилхушлик билан қариндошлариниға қулупнайхўрликка чиқиши. Чиқиши-ю, дастурхонга қулупнай тергани кетган бола келгунча Мехрини дард тутиб қолди. Улар тушиб келган такси аллақачон кетиб қолган, бу атрофда шу пайтда енгил машина топиш амри маҳол эди. Шаҳарга яқин бўлса ҳам майли экан! Бунинг устига қариндош хотин ҳам рози бўлмади:

— Вой, айланай, шу вақтда қаёққа олиб борасиз, шаҳар озмунча йўлми! Районнимиз туғруқхонасига олиб бора қолниг, шаҳарникидан қолишмайди: топ-тоза, ёруғ. Доктор ҳам пишиққина жувон.

Қариндош хотин Мехри атрофида гирдикапалак бўлар, Садирнинг «ҳа, майли» сўзини тоқатсизлик билан кутарди. Садирнинг ҳам бошқа иложи қолмаганди.

Мехри оғриқдан жағ тишларини бир-бирига босиб, дардга бардош берар, маъюс, илтижо кўзларини эрига тикиб турарди. Унинг бу қарашидан, «Раҳмингиз кела-дими? Фарзанд орзузи билан унга етишмоқ ўртасида шундай мashaққатлар бор» демоқчи эканини тушуниш мумкин эди.

Машина келди. Шофер ҳам Мехрининг азобини ҳис этаётгандек дам-бадам сигнал бериб, юришни тезлатаrdi.

Қариндош хотин айтгандек, туғруқхона яқиндагина пишиқ гиштдан солингац, қўш қаватли кўркам оппоқ бино экан. Садир хотинининг бир қўлтиғидан ушлаганича ҳамширага кўмаклашиб зинадан чиқди. Биринчи хонага киришлари биланоқ Садирга қолишини таклиф этдилар. Сал ўтмай Мехрининг кийим-бошларини дуррасига тутиб чиқиб Садирга берган ҳамшира навбатчиға қараб:

— Баҳриниса Раҳимовна бош врач кабинетидами?— деб сўради. У жавоб бериб улгурмаган ҳам эди, юқори қават зинасидан:

— Я иду!— деган товуш келди.

Бу товуш Садирни титратиб юборди. Бу товуш унга таниш, ўн йиллар давомида унинг қулоғи остида туну кун жаранглаган, эркалаган, куйлаган товуш эди: бу ўша, Садирнинг боласизлик важидан ажралишган хотини Баҳринисанинг товуши эди! Сал ўтмай зинадан пицдираб ўзи тушиб келди. Бу ўшанинг айни ўзи — ўша тулаш қошлар, чилвир соч, ҳеч кулгига тўймаган гилосдек қип-қизил лаблар... Ўзини тутиб олган ўрта ёш жувонлардек турғун ҳуснга кирган. Оқ халат унга жуда ярашганди.

Баҳриниса зинадан тушаётуб унга тикилиб турган Садирни таниди-ю, бир зум энтикди, сал ортига тисарилди, лекин шу лаҳзадаёқ ўзини тутиб олиб, енгилгина бош иргаб саломлашди. Бу салом Садирга берилдими, ёки уни сўроқлаган ҳамширага берилдими — билиб бўлмасди. У зинадан қандай шижаот билан тушиб келган бўлса, худди шундай суръатда баланд пошна туфлисини тақиллатиб ўтиб кетди. Унинг нарироқ бориб ҳамширадан: «Шу турган кишининг хотиними, келтирилган ҳомиладор?»— деб сўрагани Садирнинг қулоғига кирди. Юраги орқасига тортиб кетди. Қўлидаги тугунчалиси тушиб кетишига сал қолди. «Наҳотки, шу Баҳри, Мехрига доялик қилса!» деган фикр унинг хаёлидан чақмоқ тезлигида ўтди.

Унинг ташвишини пайқагандек навбатчи сўради:

— Виринчи туфишими?

Садир бош иргаб тасдиқлади.

— Биринчиси оғирроқ бўлади, лекин қўрқманг. Баҳтингзис бор экан. Баҳриниса Раҳимовнанинг навбатчилигига тўғри келдингиз. У эпчил, тажрибали.

Садирнинг кўнглидан «қачон доя бўла қолган экан, оддийгина ҳамшира эди-ку» деган фикр ўтди.

Навбатчи Садирдаги қизиқ ўзгаришни пайқаб, «бу одам ўзи соғми?» дегандек бошидан-оёқ кўз ташлади. Ахир, у ҳомиладор хотинларни олиб келган эркакларни кўп кўрган, лекин бунга ўхшаганини учратмаган эди. Чиндан ҳам Садир қаттиқ ташвишда эди. Айниқса, хотинини Баҳриниса туғдиришини эшитгандан кейин ўзини қўйгани жой тополмай қолди. Унинг назаридаги Баҳ-

риниса ғайирлик қилиб болани нобуд қилаётгандек бўларди.

Ахир у фарзанд орзусида озмунча куйдими! У отона орзуси билан ёш уйланганди. Аввалига фарзандни ма, унча қадрига етмади. Кейин-кейин тенгдошлари уйланиб, битта-иккита болалик бўлганда, у ўкина бошлиди. Ҳаммадан ҳам қалин ўртоғи Бурҳон тамтамнинг Биринчи май куни ўғлини елкасига миндириб, қўлига байроқча тутиб параддан ўтгани жуда кор қилди. Ўша куни уйига келиб ҳеч қаёққа чиқмади, концерт бериб турган радиони ўчириб қўйди. Кечқурун туз тотмай ётиб, эртасига ваъдалашган бўлса ҳам маёвкага бормади. Бу соатларда унинг фикрига фарзанд келар, дадалаб қаҳ-қаҳ урар, бўйнига осилиб, эркалик қиласди. Бу фарзанд жуда-жуда узоқда: ойдай кўзини ёритарди-ю, кўнглини иситмасди!

Бу фарзанд ана шу хотини Баҳринисадан бўлмайди. Докторларнинг фикри шундай. Буни билган Баҳриниса-нинг кўнглига, бир неча йилки, чироқ ёқса ёримайди. Бу хонадонда ўзини омонатдай, вокзалда юки устида ўтирган кишидай ҳис этади. Эрининг сал хафалигини шунга жўяди, айб ўзида эканинни эслаганда юраклари зирқираб, ҳали-замон даҳшат тоғи устига ағдариладиганга ўхшайди.

Фарзанд кўрмаслигига ишончи комил бўлгач, гуноҳига кечирим сўраётган айбордек эрига кўз тикиб қолди. Имкон борича унинг кўнглини овларди, лекин ўз кўнгли ёришмасди. Маҳалла-кўйда тўй-томоша бўлса, буларнинг уйини оғир сукунат босарди. Дастурхон қандай ёзилиб, қандай йиғилганини билмасди бечора Баҳриниса. Вазмин қадамлар билан эшикка йўл олаётган эрининг орқасидан маъюс қараб қоларди. У билардики, эри фарзандсизликдан ўқсиб, кўнгли намозшом бўлиб чиқиб кетаётир. Лекин иккисининг юрагида бўлган бу армон тилга чиқмасди, тилсиз ҳам иккиси бир-бирининг қалбида ётган зил-замбил қайгуни, армонни кичик бир ҳаракатдан тушуниб олардилар. Ана шунда, юраклари суви сиқилаётган анордек эзилиб кетарди, ҳалқумига ёнгоқдек нарса тиқилиб келиб, нафасини қайтарарди; бу — қалбларнинг чуқур тубидан сирқиб-сирқиб йиғилиб, сўнгра тўлқин уриб ташқарнга интилаётган изтироб, алам эди.

Охири Баҳриниса бардош беролмай ҳаммасини га-

пириб берди.. Бу унга жуда оғир бўлди, чунки улар аҳил яшардилар, бирининг елкасидаги юқ иккинчиси-нинг белини қайиштиради.

Баҳриниса дам олиш кунларидан бирида нонуштага тайёрланган ширчойни гардим косада эри олдига қўйиб, ўзиникига нон тўғрар экан, Садирни аста ер остидан кузатиб, деди:

— Садир ака, ўзингизни бундай қийнаманг, занг — темирни, қайғу-армон — кишини адою тамом қилади. Агар рози бўлсангиз менда бир фикр бор.

Садир ялт этиб хотинига қаради, ширчойда маза қилиб ивиган оппоқ нон қошиққа олинганича, оғзига етмай косанинг лабида тўхтаб қолди. Баҳриниса гап бошлишга бошлаб, фикрини қай йўсинда ётиғи билан айтишни билмасди. Мўлжалидан ортиқ юқ кўтариб тепаликка чиқиб бораётган одамдек нафаси тиқилди, тиззалидан дармон қуриди.

— Садир ака,— деди у ниҳоят,— розилик берсангиз, биронта бола асрардим, детдом бераркан.

— Бирорнинг боласиними?!— деди Садир афтини буриштириб. У бошқа сўз айтмади. Қошиқдаги ивиган оппоқ нонни яна косага туширди, хотинида шу кунгача пайқамаған бирор нарса пайқагандек унга тиқилиб қаради ва бир оздан сўнг:— Мен фарзанд кўришдан умидимни узганим йўқ!— деди.

Баҳриниса боладан гап очганига пушаймон қилди. Садирнинг бу сўзи унинг юрагини очиб ташлаган, сўнгги кунларда йиғилиб ётган аламдан қалбини бўшатган, шу билан бир вақтда Баҳринисанинг умид косасини чил-чил қилган эди. Баҳриниса ҳанг-манг бўлиб қолди. «Ширчой, ширчой бўлмади, заҳар-зақум бўлди»— деб эслади кейин у.

Баҳринисанинг бугунги гапи керосин қуйилган хашакка гугурт еқиб ташлаш билан баробар бўлган эди. Чунки сўнгги кунларда Садирнинг муносабати ўзгариб қолганди. Унинг яқин қариндошларидан бири ўтган ҳафта бир ўтиришда гап очиб, «Садиржон, қилган меҳнатларинг, орттирган давлатларинг орtingда туёқ қолмагач, бекор. Фарзандинг ишдан қайтганингда бўйниңдан қучоқлаб, ширин тцли билан «ада!» деганига нима етсин!» деб унинг кул босган юрагини яллиғлатиб юборган эди. Баҳринисанинг меҳрибонлиги, муҳаббати, садоқати, ҳамма-ҳаммаси ўша дақиқада унутилган,

бошқага уйланишга энди астойдил аҳд қилган эди. Тўғри, унинг бу ниятини пайқаб, бола асрарни масла-ҳат берувчилар бўлди, лекин бунга баъзи кишилар «ҳали белинг тўла фарзанд, бола асрар нима қилиб юрибди» деди. Хуллас, Садирнинг ниятини бузишди, йўлдан уришди. Саратонда бўйра остида ётган етти бўғинлик чаён заҳридай бугунги аччиқ жавоб Садирнинг юрагида анчадан бери қат-қат бўлиб ётган сокин вулқоннинг отилиши эди. Бу жавобни Баҳриниса албатта кутмаган эди. Шу-шу бўлди-ю, оиласа совуқлик тушди, ғишил қолипдан кўчди. Баҳринисанинг тўғри гаплари ҳам эрига ёқмайдиган бўлиб қолди, ҳатто бир куни «сўзларингдан эзғилаб ўлдирилган қандала ҳиди келади» деди. Яна бир куни у қўноқ ўтни кўрсатиб:

— Бу нима? — деди. Ҳеч нарсадан хабари йўқ бечора Баҳриниса, оқ кўнгиллик билан жавоб берди:

— Қўноқ ўт.

— Буғдоига ўхшайди, тўғримасми? Бошоги худди буғдоиникининг ўзи. Содда шаҳар одами буни буғдоига ҳам дейиши мумкин, шундаймасми?

— Тўғри.

— Бошоги-ку бор, буғдоига ҳам ўхшайди, лекин ичидан дони йўқ, қуруқ савлат. Сен ҳам худди шунга ўхшайсан: донсиз буғдоий нусха бошоқсан.

Бу сўз Баҳринисанинг у ёқ-бу ёғидан ўтиб кетди. Шу кунгача бўлган аччиқ-чучук ҳам бир бўлди-ю, бугунги бу ўхшатиш ҳам бир бўлди. У бардош беролмади, кўзига жиқ тўлган ёшни аранг тутиб:

— Шу ниятингиз бор экан, очиқ айта қолмайсизми, мунча хўрламасангиз кишини!! — деди-ю, унга қарамай югуриб кетди. Унинг пиқиллаб йиғлаб бораётгани эшитилиб турарди. Шу қетганича у Садирникига қайтиб бормади, бир ойча ўтгач, ажралишди.

Ҳозир мана шу нарсалар хаёл китобида бирма-бир варақланди-ю, Садирни янада бетоқат қилиб қўйди. Боланинг нобуд бўлишига у энди аниқ ишонарди: Баҳриниса қасос олади, бутун таҳқиrlангандар, ўксинганлари эвазига қасос олади!

Шу фикр хаёлига келиши биланоқ уни совуқ тер босди. Тезда чора кўриш тарафдудига тушди:

— Баҳриниса Раҳимовнадан бошқа одамнинг доялик қилишини илтимос этиш мумкинми? — деди у ўзини аранг босиб.

— Унга ишонмайсизми? — деди навбатчи ажабланиб.

— Йў-ғ... шундай бўлса ҳам...

Садир фикрини айтиб улгурмасдан бояги, Мәҳрининг кийим-бошларини олиб чиқиб берган ҳамишира пайдо бўлиб: «хотинингиз қиз туғди» деди ва салгина тұхтаб қарши томонга ўтиб кетди. Садирнинг қулогига чақалоқ йиғиси киргандек бўлди. Хаёlinи исканжага олиб турган даҳшатли ташвишдан қутулгандек кўринди. Қандай овқатлар келтиришини сўраб, саросимада қолган кишидек аланглаб ташқарига чиқиши билан кўнглини яна ғашлик тумани чулғаб кела бошлади. Бу ғашлик қариндошиникига етиб боргунча яна зўр ташвишга айланди. Гўё унинг назарида не-не умидлар билан топган боласи ёвуз ниятли киши қўлида қолгандек, дунёга келиш вақтида улгурмаган-у, энди албатта нобуд қиладигандек кўринарди. Кечаси билан ўнқир-чўнқир ерга чопон ташлаб ётган кишидек ёнбошидан ер ўтиб ухломади, аллақандай бир-биридан дудмал, чалкаш ўйлар тинчлик бермади. Эрталаб уйғонгана мияси ичига худди арилар қамалиб қолгандай гувилларди. Қариндош хотин ундаги бу безовталикни севинчдан кўриб бир нарса демади.

Нонуштадан сўнг Мәҳрига керакли нарсаларни рўмолга туғиб, Садирнинг қўлига тутди. Садир минг хаёл билан йўлга тушди. Мәҳри шошинқираброқ ёзилган бир хат чиқарди. Хатда эрининг Баҳринисадан бадгумон бўлиб, зўр ташвишда юрганини билгандек Баҳриниса ҳақида ёзарди: «...Шу опа бўлмаганда билмадим нима бўлардим. Жуда қийналдим. Шунда бечора оёғи куйган товуқдек атрофимда зир югурнишини кўрсангиз, бегона ҳам шунчалик жонкуяр бўларканми — жигаринг шунчалик қилмас. Кейин ҳушимдан кетиб қолибман. Ўзимга келиб мундоқ кўзимни очсан, тепамда яна Баҳриниса опа ўтирибди. Қон қуиди. Айтишларича, ўзи қон берганмиш. Туғруқхонада менинг қонимга хил келадиган қон узилиш бўлиб қолган экан. Нима билан миннатдорлик билдиришга ҳайронман. Садир ака! Агар сиз рози бўлсангиз, қизимизнинг исмини шу доя шарафига Баҳриниса қўярдик, қаршимасмисиз? Ундан кейин, мени олиб кетар куни шу опага бирор яхшироқ совға олиб келсангиз. У, интизор бўла-бўла топган қизнингизнинг доясигина эмас, унинг онасини ўлимдан сақлаб қолган киши ҳам. Мен у билан опа-синғил тутқимоқиман, ўзи

ҳам бирам дилкаш, дилдор хотин эканки, асти қўйинғ, бу ёрдаги хотинларнинг ҳаммаси ундан хурсанд, соясига салом беришади. Ҳа, айтгандек, сизни суриштириди. «Яхши турасизларми? Бу нечанчи болангиз?» деди. Назаримда сизни танийдиган кўринади. Сизни қаёқдан танишлигини суриштирай дедиму, тағин, эрини қизғаняпти, демасин деб истиҳола қилдим...»

Садир ўз кўзларига ишонмасди. Хотини ҳамма нарсадан хабар топиб, қасддан шундай хат ёзаётганга ўхшарди. Аслида Мехри очиқ кўнгиллик билан ёзар, эрининг аввал уйланганини билса ҳам, ўша ажрашган хотини мана шу меҳрибон доя эканидан бехабар эди. У эмас, ҳатто Садир ҳам биринчи йилиёқ Баҳринисанинг изини йўқотган, фақат қаердадир касалхонада ишлашини биларди. Тасодиф уни мана шу жойда дуч келтириди. Ана ўша дакки еб, талоқ олган хотини бугун унга яхшилик қилмоқда, билиб туриб, кўриб туриб яхшилик қилмоқда. Мана шунга Садир тушуниб етмасди. У аввалига ҳамма нарсани меҳрига очиб ташламоқчи, уни Баҳринисадан эҳтиёт бўлишга чақирмоқчи бўлди, лекин ички бир товуш «йўқ, у ёмонлик қилса ўша туғиш вақтида, қолаверса Мехри ҳолсизланиб ётганида қиласди. Ваҳоланки, Мехрига мос келадиган қон туғруқхонада бўлмаганидан ўзи қон берди, шу билан онани ҳам, сенинг фарзандингни ҳам асраб қолди. У қалби пок хотин, доялик бурчини шараф билан оқлаган хотин. У таҳқирлашга эмас, тақдирлашга сазовор хотин», дерди. Бу товуш устун чиқиб, Садир ўз шахтидан қайтди. Мехрининг ўзи гап бошламаса, бу сирни очмасликка қарор қилди.

Бир ҳафта ўтгач, Мехрини боласи билан олиб кетгани машинада келди. Мехрини кузатиб чиққан Баҳринисага (уни Мехри қўярда-қўймай олиб чиққан эди) ҳандай қилиб совғани беришни билмасди, ҳатто унинг юзига тик боқолмасди. Охири бир журъат билан олдинга одимлаб, гулдастага қўшиб кийимлик совғасини узатди.

— Гулингизни оламан, лекин совғангиз учун раҳмат, олмайман. Мехрихонга нимаки хизмат қилган бўлсам, бу менинг бурчим, мен фақат ўз хизматимни ўтадим,— деди қизаринқираган Баҳриниса. Унинг туташ қора қошлари чимирилиб, сўзларини тасдиқлагандек бўлиб турарди. Шу маҳал соchlарига «булочка» қилиб бантик тақдан етти-саккиз яшар қизча билан, ундан сал кичик, лямкаси елкадан ошириб кийиладиган калта шимлик

дўндиққина ўғил бола бир-бирини қувлашиб келиб, аввал ҳаммага салом беришди, кейин Баҳринисага уқдира кетдилар:

— Ая, бувимлар келишди,— деди қизча.

— Менга бураса юрадиган автомобиль олиб келдилар,— деди ўғил бола қувониб, Баҳринисага қулочини ёзаркан.

— Яхши! Яхши!— деди Баҳриниса уларнинг манглайини силаб ва сал туриб боражагини айтиб, уларни жўнатди. Кейин Садирга қараб ёлғиз у тушунадиган оҳангда:

— Қалай, болаларим яхшими?— деди ва жавоб кутмасдан хайрлашувга қўл узатди. Меҳри қанча қистамасин совғани олмади.

— Раҳмат! Ҳаммаси учун раҳмат!

Садир бу ташаккурни «шунчалик меҳрибонлик билан хотинимга доялик қилганингиз ва қон берганингиз учун» деган маънода айтган бўлса ҳам, Баҳриниса ўзича «мендан ажralиб шундай бола кўришимга мусассар этганинг учун раҳмат демоқда, ажralиш чоғидаги қўполлик ва таҳқирлари учун узр сўраётир» деб тушунди, унинг қўлини маҳкам сиқди.

Машинада боришар экан, Меҳри эрига деди:

— Болаларининг ёқимтойлигини қаранг: кишини ҳаваси келади, чақмоқдек кийинтириб қўйибди. Бизнинг Баҳринисамиз ҳам ўшалардақа бўлармикан-а!

— Албатта. Бу тарбияга боғлиқ,— деди Садир ва Баҳринисанинг ўз орзусига етиб, икки бола асрраганини кўнглидан ўтказди, лекин буни Меҳрига айтишни эп кўрмади.

Машина кенг асфальт йўлда уфқа бигиздек санчилиб борарди.

НОДИРНИНГ НАФРАТИ

Нодир «уруш-уруш» ўйнашни жуда яхши кўрарди. Дадасига олдиргани нуқул милтиғу тўппонча эди. Уни кўрган ўртоқлари ҳам дадаларига худди шундай қилишарди. Ўртоқлари билан иккига бўлинниб олиб, милтиқларини елкаларига осиб, турли истеҳкомлар қуриб гумбир-гумбир отишгани-отишган эди. Баъзан Нодир командир бўлиб қоларди. Лекин фашист бўлишни ҳеч ким истамас, шунинг учун навбати билан душман бўлишга тўғри келарди. Ахир кимнинг совет солдати билан урушгиси келади!

Нодир уруш деганда осмон тўлиб учган самолётларни, катта-катта сувлардан кечиб, ўнқир-чўнқирлардан ўтиб кетаверадиган азамат танкларни, доим душманини ўққа тарсиллатиб тутадиган пулемёт ва автоматларни, ура деб елиб-югурадиган ботир солдатларнингина тасаввур этарди. Лекин урушнинг хунук оқибатлари унинг бола ақлига келмас, у билан Нодирнинг иши ҳам йўқ эди. Ана шунинг учун ҳам, у уруш ўйнашни яхши кўрарди. Лекин ана шу «уруш-уруш» ўйнашни Нодир бу йил бутунлай ташлади, ўзигина ташлаб қўя қолмай бошқа ўртоқларини ҳам бу ярамас ўйинни ўйнамайдиган қилди. Энди у бутун қилич-қалқонларини ёндириб ташлаган.

Эҳтимол сиз бу қандай қилиб содир бўлди, деб сўрарсиз. Истасангиз батафсил айтиб бераман. Бу шундай бўлди.

Ўтган йил Нодирнинг дадаси ўзининг фронтчи ўртоғини кўргани Украинага борадиган бўлди. Ўшанда, айни ёз пайти, Нодирларнинг каникулга чиққан вақти эди.

Нодир бу сафар дадасининг оғзидан Украина сўзи чиқиши билан бўйнига осилиб олди:

— Жон дада, мен ҳам борай!

Дадаси Нодирнинг бунчалик астойдил осилиб олишини, қолаверса, хотинининг ҳам розилик беришини сира хаёлига келтирмаган эди. Мундоқ ўйлаб қараса, Нодирнинг бирга бўлгани яхши, ҳамроҳ бўлади.

Ичикиб йўлга чиқсан Нодир учинчи куни поездда зерикиб қолди. Шу зерикканидан бўлса керак, борадиган ерларининг қанақалигини, неча кунда етиб боришларини, у ерда кимлар билан учрашувларини суроштира бошлади. Ана шунда дадаси фронтдош ўртоғини таърифлай кетди:

— Худди Чапаевнинг ўзи. Мўйлови ҳам ўшанақа. Лекин у отлиқ эмас, танкист эди. Танкист бўлганида ҳам жуда кўп душман танкини қириб ташлаган қаҳрамон танкчи. Учта ордени бор.

— Сизники иккита, а, дада?

— Йўқ, менини битта, биттаси медаль.

— Сиз каттами, ўртоғингиз каттами?

— Ўртоғим мендан сал катта, у фронтда менга командир бўлган, душман танкларини қанақа қилиб атка қилишни ўргаттган.

— Ҳозир нима иш қиласи, танк ҳайдайдими?

— Йўқ, инвалид.

Нодир дадасининг ўртоғини қанақа инвалид экани билан қизиқмади, тўғриси, у инвалидлик даҳшати нима эканини тасаввур қилолмас эди. Шунинг учун бўлса керак, яна сўроқ беришда давом этди. Лекин бу инвалидликнинг нима эканини ўз кўзи билан кўргандан кейни нафаси ичига тушиб кетди.

Дадасининг ўртоғи уларни кутгани чиқмади. Укаси билан ўғли кичиккина бир станцияда уларни қарши олди. Дадасининг ўртоғи эса, ўрнидан туролмайдиган майиб ва иккала кўзи кўр экан. Исми Микола экан, дадаси билан ҳам ётган ерида кўришди. Лекин жуда қувноқ ва тетик экан. Дадаси билан ўпишиб кўришгач:

— Ўғлинг қани? — деди ва Нодирни ётган ерида бағрига босди.

— Ўзингга ўхшайдими? — деб сўради.

Нодир аввалига Микола амакининг юзига қараб чўчиғандек бўлди, унинг кўзлари ўпирилган ўрадек чуқур ботиб кетган, кўзларининг иккӣ атрофида ҳаво ранг си-

ёх сачрагандек дөглари бор. Лекин унинг жонли ҳара-катлари ва ширин сўзлари Нодирни дарров ўзига мафтун қилиб олди. У ҳикояларга шунаقا бой эканки, асти қўявернинг, ўғли билан иккаласини каравоти қошига ўтқизиб қўйинб, кечаси қизиқ-қизиқ ҳикоялар айтиб берди. Нодир бунақасини ҳеч эшитмаган ва ўқимаган эди. Ана шунда Нодирда Микола амакининг чуқур кўзларидан ва доғли юзидан чўчиш эмас, балки унга раҳм уйғонди. Ўнинг қачон бу аҳволга тушгани билан қизиқди. Дадасидан сўради.

— Урушда бўлган,— деди дадаси.

Ана шунда биринчи марта Нодирга урушнинг мудҳиш даҳшатларидан бирни аён бўлгандек бўлди. Ахир уруш у ўйлагандек ва ўртоқлари билан ўйнагандек ура-ура, пақ-пуқ ва мардлик эмас экан. Унинг мана бунақа даҳшатлари ҳам бор экан. Ана шу куни биринчи марта Нодир урушда кишиларнинг умрбод ногирон бўлишлари мумкинлигини тасаввур этди. Наҳот уруш кишиларнинг кўзини қўр қилиб, белини майиб қилиб, ўрнидан туролмайдиган этиб ташласа! Ахир уруш бўлмаганида Микола амаки бу аҳволга тушмас эди! Кеча Микола амакининг ўғли Олесь дадасининг ёшлигидаги суратларини кўрсатарди:

— Дадам жуда келишган бўлган эканлар-а, кўрдингми, ўртоқ!— деди у хўрсиниб. Демак, Олеснинг ҳам юрагида армони бор. Дадасининг бу аҳволидан кўнгли ўқсииди.

— Дадамнинг кўзлари кўриб, юролганларида ўрмонга борар эдик, қўзиқоринлар терардик эртага,— деди бир оздан кейин у.

Буни эшитиб қолган дадаси дарров ўғлининг кўнглини кўтарди:

— Эртага, албатта, борасизлар. Меҳмонларни ўзинг бошлаб бор. Мен болалигимда ҳаммасини кўрганман. Тепаликнинг ўнг томонидаги бақалоқ қарағайнинг айрисига чиқсанглар пастда ясланиб ётган текислик кўринади, сой ялт-ялт этади, худди бирор кунга солаётган қиличга ўхшайди. Ундан тушиб ўрмоннинг ичкарисига кирсанглар, бирпастда саватинглар қўзиқоринга тўлади. Қуритиб берсанг Нодир шаҳрига олиб кетади. Уларда бўлмайди бунақаси.

— Шунақами, сизларда йўқми?— бирдан ўз ўрмони билан фахрланиб, сўраб қолди Олесь.

Эртасига Олесь дадаси айтгандек Нодирни бошлаб ўрмонга борди. Ўрмонда ҳеч бўлмаган Нодирга ўрмон қизиқ таассурот қолдирди: тепага қараса осмон зўрға кўринади. Дараҳтлар таги кўм-кўк. Қушлар нағмаси оламни тутади. Салқин. Турли-туман чечакларни айт-майсизми! Нега одамлар уларни териб олишмас экан! Кўп-ку, қанақа қилиб одош қилишади!

Қайтишда Олесь теришган қўзиқоринларини йўлда ўтиб қолган қўшнисининг аравасига солиб юбориб, ўзи Нодирга деди:

— Уруш бўлган жойни кўрсатайми?

Уруш бўлган ерни кўрмаган Нодир учун бу жуда қизиқ эди. У дарров розилик берди. Олесь йўл-йўлакай бу ерда қандай жанглар бўлганини ўз кўзи билан кўрган кишидек гапириб кетди.

— Ҳу анави ер-чи,— деди Олесь, қўли билан вайрон бўлиб ётган паст-баландликни кўрсатиб,— аввал бизнинг қишлоқ бўлган экан. Урушда фашистлар ўт қўйиб юборган.

— Нега? — ажабланди Нодир.

— Кўп партизанлар чиққани учун. Ўша ўт қўйилганда Павло деган ўртоғимининг қари бувиси хатасидан чиқолмай куйиб кетган. Бечора «ёрдам беринглар!» деб бақирганда ҳам фашистлар ҳеч кимни йўлатмаган, бир қўшниси қутқармоқчи бўлганда уни фашист отиб ташлаган.

Олесь Нодирни бошлаб вайронага борди. Яксон бўлган уй-жойларнинг излари ҳали ҳам шундоқ билиниб турарди. Ҳатто нураб кетган деворларда ёнғиндан қолган қора доғлар бор. Нодир шундай катта қишлоқнинг куйиб, ер билан яксон бўлишини ҳамон тасаввур қилолмас эди. Мана уруш дегани қанақа бўлар экан. Бутун бошлиқ қишлоқдан из қолмас экан! Одамлар ичida қолиб куйиб кетар экан!

Нодир урушнинг бу даҳшатини аввал ҳеч хаёлига келтирмаган экан. Энди ўз кўзи билан кўриб, нафрати қўзгади. Шу вақтгача ўйин қилиб юрган «уруш-уруш» энди унга жирканч кўрина бошлади. Уруш — ўйин эмас, қирғин, вайроналик ва ногиронлик экан. Эртасига маҳобатли бир кўприкнинг қолдиқларини кўрганда яна баттар тутоқиб кетди. Ахир уруш бўлмаганида бу кўприк бузилмас, ўрнига қанча пул сарф қилиб янгисини нарироққа солмас эдилар. Олесларнинг қишлоғи ҳам ўз ерида

бўларди. Микола амаки ҳам бунақа аҳволга тушиб кўк-ка боқиб ётмас, балки ўғлини бошлаб ўрмон кезган бўлар, шаҳарга олиб тушиб, томошалар қилдирган бўлар эди! Нодир ана шу кундан бошлаб уруш деган сўздан ҳазар қиласиган бўлиб қолди. «Уруш-уруш» ўйинини мутлақо ташлади. Уруш — ўйин эмас, даҳшат экан! У уруш деган сўзни эшитса, кўз олдига Микола амаки, Олесларнинг вайрона қишлоғи ва унда куйиб кетган кампир, дарё устидан ўтган маҳобатли кўприкнинг мажруҳ қолдиқлари кўз олдига келади, уруш дегувчилардан жон-жаҳди билан нафратланади, қўли ўз-ўзидан (тўғриси, газабдан) муштга туgilади!

1965

АРАБ БОЛАСИНИНГ ҚУВОНЧИ

Бу воқеа Африка мамлакатларидан биринда бўлган эди.

Кун иссиқ. Қумга тухум кўмсанг пишади. Биз бир ҳафтадан бери бу беқиши ўлкани сайд қилиб юрибмиз: нималарни кўрмадик! Лекин бугунги воқеа ҳаммасидан ўтиб тушди.

Биз тушлик овқатни энди тугатиб, муздек манго шарбатини майда-майда қултум билан эрмак қилиб турган эдик, эшикда бир бола пайдо бўлди. Юпунгина кийинган, оёқ яланг, бош яланг. Тим қора сочи ажриққа ўхшаб қалин ва бир-бирининг орасига чирмашиб кетган. Фақат араблардагина бўладиган қорачиғи йирик олов кўзлари чақнайди. У аввал бежиримгина бу ресторанин тезда кўздан кечириб чиқди. Кейин, кийик боласидек чаққонлик билан ичкари кириб, енгил столларни бир-бирига яқинлаштириб, стулларни четроқ сурди. У зарур бир ишни қилаётгандек жуда жиддий, ҳаракатлари чаққон эди.

Шундан кейин уст кўйлагини ечиб ташлади. Биз ҳаммамиз унинг бу ҳаракатларидан ҳайрон эдик. Фақат ҳалигина бизга табассум билан елиб-югуриб хизмат қилган ресторан хўжайини билан биттагина официанти, бир четда кулиб турарди. Улар болани танишса керак.

Бола югуриб, зал юқорисига ўтиб кетди. У ердан туриб, юз-кўзини нурга тўлдириб, ширин салом берди. Кейин шундай акробатик ўйинга тушиб кетдики, биз ёқа ушлаб қолдик. У жуда чаққон, цирк акробатчиларига хос бир енгиллик ва усталлик билан ғоят нозик ва қалтис

ҳаракатларни аввал ерда, сўнгра икки столнинг четлари-га қўлларини қўйиб бажарди, биз жон ҳовучлаб томоша қилдик: сал қўли тойиб кетса ё стол сурилиб кетса борми, унинг майиб бўлиши турган гап. Лекин у буни хаёлига келтирмас, бутун санъатини намойиш қилиш билан банд эди.

Бу кутилмаган ажойиб акробатия бир неча минут чўзилди. Бола қора терга ботди: Африка қуёши жездек қорайтириб, матонат бахш этган бадани ва юзлари йилтиллаб, кўзлари яна ҳам чарақлаб кетди. Анчагина чарчагани энтикишидан кўриниб турарди. У ана шу энтикиш билан атрофга ширин таъзим қилди-да, қўлини узатиб бир чеккадан тилана бошлади.

Мен унинг маъюс узатилган жажжи қўлларига қараб туриб, юрагим шифиллаб кетди: наҳотки тиланчилик учун шундай ажиб санъатни намойиш қилган бўлса! Шу маҳал унинг тилини билмаганимдан жуда ўқиниб кетдим. Агар билганимда:

— Жигарим, бу серзаҳмат ва қалтис ҳунарингни хор тутма, елга совурма! — деган бўлардим.

Битта мен эмас, ҳамроҳларимнинг ҳам кўнгли эзилиб кетди шекилли, анчагина инъом беришди. («Садақа» дейишга тилим бормайди!) Бола жуда ҳам яшнаб кетди, юз-кўзини нур қоплади, дарров уст кўйлагини кийиб, стол-стулларни жой-жойига тўғрилаб қўйди. Кейин яна бир эгилиш билан иссиқ салом бериб, юргурганича чиқиб кетди.

Бизни бошлаб юрган мадам Абдураҳмон ҳам боланинг кетидан: — Жуда хурсанд бўлди. Бу яқин орада бунчалик даромад қилмагандир, — деди табассум билан.

— Нечанчи синфда ўқир экан? — дедим мен ўз режамга солиб.

— Ўқимаса керак, — жавоб қилди мадам Абдураҳмон, — ўқиса тирикликтан қолади.

— Бўлмаса бу ҳунарни қаерда ўргангандир?

Мадам Абдураҳмоннинг юзида «шуни ҳам билмайсизми?» деганига ўхшаш бир жилмайиш пайдо бўлди:

— Бирортасидан бозор бошидами, қаҳвахонадами ўргангандир-да.

Мен унинг жавобидан шуни фаҳмладимки, бу ўлкада болага ўхшаган кишилар кўп. (Кейинчалик бунга иқороб бўлдим.)

Биз кўчага чиқсан, бола ҳали шу ерда экан. Бизни

кўриб, яна юз-кўзини нурга тўлдириб табассум қилди. То биз машинага ўтириб, жўнаб кетгунимизча атрофимизда гирдикапалак бўлиб юрди. Кетимииздан узоқ қўл силтаб қолди.

Эртасига яна болани кўрдик. Бу гал уулкан бу шаҳарнинг нариги четида, денгиз қирғофида «ҳунарини сотиб» юрарди. Бизнинг машинани таниди шекилли, тўхташи билан эшиги олдида пайдо бўлди. Қуюқ салом бериб, ҳиндчасига кафтларини бирлаштириди, ҳатто қўл ҳам узатиб кўришди. Кетимииздан қолмади, бир нечта ёдгорликларни биз билан бирга томоша қилди, бирга денгиз қирғофига тушди. Биз билан юрганидан жуда мамнун шекилли, пишиб кетган юзларидан кулги аrimасди. Баъзан ёқимли ажаб ҳаракат билан ўзининг хурсандлигини билдириб қўярди.

Машинага чиқар вақтимиизда яна кечаги «репертуари»ни асфальт устида такрорлади. Биз бу гал боланинг қўл узатиб хайр-садақа сўрашини кутмасдан илтифот кўрсатмоқчи бўлгандик, у қўлимизни қайтарди, олмаслигини билдириди. Биз ҳайрон бўлдик. Нима билан уни хурсанд қилишни билмасдан турар эканмиз, бола менинг кўкрагимдаги значокни кўрсатиб, илтимос қилди. Имо-ишора билан кўксига тақиб юражагини қайта-қайта такрорлади.

Кўкрагимдаги Ленинни силуэти туширилган значок эди. Мен уни олиб боланинг қўлига тутқазганимда, унинг қувониб кетганини бир кўрсангиз эди! Ўзича алланималарни мамнуният билан сўзлаб «Ленин! Ленин!» деб қўяр, бу билан ҳам қаноатланмасдан бошмалдоғини тикка қилиб: «Ажойиб одам, менинг кўнглимдаги одам!» ишорасини қиласарди.

У значокни шу ердаёқ кўкрагига тақиб олди. Тили билан миннатдорлик билдиргани етмагандек, шу заҳоти ерда умбалоқ ошиб, бир неча «номер» кўрсатди.

Бизнинг машина жилар экан, у қўлини кўтариб самимият билан силкиб қолди.

Нарироқ боргач, машина ойнасидан қараб, уни бирталай ўз тенгқурлари ўраб турганини кўрдим.

Менимча, унга ҳамма болаларнинг ҳаваси келаётган бўлса керак!

— Ҳой, зумраша, оқиб кетасан. Сен чўмилмасанг кимнинг кўнгли қолибди. Ҳафтада бир чўмилтириб қўяман-ку ўзим,— деб Қўлдошнинг кетидан бағиллаб қолди бувиси. Қўлдош чўмилгани кетди. Қўлдошнинг бувиси бунақанги қаттиқ бағиллагани билан ўзи жуда меҳрибон, набирасини жонидан ортиқ кўради. Яхши кўрганидан уришади, уни эҳтиёт қиласди. Қўлдош эса, жуда шўх. Биринчи синфга энди борган болалар сингари ҳар нарсани билгиси келади, катталарга ўхшаб юргиси келади. Айниқса у сузишга, тўғриси, чўмилишга ишқибоз. Бунга у кинода ғаввосларни кўргандан бери ишқибоз. Яна бир куни телевизорда бир солдатнинг сузишни яхши билгани туфайли командирнинг муҳим топширигини бажарганини кўрди. Ахир бир куни Қўлдош ҳам солдат бўлади-ку, ўшанда командири топшириқ бериб қолса дарёдан сузиб ўтишга тўғри келса, унда нима қиласди?!

Демак...

Қўлдош сузишни билиб қўйишга аҳд қиласди. Лекин чўмилишига қулай ер йўқ. Улардан икки юз метрча наридан бир тегирмон сув ўтади. Аммо бу сув ўзи саёз бўлса ҳам жуда тез оқади. Қўлдошга ўхшаган болаларни бир-паста думалатиб кетади. Шундай бўлса ҳам Қўлдош чўмилади. У йўлини топган: соҳилда битта бақалоқ тол бор. Унинг иккита шохи сувга осилиб тушган. Сув уни ўзи билан олиб кетмоқчи бўлгандек пишиқ ва кўм-кўк шохларидан тортқилайди. Лекин шох-шаббалар аввалига «майли сен билан кетаман» дегандек сал эргаша-

ди-ю, яна тўхтаб қолади. Бу ҳол эрталабдан кечгача тақрорланади.

Қўлдош ана шу шохларга осилиб оёқларини тапиллатади, баъзан кучини синамоқчи бўлгандек бир қўлини қўйиб юборади. Ана шундай «куч синаш»лардан бирида у оқиб кетди. Бир-икки думалагандан сўнг зўрға соҳилга чиқиб олди. Бу ҳодиса ким орқалидир бувисининг қулогига етибди. Бувисининг бояги бобиллаши ана шундан эди.

Қўлдош бу гал ҳам маза қилиб чўмилиб қайтди. Бироқ бувиси бу гал кечирмади. Кечқурун ишдан қайтган боғбон бувасига чақди:

— Буваси, мен бу неварангизнинг кафилини ололмайман. Гапимга қулоқ солмайди. Бугун ҳам чўмилди.

Қўлдошнинг дадаси касалманд аясини курортга олиб кетган. Қўлдошнинг бутун изми бувиси билан бувасида. Шунинг учун улар ҳар вақтдагидан кўра қаттиққўлроқ. Шундай бўлса ҳам буваси бувисининг ёнига тушмади. Қўлдошга сал хўмрайиб қаради-ю, кетидан мийнфида кулиб қўйди.

— Сузишни биласанми, ўғлим? — деди у.

Қўлдошга жон кирди, сайраб кетди.

— Гап шунда-да, бува, билмайман. Тенгқурларимнинг ҳаммаси билади.

— Эркак боланинг сузишни билмагани, албатта, яхшимас. Бу керак нарса!

— Бўлмаса-чи!

— Ҳой, ҳой буваси, нима деяпсиз? Бир фалокатни бошламоқчимисиз, ота-онаси йўғида-я! — буванинг шахтини қайтармоқчи бўлди буви, лекин бува бўш келмади:

— Аввалам бор катта ота-онаси сен билан мен. Қеъин улар. Улар бўлса, нима қилса қиласверадими? Йўқ. Үғлинг ақлли бола. Сен билан менинг сўзимдан чиқмайди. Шундайми, Қўлдошжон? Аммо лекин сен билан мен ҳам боланинг раъйини қайтараверишимиз яхши эмас. Баъзан ёрдам беришимиз керак.

Буви гапнинг тагига тушумади.

— Мен билмайман, бир фалокат бўлса, ота-онасига ўзингиз жавоб берасиз, — деди буви ва сигирни соққани өғилхонага ўтиб кетди. Бува орқасидан гапириб қолди:

— Сен хавотир олма, худо хоҳласа, ҳеч нарса бўлмайди.

Аммо саранжом бува бу сўзниң ҳам тадбирини кўрди. Бир куни ишдан қолиб, Қўлдошни ёнига чақирди:

— Лаббай, бува? — югуриб келди Қўлдош.

— Сенга ўхшаб чўмилишни яхши кўрадиган ўртоқларинг кўпми? Нечта бор?

— Кўп. Анча бор. Нима эди?

— Барини йифиб кел!

— Хўп бўлади.

Қўлдош бу гапнинг тагига етмаса ҳам буваси яхши бир ният қилаётганини қалби билан сезиб, елиб кетди. Тенгдошларини уйма-уй юриб, йифиб келди. Ярим соат ичидা унинг ўзига ўхшаган қора-қура ўнтача бола буванинг қошида қатор туарди.

— Ҳаммаларинг ҳам чўмилишга ишқибозмисанлар?

Болалар нима гап эканига тушунмай аввалига ийманнишиб туришди. Кейин чуғурлашиб жавоб беришди.

— Ундай бўлса, менга ёрдам беринглар! Қани, азатлар, кетдик.

Бува болаларнинг қуршовида йўлга тушди. Ўша бир тегирмон сув оқадиган катта ариқнинг ёйиқроқ ерига келиб бува тўхтади. Болалар ҳам.

— Гап шу,— деди бува,— ариқнинг мана шу еридан мен сизларга бўғиб бераман. Дами қайтади, кейин сизларни оқизмайди. Бемалол чўмилаверасизлар. Бўптими?

— Бўпти! — болалар маъқуллашди.

— Бўлган бўлса, ҳу анави тошларнинг йирик-йирикларини мана бу ерга тўпланглар. Лекин эҳтиёт бўлинглар, оёқларингга тушиб кетмасин.

Болаларга қанот битди. Чумолидай ўрмалашиб, бир оз вақт ичидা анчагина тош ташиб қўйишли. Уч-тўртта каттасини буванинг ўзи бир-икки дам олиб кўтариб келди. Бирпас дамини олга, ҳалиги катта тошлардан биринни мўлжал билан сувга думалатди. Унинг ёнига яна бирини туширди. «Менинг йўлимни тўсма» дегандек, шиддат билан оқиб келаётган сув аввалига бир зарб билан тошни оқизиб кетмоқчи бўлди. Йўқ, кучи етмади шекилли, унинг устидан, ёнидан жаҳл билан ўтиб кета бошлади. Тошлар ташланиб борган сари сув кўтарилиб, унинг шиддати ҳам қайта бошлади. Бориб-бориб йўлига тўғаноқ бўлган катта-кичик тошларнинг орасидан отилиб, устидан тошиб ўтиб, йўлига кета бошлади. Тош тўғоннинг бу томони анча кўтарилиб, сув секинлашди,

у томони өса ҳамон аввалгидек тез ва шиддат билан оқарди.

То бу тош тўғонни эпақага келтиргунча бува қора терга тушди. Қийим-бошлари шалаббо бўлди. Тоғ суви муздай бўлмайдими, бува сувда узоқ туролмасди. Соҳилга чиқиб исинниб оларди.

Хуллас, кун тиккага келганда иш тамом бўлди. Болаларнинг севинчи ичига сиғмасди.

Бува болаларнинг раҳматига кўмилиб, қўрғонига қайтаркан, яна бир таъкидлашни унутмади:

— Тўғоннинг устига чиқманглар, у ҳали яхши ўрнашгани йўқ, босиб қолади. У ёғига ағанасанглар оқизиб кетади. Хўпми?

— Хўп, бува! Минг раҳмат!

— Хўп, бува!

Болалар баравар чуғурлашарди. Бува кўздан ғойиб бўлар-бўлмас ечиниб, сувга тушишди. Буни қарангки, сувнинг тез оқиши бўғилгани устига анча чуқур тортибди. Энди Қўлдошнинг кўкрагидан келади. Бу жуда яхши. Энди қулоч отиб сузса ҳам бўлади. Бу бетидан шўнғиб, нариги бетидан чиқса ҳам бўлади.

— Қўлдош! Зап буванг бор-да! — деб фахрланишди болалар. Лекин Қўлдош кеккаймади:

— Сенинг буванг ёмонми? Сеники ҳам яхши. Баҳорда ҳаммамизни йиғиб гулпайванд қилишни ўргатганлари эсингдами?

— Бўлмасам-чи!

Болалар куни бўйи маза қилиб чўмилишди. Куни бўйи тилларидан бувалари тушмади.

1970

СОЛДАТ ВА ҚУШ

Жаиг ўрмон бўсағасида борарди.

Айни баҳор.

Кечагина оламни овозга тўлдириб турган қушлардан бугун ном-нишон қолмagan. Улар кеча кечгача ҳам унда-бунда кўриниб, баъзан товушлари келиб қоларди. Бу-гун эрталаб бошланган шиддатли отишмадан кейин жи-миб қолишиди. Қушпарат солдат Бўтакўзниг уларга раҳми келди:

— Бу лаънати уруш дастидан кишилар эмас, қушларга ҳам тинчлик йўқ, бечоралар уяларини ташлаб қаёқ-ларгадир тўзиб кетишиди. Товушлари ҳам келмай қолди.

У атрофга аланглади, кафтини қулоғи орқасига қўйинб тинглади. Қушларнинг на шитирлаши, на бирор ово-зини эшитолмаганидан юраги ачидими, окопдош шери-гига қушлар ҳақида алланималар ҳикоя қила кетди.

— Қушлар ҳам кишига ўхшаб хуш муомала гадоси. Агар сен унга бирор меҳрибонлик қилсанг асти унумтайди. Бувимнинг иккита мусичаси бўлар эди. Қишин-ёзин қўлларидан дон ерди. Ҳатто бола очганда боласини ҳам эргаштириб бувимнинг олдига келган. Гўё болаларини бувимга таништиргани олиб келган эди. Бувим ҳам буни пайқади шекилли, уларга сўз қогди:

— Болаларингга эҳтиёт бўл, бу атрофда мушук ўл-гур кўп.

Бўтакўзниг эртакнамо сўзларидан юзига мамнуният кулгиси сочилиб қулоқ солаётган ҳамроҳи тегишиди:

— Демак, сиздаги қушпаратлик ҳам бувингиздан ме-рос экан-да!

— Эҳтимол. Лекин бувим ҳеч қушни қафасга солиб боққан эмас. Афсус у нуқсон менда бўлиб ўтган. Бола эканман, билмабман, бувим бечора нуқул: «Эркини бўрма, олтин қафасда булбул ҳам сайрамайди», деб койир эдилар. Мен болалигимда саъва, беданани, қумрини бироз вақт тўрқовоқларда боққанман. Кейинчалик қўйиб юборганиман. Ана ўшандা қуш бечораларнинг яйраб учиб кетишини кўрсангиз! Шу-шу қуш зотини қафасга солган одамни кўрсам нафратим қўзғайди. Эркинликда, ўз хоҳиши билан сайраши қандай яхши. Товушларини эшитсам кетаётган еримда тўхтаб тинглайман. Инидан тушиб кетган боласини кўрсаму, албатта жойига олиб қўяман. Жойини тополмасам учиб кетадиган бўлгунча боқаман.

— Сизнинг томонда қушлар кўпми? — қизиқди ҳам-суҳбати.

— Минг хили бордир. Эрталаб туриб боғларга қулоқ солсанг, баҳринг очилади. Дўстим, окопда ана шуларнинг ҳам хумори тутади-да. Фронтга тушибманки, яйраб бирор марта қуш сайроғини эшитганим йўқ.

— Шунинг учун окопни ҳам шундоқ ўрмон оғзида қазиган экансиз-да.

— Топдингиз. Қадрдан дўстсиз-да, ичимдагини биласиз! Бир томондан қушларнинг ўзини соғинган бўлсам, иккинчидан уларни ҳам бу бераҳм ёвуз душмандан ҳимоя қилишим керак. Қуш бечораларнинг қўлида ўқ-дориси йўқ!

Бўтакўзининг окопдош ҳамроҳи узоқ Сибирдан эди. Бўтакўзининг қушлар ҳақидаги сўзлари, мевалар ҳақидаги кечаги ҳикоясига ўҳшаб унга жуда қизиқ туюлди. Душманга Бўтакўзdek қирон келтираётган, Бўтакўзdek довюрак, азamat, ҳар бир бармоғи олти ойлик боланинг болдиридек келадиган йўгон ва бақувват йигитнинг митти қушлар ҳақида, уларга меҳрибонлик ҳақида нозик ҳис, нафис ҳаракатлар билан сўзлаши унга жуда ғалати кўрниарди. «Бу улкан кафтида саъва эмас, капитар ҳам кўринмай кетса керак. Бу қўллар шернинг томонидан олса, нафасини чиқармай қўяди», деб кўнглидан ўтказди. Сибирлик бу йигитнинг зуваласи эса кичкина, ихчам эди. Лекин Бўтакўз ҳамон қушларнинг ишқибоз бўлмаган одам илғаб ололмайдиган хислатлари, фазилатлари, қачон ва қандай сайрашлари, нечтадан бола очишлари, болаларига муомалалари ҳақида завқ-шавқ билан сўзлар-

ди. Ҳатто ҳамроҳи умрида қўрмаган баъзи қушларнинг қанақалигини қизиқ-қизиқ ҳаракатлар билан тушунтириб, сайрашларини қилиб беради. Унга сари ҳамсуҳбатининг ҳаяжони ошиб, кулгидан ўзини тийиб ололмасди.

Икки соатча давом этган отишма орасидаги тинчлик қушлар суҳбати билан тугади. Яна ўқлар чақнаши, яна замбараклар гумбурлаши, аллақаерда самолётларнинг бўғиқ хириллаши... Бир маҳал пулемётчи икки ўртоқнинг окопи тепасидаги оқ қайиннинг катта бир шохи тўп ўқидан шартта узилиб тушди. Сал ўтмай нимадир чийиллади. Буни ҳаммадан олдин Бўтакўз пайқади. У дарров шеригига:

— Қуш боласи-ку! Сен ҳушёр тур, мен ҳозир...— де-ди-ю, окопдан эмаклаб чиқди. У дастлаб дўппидек тўнтарилиб ётган қуш уясини кўрди. Ичида хашакка ёпишиб қолган яримта тухум пўчоги. «Демак, чийиллаган қуш боласи», деган фикр Бўтакўзниң хаёлидан учган ўқ тезлигида ўтди. Кўзи билан ана шу қуш боласини қидирди. Унинг бу мушкулини қушчанинг ўз чийиллаши осон қилди. Ундан сал нарида, буталар остида бир қуш боласи дир-дир титраб, кўзларини мўлтиллатиб турарди. У ўз ҳимоячисини кутиб тургандек Бўтакўздан қочмади. Бўтакўз ҳам қушларнинг хислатларини биладиган, раҳмдил кишилардагина бўладиган эҳтиётлик билан гариб қушчани улкан кафтига олди, у ёқ-бу ёғини кўздан кечирди: хайрият, ҳамма ёғи бутун!

Қуш энди темир қанот бўлиб келаётган эди.

Бўтакўз қушчанинг уясини ҳам олиб, окоп ичидা, бир чеккага жой тайёрлади. Уяси устига қушчани қўйиб унинг устига эрталабки отишмада ҳалок бўлган жангчининг каскасанни тўнтарди. Бу орада қушга гап отиб қўйди:

— Сен шу бехавотир ерда дамингни олиб тур. Биз сенинг тинчингни бузган анави газанданинг адабини бериб олайлик.

Бўтакўз ўз жанговар ишига киришди. Душман устига бир-икки ўқ ёғдирди. Айниқса, сўнгги марта қойил қилди: душманни анча яқингача қўйиб бериб, кейин роса ўқса тутди. Тутдай тўқди. Хурсандлигидан каска остидаги қушга тегишид:

— Сенинг ўчингни ҳам олиб қўйдим, дўстим!

Қушча Бўтакўзниң окопида уч кун яшади. Тўртинчи кун баҳтсиз ҳодиса рўй берди. Тонгда бошлиланган отиш-

мада бир замбарат ўқи шундоққина пулимётчилар око-
пи ёнига келиб тушди. Бўтакўз оғир яраланди. Тушдан
кейин ўзига келди. Унинг сўраган нарсаси ана шу қуш-
ча бўлди. Ростини айтишга мажбур бўлишди: қуш ўл-
ган эди.

Бўтакўзга бу хабар ўз ҳолидан ҳам оғирроқ туялган-
дек бўлди. Раҳмдиллик билан деди:

— Аттанг, бечора нобуд бўпти-да!

Салдан кейин унинг ўзи ҳам оламдан ўтди. Унинг
жасади ёнига қушчани ҳам қўйиб кўмдилар.

1970

Табиатнинг қизиқ сирлари бор.

Буни қарангки, Жамшиднинг буваси қазиган қудуқнинг суви бу қишлоқда ҳамманикидан ширин. Нега? Ҳеч ким билмайди. Бўлмаса бу қишлоқда деярли ҳар хона-донда қудуқ бор. Ҳаммасидан яхши сув чиқади. Лекин Жамшиднинг буваси тоғ этагидан ер ажратиб, тошлардан тозалаб ер очиб, экин экди, қудуқ қазиди-ю, қўни-қўшни уникига қатнаб қолди. Аввалига девор-дармиён қўшнилар, кейин нарироқдагилар ҳам кела бошлади. Молларига ўз қудуқларидан берсалар ҳам, овқат ва чой учун, албатта, Жамшидларникидан челаклаб олиб кетардилар.

Жамшиднинг буваси ғалатироқ одам. Кўп ирим-сиirimларга риоя қиласди. Шунни бошқалардан ҳам талаб этиб юради. Қазиган қудуғининг суви ширин чиққанидан, кишиларнинг манфаатдор бўлганидан ортиқча ажабланмаса ҳам, қўни-қўшнининг бўш чеълак билан кириб, тўлдириб чиқиб кетавериши бувага ёқмай қолди. Буванинг наздига бу яхши белги эмас: хонадондан барака кўтарилади!

Бува авваллари ўзича пингиллаб юрди, кейин битта-яримтага дардини ошкор айтди. Шунда ҳам кишилар қудуққа қатнашини қўймади. Ҳатто бир уста қўшни икки киши билан келиб қудуқнинг атрофини яхши тахталар билан ўради, қўлда тортадиган сувни чиғириқ билан айлантириб оладиган қилди. Устаси тушкур қизиқчироқ экан, бувага тегишиб қўйди:

— Бу бош қудуғимиә, яъни ош қудуғимиз. Тартибли бўлгани яхши.

Бува индамади. Устага бу ҳол малол келди шекилли:

— Ҳа, қўшни, ишимиз сизга маъқул тушмадими?— деди.

— Нега, яхши...— Лоқайд жавоб қилди бува.

Аслида бу иш бувага ёқмаган эди. Унинг назарида қўшнилар у қазиган қудуғини узил-кесил ўзлариники қилиб олишаётган эди. Бунга эса унинг асти розилиги йўқ. Ичиде «бу қўрами, карvonсаройми?» деб қўйди. Лекин қўрасининг эшигини кишилар кирмайдиган қилиб орқасидан бекитиб олишга ботинмади. Қўздай қўшниларнинг бетига қанақа қилиб эшик ёпди! Ичиде ғижиниб юрди. Эшикдан чепак билан кирган ҳар кишини кўргандан бир ити қўзғаб, қудуқ чийиллаганда ғаши келди. Аммо бирортасига ботиниб бир нарса демади: кўпга кесак отиб бўлмайди, нақ тошбўронда қолиб кетасан!

Бува шу зайлда қишини ҳам ўтказди. Баҳорга чиқиб қудуқнинг атрофига турли-туман экин экди, қудуққа борадиган йўлни жуда тор қолдирди. Бошлаб бу билинмади. Экинлар ўсган сари йўл торайиб бораверди. Кейинчалик шундай ҳолга келдик, ўткинчининг барига илашадиган бўлди, юришини оғирлаштирди. Челақдаги сувга барглари тушди. Бу ҳолни кўрган қўшнилардан бири:

— Экинлар жуда ғовлаб кетибди-ку, бува!— деб тил тегизди. Бува ҳам сир бой бермади:

— Янги ер-да, бақувват!

Экин авж олиб, қудуққа борадиган сўқмоқ бекилгани сари баъзи қўни-қўшни оёғини тийди: буванинг ниятини англай бошлади. Бува бундан ичиде мамнун эди: бўйчининг мокисидек қатнайдиганлардан қутулдим Ахир инсоф керак-да, бир йил — ўн икки ой бирорвоницидан сув ташиб ичишадими! Ўзлариники сал бемазароқ бўлса, тешиб чиқмайди. Яхши қилдим, деб юрди.

Лекин бунинг чуви чиқа бошлади. Қудуқдан оёғини тийган ҳамқишлоқлар бувадан қўлинни ювиб қўлтиққа урмаган бўлса ҳам, муносабатларига совуқлик тушди. Баъзи бир маъракаларга уни айтишмади, кўрганда ҳам ортиқча мулозамат кўрсатишмади.

Буни бува сезса ҳам аҳамият бермади: гармседлск ўтиб кетади, вақтинчалик. Гармсель узоққа чўзилди. Бува ичидан зил кетди.

Шу орада севимли эрка набираси Жамшид бир куни

мактабдан йиғламсираб қайтди. Бувасига сезилар-сезил-
мас салом бериб, ичкарига ўтиб кетди. Уйга кира солиб
портфелини хонанинг бир четига улоқтириди, ўзи ҳўнграб
йиғлаб юборди. У ҳеч қачон бунақа ҳўрлиги келиб, ўпка-
си тўлиб йиғламаган эди. Бува ҳайрон бўлди. Қириб
аҳволни сўрагунча Жамшиднинг аясига айтиётган сўзи-
ни эшитиб қолди. «Мактабда ҳамма болалар «зиқналар,
хасислар» дейди. «Табиатнинг сувини аяган очкўзлар»,
дейди. Энди мактабга бормайман. Уяламан!»

— Қанақа сув?— сўради аяси.

— Қанақа сув бўларди, қудуқники-да! Бувам ўтиб
бўлмайдиган қилиб ҳамма ёғига атайн экиб таш-
ладилар-ку! Қишилар бунинг сабабини билмайдими, ер
остида илон қимирласа билади, ҳаммасини билади.

Бува неварасининг олдига киришга журъат этмади.
Оғзига бир кафт нос ташлаб кўчага чиқиб кетди...

Эрталаб турса қудуққа олиб борадиган сўқмоқнинг
икки ёнидаги жўхори ҳали пишмасдан ўриб ташланган,
йўл кенг қилиб очилган эди.

Буни ё келини, ё невараси Жамшид қилганини бува
билди-ю, индамади. Яна тилининг остига бир кафт нос
ташлаб, кўчага чиқиб кетди.

1971

ОҚҚУШНИНГ КЕҢЖА БОЛАСИ

Бу қизиқ ҳикояни менга йўлда бир қозоқ киши айтиб берган эди.

...Чорсанбойнинг дадаси овчи. Овчи бўлганда ҳам тиниб-тинчимаган овчи. У қуш отади, қуш тамом бўлгандан кейин, совуқ тушгач, балиқ тутади. Бунинг сабаби бор, албатта. Уларнинг уйи шундоқ катта кўлнинг ёқасида. Эшигидан чиқиб қарасанг кун тигида жимиirlаб ётган кўлнинг кўм-кўк сувини кўрасан. Соҳиллари қумлоқ ва қамишзор. Бу ерда шунақа қамиш қалин ўсадики, орасига киролмайсан, одамлар ўриб кетса ҳам, ҳеч тамом бўлмайди. Бу қамишлар қушлар уяси Чорсанбойнинг дадаси шу қамишзорларда қўнжи тиззадан ошадиган узун этигини кийиб ов қилади, баъзан икки-уч кунлаб қолиб кетади. Қанчалаб тустовуқларни елкасига хуржун қилиб ташлаб қайтади, ҳатто энлик камарига ҳам қатор қистириб олади.

Баҳор чиқиши билан кўл гўё қайтадан ёшаради, кузда сарғайған соҳилдаги қамишлар орасидан нов-ниҳоллари қад кўтариб, кўм-кўк тусга киради, остларида аллақандай ўтлар ниш уради, ҳатто бутун ёз бўйи қумлоқ бўлиб ётадиган ерларда ҳам турли-туман кўм-кўм гиёхлар пайдо бўлади. Қушлар галаси кўл устидан чуурлашиб ўтади. Оламни завқ-шавқча кўмиб юборади.

Бугун якшанба. Чорсанбой қайиғини тузатаётган дадасига кўмаклашарди. Қайиқ дадасининг ҳамроҳи. Ёз бўйи унда сузади. Кузга бориб қирғоқча тўнтариб қўяди, Мана энди баҳор чиқиши билан уни кўздан кечириб,

керак ерига мих қоқиб, баъзи ерининг тахтасини алмаштиряпти.

— Сен оловга қара,— деди дадаси Чорсанбойга. Улардан нарироқда бир эски челакда мўм қайнарди. Бу мўм билан қайиқнинг сиртини мойлашади, дарзлари бекилиб, сув ўтмайдиган бўлади.

Дадасининг огоҳлантирганича бор: чеълак остидаги олов сусайиб қолган экан. Чорсанбой ўт қалади, гуриллатиб юборди. Сал ўтмай мўм яна биқиллаб қайнай кетди. Бу ишидан Чорсанбойнинг ўзи ҳам хурсанд бўлди. У «қалай, шундай ёнгани яхшими, дада?» дегандек унга изаз ташлаган эди, бирдан бир гала қушларнинг жўр овози унинг хаёлини олиб қочди. Бу оққушлар эди. Чорсанбой уларни хурсанд бўлиб кузатиб турди. Улар анчамунча эди. Улар кўл устида чуғурлашиб бир айланишида-да, этак томонга ўтиб, кўздан ғойиб бўлишди. Лекин бир-икки жуфти шу заҳоти яна ортига қайтиб, сувга тушди. Оппоқ улкан қанотларини елкандек ёзиб, сув бетида беланчак бўлиб туришди.

— Булар қолди шу ерда,— деди Чорсанбойнинг дадаси.

— Қаёқдан билдингиз?

— Бизнинг кўл уларга ёқиб қолди. Ҳали бола очади.

— Йўғ-э!— қувониб кетди Чорсанбой,— боласини ушлаб берасизми? Боқса бўладими?

— Ушлатмайди. Отсанг майиб бўлади.

— Йўқ, отманг,— деди ҳалитдан Чорсанбойнинг оққуш болаларига раҳми келиб.

Дадаси айтгандек ўша оққушлардан бир жуфти эртасига ҳам шу кўлда кўринди, индинига ҳам. Чорсанбой жўрттага кунда, кун ора улардан хабар олиб қўярди. Гарчанд уларга дахли бўлмаса ҳам, уларни боқмаса ҳам, улар яқинига йўлатмаса ҳам: «Менинг оққушим», деб гапиради, фахрланарди.

Бир куни бундоқ қараса, оққушлар йўқ. Эртасига ҳам кўринмади. Бир ҳафта ўтди — ҳамон дарак йўқ.

— Кетиб қолди!— деди у ўқиниб дадасига.

— Ҳеч қаёққа кетмайди. Шу ерда!— деди дадаси бамайлихотир.

— Қани бўлмаса? Сузмайдими? Ўйнамайдими?

— Бола очяпти.

— Бола очяпти? Вой, маза! Боласидан оламан. Қаерда очяпти, дада?

— Қамишзорда, тополмайсан.

Чорсанбой бир ҳафта кутди. Икки ҳафта кутди. Болалари у ёқда турсин, уларнинг ўзидан дарак йўқ эди. Кўлга қарай бериб, кўзлари тиниб кетадиган бўлди. Охири умидини узди.

— Қетиб қолди!— деди.

— Йўқ, шу ерда!— деди дадаси яна қатъий қилиб.— Бу йил ёзни шу кўлда ўтказади.

Чорсанбой дадасининг сўзини ёлғонга чиқаришга ботинолмади. Унинг дадаси қанақаки, бу атрофдаги қушва ҳайвонларнинг ҳамма қилигини, ҳунарини, турқини, қачон келиб қачон кетишини, қанақа ерда нечтадан бола очишини, болаларини қанақа қилиб катта қилишини— ҳамма, ҳаммасини яхши билади, яхши бир китобдай ёдакам билади. «Даданг учган қушнинг қўнадиган ерини олдиндан билади», деб унга тегишади қўшилари.

Шундай бўлса ҳам Чорсанбойда дадасининг сўзига шубҳа уйғонди. Кўлга чиқмай қўйди. Аста-секин оққушлар ёдидан кўтарила бошлади. Сигири туғиб, бузоқ билан овора бўлиб кетди.

— Оққушларингни кўрдингми, болаларини эргаштириб юрибди,— деди дадаси бир куни овдан келиб.

— Ростданми?

Чорсанбойнинг юрагида оққушлар меҳри қайта уйғонди. Ҳозироқ югуриб соҳилга чиқарди-ю, бари бир қоронғи, тун. Оққушлар кўринмайди. Болаларини қаноти остига олиб, ким билади, қайси қамишзор қумлоқда мудраяпти?

Чорсанбой тунни зўрға ўтказди. Буни қарангки, туни билан безовталаниб, неча бор уйғонган Чорсанбой тонгга яқин тош қотиб ухлаб қолибди. Мундоқ кўзини очса, кузнинг илиқ шамоли кун тушиб турган деразанинг юмшоқ пардасини ҳилпиллатарди. Уйда ҳеч ким йўқ. Юзқўлини наридан-бери ювди-ю, онасининг «чойингни ичиб кет!» дейишига қарамай кўл бўйига чопди. Оққушлар ҳам «соғинган бўлсанг, мана болаларим, яхшилаб кўриб ол!» дегандек қирғоқдан салгина нарида сузиб юради. Лекин болалари ўзига ўхшамас, худди тупроққа думалаб олгандек «ифлос» эди. Наҳотки, шундай оппоқ ва чиройли қушларинг болалари шунақа хунук бўлса! Унинг ихлоси қайтди.

У кўнглидагини яшиrolmasdan:

— Дада,— деди у,— нега болалари бунақа ғалати?
Оппоқ эмас?

— Кейин оқариб кетади,— деди балиқ тутиб ўтирган дадаси.

Бир ой ҳам ўтди — оққушлар оқармади. Лекин улар шунақа тез ўсардикি, сал вақтдан кейин ота-оналаридан фарқ қилмай қолди, фақат рангларигина ажрабиб турарди. Учишолмас эди. Бу орада куз тушиб, совуқ бошланди. Оққушларнинг учиб кетадиган вақти бўлган эди. Буни она оққуш сезди шекилли, болаларини учишга машқ қилдира бошлади. Сокин қирғоқни танлаб олди. Болаларини қатор тизиб қўйиб, ўзи олдинга ўтди. Учиб кўрсатди, кетидан болаларини бир-бир йўллади. Улар оналарига ўхшаб кўл бетида улкан қанотларини кенг ёзиб, сувни шапиллатиб уриб, яхмалак отгандек сузив кетдилар. Лекин оналарига ўхшаб сув бетидан кўтарила олмадилар. Машқ яна такрорланди. Бу гал боягидан кўра тез ва чаққон елиб кетдилар, бироқ сувдан ҳамон азод кўтарилиб кетолмай, сал-сал юқорилаб қўйиншарди. Она қуш уларни шунчалик сабр-тоқат билан машқ қилдирардик, бирортасини «койимас», «туртмас» эди, машқни тинимсиз такрорларди, ўзи намуна кўрсатарди. Эртасига бу машқ яна давом этарди.

Чорсанбой дадаси олдида қармоқни сувга солиб қўйиб, маза қилиб томоша қилди. Икки кўзи қушларда эди. Бир маҳал:

— Ана кўтарилиди, учиб кетди!— деб қичқириб юборди.

— Учади-да, бекорга онаси қунт билан машқ қилдиряптими!— деди дадаси, шундай бўлишини неча марта кўрган кишидек беҳаяжон.

Бу маҳал оққушлар тўдаси кўл устида доира ясамоқда эди.

— Вой, анави биттаси қопти-ку!— деди Чорсанбой сув бетида, тўлқинда қалқиб турган оққушчани кўриб.

— Учади. Шошма. Ахир ўқувчиларнинг ҳаммаси «беш»га ўқимайди-ку. «Уч» оладигани ҳам бор, шундайми?

— Албатта,— тасдиқлади Чорсанбой.

— Бу ҳам ўшанақа зўрға «уч» оладиганга ўхшайди.

Совуқ тез тушди. Буни пайқаган катта оққушлар болаларини учишга жадаллик билан ўргатишарди. Кўпчилиги кўл устида икки-уч доира ясайдиган бўлса ҳам,

анави кенжаси ҳамон узоқ учолмас, тезда сувга қўйиб оларди, ҳурпайиб туради. Афтидан нимジョンга ўхшарди.

Бир куни қуёш ботишига яқин барча қушлар баравар кўтарилишди. Кенжа ҳам кўтарилиди. Лекин кўл устида бир доира ясаб, яна ўз жойига келиб қўнди. Шу кечаси жуда қаттиқ совуқ бўлди. Чорсанбой эрталаб чиқиб ҳайрон қолди: ҳамма ёқ оппоқ, худди қор ёққандек. Аслида бу қиров-булдуруқ эди. Атроф эртаксимон туега кирган. Бу ажойиб кўринишдан завқланиб турган Чорсанбойнинг эсига оққушлар тушди: уларнинг ҳоли нима кечди? У кўлга чопди. Қай кўз билан кўрсинки, кўл муз қотган. Кенжа оққушчанинг қанотларини муз «ушлаб» қолибди. Катта-кичик оққушлар унинг атрофида уймалашиб ётибди. Лекин уни муздан ажратиб олишолмас эди.

Чорсанбойнинг юраги ачиdi. Нима қилишини билмасдан уйга чопди:

— Дада! Дада! Кичкина оққуш музга ёпишиб қолти. Энди нима қилади? Улиб қоладими?

Дадаси нима гаплигига дарров тушунди. Саройдан болта, узун тахта олиб йўлга тушди. Оққушлар ҳамон ташвишланиб, уймаланиб ётарди. Улардан чўчимади ҳам.

Дада қирғоқ музини тепиб кўрди, болта билан урди. Қаттиқлигига қаноат ҳосил қилгач, музга ёпишиб қолган оққушча олдига аста-аста юриб борди. Оёғи остига тахтани узун ташлаб, болта билан секин-секин атрофи чопиб, оққушчани муз панжасидан қутқариб олди ва ёнида турган ўғлига узатди:

— Ма, уйга элт! Исит!

Чорсанбой қувонишини ҳам, хафа бўлишини ҳам билмасди. Шерикларининг бу фожиали ҳолатдан қутулганини кўрган бошқа оққушлар кўлни бир айланниб, Чорсанбойнинг тепасига келганда пастлаб ўтишди. Гўё шерикларининг меҳрибон қўлда эканига ишондилар ва яна бир доира ясаб, кўл ортида кўздан фойиб бўлдилар.

Кенжа оққуш эса қиши билан Чорсанбойларникида қолди. Олдинига ётсираб ҳеч кимнинг қўлидан ҳеч нима емади, сув ҳам ичмади. Чорсанбойни яна ваҳима босди:

— Улиб қолади!

Яна дадаси далда берди:

— Ўлмайди, сабр қил, ўғлим. Урганиб кетади.

Бу гал ҳам дадасининг сўзи тўғри чиқди. Оққушча

аввалига уйга, одамларга қўниқди. Қейин ивитилган нон ушоқларини чўқиди, кейин сув ичди. Қейинчалик эса, ўзи овқат тилаб келадиган бўлди, кишилар дастурхонга ўтиrsa, ёнларига келиб, чиройли кўзларини мўлтиллатиб туради. Бора-бора унинг ўзига идиш айиришди. Кишилардан эмас, ҳатто ҳовлида доим мудраб юрадиган қари итдан ҳам энди ҳайиқмайди. Мушук билан эса ўйнашади, думини чўқиб қақиллади.

Баҳор чиқиб, ариқда сувлар шарқираб оқадиган бўлганда у кўлга бир-икки марта ўзича бориб-келиб юрди. Бегона болалардан ҳам чўчимади. Илк оққушлар товуши кўл томондан келган куни бир кетганича қайтиб келмади. Чорсанбой ўкингандек бўлган эди, дадаси юпатди.

— Яхши бўлди, элатини топди.

1971

МУНДАРИЖА

Ҳикоялар

Олтин зангламас. Роман	3
Балогат	410
Алданиш	420
Дакки :	429
Баҳриниса	435
Нодирнинг нафрати	444
Араб боласининг қувончи	449
Тез оқар сув	452
Солдат ва қуш	456
Қудуқ	460
Оққушнинг кенжা боласи	463

На узбекском языке

Шұхрат

*Избранные произведения в 3-х томах,
том II*

ЗОЛОТО НЕ РЖАВЕЕТ

Роман

РАССКАЗЫ

*Печатается с изданий: Издательство
художественной литературы и искус-
ства им. Гафура Гуляма. Ташкент,
1970 г. Гослитиздат — УзССР — Таи-
кент, 1958 г., Издательство «Ёш гвар-
дия» — Ташкент, 1973 г.*

Редактор *Х. Мансурова*

Рассом *А. Баёдасарян*

Расмлар редактори *А. Бобров*

Техн. редактор *Э. Сайдов*

Корректор *Р. Содикбекова*

ИБ № 175

Босмахонага берилди 7.02.79. Босишига руҳ-
тат этилди 17. 01. 80. Формати 84×108^{1/4}.
Босмахона қоғози № 1. Адабий гарнитура.
Юқори босма. Шартли босма л. 24.78. Нацр
л. 25.11+0,1 вкл. Тиражи 60000. (7-муқовада
да 10000, 5-муқовада 50000). Заказ № 214.
Баҳоси 7-муқовада 1 с 90 т. 5-муқовада
1 с. 80 т. Гафур Гулом номидаги Адабият
ва санъат нашириёти. Тошкент, 700129, На-
войй кӯчаси, 30.

Ўзбекистон ССР Нашриётлар, полиграфия
ва китоб савдоси ишлари Давлат комите-
тининг Тошкент «Матбуот» полиграфия иш-
лаб чиқаниш бирлашмаси. Тошкент, Ҳамза
кӯчаси, 21,

Шуҳрат.

Танланган асарлар: З-жилдлик.—Т.: Адабиёт ва санъат науриёти, 1980.

2 жилд: Роман, Ҳикоялар. 472 б.

Атоқли адид Шуҳратнинг ушбу китоби «Олтин зангламас» романни ва ҳикоялардан ташкил топди. Муаллиф асарларида совет қишиларининг коммунистик эътиқоди ва олижаноблигини тараним этади.

Шуҳрат. Избранные произведения. В 3-х т. Т. 2. Роман. Рассказы.

ББК 84Уз
Уз